

渭南文集

陆游

文硕阁

wenshuoge.com

目录

关于我们	4
目录	6
原传	13
卷一	14
卷二	20
卷三	25
卷四	29
卷五	34
卷六	38
卷七	42
卷八	47
卷九	52
卷十	57
卷十一	62
卷十二	69
卷十三	74
卷十四	79
卷十五	85
卷十六	91
卷十七	96
卷十八	101
卷十九	106
卷二十	111
卷二十一	116
卷二十二	121
卷二十三	126
卷二十四	132
卷二十五	140
卷二十六	145
卷二十七	152
卷二十八	160
卷二十九	167
卷三十	174
卷三十一	181
卷三十二	189
卷三十三	194

卷三十四	198
卷三十五	204
卷三十六	208
卷三十七	212
卷三十八	217
卷三十九	223
卷四十	228
卷四十一	234
卷四十二	239
卷四十三	243
卷四十四	248
卷四十五	253
卷四十六	258
卷四十七	263
卷四十八	268
卷四十九	273
卷五十	283
放翁逸稿卷上	292
放翁逸稿卷下	297

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

目录

钦定四库全书 集部四

渭南文集目錄 别集类三 【宋】

卷一

表

牋

卷二

南宮表牋

卷三

劄子

卷四

劄子

卷五

奏狀

卷六

啓

卷七

啓

卷八

啓

卷九

啓

卷十

啓

卷十一

啓

卷十二

啓

卷十三

书

卷十四

序

卷十五

序

卷十六

碑

卷十七

记

卷十八

记

卷十九

记

卷二十

记

卷二十一

记

卷二十二

铭

赞

记事

卷二十三

传

青词

疏

卷二十四

疏

祝文

卷二十五

劝农

杂书

卷二十六

跋

卷二十七

跋

卷二十八

跋

卷二十九

跋

卷三十

跋

卷三十一

跋

卷三十二

墓志铭

卷三十三

墓志铭

卷三十四

墓志铭

卷三十五

墓志铭

卷三十六

墓志铭

卷三十七

墓志铭

卷三十八

墓志铭

卷三十九

墓志铭

墓表

圻记

卷四十

埴铭

卷四十一

祭文

哀辞

卷四十二

天彭牡丹谱

风俗记

致语

卷四十三

入蜀记

卷四十四

入蜀记

卷四十五

入蜀记

卷四十六

入蜀记

卷四十七

入蜀记

卷四十八

入蜀记

卷四十九

词

卷五十

词

【臣】等谨案渭南文集五十卷宋陆游撰游字务观山陰人以?补登仕郎官至华文阁待制致仕为南渡诗人之冠事蹟具宋史本传游有诗文二集文集为其子迥所编游晚封渭南伯故以为名第一卷至四十一卷皆古文第四十二卷为天彭牡丹谱风俗记致语四十三卷至四十八卷为入蜀记四十九卷至五十卷皆诗余陈氏书録解题渭南集三十卷此本多二十卷疑振孙偶讹五字为三也游晚年为韩侂胄作阅古泉南园二记以此为清议所讥其文不载於集中至明毛晋辑逸藁乃从叶绍翁四朝闻见録中取以附入则迥編集时殆欲讳其父之为似道作记而删之欤乾隆四十四年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原传

原传

陆游字务观越州山陰人年十二能诗文?补登仕郎锁厅荐送第一秦桧孙埙适居其次桧怒至梟主司明年试礼部主事复置游前列桧显黜之由是为所嫉桧死始赴福州宁德簿以荐者除敕令所删定官时杨存中久掌禁旅游力陈非便上嘉其言遂罢存中中贵人有市北方珍玩以进者游奏陛下以损名斋自经籍翰墨外屏而不御小臣不体圣意辄私买珍玩亏损圣德乞严行禁絶应诏言非宗室外家虽实有助劳母得辄加王爵顷者有以师傅而领殿前都指挥使复有以太尉而领阁门事渎乱名器乞加订正迁大理寺司直兼宗正簿孝宗即位迁枢密院编修官兼编类圣政所检讨官史浩黄祖舜荐游善词章谙典故召见上曰游力学有闻言论剴切遂赐进士出身入对言陛下初即位乃信诏令以示人之时而官吏将帅一切翫习宜取其尤沮格者与衆弃之和议将成游又以书白二府曰江左自吴以来未有舍建康他都者驻蹕临安出於权宜形势不固馈餉不便海道逼近凜然意外之忧一和之後盟誓已立动有拘碍今当与之约建康临安皆系驻蹕之地北使朝聘或就建康或就临安如此则我得以暇时建都立国彼不我疑时龙大渊曾觐用事游为枢臣张焘言觐大渊招权植党荧惑圣听公及今不言异日将不可去焘遽以闻上诘语所自来焘以游对上怒出通判建康府寻易隆兴府言者论游交结台諫鼓唱是非力说张浚用兵免归久之通判夔州王炎宣抚川陕辟为干办公事游为炎陈取进之策以为经略中原必自长安始取长安必陇右始当积粟练兵有衅则攻无则守吴玠子挺代掌兵颇骄恣倾财结士屡以过误杀人炎莫谁何游请以玠子拱代挺炎曰拱怯而寡谋遇敌必败游曰使挺遇敌安保其不败就令有功愈不可驾驭及挺子曦僭叛游言始验范成大帅蜀游为参议官以文字交不拘礼法人讥其颓放因自号放翁後累迁江西常平提举江西水灾奏拨义仓赈济檄诸郡发粟以予民召还给事中赵汝愚驳之遂与祠起知严州过阙陛辞上谕曰严陵山水胜处职事之暇可以赋咏自适再召入见上曰卿笔力回斡是善非他人可及除军器少监绍兴元年迁礼部郎中兼实録院检讨官嘉泰二年以孝宗光宗两朝实録及三朝史未就诏游权同修国史实録院同修撰免奉朝请寻兼秘书监三年书成遂陞宝章阁待制致仕游才气超逸尤长於诗晚年再出为韩侂胄撰南园阅古泉记见讥清议朱熹尝言其能太高迹太近恐为有力者所牵挽不得全其晚节盖有先见之明焉嘉定二年卒年八十五

卷一

钦定四库全书

渭南文集卷一

宋 陆游 撰

天申节贺表

化国之日舒以长运啓千龄之盛天子有父尊之至心均万?之驩敢即昌期?申寿祝【中贺】恭惟太上皇帝陛下宅心清静受命溥将协气熏为太平华夷衔莫报之德孙谋以燕翼子宗社侈无疆之休诞敷锡於下民丕灵承於上帝臣方驰使传阻缀朝班望睟表於云霄敢恨微踪之远被颂声於金石尚希薄技之陈

会庆节贺表

有王者兴爰啓丕平之运使圣人寿敢忘胥戴之诚【中贺】恭惟皇帝陛下荡乎无名建其有极干戈载戢恩加辽碣之区囹圄一空治格成康之上敛时百福享国万年臣迹滞遐陬心驰魏阙纪虹渚电枢之庆莫厕诸儒演龙宫蕊笈之文徒修故事

又

帝生商而立子有开必先民戴舜以同心无远弗届乾端肇辟岳贡交修【中贺】臣早以湖海之微生亲见唐虞之盛典蓬转逾二十年之久每注想於冕旒嵩呼上千万寿之时独阻陪於簪笏兹膺郡寄复在王畿日瞻佳气之郁葱耳听驩声之洋溢永言疎贱已极光荣恭惟皇帝陛下焕乎其有尧文粲然而兴周道三朝图籍将还荣河温洛之都万里车书已轶碣石榆林之壤以仁政广华夷之德泽以丰年奉郊庙之牲牷凡曰含齿戴发之俦均被沦肌浹髓之赐光御无疆之历益培有永之年臣猥以分符莫遑造阙箫韶方奏徒倾就日之心歌颂可陈尚刻齐天之石

瑞庆节贺表

虹流电绕适当圣作之辰鳌拚嵩呼共效寿祺之祝敢倾丹悃仰叩睿聪【中贺】恭惟皇帝陛下德当乾符躬有圣瑞东渐西被伟声教之混同上际下蟠极仁恩之渗漉帝生商而立子民戴舜以同心历考前闻孰逾盛际臣生逢千载仕历四朝岳贡川珍猥预骏奔之末鸢飞鱼跃永依洪造之中

光宗册宝贺表

龟食簪从考庙方严於典册仗全乐备都人咸覲於礼容圣教茂昭驩声旁达【中贺】恭惟皇帝陛下道参穹壤德肖祖宗稽周王小毖之求躬虞帝终身之慕父传归子有光盛举於两朝天定胜人果见太平於今日乃咨元老大臣之参订兼采议郎博士之讨论勒崇垂鸿极高蟠厚臣在列覩龙飞之旦紬书奏麟趾之篇际遇特殊等夷罕及既莫预曲台之议又阻从属车之尘徒有悃诚形於梦想

皇帝御正殿贺表

肃传清蹕端御听朝德上际而下蟠泽东渐而西被【中贺】恭惟皇帝陛下体天广覆如日正中率礼无违永叹岁月迁流之速向明而治勉畜臣民爱戴之心諏太史涓吉之辰采奉常絳蒨之议对扬宗社之福爰举公卿之觴两曜清明四方拚舞臣农畴齿髦帝所梦遥华袞光临虽莫望火龙黼黻之盛黄麾备设尚想闻金石丝竹之音

皇太子受册贺表

明诏建储永为宗社之本正衙发策显畜神祇之心国势奠安輿情闾泽【中贺】恭惟皇帝陛下若稽古训骏惠先猷寿考亿年诞膺不蔽之福本支万世坐拥无疆之休存心养性以事天修身齐家而治国迨举有邦之庆益昭知子之明臣迹远周行心驰魏阙命太史卜日之吉徒闻播告之传遣上公持节以行莫预观瞻之盛愧未辞於圣代尚自力於声诗

贺明堂表

农扈屡丰协气方流於縣宇合宫大享旷仪遂举於中天驿置星驰嵩呼雷动伏以圣神在御祈报间行肆严长至之祠一举上辛之典惟兹宗祀实在季秋既得万国之驩心宜罄一精之嘉荐【中贺】恭惟皇帝陛下范围元化斧藻太平采皇佑之旧章茂建中和之极稽绍兴之新制用适古今之宜上帝顾歆殊休丛委臣官縻遐徼心系明廷考汉家汶上之图嗟莫陪於润色继周颂我将之作尚自力於形容

谢明堂赦表

明堂总章举旷仪於路寝鉤陈羽卫敷大号於端闈德协穹祇春回海县【中谢】恭惟皇帝陛下道绳祖武政酌民言乾文仰法於房心肇称钜典解泽默符於雷雨一洗衆愆统和天人空虚圉圉臣适乘使传远在遐陬奉五百里之驿书徒深螯拚上千万年之圣寿莫缀鳧趋

谢赦表

宣布仁恩发扬孝治观人心之鼓舞知天命之协从【中谢】恭惟皇帝陛下躬舜禹之资履曾闵之行损又损而至道老吾老以及人一日三朝虽极宁亲之大养四方万里尚忧庶狱之无辜内广惠心旁流霈泽雨露所被圉圉一空臣适以守藩恭闻孚号虽与民欣戴如瞻咫尺

之天然受命禱祈實勞方寸之地

謝賜歷日表

春秋以王而次春丕顯體元之妙閏月定時而成歲適當頒歷之辰治象一新歡聲四溢【中謝】恭惟皇帝陛下道兼倫制化被堪輿念王業之艱難每急農桑之務察天心之仁愛尤深水旱之憂誠意既孚嘉生並應呼嵩高之萬歲幸觀昌期陳泰階之六符不勝大愿

又

詔班新歷雖舉彝章地近清都獨先下拜恩光旁燭小已知榮【中謝】臣聞堯授人時實前民用漢得天統克協帝心方當重熙累洽之盛時宜謹體元居正之大典恭惟皇帝陛下凝圖丕赫受命溥將齊七政於璿玑昭示太平之象調四時之玉燭用待來歲之宜爰勅有司以幸天下臣偶叨牧養獲與布宣職思其憂勸課誓殫於綿力年運而往功名更感於初心

福建到任謝表

咸造在廷甫遂朝宗之愿奉使有指遽叨臨遣之榮大造難名余生曷報【中謝】伏念臣么然薄命起自窮閭偶以元佑之黨家獲與紹興之朝士真人有作景運方開適當寧嘆息人才之實難顧一時豪傑号召而未至首蒙引對面錫殊科遭逢稀濶之知聳動迹遐之听豈期蹇薄旋困沈綿卒繫全度之恩俾獲退藏之分侵尋半世轉徙兩川三為別乘之行再忝專城之寄五十之年已過非復壯心八千之路來歸恍如昨夢敷陳淺拙應對參差惟遭黜之是宜豈超遷之敢望此蓋伏遇皇帝陛下道兼倫制澤被堪輿念臣留落有年尚未除於狂态憐臣馳驅無地空竊抱於愚忠顧雖末路之孤踪猶玷外台之高選臣謹當力思守道深戒瘵官禮樂遠有光華既大踰於素望靖共好是正直庶少奮於鴻私

江西到任謝表

疏恩趣召靡待一人之言改命遣行猶備四方之使丹衷欲叙雪涕先傾【中謝】伏念臣稟資迂愚立身羈縻偶竊犁鋤之余暇妄窺述作之淵源累然自力於簡編老之將至過矣見稱於流輩轉而上聞頃入對於燕朝實親承於睿獎然而異恩賜第弗由場屋之選抡特旨造廷非出公卿之論荐已分亟投於閑散豈期重累於生成此蓋伏遇皇帝陛下立賢無方用人唯已一洗拘牽之積弊廣收魁杰之遺才施及妄庸亦蒙省錄甫停追詔還界使凡曰自結於上知皆俾無蹈於後害海岳之內纖塵墜露何所用之父母之愛幼子童孫蔑以加此驅馳入境感懼填膺重念臣朴學守株孤身吊影素乏蚍蜉蛄子之助孰為輪囷蟠木之容愴余日之安歸抱微誠而永嘆方天子建中和之極用告成功雖文史近卜祝之間亦思自效尚凭長育不遂棄捐所愿預草漢家檢玉之文未敢遽同堯民擊壤之作剝肝自訴伏鑽何辭疾痛飢寒仰而呼天誓靡求於世俗齋戒沐浴可以事帝冀終望於清光

严州到任谢表

穿延和之细仗面咫尺天佩新定之左符秩二千石叨尘过分感惧交怀【中谢】臣闻明主恩深书生命薄唐帝之知李白一官不及於生前汉皇之念相如遗稿徒求於身後况如臣辈莫望昔人猥缘一枝之卑尝缀百僚之末虽簪笏久违於听謁乃姓名犹在於渊衷乘传来归两奉召还之旨怀章欲上亟蒙趣对之荣亲降玉音俯怜雪鬓劳其久别盖宠嘉近侍之所宜勉以属文实临遣守臣之未有兹盖伏遇皇帝陛下睿谟冠古英断如神肆笔成书千载独高於圣学刺经作制诸儒絕企於清光以臣夙被化於明时怜臣未废书於晚岁将激昂其素志故濶略於往愆臣敢不戴使愚使过之恩念有社有民之寄憩棠陰而听讼期无坠於家声及瓜戍而代归尚少酬於君赐

除宝谟阁待制谢表

陪衆隼以登瀛已慙薄陋扈六飞而上雍遽践高华恩重命轻感深涕實【中谢】伏念臣材非异稟家本至寒苍雅遗书守先臣之孤学庄骚奇作诵诸老之旧闻窃慕隐居求志之风尤耻譁世取名之事年运而往道阻且长仕止为贫适遇四朝之盛际老犹不死遂为六圣之遗民岂期垂尽之时更被非常之遇置之儒馆命以信书特寬尸素之重诛不待汗青而加赏兹盖伏遇皇帝陛下道兼伦制学备诚明体穹穹厚厚之仁跻荡荡巍巍之治风行雷动号令靡隔於幽遐鱼跃鸢飞人材不遗於疏贱虽耄期之已迫尚覆育之愈深臣敢不口诵训辞心铭德泽入预甘泉之笔橐傥效微劳归寻杜曲之桑麻终祈洪造

转太中大夫谢表

信史奏篇获纪两朝之盛恩书驰驿躡跻四品之荣方醴赏之既行欲牢辞而弗敢始终忝幸俯仰兢慙【中谢】伏念臣身出穷阎家承孤学披肺肝而自力虽有素怀赐骸骨以归休已更累岁昨被出纶之命起参载笔之游强眊昏废忘之余均笔削讨论之责食常忘事但忧尸素之当诛成本因人乃以汗青而受宠兹盖伏遇皇帝陛下奉先思孝守位曰仁夙受命於皇天克肖其德肆纂图於列圣无疆惟休永怀弓劍之藏每切羹墙之慕爰求遗老俾诵旧闻而臣猥以耄期恭承训勉怵大父诗书之业久已寂寥读元丰文献之言至於感泣虽迫盖棺之日敢忘结草之酬

谢致仕表

持橐甘泉已窃逢辰之幸挂冠神武又叨归老之荣加恩俯念於耄年延赏特颁於申命伏读丝纶之语曷胜犬马之情【中谢】伏念臣家本穷阎世承孤学虽遇千龄之盛际初无一曰之微劳白首光陰躡冠登瀛之选青云步武亟陪上雍之班属预奏於信书遂祈归於故里奉祠虽佚窃食靡安兹游贡於忱辞始恭承於俞旨至於特捐异数增贲衰门顾令么微获被荣耀兹盖伏遇皇帝陛下仁参化育道极范围继粟继肉以养贤才祝鯁祝噎以礼耆耄思贞元之朝士寤寐不忘念山陰之老人生存无几越拘挛於令甲耸观听於荐绅简编有光世类知

劬而臣抱痾牀第絕望闕廷賤息何能亦忝及亲之祿素风未坠岂无报国之期

落职谢表

叨荣罪大念旧恩深仅镌笔橐之华犹保桑榆之景仰慙鸿造下愧公言【中谢】伏念臣本出故家初无他技每自求於远宦岂有意於虚名命之多艰动辄为累强起仅余於数月退归又阅於六年齿豁头童心剿形瘵叫阍请命蒙恩久许其乞骸饰巾待终视世已同於逆旅敢谓寬平之邦宪尚令漸尽於里居此盖伏遇皇帝陛下励精大猷惠养遗老念臣生当全盛被六圣之涵濡怜臣仕遇中兴荷三宗之识拔虽名薄责益示殊私臣敢不祇诵训词痛惩宿负尸居余气永无再瞻轩陛之期老生常谈莫叙仰戴丘山之意

逆曦授首称贺表

天无私覆实均父母之仁邦有大刑爰下风雷之令英断若神明之速成功无晷刻之淹氛稷澄清颂声洋溢【中贺】臣伏以高皇有作王室中兴方犬戎窥蜀以凭陵赖骁将奋身而守卫念功无已分阃相承仰累朝宠数之非常虽举族糜捐而曷报岂图小丑自取参夷僭服自如改元无憚受封割地已北通獯鬻之庭置戍夺符欲东扼瞿唐之险罪不胜於擢发诛宁貸於闔门肆推旷荡之恩实自圣神之造恭惟皇帝陛下德配天地功光祖宗览图籍而动容每念两京之未复奉庙祧而霑涕不忘九世之深讐蠹兹雏卵之微自投鼎鑊之地人情共愤天讨遂加蒞醢以赐诸侯虽特寬於汉法头颅之行万里已大震於戎心遥知羣丑宵遁之余无复并塞秋防之警臣身归南陌名寓西清驰驿四传徒快鲸鲵之戮造朝旅贺莫趋鵷鹭之班

光宗册宝贺太皇太后牋

諏谷旦於清台蓍龟允协奉鸿称於考庙典册有严庆袭重闈驩腾函?恭惟太皇太后殿下道同先后德着累朝阅天下义理之深体坤元光大之盛密扶睿断纂修列圣之治功备述先猷啓迪一人之达孝举时大典绍国成规臣敛迹还东驰心拱北绅綬杂遝遥瞻济济之贺班宫阙迢嶢徒寄区区之梦境

皇帝御正殿贺皇后牋

圣治聿新爰正路朝之御邦仪丕举实繫内助之功盛典告成函生胥庆恭惟皇后殿下道隆任姒化洽邦家方当宁之朝羣臣惟圣时克宜中壺之介万寿与天同休内腾六寝之驩外副万方之望臣久违近着获遇昌辰听九宾之胪传莫陪拚舞望五云之宫阙徒极倾输

皇帝御正殿贺皇太子牋

清跸肃九宾之仪方临当宁宝觴奉万寿之祝允属储宫邦家有光华裔同庆恭惟皇太子殿下道隆孝友性极诚明以大学为家传一洗俗儒章句之陋以密赞为子职岂独寝门栢紼之

恭相此多仪实先百辟某久婴沈疾已迫颓龄想广殿之崇严莫陪檐翼占前星之明润徒极倾驰

皇太子受册贺皇后牋

壺政忧勤协赞上圣登三之治母慈顾复遂开东宫明两之祥汗简光华函生鼓舞恭惟皇后殿下道光图史化被宫闈嗣先后之徽音体柔只之厚载妣汭之降二女允谓盛时周臣之止九人实资内助迨此建储之命益知伋极之尊臣自去通班久安故里颓龄髦矣莫陪执玉之趋钜典焕然不胜拭目之喜

贺皇太子受册牋

父慈子孝集大庆於我家日吉时良发正衙之显册国势重於九鼎驩声达於四方恭惟皇太子殿下秉德淳明宅心虚静英姿达识事洞照於几先强记博闻言必稽於古训躬守累朝仁恕之训日侍两宫睟穆之颜历考古初实为创见臣夙叨四品垂及九龄为国老农莫造济济鹄鸾之列逢时盛典尚怀区区犬马之心

逆曦授首贺太皇太后牋

叛臣干纪敢萌负固之心密诏行诛不待崇朝之久庆关宗社喜溢宫庭臣伏以参井之墟古今重地方高帝东巡之始实金人南牧之秋爰有骁雄服劳疆圉惟列圣念功之意每示优隆度故臣誓报之心岂有穷已蠢兹微孽亦荷异恩入居宿卫之联出任师干之寄天所助者顺乃怀悖逆之图人不食其余自掇歼夷之谴尚全遗族实出上恩恭惟太皇太后殿下坤厚资生母仪燕翼每道先朝之家法助成圣主之性仁慰在天之灵故诛其孥而无赦广及物之泽故宥其族而弗疑臣久屏穷阎犹叨近侍用三有宅欣逢汤德之寬於万斯年莫预尧封之祝

逆曦授首贺皇后表

逆臣负固上貽正宁之忧密诏行诛不待灵旗之指勲高古昔喜溢宫庭伏以分阃专征本倚世臣之旧野心叵测辄干邦宪之严妖禽自取於覆巢靡草独枯於长夏尚加矜贷曲示涵容故虽同产之亲止用徙乡之典恭惟皇后殿下道光妣汭德配坤元侍膳慈闈克谨晨昏之奉焦心中壺每分宵旰之劳及此成功允为大庆聳裔夷之观听增竹帛之光华臣久已归耕莫陪入贺身修家齐国治实由内助之功天时地利人和行覩外攘之烈

渭南文集卷一

卷二

钦定四库全书

渭南文集卷二

宋 陆游 撰

丞相率文武百僚请建重明节表

飞龙在天方仰君临之德流虹绕渚实开圣作之祥宜纪昌辰用彰盛际恭惟皇帝陛下承漠丕显受命溥将致养三宫备本朝之家法参决万务得率土之民心正宁初临积陰顿解於赫明离之象益昭出震之符臣等不胜大愿请以九月四日为重明节伏望皇帝陛下俯察羣情亟颁俞旨施尊名建显号侈穹旻发祥之期披皇图稽帝文伸臣民归美之报着之令甲副在有司邦家增光天下幸甚

又

受命若帝之初宜邦彝之悉举盛德如天之覆岂人欲之或违比罄忱辞愿标令节未回聪听曷慰羣情伏以纪千秋之名虽由唐旧允长春之请则在宋兴况今非独循累代之成规盖亦以此侈重华之大庆显号而未讲盛旦郁而弗彰谦虽益光礼则未称伏望皇帝陛下茂昭钜典亟发德音汉殿尊荣亲奉玉卮之寿周行拚蹈各陈金监之书岂惟光简册之传实以副天下之望

又

渊听未回确尔执谦之意忱辞屡叩歉然归美之诚彝典不可以久稽衆心不可以屡拂敢控喁喁之请再干穆穆之光窃以民之戴君自古有训礼之饰治後世尤详惟大德得其名故因诞弥而纪节虽先王未之有亦容增益之随时当渚虹枢电之辰受岳贡川珍之集乃同常日夫岂人情今者博士议郎固执於庭秩宗奉常各扬其职必期得请畴敢自安伏望皇帝陛下圣度兼容大明委照帝辞三祝足昭挹损之怀臣同一心终冀允俞之命

立皇后丞相率文武百僚称贺寿皇表

北宫移仗方瞻与子之明中禁正名复奉齐家之训化行縣宇驩动羣心【中贺】恭惟至尊寿皇圣帝陛下盛德日新圣图天广虽名持守躬创业垂统之艰不憚忧勤示诒谋燕翼之法乃者独观道妙将就葆颐犹崇朝亲发於德音谓初政莫先於内治茂建壺则所以垂万世之典常大明人伦所以移四方之风俗臣等获尘朝着亲奉睿谟发册听廷共仰光华之典称觴广殿益深拚舞之情

贺皇帝表

宝运绍开椒涂首建典册以时而告具蓍龟协吉而弗违庆集宫庭懽传海宇【中贺】伏以圣人有作追参尧舜禹之盛时壺范增光上配姜任姒之至德矧惟内助始自初潜稽女史彤管之言广周南关雎之化兹正中宫之位号实出寿皇之训谟玉音诞敷汗简登载求於前世邈矣未闻顾家国之荣怀宜神只之安乐恭惟皇帝陛下仁参苍昊德被黔黎永惟大学齐家之端先诚其意推原春秋谨始之义以御于邦故当天临之初务先坤载之厚臣等身逢华旦目覩弥文燕至祀祿行庆则百男之佑鸡鸣问寝敢祝於万年之休

贺皇太后牋

圣子问安方极兰陔之养神孙正内肇新椒掖之华母道弥尊人情溢喜【中贺】恭惟皇太后殿下抱神以静藏心於渊德修螭蛎螭之中化行崑崙磅礴之外唐虞盛际乃出一家父子之亲任姒徽音仍见三朝妇姑之法方且享宗社奠安之福视本支蕃衍之祥於古有光与天无极臣等幸逢熙运获缀清班至哉坤元实首彝伦之叙养以天下益观孝治之隆

贺寿成皇后牋

盛德继承爰本亲传之妙中宫崇建式光就养之尊庆集禁庭驩传海宇【中贺】恭惟寿成皇后殿下妇功饬备母道含洪躬老氏之俭慈享周家之福祿密赞乾刚之断神器有归助成离照之明天心允畲惟每思於静顺故备极於安荣袞龙兼彩服之纁綌翟焕玉卮之奉贵无伦敌日以舒长简册其有光风俗为之丕变臣等偶逢熙运获相多仪坤顺承天喜徽音之克嗣孙又有子知寿祉之无穷

贺皇后牋

诞受丕基方正宁凝旒之始协修陰教举路朝发册之仪厚载有光羣情咸悦【中贺】恭惟皇后殿下庆鍾勲闕道嬪皇家辅佐积勤实自龙潜之日休祥有衍早符熊梦之占寿皇所以亲发於德音圣主所以深资於内助副笄奉三殿之养大练受六宫之朝震耀简编感移风俗臣等预闻鉅典实激欢悰法地所以法天仰戴坤仪之至德事母同之事父曷胜螯拚之微诚

文武百寮谢春衣表

宝运绍开方谨人时之授宠光下逮俾均春服之成荣被簪绅欢腾拜舞【中谢】恭惟皇帝陛下凝图丕赫抚运重熙租税所储靡专一己之奉寒暑有赐式厚羣臣之恩所以恤其澣濯之私盖将责其忠嘉之报虽旧章之是举实初政之当先臣等获缀班聯恭承锡予去女工之蠹已观府库之充遗天下之衣愿广乾坤之德

重明节明庆寺丞相率百僚啓建道场疏开起

乾端澄肃时爰及於杪秋离照光明运方隆於中夏敢输诚悃仰祝寿龄皇帝陛下恭愿宜君宜王时万时亿泰元增汉帝之策配天其休洪范锡神禹之畴与民同福

满散

肃霜协令方观万宝之成绕电告祥实契千龄之会饬供既周於月律殫诚爰集於廷绅冀凭薰祓之勤仰报照临之德皇帝陛下恭愿政敷有截寿格无疆天地人之三才共扶兴运尧舜禹之一道永庇函生

进疏

大易明两作离允符继照之盛太极函三为一诞拥无疆之休寿何待於禱祠运自臻於熙治恭演仙真之秘旨实输臣子之至情皇帝陛下恭愿化冒羣伦治偕邃古奉亲备天下之养履位处域中之尊至诚之道可以前知方卜亿万年之永命诸福之物莫不毕至岂止百千所之上闻

会庆节明庆寺丞相率百僚啓建道场疏开起

有开必先天地肇兴於景运无远弗届华夷毕効於贡琛况在周行敢稽寿祝至尊寿皇圣帝陛下伏愿道超古昔化洽黔黎端居无黄屋之心既高揖逊万乘致彩衣之养弥极尊荣

满散

电枢肇纪适逢震夙之期月琯告周游罄延鸿之禱虽嘉祥之自至顾归美之敢稽至尊寿皇圣帝陛下伏愿福等河沙寿踰刼石尧仁舜孝治功永焕於青编天大佛尊睟表长临於黼展

进疏

天为羣物之祖可谓极尊寿居五福之先实归上圣脱屣亲传於大宝颐神方御於殊庭敢率羣伦恭培睿算至尊寿皇圣帝陛下伏愿诞膺戩谷端拱穆清以八千岁而为春永享舒长之景卜七百年而过历茂隆貽燕之祥

文武百僚谢冬衣表

霜露既降着孟冬始裘之文法制具存举九月授衣之令进趋檐翼拜舞光华【中谢】恭惟皇帝陛下大度并包至仁渗漉及是月也初有祁寒之虞念无衣兮俾膺好赐之厚疏恩荣於在列斥府库之余藏臣等误荷选抡获沾锡予覩万里农桑之业共乐时平诵羣臣币帛之诗誓图忠报

会庆节丞相率文武百僚贺寿皇表

锡美无疆丕显生商之旦成功不处适当命禹之时熙运亲逢羣情胥庆【中贺】恭惟至尊寿皇圣帝陛下仁涵动植道配堪舆诗书所称何有加卓尔规模之大唐虞之际斯为盛超然揖逊之风积勤致王业之成端拱视天民之阜岂特极高而蟠厚固已勒崇而垂鸿臣等误置周行久陶圣化蓬莱隔弱水三万里获进谒於殊庭上古有大椿八千秋冀默符於睿算

丞相率文武百僚贺至尊寿皇圣帝冬至表

化国之日舒以长一阳初复天子之父尊之至万寿维祺亚岁肇新羣心胥悦【中贺】恭惟至尊寿皇圣帝陛下道兼伦制化极范围刚长而亨周测土圭之景功成则退尧无黄屋之心薰然慈孝之兼隆允矣古今之莫及方且内享视膳问安之大养外腾重熙累洽之颂声风动华夷光昭竹帛臣等幸逢盛际获造听廷斗建子以定时是为嘉会星拱辰而在列同罄丹诚

丞相率文武百僚贺皇帝冬至表

一之日以授时黄钟合律万斯年而介福赤伏膺符庆集邦家驩腾海?【中贺】恭惟皇帝陛下仁同乾覆道协时雍旦复旦以重光邦图有永新又新而不倦帝德难名默观造化之机自得财成之妙清心省事成归根反本之功任贤去邪体进阳消陰之象臣等幸逢熙运获迓威颜和气先回岂待葭灰之应丰年已兆敢陈云物之占

丞相率文武百僚请皇帝听乐表

祖庙宁神岁浹更於燧火礼经有制时当备於箫韶敢控微衷上干渊听伏以中月而禪寿皇已循不易之规逾年改元圣主方受惟新之命傥未举钧天之奏何以慰率土之怀伏望皇帝陛下俯察忱辞仰稽典故欲闻五声八音六律以复朝廷之常亲帅三公九卿诸侯共致慈闱之请笙鏞以间而人神喜琴瑟在御而心体安茂昭庶政之惟和孰谓太平之无象奉万年之觴於广殿及此首春撞千石之钟於大庭震於四海

丞相率文武百僚贺皇太后受册牋

献岁发春太史奏元龟之吉展采错事东朝庆大典之成佳气一新驩声四溢【中贺】恭惟寿圣皇太后殿下聪明睿智寿富康宁践履艰难佐高庙廓清之烈遵行恭俭啓寿皇诒燕之图肆因初元只奉显册玺篆虫鱼之古乐成钟磬之和内而百官有司方屏息而观盛事外则万方黎献咸拜手而颂闋休载稽前闻可谓尽美臣等偶叨在列获际升平有子而又有孙共仰本支之盛视今犹之视昔前知竹帛之传

丞相率文武百僚贺寿成皇后受册牋

宫壺涂椒德配重华之盛册书镂玉礼行路寝之严圣孝益隆輿情交庆【中贺】恭惟寿成皇后殿下俭慈性稟柔顺躬行至哉坤元象服早光於内治养以天下寝门方奉於母仪今者稽参六籍之文博尽诸儒之议建此显号迈於前闻仰惟贵无敌而富无伦是谓仁之至而义之尽臣等偶缘在列获遂逢时纪劬汭涂山之兴幸窥简牘继生民思齐之作尚播声诗

丞相率文武百僚上皇帝贺三殿受册表

重庆有光仰东朝之慈爱双亲并奉极北内之尊荣正岁肇新弥文告备邦家之喜夷夏所同【中贺】伏以尧舜禹之相承盖非一姓姜任姒之善继又不同时参稽前闻孰拟昭代恭惟皇帝陛下奄有万宇统和三灵由至公大义膺宝运之传讲寝威盛容伸天下之养太史灼龟而献兆曲台縣蕝而具仪黄麾之仗夙陈簪绅在列白玉之册时举金石充庭既已隆孝道而通神明固将礼高年而厚风俗新又新而进德老吾老以及人臣等误被选抡获尘班着虽润色讨论於大典每慙稽古之疎然登降跪拜於路朝实窃逢辰之幸

丞相率文武百僚贺寿皇正旦表

道妙混成太极着两仪之本天端更始三朝受万国之归庆集有邦欢腾率土【中贺】恭惟至尊寿皇圣帝陛下濬哲稽古清明在躬握乾符阐坤珍难名荡荡之德系唐统接汉绪诞受丕丕之基以海宇之富而蹈巢由高世之风以父子之亲而行尧舜旷代之事迨此献岁发春之日实繫考图数贡之时史册增华摺缙太息臣等幸承睿獎获覩昌期鵬行毕集於大庭共喜威顔之近龙袞恪趋於小次更知荣养之尊

丞相率文武百僚贺皇帝正旦表

尧授舜舜授禹方瞻继照之明正次王王次春茂举履端之庆乾坤开辟日月光华【中贺】恭惟皇帝陛下德上际而下蟠化东渐而西被改元定号稽列圣之旧章发政施仁抚重熙之景运内有可封之俗外无不諫之戎方且采诸儒之议以制朝仪陈九奏之音以为亲寿颁朔靡殊於遐迩受图高拱於穆清治功卓然海内幸甚臣等误膺睿獎获缀通班戮力同心永惟春秋五始之义拜手稽首敢奏天子万年之诗

渭南文集卷二

卷三

钦定四库全书

渭南文集卷三

宋 陆游 撰

蜡弹省劄【癸未二月二府请至都堂撰】

朝廷今来特悖大信明大义於天下依周汉诸侯及唐藩镇故事抚定中原不贪土地不利租赋除相度於唐邓海泗一带置关依函谷关外应有据以北州郡归命者即其所得州郡裂土封建大者为王带节度镇抚大使赐玉带金鱼涂金银印其次为郡王带节度镇抚使赐笏头金带金鱼涂金铜印仍各赐铁券旌节门戟从物元系蕃中姓名者仍赐姓名各以长子为节度镇抚留後世世袭封永无穷已余子弟听奏充部内防团刺史亦令久任将佐比类金人官制升等换授其国置国相一员委本国选择保奏当降真命余官准此七品以下听便宜辟除土地所出并许截留充赏给军兵禄养官吏等用更不上供每岁正旦一朝三年大礼一助祭如有故听遣留後或国相代行天申会庆节止遣国官一员将命应刑狱生杀并委本国照绍兴勅令参酌施行更不奏案合行军法者自从军法四京各用近畿大国兼充留守朝廷惟於春季遣使朝陵余时止用本处官吏侍祠每遇朝贡当议厚给茶彩香药等充回赐以示抚存遇一国有警急诸国迭相救援如开斥生地俘获金宝并就赐本国仍永不置监司帅臣及监军等官 议定各遣子弟一人入覲当特赐燕劳毕即时遣回机会之来时不可失各宜勇决以称朝廷开纳之意

论选用西北士大夫劄子

臣伏闻天圣以前选用人才多取北人寇准持之尤力故南方士大夫沈抑者多仁宗皇帝照知其弊公听并观兼收博采无南北之异於是范仲淹起於吴欧阳修起於楚蔡襄起於闽杜衍起於会稽余靖起於岭南皆为一时名臣号称圣宋得人之盛及绍圣崇宁间取南人更多而北方士大夫复有沈抑之叹陈瓘独见其弊昌言於朝曰重南轻北分裂有萌呜呼瓘之言天下之至言也臣伏覩方今虽中原未复然往者衣冠南渡盖亦衆矣其间岂无抱才术蕴器识者而班列之间北人鲜少甚非示天下以广之道也欲望圣慈命大臣近臣各举赵魏齐鲁秦晋之遗才以渐试用拔其尤者而任之庶上遵仁祖用人之法下慰遗民思旧之心其於国家必将有赖伏惟留神省察取进止

代乞分兵取山东劄子

臣等恭覩陛下特发英断进讨京东以为恢复故强牵制川陕之谋臣等获侍清光亲奉睿旨不胜欣拚然亦有惓惓之愚不敢隐默者窃见传闻之言多谓敌兵困於西北不复能保京东

加之苛虐相承民不堪命王师若至可不劳而取若审如此说则吊伐之兵本不在衆偏师出境百城自下不世之功何患不成万一未至尽如所传敌人尚敢旅拒遗民未能自拔则我师虽衆功亦难必而宿师於外守备先虚我犹知出兵京东以牵制川陕彼独不知侵犯两淮荆襄以牵制京东邪为今之计莫若戒勅宣抚司以大兵及舟师十分之九固守江淮控扼要害为不可动之计以十分之一遴选骁勇有纪律之将使之更出迭入以奇制胜俟徐郢宋亳等处抚定之後两淮受敌处少然後渐次那大兵前进如此则进有辟国拓土之功退无劳师失备之患实天下至计也盖京东去敌都万里彼虽不能守未害其强两淮近在畿甸一城被围尺地陷没则朝廷之忧复如去岁此臣所以夙夜忧惧寝不能瞑而为陛下力陈其愚也且富家巨室未尝不欲利也然其徒欲贾于远者率不肯以多貲付之其意以为山行海宿要不可保若倾囊而付一人或一有得失悔其可及哉此言虽小可以喻大愿陛下留神察焉臣等误蒙圣慈待罪枢筦攻守大计实任其责伏惟陛下照其愚忠臣等不胜幸甚取进止

上二府论事劄子【壬午六月五日】

某伏见大理寺奏北界蒙城县官邢珪罪状窃缘有司之议据其侵犯边城杀害义旅虽置极典未足当罪然既已具奏则当有特旨恐与有司之议不可同日而语何者有司谨守律令朝廷当断以大义故也按邢珪生於涿易非祖宗涵养之人仕於伪界非国家禄使之吏身有官守一旦危急力虽不及犹能死守虽懵於逆顺不知革面然春秋之义天下之善一也若遂诛之恐非所以劝天下之为人臣者奏陈之际傥为一言贷其草芥微命以示中国礼义实非小补又虑议者以谓张安国杀耿京事与此略同恐啓寬貸之路无以慰归附之人则某谓不然张安国中国人又尝受旗榜招安见利而动贼杀耿京反覆奸猾罪恶明白与珪实为不类兼邢珪所犯在未被大赦荡涤之前张安国所犯在已受旗榜招安之後伏乞钧察

上殿劄子三首【壬午十一月】

臣恭惟陛下天纵圣智生知文武御极之初内出大号所以加惠於海内甚渥犹以为未足也乃八月戊子寬恤之令继下至诚惻怛纖悉备具欢欣之声达於远迩可谓盛矣然今既累月不知有司皆已推而致之民乎若犹未也是不免为空文而已无乃不可乎又有大不可者陛下初即大位乃信诏令以示人之时前日数十条或曰当置典宪或曰当议根治或曰当议显戮可谓丁宁切至赫然非常之英断也若复为官吏将帅一切翫习漫不加省一旦国家有急陛下诏令戒勅之语将何加此而欲使人捐肝脑以卫社稷乎周官冢宰以正月之吉始和布治於邦国都鄙垂象之法徇以木铎曰不用法者国有常刑正月周正今之十一月也正岁夏正今之正月也自十一月至正月若未甚久而申敕告戒俟以刑辟已如此其严今命下累月而有司或恬然不以为意臣窃惑之欲望圣慈以所下数十条者申谕中外使恪意奉行毋或失坠仍命諫官御史及外台之臣精加考核取其尤沮格者与衆弃之不惟圣泽速得下究亦使文武小大之臣耸然知诏令之不可慢如此实圣政之所当先也伏惟留神省察取进止

又

臣闻夏尚忠商尚质周尚文三者迭用非以为异因时制宜有不得不然者臣窃观太祖太宗之世法度典章广大简易律令可以禁奸无滋彰之患文移可以应务无丛委之弊君臣上下如家人父子论说径直诚意洞达所详者大所略者小事易举功易成其气象风俗人物议论至於今可考也太平既久日趨於文放而不还未流愈远浮虚失实华藻害道虽号为粲然备具而文移书判增至数倍居官者穷日之力实不暇给猾吏奸人乘隙以逞其始也所详者小所略者大其极也并小者不复能详则一切鹵莽听吏之所为而已太上皇帝中兴大业当宁叹息思有以救之於是渐加订正以还其旧两省复通为一以革逗滞之风寺监几省其半以去支离之害简礼容删律令规模措置盖欲悉除繁文复从祖宗之质而後已有司奉承未能尽如本指此陛下今日所当力行不可缓也臣愚欲望圣慈明诏辅臣使帅其属因今六曹寺监百执事所掌讲求祖宗旧制以趨於广大简易之域繁碎重复无益实事者一皆省去使小大之臣咸有余力以察奸去蠹修举其职则太平之基自此立矣元佑中司马光请改三省职事一如昔日中书之制苏辙亦请收昔日三司之权悉归户部则臣所谓因今所掌以求祖宗旧制诚不为难顾陛下力行何如尔干冒天听伏深战栗取进止

又

臣窃观周自后稷公刘以来积德深远卜世长久为之子孙者宜皆取法焉然而独曰仪刑文王又曰仪式刑文王之典汉自高祖创业其後嗣亦多贤君然史臣独曰汉言文景美矣至武帝之功烈犹以不遵文景之恭俭为恨唐三百年一祖三宗皆号盛世而太宗贞观政要之书独传宝以为大训元佑中学士范祖禹亦曰祖宗畏天爱民子孙皆当取法惟仁宗在位最久德泽深厚结於天下诚能专法仁宗则成康之世不难致也呜呼祖禹之言天下之至言也迨我太上皇帝躬履艰难慨然下诏专法仁祖之政且窃闻燕闲惟考观仁祖政事是以於万斯年无疆惟休亦享仁祖垂拱之福可谓盛矣陛下绍休圣绪正当师太上专法仁祖之意申命还英进读之臣日以宝训反覆敷绎以究微意仍命辅臣政事法度一以仁祖为法臣将见陛下福祿川至治效日见年谷屡丰四夷率服庆历皇佑之盛复见於今虽遐方絕壤皆当梯航而至矣况中原故地其有不复者哉臣不胜至愿伏惟圣慈留神省察取进止

拟上殿劄子【壬午准备轮对会内禅遂不果上】

臣观小毖之诗见成王孜孜求助特在初载意其临天下之久阅义理之多则当默识独断虽无待於羣臣可也及考之书然後知其不然舜伐三苗年九十有三闻伯益一言则退而敷文德舞干羽无一毫自用之意武王受贡桀年九十有一召公作训累数百言武王纳之不以为过呜呼为人臣而不以舜武王望其君者不恭其君也伏以陛下生知之圣度越百王稽古之学博极坟典历试诸艰身济大业更事阅理多矣自公卿大臣皆陛下四十年教养所成况於小儒贱士见闻浅陋曾何足以仰清光备顾问哉然其所陈则未必无尺寸之长何者举吏部之籍搢绅之士几人其得见君父者几人白首州县而不得一望阙门者多矣则凡进见之人固宜夙夜殫思竭诚以幸千载之遇虽其间有论事梗野不达大体者究其设心亦愿际会犯威颜以徇俗舍富贵以取名臣窃谓无是理也欲望陛下昭然无置疑於圣心克己以来之虚心以受之不憚舍短而取长以求千虑之一得庶几下情得以毕达羣臣无伯益召公之贤陛

下以舜武王之心为心则是圣德巍巍过於舜武王矣如其屈万乘之尊躬日昃之劳顾於疎远之言无大施用姑以天地之度容之而已是独言者一身之幸也干冒天威臣无任惶怖俟罪之至

上二府乞勿受庆云图劄子【癸未春】

伏覩尚书省劄子知阆州吕游问奏庆云见并图一轴奉圣旨降付编类圣政所仰见主上圣孝推美太上皇帝之心然窃闻太上皇帝建炎之初京东进芝草亲诏却之盛德煌煌光映简册今乃以庆云见为圣政恐非太上皇帝之本意兼阆州所奏专以庆云见於普安郡及在主上即位前一日为受命之符谀佞牵合不识大体政与京东芝草相类若受而不却虽不报行其谁不知深恐自此草木之妖氛气之怪纬 之说歌颂之文纷纷来上却之则自啓其端不却则遂将成俗欲望钧慈以太上皇帝却芝草故事委曲奏陈主上刚明英断必有以处此矣干冒钧严不胜恐怖之至

上二府论都邑劄子

某自顷奏记迨今累月自顾贱愚不肖无尺寸可以上补聪明而徒以无益之事上勤省阅实有罪焉故久不敢以姓名彻左右今者偶有拳拳之愚窃谓相公所宜闻者伏冀少留观览幸甚幸甚伏闻北人累书请和仰惟主上圣武相公威名震叠殊方足以致此而天下又方厌兵势且姑从之矣然某闻江左自吴以来未有舍建康他都者吴尝都武昌梁尝都荆渚南唐尝都洪州当时为计必以建康距江不远故求深固之地然皆成而复毁居而复徙甚者遂至於败亡相公以为此何哉天造地设山川形势有不可易者也车驾驻蹕临安出於权宜本非定都以形势则不固以馈饷则不便海道逼近凜然常有意外之忧至於讖纬俗语则固所不论也今一和之後盟誓已立动有拘碍虽欲营缮势将艰难某窃谓及今当与之约建康临安皆系驻蹕之地北使朝聘或就建康或就临安如此则我得以闲暇之际建都立国而彼既素闻不自疑沮敌人欲借以为辞亦有不可者矣今不为後且噬脐至於都邑措置当有节目若相公以为然某且有以继进其说不一二年不拔之基立矣某智术浅短不足以议大计然受知之深不敢自以疎远为疑干冒钧听下情恐惧之至

渭南文集卷三

卷四

钦定四库全书

渭南文集卷四

宋 陆游 撰

上殿劄子

臣闻善观人之国者无他惟公道行与否尔书曰毋虐茆独而畏高明诗曰柔亦不茹刚亦不吐此为国之要也若夫虐茆独畏高明茹柔吐刚而能使天下治者自古未之有也朝廷之体责大臣宜详责小臣宜略郡县之政治大姓宜详治小民宜略赋敛之事宜先富室征税之事宜核大商是之谓至平是之谓至公行之一邑则一邑治行之一郡则一郡治行之天下而治不逮於古者万无是理也伏见朝廷顷因人言必显有功状乃畀职名行之数年而大臣近侍不得职者几人帅臣监司之加职者又比比而有至於铨曹格法所以厄小官者则未尝少弛张也庆典之行所及至广贴职以上例皆甄复虽阿附秦氏得罪者亦在焉至於常调孤远固多久絪刑宪者今更赦令虽使皆得沾被铨法拘挛必不如是之旷荡也无乃责大吏反略而责小臣反详乎郡县之吏不能自立观望揣摩惟强是畏豪右虽犯重辟官吏贪者黠者则公与之为之市廉者懦者则又自营曰得无反为所害乎凡嫁鬻平人诬罪僮奴者皆有司为之道地也凶年饥岁虽贫富俱病然富者利源至多贫者惟守田亩孰为当恤视郡县之庭鞭笞流血桎械被体者皆贫民也吴蜀万里关征相望富商大贾先期遣人怀金钱以赂津吏大舸重载通行无苦终更小官造廷进士垂橐萧然齎粮有限而稽留苛暴略不之恤如是谓之平可乎谓之公可乎臣昧死伏望陛下推至平至公之道自朝廷始然後下诏戒敕四方而继之以诛赏不过岁月治效自见惟在陛下执之重如山岳坚若金石尔苟卿论辟国之说曰兼并易能也坚凝之难夫岂独兼并哉凡为政施行之甚易坚凝之甚难臣区区之言陛下或以为万有一可采焉敢并以坚凝为献取进止

又

臣伏读御制苏轼赞有曰手扶云汉斡造化机气高天下乃克为之呜呼陛下之言典谟也轼死且九十年学士大夫徒知尊诵其文而未有知其文之妙在於气高天下者今陛下独表而出之岂惟轼死且不朽所以遗学者顾不厚哉然臣窃谓天下万事皆当以气为主轼特用之於文尔赵普气盖诸国故能成混一之功寇准气吞契丹故能成却敌之功范仲淹气压灵夏故西讨而元昊款伏狄青气慑岭海故南征而智高殄灭至於韩琦富弼文彦博之勲劳唐玠包拯孔道辅之风节大抵以气为主而已盖气胜事则事举气胜敌则敌服勇者之鬪富者之博非有他也直以气胜之耳今天下才者衆矣而臣犹有忧者正以任重道远之气未能尽及古人也方无事时亦何所赖此一旦或有非常陛下择羣臣使之假钺而董二军拥节而谕万里虽得贤厚笃实之士气不素养临事惶遽心动色变则其举措岂不误陛下事耶伏望万几

之余留神於此作而起之母使委靡养而成之母使沮折及乎人才争奋士气日倍则缓急惟陛下所使而已且吴蜀闽楚之俗其浑厚劲朴固已不及中原矣若夫日趨於拘窘怯薄之域臣实惧国势之寢弱也不胜私忧犯分献言恭惟陛下裁赦取进止

又

臣闻天下有无穷之变而有必然之理惟默观陰察能得其理则事变之来虽千态万状可以坐制而无虞矣天下之变最幽眇仓卒不可测知者莫如雷霆鬼物然雷霆冬伏而春作鬼物昼隐而夜见则其理之必然有不待智者而知之矣今朝廷内无权家世臣外无强藩悍将所虑之变惟一金人劲敌也不时反覆虽其族类有不能测而臣窃以谓是亦有可必知者夫何故寬猛之相继如寒暑昼夜之必相代也故自金人强悍以来靖建炎之间兵戈扰攘则有绍兴之和通和既久则有辛巳之寇寇而败亡则又有隆兴之和今边陲晏然枹鼓不作逾二十与绍兴通和之岁月略相若矣不知金人终守和约至数十百年而终不变邪将如昼夜寒暑必相代也且金非他敌比也无狐伏之惧有虎视之凶惟制之以力劫之以威则粗能少定今力惫势削有乱而已其乱不起於骨肉相残则起於权臣专命又不然则奸雄袭而取之耳三者有一焉反金人之政以悦其国人且何为哉虽陛下聪明英睿自有所处然臣窃观士大夫之私论则往往幸敌之懦以为安不知通和已二十余年如岁且秋矣而谓衣裘为不必备岂不殆哉大抵边境之备方无事时观之事事常若有余一旦有变乃知不足伏望陛下与腹心之臣力图大计宵旰弗怠缮修兵备搜拔人才明号令信赏罚常如羽书狎至兵锋已交之日使敌果有变大则扫清燕代复列圣之讐次则平定河洛慰父老之望岂可复如辛巳仓卒之际敛兵保江凜然更以宗社为忧邪臣世食君禄且蒙陛下省録姓名已二十余年念无以报天地父母之大恩故其陈於陛下者惟惧不尽而不知狂愚之为大罪也取进止

乞祠禄劄子【戊申四月】

照对某昨任主管成都府玉局观将满陈乞再任蒙恩差知严州於淳熙十三年七月三日到任郡政乖刺雨泽不时上劳宵旰死有余责赖蒙朝廷哀矜山郡瘠土之民重赐蠲放广行賑恤上格和气下安衆心入秋得雨陆种倍收六县并无流徙人户今春以来雨阳尤为调适二麦继熟民间亦以为所收倍於常年賑济讼事稍纾吏责某虽去替不远实缘年龄衰迈气血凋耗夏秋之际痼疾多作欲望钧慈特赐矜悯许令复就玉局微禄养痼故山及天气尚凉早得就道实为至幸

上殿劄子

臣恭惟陛下躬圣人之资履天子之位而致养三宫承颜左右盛事赫奕冠映千古尚何待尘露之增山海哉顾臣窃抱惓惓之愚不敢辄默伏惟陛下圣孝纯至稟於天性昔在潜邸及登储宫以来夙夜孜孜何尝顷刻不以寿皇为心寿皇罢朝而悦进膳而美则陛下欣然喜动於色寿皇罢朝而不悦进膳而少味则陛下愀然忧见於色方是时徒能喜之忧之而已今则致亲之悦者责在陛下其可以不深念乎所谓悦亲之道非荐旨甘奉轻暖也非晨昏定省冬夏

温清也非千门万户之宫钧天箫韶之乐也惟在陛下得天下之爱戴以宁寿皇之心而已鸡鸣而揽衣辨色而视朝必曰此昔者问安之时也今以万几之繁不能日朝重华歉然於怀岂有限极然阙问安之常礼之小也致天下之治孝之大也吾其力为其大者乎此固寿皇所望於陛下亦天下所望於陛下也治功已成中外无事陛下时备法驾率羣臣上万年之觴岂非天下之大庆不然太史或以灾异上闻四方或以寇盗来告寿皇闻之万分有一微辍玉食陛下虽居万乘之贵孰与解忧哉臣昧死愿陛下於进退人才罢行政事之际率以是为念自三思十思以至百思不为过也自一日五六日至於旬日不为缓也谋及卜筮谋及卿士谋及庶人不为广也一有小失岂独上劳宵旰寿皇亦与焉故陛下今日忧勤恭俭百倍於古帝王乃仅可耳譬如臣民之家上有尊亲则所以交四隣训子弟备饥馑御盗贼比之他人自当谨戒百倍何则彼亦惧忧之及其亲也犬马小臣贪於增广圣孝不知言之涉於狂妄冒犯天威伏候斧钺

又

臣闻诗曰上天之载无声无臭人君与天同德惟当清心省事澹然虚静损之又损至於无为大臣不得而窥所好则希合苟容之害息小臣不得而窥所好则谄谀侧媚之风止不以从其所好而加赏则儉人伏不以逆其所好而加罪则端士进玩好无益之物不好则不接於目诌谐败度之言不好则不闻於耳大抵危乱之根本谗巧之机芽奸邪之罅隙皆缘所好而生臣下虽有所偏好而或未至大害者无奉之者也人君则不然丝毫之念形於中心虽未尝以告人而九州四海已悉向之矣况发於命令见於事为乎且嗜好之为害不独声色狗马宫室宝玉之类也好儒生而不得真则张禹之徒足以为乱阶好文士而不责实则韦渠牟之徒足以败君德其他可推而知矣昔者汉文帝及我仁宗皇帝所以为万世帝王之师者惟无所嗜好而已恭惟陛下龙飞御极之初天下倾耳拭目之时所当戒者惟嗜好而已无有作好遵王之道天之所以锡神禹也伏惟陛下留神省察实天下幸甚取进止

上殿劄子【己酉四月十三日】

臣闻王者以一人之身临制四海人情错出事变遽至惟静以俟之则心虚而明惟重以持之则体大而正无偏听之过无轻举之失天何言哉舜何为哉後世士大夫学术卑陋识虑褊浅顾谓王者得位必有以耸动天下於是厌常喜新之论兴饰智骇俗之政作衆人之所喜而君子之所深忧也臣伏见陛下自在潜邸以至龙飞御宇三十年间天下之事何所不习虽日出百令固亦易尔乃谦恭退托而安静无为沈潜渊默而聪明不作上则承寿皇之睿谟下则尽羣臣之公议及乎议有未决徐而断之政有当行从而举之理愜事允出臣下思虑之表有心者诚服有口者颂数则所谓静与重者陛下既得之矣呜呼一郡一邑之长视事之始尚且以新奇眩衆以敏速钓名陛下有天下之利势而不用有圣智之絶识而不施超越羣伦奚啻万亿而或者方以耸动天下为献此固儿童之见而陛下所不取也窃恐羣臣献此说者浸多虽陛下决不取然臣不胜惓惓爱君之愚忠思有以坚圣心而广初政昔魏郑公忧贞观之政渐不克终苏辙亦谓但如元佑之初足矣若夫进锐退速能动耳目之观听而无至诚惻怛之心以终之如明皇之焚锦绣德宗之放驯象实陛下之龟监也故臣愿陛下图事揆策不厌於从

容行赏议罚无取於快意兢兢业业常如此三月之间则成康文景之盛复见於今日矣犬马小臣出位妄言冒犯天威臣无任

又

臣闻天下有定理决不可易者饥必食渴必饮疾必药暑必簟岂容以他物易之也哉臣伏观今日之患莫大於民贫救民之贫莫先於轻赋若赋不加轻别求他术则用力虽多终必无益立法虽备终必不行以臣愚计之朝廷若未有深入远讨犁庭扫穴之意能於用度之间事事裁损陛下又躬节俭以励风俗则赋於民者必有可轻之理缓急之备固不可无姑以岁月徐为之可也如是则和气浹洽必无水旱之灾驩声洋溢必无盗贼之警何虑国用之不足邪设使裔夷弗宾侵犯王略所谓率其子弟攻其父母直可舞干羽而格之尔顷者建炎绍兴戡定变乱之日一切赋敛有非承平之旧者高宗皇帝宵旰焦劳每欲俟小定而悉除之故诏令布告天下曰惟八世祖宗之泽岂汝能忘顾一时社稷之忧非予获已止俟扞防之隙首图蠲省之宜臣幼年来见民诵斯诏至於感泣虽倾赀以助军兴而不敢爱旋属国家多故金敌畔盟虽所蠲已多终未仰称圣意寿皇圣帝临御以来所以节用裕民者皆继承高祖蠲省之指也则陛下今日岂可不以为先务哉臣昧死欲望圣慈恢大度明远略诏辅臣计司博尽论议量入而用量用而取可蠲者蠲可省者省富藏於民何异府库果有非常孰不乐输以报君父沦肌浹髓之恩哉若有事之时既竭其财矣幸而无事又曰储积以为他日之备也虽恢复中原又将曰边境日广矣屯戍日衆矣则斯民困弊何时而已邪渎犯天威罪当万死惟陛下载赦取进止

除修史上殿劄子

臣伏见真宗皇帝至道三年冬修太宗实录至明年咸平元年八月而毕甫九阅月修书者钱若水柴成务宗度吴渊杨亿五人而已书成又诏重修太祖实录至明年六月而毕亦甫九阅月修书者王元之梁颢赵安仁李宗谔四人而已臣窃考之太祖讨泽潞取杨州平吴灭蜀定荆楚下五岭太宗抚有吴越荡定汾晋用师蓟门问罪夏台皆大举动业广事丛议论烦委兵机戎政攻守馈饷功罪黜陟之事可谓夥矣至於制礼作乐明刑治历修废官举坠典革五季之弊复汉唐之盛侧席求治可谓勤矣宜其摹写日月形容造化虽累岁不成而奏书之速不淹三时上足以慰羹墙之思下足以厌荐绅之望非独此数人者毕精竭思之力也意者当时命令重刑赏必尊君体国之俗成凡史官絀绎之所须者上则中书密院下则百司庶府以至四方万里郡国之远重编累牒如水赴海源源而集然後以耳目所接察隧碑行述之谀辞以衆论所存刊野史小说之谬妄取天下之公去一家之私而史成矣九阅月而奏书臣诚未见其为速也臣乞身累年忽蒙圣恩起之山泽之间使与闻大典既不累以他职又特寛其朝谒责委之意可谓重矣然臣之愚虑有欲陈者未敢遽以仰渎天听而略具梗槩於前欲乞圣慈明诏大臣俟臣供职有所陈请择其可者出自朝廷主张施行如臣不能自力旷职守负圣知则窜殛之刑所不敢避取进止

乞致仕劄子【癸亥】

臣輒冒重誅仰干洪造伏念臣生逢千載仕历四朝晚蒙旒扆之知爰錫弓旌之召濫司汗簡擢长僊蓬曾未几时亟跻近列虽愿输於尘露顾已迫於桑榆记问荒疎文辞衰退重负夜行之责难贪昼接之荣又况与奏成书获经睿览时则可矣敢少缓於控陈天实临之冀俯从於恳款伏望圣慈许臣守本官职依前致仕

又

臣近缘实录院进书已毕具奏乞守本官职依前致仕准尚书省劄子奉圣旨不允者伏念臣学缘病废志与年衰步蹇弗支髮存无几出入鴈行之内惕然有腴於面颜迫参豹尾之间观者亦为之指目岂容冒昧久窃宠荣敢干咫尺之威洵贡再三之请万籤黄卷怅已负於初心十具乌犍冀获安於故里伏望圣慈特赐开允

又【甲子】

臣輒倾愚恳仰达圣聪伏念臣衰頽余龄已开九秩遭逢盛际逮事四朝擢置周行初出高皇之独断进登法从晚蒙陛下之异知期岁强颜秋毫无补及沥乞身之请更蒙优老之除久此叨尘岂胜危惧虽天地之恩未报而犬马之力已穷杜曲桑麻傥遂扶犁之初愿灞桥风雪更寻策蹇之旧游誓教训於子孙用报酬於君父伏望圣慈许臣守本官职致仕

渭南文集卷四

<集部,别集类,南宋建炎至德佑,渭南文集>

卷五

钦定四库全书

渭南文集卷五

宋 陆游 撰

天申节进奉银状

效颂祝於万年适逢盛际备贡输於九牧敢竭微诚前件银祇率典章获参包篚大庭旅百愧非梯山航海之琛神岳呼三但切就日望云之意

辞免赐出身状

准尚书省劄子奉圣旨赐进士出身者孤远小臣比蒙召对从容移刻褒称训谕至於再三仰惟天地父母之恩固当誓死图报惟是科名之赐近岁以来少有此比不试而与尤为异恩揣分量材实难忝冒欲望敷奏特赐追寝以安冗散之分

又

近蒙恩赐进士出身尝具状乞行追寝以谓科名之赐近岁以来少有此比不试而与尤为异恩揣分量材实难忝冒今月六日准尚书省劄子奉圣旨不许辞免蝼螳至微曲烦申谕雷霆在上其敢饰辞然义有未安若不自列强颜冒宠获罪愈大盖特赐科名虽有故事必得非常之人乃副非常之举甚非所以重儒科杜幸门也重念某一介疎贱行能亡取比蒙召对面加训奨退而感激至於涕泗今者但使获安冗散之分以效尺寸之劳则於上报主恩不敢惮死

条对状

准今月六日诏书节文令侍从台谏取当今弊事悉意以闻退率其属极言毋讳臣恭依诏旨条具下项一有国之法当防其微人臣之戒尤在於偏异姓封王偏之尤者也盖封王始於汉初天下未定权宜之制然韩彭英卢皆以此败汉亦几至大乱遂与羣臣盟曰非刘氏不王後世惩创其失魏晋隋唐皆起草昧有天下岂无功臣止於公侯而已国初赵普有社稷大功亦未尝生加王爵也唐将封王始於安禄山而本朝则始於童贯此岂可法而比年以来寢以为常识者莫不忧之欲乞圣慈明诏有司自今非宗室外家虽实有勲劳毋得辄加王爵藏之金匱副在有司永为甲令实宗社无疆之福

一伏见比来朝廷间遣小臣干办於外既衔专命又无统属造作威福矜诧事权所在骚然理有必致如措置酒坊招捕海贼未有毫发成効而扰害之事已履满闻听则此事害多利少可

以无疑若以轻君命失国体言之则虽有厚利亦不可行臣谓如此二事之类止当专委户部长贰转运司及安抚使提点刑狱措置如其不职自有典宪诚不足一一上烦圣虑昔祖宗置走马承受本欲便於奏报耳而小人恃势日增岁长及改称廉访使者则监司帅守反出其下败乱四方危及社稷实走马承受之末流也可不危哉此事乞陛下与辅臣长虑远计亟行废罢若止如近日改易其人及令听安抚使节制之类根本未除终必为害若朝廷或有大事势须遣使即乞於廷臣中遴选材望庶几不负任使不启弊端实天下之幸一自古有国设官分职非独下不得僭上上亦不得侵下所以正名分也公师之官将相之位人臣之至贵天子所尊礼非百官有司比也方宣和间王黼以太宰而行应奉司蔡攸以三孤而直保和殿紊乱之事遂为祸萌中兴以来所宜痛革而顷者遂有以师傅而领殿前都指挥使者天下固已怪矣近复有以太尉而领合门事者合门古之中涓太尉服章班列盖视二府渎乱名器莫此为甚欲乞圣慈诏辅臣议之例加订正着为定制亦革弊所当先也

一伏覩诏书委监司条具部内知州治行仰见陛下抚恤百姓欲各安田里之意然臣窃谓惟贤乃可以知贤而无瑕者乃可以议人不审今之监司皆已贤乎若犹未也旦夕臧否来上而按行黜陟无乃未可乎虽使谏官御史劾奏其不当者然人之识见自有分限若本无才智又无学术乃使品藻贤否而劾其不当是犹强盲者使察秋毫而责其不见也臣欲望圣慈令三省具诸路监司姓名精加讨论其不足当委寄者例皆别与差遣选有才智学术之士代之则前日之诏不为空文既一清监司之选又审知郡守之政实今日先务也

一伏覩律文罪虽甚重不过处斩盖以身首异处自是极刑惩恶之方何以加此五季多故以常法为不足於是始於法外特置凌迟一条肌肉已尽而气息未绝肝心联络而视听犹存感伤至和亏损仁政实非圣世所宜遵也议者习熟见闻以为当然乃谓如支解人者非凌迟无以报之臣谓不然若支解人者必报以凌迟则盗贼盖有灭人之族者矣盖有发人之丘墓者矣则亦将灭其族发其丘墓以报之乎国家之法奈何必欲称盗贼之残忍哉若谓斩首不足禁奸则臣亦有以折之昔三代以来用肉刑而隋唐之法杖背当时必以谓非肉刑杖背不足禁奸矣及汉文帝唐太宗一日除之而犯法者乃益稀少几致刑措仁之为效如此其昭昭也欲望圣慈特命有司除凌迟之刑以明陛下至仁之心以增国家太平之福臣不胜至愿

一臣恭以陛下仁心惻怛圣泽?广四方万里之远昆虫草木之微生长养惟恐或伤近者天下奏狱虽盗贼奸蠹罪状已明一毫可宽悉蒙原减岂有无辜就刑而不加恤者臣是以不量疎贱敢昧死有请夫宦侍之臣自古所有然晚唐以来始进养子童幼何罪横罹刀锯古制宫刑之惨才下大辟一等是虽显有负犯犹在所矜而况於童幼乎向使宿卫不足供奉阙人暂开禁防尚为有说今道路之言咸谓员已倍冗司局皆溢而日增岁加未闻限止诚恐非陛下爱人恤物蕃育羣生之意也臣伏覩太祖皇帝开宝四年诏内侍官年三十无养父听养一子并以名上宣徽院违者抵死真宗皇帝咸平中复申前诏仁宗皇帝嘉佑四年又诏入内侍省权罢进养子三圣诏令炳如丹青遵而行之实在陛下且方今圣政日新入无苑囿之观出无逸游之好诸军无承受诸路无走马中人所领不过两宫扫除之职而已顾久弛成宪以从其私干犯至和亏损仁政臣虽甚愚犹知其不可也伏惟圣慈少留听焉

一自古盜賊之興若止因水旱飢饉迫於寒餓嘯聚攻劫則措置有方便可撫定必不能大為朝廷之憂惟是妖幻邪人平時誑惑良民結連素定待時而發則其為害未易可測伏思此色人處處皆有淮南謂之二禳子兩浙謂之牟尼教江東謂之四果江西謂之金剛禪福建謂之明教揭諦齋之類名號不一明教尤甚至有秀才吏人軍兵亦相傳習其神號曰明使又有肉佛骨佛血佛等號白衣烏帽所在成社偽經妖像至於刻板流布假借政和中道官程若清等為按勘福州知州黃裳為監雕以祭祖考為引鬼永絕血食以溺為法水用以沐浴其他妖濫未易槩舉燒乳香則乳香為之貴食菌蕈則菌蕈為之貴更相結習有同膠漆萬一竊發可為寒心漢之張角晉之孫恩近歲之方腊皆是類也欲乞朝廷戒敕監司守臣常切覺察有犯於有司者必正典刑毋得以習不根經教之文例行闊略仍多張曉示見今傳習者限一月听齋經像衣帽赴官自首與原其罪限滿重立賞許人告捕其經文印版令州縣根尋日下焚毀仍立法凡為人圖畫妖像及傳寫刊印明教等妖妄經文者并从徒一年論罪庶可陰消異時竊發之患奏筠州反坐百姓陳彥通訴人吏冒役狀

臣近因民間詞訴勘會到本路筠州百姓陳彥通因訴事夾帶稱高安縣押錄陳諒經兩次徒杖罪斷罷不合冒役事其本州於淳熙六年十月內以為陳彥通所論冒役不實遂引用乾道六年八月二日臣僚陳請妄訴冒役科反坐刑名仍引在法諸州縣公人曾因犯罪勒停【謂於法不該收叙及未該收叙者】放罷編配再行投募充役者許人告諸州縣收叙公人於令格有違者徒二年公人依法不該收叙而隱落過犯或改易姓名別行投募者准此將百姓陳彥通決脊杖十三臣竊詳反坐之法本謂如告人放火而實不曾放火告人殺人而實不曾殺人誣陷善良情理重害故反其所坐然有司亦不敢即行多具情法奏取聖裁今愚民無知方其為奸胥猾吏之所屈抑中懷冤憤訴之於官但聞某人曾以罪勒罷又有許告指揮則遂於狀內夾帶冒役之語村塾小民何由身入官府親見案牘小有差誤亦當未減以通下情縱使州郡欲治其虛妄募越之類亦自有見行條法笞四十至杖八十極矣與反坐之法有何干涉若一言及吏人冒役便可摺摭置之徒罪則百姓被苦豈復敢訴吏何其幸民何其不幸也自昔善為政者莫不嚴於馭吏厚於愛民今乃反之事屬倒置兼見今諸處冒役吏人雖究見是實亦不過從杖罪科斷罷役而已未有即置之徒罪者豈有百姓訴吏人冒役却決脊杖之理臣本欲即按治筠州官吏又緣有上件乾道六年八月二日臣僚陳請到指揮顯見因此陳情致得州郡憑藉用法?刻臣蒙恩遣使一路出自聖知拔擢苟有所見不敢隱默欲望聖慈更賜詳酌如以臣奏為然即乞特降睿旨寢罷乾道六年八月二日因臣僚陳情所降指揮庶使百姓不致枉被?重刑責且下情獲通胥吏稍有畏憚天下幸甚

除寶謨閣待制舉曾黯自代狀

准令侍從授告訖限三日內舉官一員充自代者右臣伏覩從政郎總領淮東軍馬錢糧所準備差遣曾黯克承家學早取世科操行可稱文詞有法臣實不如舉以自代

辭免轉太中大夫狀

中大夫充寶謨閣待制提舉江州太平興國宮陸某狀奏臣以修進兩朝實錄今月二十三日

伏准告命授臣太中大夫依前充宝谟阁待制提举江州太平兴国宫者序进一阶虽循故事擢登四品实出殊私劳薄赏醲人微恩重而况臣遭逢颇异涉历寢四朝尝綴於廷绅八十更持於从橐惟宠光之永絶庶视息之少延敢控愚衷冀回鸿造

荐举人材状

太中大夫充宝谟阁待制致仕臣陆某近承绍兴府牒备承尚书吏部符准都省劄子奉圣旨节文令前侍从各举人材三两人臣为已致仕累年窃虑与在外侍从见任藩郡及宫观人事体不同遂具申审今准都省劄子照得宝谟阁待制致仕俞渤荐举万梦实等讫劄送臣照会者臣切见宣教郎知临安府临安县巩丰材识超卓文辞宏赡从政郎前随州州学教授王田学问淹贯议论开敏以上并可备文字之职文林郎监潭州南岳庙赵蕃力学好修杜门自守入仕以来惟就祠禄今已数任若将终身或蒙朝廷稍加识拔足以为静退之劝抑躁竞之风於圣时不为无补如或不如所举甘坐责罚

渭南文集卷五

卷六

钦定四库全书

渭南文集卷六

宋 陆游 撰

谢解后

倦游場屋分已归耕首置贤书出於过听得非其分荣不盖惭伏念某行已迂疎稟资穷薄生逢圣代岂愿老於渔樵性嗜古文了不通於世俗因息四方之志专为一壑之谋比游都城适睹明诏复踊跃而自献信习气之难除内负初心外慙旧友然而废放已久尽忘科举之章程得失既轻颇有山林之气象譬之进昌歜於玉食陈侏儒於燕朝方以怪而见珍故虽朴而不废恭惟某官行为世表经为人师早学长安识子云之奇字晚游吴会得中郎之异书心术正而无邪文章简而有法愤雕虫之积弊疑草莽之可收遂致庸虚辄先豪俊自知不称敢辞同进之争名所惧流言窃谓主司之好异其为愧悚实倍寻常

贺台州曾直阁啓

恭审宠辞使节移镇便藩上待老成惟恐弗当其意士闻静退自消争进之心凡有识知谁不驩喜恭惟某官渊乎似道清而有容古学名家郁为诸儒之领袖高文擅世坐还两汉之风流蚤践清华屡当要剧民依恺悌之政吏畏道德之威不言而令己行寡欲而人自化好直无矫枉之过为善无近名之嫌历考平生追配古人而奚愧中更俗吏益知儒者之有功此由真馆之宴闲起奉外台之委寄翔而後集泛然敢辞子房避三万户之封曼容至六百石而去当宁为之太息举朝仰其高风故择名邦示优耆德然而公议所属久安实难第恐赐环之来弗容坐席之暖某早尝问道晚益受知春服方成怅又违於师范郡斋犹冷冀?卫於生经

贺曾秘监啓

恭审趣登文陛进冠兰台简册光华孰谓太平之无象荐绅叹息共欣大老之来归诚为中外之荣观非复门阑之私庆窃尝闻诸耆旧昔在祖宗朝有道德魁伟之臣士鄙刑名功利之学政术既斥夫卑陋国势自极於尊安岂惟右文饰治之方是亦折冲消萌之要至於主盟儒道典领书林必求名胜之宗尤极清华之选不图近岁顿异前规老吏亦惊兹岂膏梁之地遗编何罪至遭锋镝之腥廷范之污清流哥奴之非时望较之於此诚何足言天未坠於斯文上眷求於旧德恭惟某官文贵乎道气合於神学稽古以知天心集虚而应物旧闻入洛之盛事疑於古人追数过江之诸贤屹然独在虽身居湖海之远而名满覆载之间友化人而游帝居顾肯复求於外物登泰山而小天下盖尝俯陋於诸儒昨者法宫决事之初起於琳馆燕居之际力归使节自乞守符观其勇退於急流真若无意於斯世迫功名之不赦凛风节之愈高姑复

领袖馆阁之游行即几杖庙堂之上某自惟幸会最辱知怜识度关之云距今十载从浴沂之乐终後诸生孤踪愈远於师门精意空驰於梦想

贺谢提举啓

伏审显膺帝制起拥使华虽舆论歉然谓未究大贤之蕴然用人如此谁不知公道之行恭惟某官躬真独简贵之资蕴笃实诚明之学早并游於洛下晚独步於江东谈笑多闻文章尔雅履常应变虽与时而偕行据古守经盖絶世而独立风采闻於天下劳烈简於上心自去清班久安真馆付功名於昨梦若无意然顾富贵之迫人恐不免耳迨法宫之决事付便郡以优贤曾未踰年已闻报政入膺三接之宠出临千里之畿明诏始传吾党相庆以谓名流之施設当有前辈之规摹班超之策平平阳城之考下下至於俗吏乃求奇功所愿一洗簿书之尘庶几少称台阁之望此自明公之所及岂须贱子之具陈冒渎之?慚惶无措

贺礼部曾侍郎啓

恭审显奉制书进司邦礼所养既厚万鍾亦何足言衆望所归九迁犹以为缓惟是老成之用式昭至治之符凡有识知谁不驩喜窃考六官之制本皆三代之余惟宗伯之清华极近臣之遴选诚使此地常得其人则朝廷日尊自弭未形之患论议守正亦折羣邪之萌一昨多艱寢忘大体刑名钱谷独号剧曹文物 常仅同虚器盖道由时而升降官以人而重轻苟凡材非据於其间则旧章何恃而不废孰谓斯文之幸复闻公议之伸恭惟某官直哉惟清渊乎似道心至虚而善应名弗求而愈高紬绎六经推明上世之絶学度越两汉追配先秦之古人早并游於洛中晚独步於江左人诵其德家有其书使少贬於诸公已亟升於华贯顾久幽而弥厉凜自信之不同上屡兴见晚之嗟公犹怀勇退之志勉收功业於无复意之後起践富贵於不得已之余黄发皤然德容穆若昔者庆历之盛侧席而致衆贤元佑之初加璧而聘诸老今兹盛事可谓无慚然犹渐进於省中未足大慰於天下窃谓德齿之贵宜登师保之崇入则几杖三雍之间出则卷绣百工之上使勲贵敛衽畏杨绾之清朝埜洗心化毛公之俭纪话言於竹帛肖形像於丹青垂之无穷然後为称某顷陶善诱尝辱异知虽借势於王公大人非迂愚之敢及惟侍坐於先生长者尚梦寐之不忘逃闻纶綍之传独阻门阑之庆仰怀曩遇不胜下情

贺辛给事啓

恭审光奉制书就升鉅镇用人惟已上方询事而考言知我其天公岂枉寻而直尺世不容而何病道有命而後行虽殿藩犹屈於经纶然亲擢益知於眷注搢绅颂叹道路驩欣伏闻先王相我後人上天为生贤佐若时大任之降将啓非常之元故必雍容回翔以养其康济之才排摈斥疎以积夫迕遐之望遗之险艱以励其志待之耆老以全其能周公居东归相成王之善治谢傅高卧晚为江表之宗臣勲名卒至於伟然物理殆非於偶尔恭惟某官气守刚大性资方严其在朝廷有金玉王度之益其位岳牧有股肱帝室之劳指朋党於蔽蒙胶漆之时发奸蠹於潜伏机牙之始庭叱义府面折公孙可否一语而不移利害十年而後验人服其识家诵其言皓首来朝方共推於宿望丹心自信宁少贬於诸公洗鄙夫患失之风增善类敢言之气

頽仰无媿进退两高不可诬者忠邪之情不可揜者是非之实出守未几见思已?惟是谋帅之难孰先旧德之举然而方政机之虚席宜召节之在途开慰斯民始自今日某迂愚不肖窮薄多奇虽道德初心之已非犹节义大闲之可勉侧闻休命?激懦衷辄忘奏记之狂盖出执鞭之慕仰祈闕量曲贷严诛

富福州察推啓

识面卜邻固常怀於鄙志杜门扫轨殊未接於英游於此相逢慨然永叹恭惟某官城南旧望江左名流高韵照人清言絶俗过眼不再真读五车之书落笔可惊倒流三峡之水岂有如公之人物犹令随牒於海邦政恐驿召之行弗容席暖之久某奔驰斗粟流落二年久亲柱後之惠文高束牀头之周易政须名理之语一洗簿书之尘

贺何正言除左司諫啓

恭闻亲诏登用大贤以白首魁伟之臣膺明时諫诤之任善类相庆公道遂行窃以逆指犯顔人疑於甚难而君子谓之易盛朝治世衆安於无事而识者以为忧然非身居献替之官与夫素着中外之望虽抱此识何自而言邈乎太平之难逢考之前史而可见以正人遗圣主实惟祖宗敷佑之心而公议在朝廷岂非庙社无疆之福恭惟某官心潜百圣学贯羣经老成之风师表一世直养之气充塞两仪立朝寛大而持平论事雍容而守正虚舟触物此自信其无心怒发冲冠彼安知夫有体居多圣政之助始明儒者之功非独诚伪不可以欺要之忠邪久而自判上眷既厚人望又归遂当登四辅之聯岂久置七人之列某顷以朴学尝预诸生虽在泥涂犹是门阑之旧物竟无名第亦窃塲屋之虚声敢俟明公勲业之成勉继輿人歌颂之作不足为报姑尽此心

贺汤丞相啓

恭审显膺典册进冠公台廷告未终搢绅相庆邮传所及夷夏归心焕君臣嘉会之逢侈庙社无疆之福恭惟某官民之先觉国之宗臣精义探系表之微英辞鼓天下之动至诚贯日历万变而志意愈坚屹立如山决大事而喜愠不见一昨力辞重任之降屈居次辅之聯三年有成九功惟叙方当诏令之诞布孰测谋谟之所从凡有大政事之慰斯民咸曰右丞相之告於上虽家置一喙以颂德士予千金而示恩窃揆其情未至於此盖庙堂之寄代天而理物帷幄之算经远而折冲平居用小大之材欲其披肝胆以自尽一旦付疆場之事欲其捐性命而不辞自非有以素服衆心则将谁与共济大业晋文侧席於子玉回纥下拜於汾阳王商以忠謇立朝则单于不敢仰视平津以嬖嬖充位则淮南谓若发蒙自昔论世之盛衰莫如置相之当否譬犹震风凌雨之动地夏屋愈安鸿流巨浸之稽天方舟独济人望所属国体自尊今者大明弼亮之勲正席辯章之任守文致理将见隆古极治之时应变制宜必有仁人无敌之勇圣主以此属元辅学者以此望真儒行或使之天所命也某猥以孤远辱在记怜如其少道衣食之忧犹能颂中兴之盛德必也遂老江湖之外亦自号太平之幸民穷达皆出於恩私生死不忘於报称

除删定官谢丞相啓

收置钧陶固已踰於素望责功铅槩仍俾効其寸长神观顿还尘埃一洗欲叙丹衷之感不知危涕之横伏念某独学寡闻倦游不遂澜翻记诵愧口耳之徒劳跌宕文辞顾雕虫而自笑低回久矣感叹凄然使有一人之见知亦胜终身之不遇然而稟资至薄与世寡谐在乡闾则里胥亭长之所叱诃仕州县则书佐铃下之所蹈藉声名湮晦衣食空无方所向而辄窮已分甘於永弃侵寻末路邂逅殊私招之於衆人鄙远之余挈之於半世浮沈之後既赏音於一旦又诵句於诸公岂料前史之美谈乃获此身之亲见兹盖伏遇某官斯民先觉吾道宗师大学诚明上下同流於天地至仁溥博远近一视於华夷和气行礼乐之间治道出政刑之外惟公故无所不取惟大故无所不容乞令顽钝之资亦预甄收之数重念某家世儒学非有旗常鍾鼎之勲交友渔樵又无金张许史之助特缘薄技获齿诸生形顾影以知归口语心而誓报死而後已天实临之

谢内翰啓

来自远方骤参要局知其爱闲而多病故为湔俗吏之尘勇於悼屈而哀穷故使污清流之末繫禁近吹嘘之过蒙庙堂选拔之优俯仰以思愧思交至伏念某读书有限识字不多岁月供簿领之劳衣食夺山林之志穷虽已甚狂不自懲性本懦孱辄妄希於骨髄仕由资荫乃?恶於膏粱坐此湮厄而莫收未忍依违而少贬比游輦轂久困氛埃望见车骑之雍容传诵文章之闳丽不胜慕乡求备使令门墙才许其一登声价已增於十倍夫富贵外物惟事贤可谓至荣父子虽亲然相知犹或不尽曾是疎远至孤之迹又无壤奇可喜之能不自省其何繇乃遽叨於斯遇非常之幸从古罕闻此盖伏遇某官自明而诚养气以直行着四方之防范文专一代之统盟勤於教人务传圣师之道广於求士用报睿主之知岂谓孤生亦蒙至意称於天下曰知己谁复间然虽使古人而复生未易当此惟誓坚於名节庶不辱於恩私

谢谏议啓

来自远方骤参要局因书生铅槩之业使效尺寸之长脱俗吏簿领之烦曲从疎野之性傥非恩旧每赐揄扬自顾 然何以得此伏念某读书有限识字不多岁月供道路之劳衣食夺山林之志穷虽已甚狂不自懲材本懦庸辄妄希於骨髄仕由资荫乃?嫉於膏粱衆恶所丛孤生余几自顷并游於場屋亦尝辱遇於宗师徒窃虚声莫禱真赏一斥遂甘於蹭蹬残年絶望於騫腾此在常情所宜显弃岂谓并容之度未移宿昔之私既许瞻君子盛德之容渊乎似道又使知大人接物之际欢然有恩乞致庸虚误蒙甄录此盖伏遇某官养气以直自诚而明大学中庸发挥千岁之旨生民清庙主盟一代之文吾道由此而复传善人有恃而不恐施及区区之旧物不忘眷眷之?情求羣称於门墙惟益坚於名节死而後已天实临之

渭南文集卷六

卷七

钦定四库全书

渭南文集卷七

宋 陆游 撰

谢曾侍郎啓

结绶弹冠既过寻常之望怀铅抱槧获输尺寸之长永言卵翼之恩忽焉涕泪之集伏念某读书有限与世无缘吟梁甫於草庐倒天吴於短褐借助於金张许史既家世之不为从事於米盐簿书又生平之未学一昨奔驰薄宦流落殊方土风顿异於中州宿疾遽侵於壮岁食有鼃蛇之异医无鍼石之良凜然怀性命之忧不暇计饥寒之迫毁车杀马逝从此以径归卖劔买牛分余生之永已岂谓始终之不弃俯怜缓急之谁投出泥涂而濯清风披泉扃而起白骨称於天下曰知己顾岂在於他门虽使古人而复生亦难胜於此赐兹盖伏遇某官尽心知性惟道集虚气塞天地之间辞编诗书之策授业解惑务广先师之传扬善进贤用为圣主之报广则或至於杂怨则不责其全是致庸虚亦污题品然而仰观明公之勇退每蹈前哲之难能超轶絶尘优游卒岁虽贤愚之甚远顾师慕之敢忘誓当力戒它岐益坚素守祸福有命岂其或置於胸中名节傥全是则不辱於门下终期末路可复斯言

刪定官供职谢啓

拔茅以征冒处清流之末及瓜而往曾无累月之淹恩重如山感?至骨伏以刑措不用邈矣成康之隆法家者流肆於秦汉之际以吏为师而先王之泽熄以律为书而圣人之道微是以鄙夫深文而不知还儒者高谈而靡适用惟我国家之制克合古今之宜置局而总以弼臣拔材而列之官属必有远关盛衰之法以授有司故非深達体要之人不预此选岂容懵甚亦在数中兹盖伏遇某官学极诚明才全经纬道枢善应万变不外於吾心仁风远翔庶物悉陶於和气矜怜坠绪收拾遗材致兹流落之余被此生成之赐某敢不讨寻废忘激励懦庸念彼三尺法安出哉要必通於古谊否则一狱吏所决耳尚奚取於诸生冀收毫发之劳庶逃俯仰之媿

贺黄枢密啓

恭审显膺制书进贰枢府威望之重宗社所凭天其相有永之图日以冀中兴之治窃以朝廷之政属在帷幄之臣方无事之时雍容坐谈则夫人而皆可应一旦之变酬酢曲当非有道者不能历观昔人盖鲜全美王导之襟量而学不至德裕之术略而器未优故晋卒安於江东唐莫追於贞观有志之士太息於斯恭惟某官心正意诚任重道远躬卓行於苟且自恕之俗推絶学於散缺不全之经凜然一家之言发乎千载之閤加之博极坟史得兴亡治乱之由综练典章识沿革始终之际气足以慑奸慝明足以察忽微其在掖垣惟公议是达其侍经幄惟王

道是陈果由师锡之同入总本兵之寄然而方时多故为计实难夷狄鸱张肆猖狂不逊之语边障狼顾怀震扰弗宁之心东有淮江之冲西有楚蜀之塞降附踵至人心虽归而强弱尚殊踊跃请行士气虽扬而胜负未决坚壁保境则曷慰后来之望辟国复土则又有兵连之虞窃惟明公素已处此某顷联官属获侍燕居每妄发其慙愚辄误蒙於许可虽辍食窃忧於谋夏而荷戈莫効於防秋敢誓糜捐以待驱策

除编修官谢丞相啓

揆才无似得禄已优不知何取於圣时顾使辄尘於清选既难称塞但有慚惶伏念某学术空疎文词朴拙顷游場屋未能絶出於原夫久返山林但欲追酬於歛乃至於手编简册身缀鵷鸾岂惟忘魏阙之心固已息邯郸之梦敢图一旦辄越稠人与闻国典之权輿猥备枢廷之掾史此盖伏遇某官斯民先觉盛世元臣亮天以格物之诚化俗用修身之道虽江海至广固无待於细流念燕雀兼容亦何伤於大厦故令滥进以广旁求然而某天赋甚穷自量尤审层台起於累土虽?知獎拔之心浮屠成於合尖冀终遂迂愚之分敢忘惕励用对陶成

谢参政啓

揆才无似得禄已优不知何取於圣时顾使辄尘於清选既难称塞但有慚惶伏念某至拙无能下愚不肖分章析句於蓬枢瓮牖之下学但慕於俚儒娱忧纾悲於山颠水涯之旁文不供於世用比坐啼号之迫浪为衣食之谋投檄无缘强顏可笑橘踰淮而为枳窃自慨然泥出井而为尘望胡及此手编简册身缀鵷鸾笔研重寻氛埃一洗兹盖伏遇某官至仁无间大德有容文兼衆作而不以穷人识高一代而乐於成物虽江海至广本无待於细流念燕雀兼容亦何伤於大厦致兹久困遂得少通然而某天赋甚窮自量尤审层台起於累土虽?知獎拔之心浮图成於合尖冀终遂迂愚之分敢忘惕励用对陶成

谢赐出身启

明廷锡对晨趋甲帐之严亲札疏恩莫拜丙科之宠感?涕陨媿极汗流窃以国家取士之方固非一路学者进身之始又恶多岐故祖宗非私於俊造之科而公卿罕出於选举之外至膺特诏尤号异人颂诗足以配弦歌则梅尧臣出於皇佑文章足以垂竹帛则王安国起於熙宁或友朋借誉而不以为私或兄弟当涂而莫之或议厥繇至当故可无慙如某者才朴拙而无奇学迂疎而寡要自悲薄命久摈名场敢谓一朝遂叨赐第门外之袍立鹄恍记少时诏中之字如鸦犹疑梦事兹盖伏遇某官股肱王室领袖儒林以谓设一目之罗盖非得爵之道至於售千金之骨抑明市骏之心宁借妄庸以风四方不忍拘挛而废一士某敢不讨寻旧学企慕前修儒者之弊劳而无功誓少求於实效圣君所行即是故事将时得於遗材敢仰贺公道之兴非独叙私情之谢

富人贺赐第启

比对明廷猥尘特举两章控避莫回天地之恩一纸来临复拜友朋之赐未知称塞积有惭惶伏念某才本迂疎识尤浅暗顷游場屋首犯贵权既憎糠播之偶前复恶瓦注之辄巧讼刘蕡之下第空辱公言与李贺而争名几成奇祸败期末路复齿清流晨趋甲帐之严莫拜丙科之宠此盖伏遇某官学穷游夏文媲卿云槐花黄而并游每记帝城之旧荔子丹而共醉未忘闽岭之欢特假溢言俾膺异选千名记佛虽叨学者之光荣一日看花宁复少年之意气但怀感佩未易敷陈

贺张都督啓

恭审诞膺册书首冠枢府运筹决帷幄之胜遂定庙谟假钺督中外之军仍专阃寄传闻所逮欣拚惟均恭惟某官降命应期自天生德许国本事亲之孝化民用克己之仁早际圣神徧居将相书虞渊取日之绩恍若古人咏东山零雨之诗适当初政属边烽之尚警烦幕府之亲临元黄之筐争归赤白之囊几息果洊膺於徽数用卒究於宏规仰惟列圣之恩实被中原之俗耕田凿井举皆?养之余寸地尺天莫匪照临之旧岂无必取之长算要在熟讲而缓行顾非明公谁任斯事不惟衆人引颈以归责固亦当宁虚心而仰成某获预执鞭欣闻出紵斗以南仁杰而已知德望之素尊陝以东周公主之宜勲名之益大虽不敢纪殊尤於竹帛尚或能被一二於弦歌冒渎之深震惶无措

问候洪总领啓

借势於王公大人夙怀志愿侍坐於先生长者适有夤缘仰伟度之兼容抚孤踪而知幸伏念某至愚不肖甚拙无能一官初迫於饥寒百虑更成於疾疢缀鸳鹭会朝之列自伤勸鹤之摧颓望鱼龙变化之涂独类寒龟之藏缩比求祠庙归扫邱坟犹出佐於近藩实大踰於素望始终徼幸进退惭惶恭惟某官材擅国华德推世美崇论宏议质诸鬼神而不疑大册高文编之诗书而无愧历风波并起之嶮挺金石可开之诚雍容回翔而愈高康济之资排摈斥疎而弥积迹遐之望天将降於大任上惟图於旧人荷从橐於西清方俟论思之益拥使□於北固犹烦道德之威某窃覬须臾钦承约束快威风景星之覩幸孰过焉辱高山流水之知愧其自此

龠钤辖啓

列属枢廷自不安於清选佐州京岷犹误被於明恩方修候问之恭已拜緘滕之赐情文甚宠感愧兼?伏惟某官胄出山西书传圯上绿沈金鎖虽勇略之无前缓带轻裘亦风流而自命兹膺帝眷暂总兵符遂容顚顚之余获厕游从之末春容方丽戎幕多闲冀加卫於寝兴用大符於颂祷

问候叶通判啓

列属枢廷自不安於清选佐州京岷犹误被於明恩敢谓穷途获亲耆德恭惟某官性资直谅学术渊源恺悌宜民固已高於治绩忠诚许国曾未究於远猷行膺召节之严趣上禁途之峻

虽仰观翔翥凤凰方览於德辉然犹幸须臾虎鼠同称於相属春容方丽燕寝多闲冀调兴止之宜用副倾依之素

俞吴提宫啓

伏蒙讲修拜礼惠示函书温乎其容若加亲粲然有文以相接虽快景星之覩终慙明月之投伏惟某官华国英材通家旧好未尝少贬於公卿势位之地顾乃独厚於江湖顛顛之人卖劍买牛念即归於农亩乘车戴笠尚永记於交盟

贺叶提刑啓

伏审显奉玺书改临畿服坐於庙朝而施利泽虽尚郁於远猷送以礼乐而有光华实寢隆於睿眷传闻之始开慰实深恭惟某官学造宫廷行尊防范阅议两朝之望高文百世之师入践掖垣有斧藻圣谟之益出乘使传有宣道王意之劳周旋百为终始一节凤凰之翔千仞虽瞻仰咏叹之实同虎豹之守九关终排摈斥疎而莫进窃惟大任之降将启非常之元必使备历於阻难所以终成其器业今者承边鄙宿兵之後加夏秋积潦之余疾疴相熏流逋未止忧軫上烦於宵旰抚摩方属於忠贤伏闻亲奉尺一之书下慰亿兆之望坐席未暖握节遽行盖将访灾沴之由施寬平之政挈之沟壑之内厝诸衽席之安老稚聚观感涕相属迨及嘉猷之告宜膺共政之求某久去门墙寢疎牋牍抠衣函丈每怀问道之诚负弩前驱即下望尘之拜其为欣拚未易敷陈

贺吕知府啓

恭审光膺中诏洊畀左符協於师言出自上意凡在部封之内举同拚舞之情恭惟某官襟量恢阔文辞卓伟飞书走檄名早震於华夷仗节拥旄功每书於竹帛比属边烽之静力辞宫钥之严虽北阙之书至於屡上然东山之志宁许遽从果被睿知复膺重寄仁风穆若方回比屋之春威望凜然先破臣奸之胆某自欣末路得附余光不汝疵瑕固荷包荒之度令公喜怒敢招越分之尤惟殫惕励之诚用对眷知之好

上陈安抚啓

佐州北固麦甫及於再尝易地南昌瓜末期而先代虽千里困奔驰之役幸一官托覆护之私伏念某孤学背时褊心忤物方牵聯而少进已恐惧而遽归偶充振鹭之廷自知非称不失屠羊之肆其又奚言比自列於私嫌遂再污於除目始终徼幸俯仰慙惶恭惟某官道极诚明器函康济阅议两朝之望高名百世之师经术渊源造大学中庸之妙文章简古在先秦两汉之间久以台省之英出试蕃宣之绩虽弗容而君子乃见公初无欣戚之殊然必进而朝廷始尊国实系安危之重伫闻休命大慰衆心某再扫余尘增光末路顾才能之有限加疾疴之未平先生琴瑟书册在前愿卒门人之业小子洒扫应对则可敢瞻别驾之功

上史运使啓

佐州北固麦甫及於再尝地易南昌瓜未期而先代虽千里困道途之役幸一官在部封之中
伏念某学本小知器非远用昨寢寻於薄宦偶比数於诸公除目虽频不出百僚之底骇机忽
发首居一网之中谓宜永放於穷阎犹得出丞於近郡复缘私请更冒明恩超超空凡马之羣
实非能辨默默反屠羊之肆其又奚言侥幸非常惭惶莫谕恭惟某官英姿山立大度渊淳不
媿於天而不忤於人卓矣诚身之学有考於前而有验於後大哉致主之言顾自信之甚明虽
不容而何病使事有指姑少试於澄清治具毕张要终烦於经济某小舟已具湧刺将前虽多
病怀归徒费嘘枯之力然至仁逮下实寬束湿之忧

渭南文集卷七

卷八

钦定四库全书

渭南文集卷八

宋 陆游 撰

龠发解进士啓

都骑来临方快景星之先覩雄文授?更慙明月之暗投藏弃为荣幸甚过望伏惟解元先辈材高衆隼学富三余将鸿渐於天廷姑龙骧於学海岂图羈宦适与荣观万里抁风莫测云程之远一第溷子行闻桂籍之传欣佩兼怀敷宣罔既

龠廖主簿发解啓

都骑来临方快景星之先覩雄文授?更慙明月之暗投藏弃为荣幸甚过望伏惟某官文高艺圃行着乡评虽数奇如李广之封犹强饭有廉颇之志贾勇千人之敌策勲百战之余岂意羈游与观盛事故将军美妄校尉知久郁於壮图新天子用老舍人宜即膺於显擢其为赞喜莫究占言

上二府乞宫祠啓

白首而困下吏久安佐郡之卑黄冠而归故乡辄冀奉祠之乐恃廊庙并容之度忘江湖远屏之踪敬布忱诚仰干造化伏念某读书有限与世无缘岁月供簿领之劳衣食夺山林之志拊心自悼顾影知慙傥少逭於饥寒誓永投於闲散顷以牵聯而少进惕然恐惧而弗宁亟辞振鹭之廷径返屠羊之肆优游食足敢陈楚些之穷衰疾土思但抱越吟之苦伏望某官因材授任与物为春察其愚无能乏细木侏儒之用哀其穷不自活捐太仓红腐之余特假闲官使安晚节弃窳宪如孤雏死鼠宁足矜怜譬杜牧以白骨游魂少加恤养某谨当收身末路没齿穷山玩仙圣之微言乐唐虞之盛化杜门扫轨固莫望於功名却粒茹芝冀羸成於道术虽无以报犹不辱知

贺吏部陈侍郎啓

恭审显膺帝眷进贰天官成命甫行羣情交庆若用人每皆如此则公论宁复间然窃以自昔抚运而有邦孰不好贤而愿治然贤能之进常齟齬而不合治安之会亦稀阔而难遭京房事汉则见谓小忠孔子去鲁则自以微罪有志之士太息於斯方今主上嗣无疆之庆基恢有为之远略思求人杰俾代天工当馈叹无萧曹共传斯训耻君不及尧舜今得其人采四海之公言寘六卿之要地将期共政以责奋庸恭惟某官道大而气刚才全而业钜方登台阁则已挺

然称辅相之器及试岳牧则又卓尔着藩垣之劳福及京师名震天下使能少贬久已趣还顾乃周旋四镇之间淹历五年之久积排摈斥疎而莫置殆艱难险阻之备更道之将兴理不轻畀岂惟论思献纳陈万世之策遂将经纶康济致三代之隆某早出门墙晚依幕府海言狂耳盛德铭心驾下泽之车虽已安於微分磨浯溪之石尚拟颂於中兴

贺莆阳陈右相啓

恭审廷扬大号位冠羣公识者咨嗟益信道行之有命闻而兴起共知天定之胜人某尝因故老之言窃考昭陵之治乾坤大度固兼容而罔间日月之照实无隐而弗临小人虽有幸进而善类常多詖论亦或抵巇而公议终胜故士气屡折而复振邦朋既久而自消谔谔昌言天下诵道辅仲淹之直巍巍成绩史臣书韩琦富弼之贤固尝端拜於遗风岂意亲逢於盛旦恭惟某官名盖当代材高古人瑰伟之器足以遗大而投艱精微之学足以任重而道远方孤论折羣邪之鋭盖一身爲衆正之宗徇国忘家惟天知我论去草者絶其本宜无失於事机及驱龙而放之菹果不动於声气卓矣回天之力孰曰拔山之难积此茂勲降时大任岂独明公视嘉佑之良弼初无间然亦惟圣主享仁祖之治功殆其自此某孤远一介违离累年登李膺之舟恍如昨梦游公孙之合尚冀兹时敢誓糜捐以待驱策

谢王宣抚啓

杜门自屏误膺物色之求开府有严更辱招延之指衔恩刻骨流涕交颐伏念某独学寡闻倦游不遂澜翻诵说愧口耳之徒劳跌宕文辞顾雕虫而自笑顷预朋来之列适逢圣作之辰玉音亲锡於儒科奎翰特嘉於朴学曾未乾於诏墨已亟远於周行病骨支离遭涂颠沛弩马空思於十驾沈舟坐閱於千帆方所向而辄穷已分甘於永弃侵寻末路邂逅赏音招之於衆人鄙远之余挈之於半世奇穷之後夫富贵外物唯事贤可谓至荣父子虽亲然相知犹或不尽曾是疏远至孤之迹又无瓌奇可喜之能不知何由坐窃殊遇称於天下曰知己谁或间然虽使古人而复生未易当此此盖伏遇某官民之先觉国之宗臣精义探系表之微英辞鼓海内之动至诚贯日践危机而志意愈坚屹立如山决大事而喜愠不见虽裴相请行於淮右然萧公宜在於关中姑乞外庸即登魁柄凡一时之荐宠极多士之光华岂谓迂疎亦加采录某敢不急装俟命碎首为期运笔飒飒而草军书才虽尽矣持被刺刺而语婢子心亦鄙之尚力着於微劳庶少伸於壮志

通判夔州谢政府啓

贫不自支食粥已踰於数月幸非望及弹冠忽佐於名州孰知罪戾之余犹在悯怜之数衔恩曷报抚已知慙伏念某少也畸人长而独学好庄周齐物之说乐以忘忧读嵇康养生之篇慨然有志秉心不固涉世寢?儿女忽其滿前藜藿至於并日屡求吏隐冀代躬耕亦尝辱记其姓名固欲稍畀之衣食费元化密移之力不知几何悼孤生一饱之艰乃至如此卒叨薄禄实谓殊私此盖伏遇某官黼黻帝猷权衡国论开公孙之东阁共欣多士之彙征解晏子之左骖不忍一夫之独废召来和气力致隆平惟是鱼复之故城虽号乌蛮之絶塞乃如别驾实类闲官

况惇惇方起於徒中宜凜凜过虞於意外固弗敢视马曹而不问亦每当占纸尾而谨书岂有功劳能自表见念昔并游於英俊颇尝抒思於文辞既嗟气力之甚卑复恨见闻之不广今将穷江湖万里之嶮历吴楚旧都之雄山巔水涯极诡异之观废宫故墟吊兴废之迹动心忍性庶几或进於豪分娱忧纾悲亦当勉见於言语傥麤传於後世犹少奋於?知过此以还未知所措

谢洪丞相啓

薄技効官曾是青袍之朝士明恩起废更为朱绶之山人虽莫与於鸿钧犹窃陶於盛化敢修尺牋敬布寸心伏念某承学孤生辍畊塲仕顷输劳於铅槩尝厠迹於绅綬再岁京华每有鳬雁少多之叹一时士类或为草木臭味之同因遭衆口之铄金孰信淡交之如水讵由寬貸得遂退藏幸未抵於投荒乃复污於除吏兹盖伏遇某官应期降命同德格天以渊源之学润色皇猷以直大之气折冲世变彝鼎方书於伟绩涛澜忽起於畏涂际嘉会之风云将开平治界凶人於豺虎亟正谗诬乃顾近藩暂劳卧护锄耰竞劝流逋已见於四归弦诵相闻风俗殆期於一变俯念编氓之贱尝居部吏之间假之余光使不终废而某自安隐约久困沉緜和尧民击壤之歌徒欣末路刻唐士齐天之颂尚俟他时

上王宣抚啓

薄命遭回阻并游於簪履丹诚精确犹结恋於门墙敢辞蹈万死於不测之途所冀明寸心於受知之地伏念某稟资凡陋承学空疎虽肝胆轮囷常慕昔贤之大节乃齿牙零落犹为天下之穷人抚劒悲歌临书浩叹每感岁时之易失不知涕泗之横流昨属元臣暂临西鄙获厠油幕衆贤之後实轻玉关万里之行奋厉欲前弩马方思於十驾羈穷未熬沉舟又閱於千帆伤弱植之易摇悼鸿钧之难报心危欲折发白无余如输劳効命之有期顾陨首穴胸而何憾兹从剡曲来次夔关虽未覩於光躔已少纾於志愿此盖伏遇某官应期降命生德自天器宇魁閎鍾太行黄河温厚之气文章钜丽有庆历嘉佑太平之风取人不弃於小材论事每全於大体念兹虚薄奚足矜怜然遭遇异知业已被展前之荐使走趋远郡岂不为门下之羞傥回曩昔之恩俾叨分寸之进穷子见父可量悲喜之怀白骨成人尽出生全之赐过此以往未知所裁

谢晁运使啓【救火後发举状】

事出权宜弗及先言而後救恩加慰藉乃烦并蓄而兼收甫定惊魂已横感涕伏念某灰心贱士焦尾余生学才比於聚萤智莫阶於束緼偶缘羈宦获托余光别驾治中已负旷瘵之责祝融回禄更慙备御之疎方炎官热属之鼎来实杯水輿薪之弗救烟埃蔽日纒缶交涂郁攸遽骇於黔庐仓卒仅知於顾府焦头烂额本资衆力之同露盖暴衣至屈使华之重惟当治罪宁可论功此盖伏遇某官造道精?宅心诚敬曲记荧荧之迹特收赫赫之威怜巢燕之几焚脱池鱼於必死弗用玉璫方勤人事之修等与牛车俾离火宅之怖某敢不仰思难称俯愧无劳深念客言更谨徙薪之戒广储水器常如濡幙之时过此以还未知所措

谢夔路监司列荐啓

意象累然揣分方安於下吏宠光异甚文章遽上於公车莫测何由但知难称伏念某久嬰瘳病见谓散材偶从诸老先生之游羸得前言往行之略可咨今事少年误窃於虚名力洗陈言晚节方慙於大学一来楚硤再閱王春惟体重於藩方故职均於曹掾占名惟谨幸逃有蠚之嘲窃禄甚微屡起无鱼之叹岂期僉论骤及孤踪遂令枯槁之余渐有敷荣之望此盖伏遇某官器函魁磊议极崇猷虽持秋霜夏日之严每廓沧海洪河之量大呼相和或容醉吏之狂重听何伤曲恕聳丞之老虽深知其无用亦并采而不遗某敢不强恕求仁质直好义庶几夙夜或免小人之归犹有鬼神尚图国土之报

龢薛参议啓

伏审光奉制书来参戎幙山川信美久嗟人物之寂寥车骑甚都一耸吏民之瞻视极知趣召之在迩犹幸小留而後东恭惟某官器度清真风规高亮骥行千里腾骧本结於主知虎拒九关排斥遂收於朝蹟惟是雄豪之气寓於钜丽之文南吊沈湘西赓谕蜀顾卧龙之遗蹟有化鹤之故城虽左官共叹於滯淹然絶景政烦於弹压某久疎麈尾之诲喜闻鷁首之来联远游之诗固莫追於大手续郊居之赋犹小异於庸人

龢卫司户啓

弹冠巫峡早钦三语之贤振柁蜀江首拜尺书之宠情文两厚感恟兼深伏惟某官自立修名蚤收上第千人所见共推高明练达之才一座尽倾行接醞藉雍容之论岂独有光於吾党固将增重於此州至於痛惩文法之疎一振廉隅之坏非俗吏所为也微君子其能乎愿疾其驱用谐所冀

与何蜀州啓

漂流万里可知已老之头颅赞貳一城复得本来之面目将就脂车之役敢稽削牍之恭伏念某小智自私大惑莫解自收朝蹟久困宦游冒别驾治中者三州假军谿祭酒者数月老骥伏枥虽未歇於壮心逆风撑船终不離於旧处忘栖栖之可笑复挈挈以此来恭惟某官旷度清真高标峻洁体道自得有见於参倚之间受气至刚不移於毁誉之际顾公言之允穆知追诏之方行敢意穷途猥尘上佐然某比缘多病?愿少闲岁计之有余当守平生之素志治行其无事更归长者之余风

龢交代杨通判启

瓜戍及期幸仁贤之为代萍踪无定怅候问之未遑敢谓劳谦特先荣翰伏惟某官渊乎似道直哉惟清风致虽高不废应酬於衆务文词甚丽要皆原本於六经所宜问津於黄扉青琐之间何至涉笔於赤甲白盐之下即闻号召遂陟清华某猥以陈人偶叨末契道途迫遽仅能占

报於记曹舟舫轲峨弗获往迎於市暨归依之素敷叙奚殫

与赵都大啓

洊被台移摄陪幕辩方剡章而俟报辄怀檄以径前迫於奇穷作此顽钝冒世俗之所悯笑赖
門下以为依归伏念某下愚无知大惑不解罪宜永斥朝蹟已收者十年身困远游车辙几环
於万里比官巴硤旋客塞垣岁月不知其再周形影相顾而自悼支离病骨无毁而亦消羈旅
危魂虽招而未返念惛惛之安往复挈挈以此来岂忘慙羞实恃矜惻老马已甘於伏枥敢望
长途穷猿方切於投林况依茂荫斯盖伏遇某官资函英达学蕴渊源早奋奇谋盖处囊而立
见晚更剧任真游刃以无前宝储直中禁之严玉节寄西陲之重曲怜狂简自致漂流每假借
於余谈为经营其一饱致兹小憩尽出大恩某敢不痛洗昨非姑休疲役松陵笠泽虽賒故国
之归期锦江草堂聊窃老师之补处

渭南文集卷八

<集部,别集类,南宋建炎至德佑,渭南文集>

卷九

钦定四库全书

渭南文集卷九

宋 陆游 撰

与成都张阁学啓

薄游万里最为天下之穷摄守一官猥与幕中之辩将携挈而就食敢削牍以告行伏念某下愚难移大惑莫解光阴晼晚已逾不惑之年簿领沉迷犹在无闻之地嗟征途之可厌舍旧馆而谁依为晏平仲执鞭既云素愿就谢仁祖乞食寧复自疑兹承行省之移遣备大藩之属虽剡章之未报辄怀檄以径前冒行世俗之讥诃实恃门阑之知獎老马已甘於伏枥敢望长途穷猿方切於投林况依茂荫恭惟某官学函经济洞极诚明秉心无邪不媿於頼仰之际体道自得有见於参倚之间学倡诸儒惠加多士虽困穷之自取亦提挈而不遗照隐察微每能得之濠上哀穷悼屈几若推之沟中施及孤生亦叨异顾某敢不暂休疲役痛洗昨非陪莲幕之英游虽知迟?居草堂之补处尚窃光华

畬勾简州啓

近被台移来陪幕辩以海内孤寒之迹假天涯独冷之官但虞讥诃谁肯慰藉忽奉华笺之况岂胜末路之荣伏念某性资冥顽问学衰废留落殊方者累岁奇穷举世而一人虽梦寐思归类泽国春生之雁而巾瓶无定如云堂旦过之僧比叨阍属之招实过埜人之分方剡章而待报忽捧檄以径前久矣倦游幸兹小憩此盖伏遇某官风猷凝粹志节清真念依依浪迹之安归假亶亶余谈而?助遂容萍梗暂息適途惟此意之甚恩实衰俗之创见而某自侵晚景久歇壮心理剡曲之归舟方从此日卜浣花之絶境敢倣先贤

与蜀州同官啓

去国十年饱作江湖之梦佐州万里又寛沟壑之忧伏惟某官材术清通风猷凝粹虽小试尚淹於远业而盛名已着於金言俯念孤踪方厄黄杨之闰特诒妙翰俾生枯枿之春靖言留落之余曷副吹嘘之意感慙交集敷叙奚殫

贺薛安抚兼制置后

恭审玺封緑底疏恩遥下於霄宸幙建碧油开府全临於井络周邦咸喜旧观复还民望息肩之期士知托命之所窃以江淮驻蹕胜人在天定之时梁益宿兵擊首有尾应之势悦事权之少削则脉络之不通宜得股肱之良用增臂指之重至於旁连荆豫外抚戎蛮亭幃騫腾东帙

巴渝之阻关河重复西当秦陇之冲盖有应变於立谈之间岂容稟令於千里之外维时诏旨实契事机恭惟某官渊博有传方严不挠欲言崇议实为百世之师杰作雄辞散落四夷之远入则首处六官之长出而遍膺十乘之华进用虽速而人犹恨其滞淹位望愈崇而心益持於挹损涵湖海胸怀之大负庙堂器业之优将究显庸果膺隆委关中既留萧丞相上遂宽西顾之忧江左自有管夷吾人共望中兴之盛而况丝纶之命适兹弧矢之期维岳降神而申生不应风云之会梦帝赉弼而得说遄观袞绣之归某去国十年佐州万里缚袴服弓刀之役虽恨迫於衰迟曳裾陪簪履之尘尚欣承於闲燕归依之至敷绎奚殫

与李运使启

伏审抗章力请优诏曲从虽暂劳谕蜀之行然益见回天之力恭惟某官致知格物学道爱人亲承西洛之正传独殿中朝之诸老至於盘礴游戏之翰墨嬉笑怒骂之文章过黄初而有余嗟正始之复见飞腾捷路耻烦狗监之吹嘘散落遐荒寧付鸡林之监裁比下九天之号召已倾四海之观瞻不俟驾行命义虽存於大戒可以理夺忠孝果得而两全方帅阃之犹虚以计司而兼莅仰惟台省清华之宿望加以山林高逸之雅怀一琴一龟预想铃斋之静三熏三沐尚陪药市之游过此以还未知所措

上郑宣抚启

伏审显膺大号出董成师自陕以西咸舞歌於德化从天而下即震疊於威灵岂惟玉关翰海驰奏捷之音将见博士议郎上策勲之典士心闔怱国势尊安窃以当今秦蜀之权重无与比中原祖宗之地久犹未归既天定而胜人宜王明之受福非得太行黄河山川所鍾之杰谁复庆历嘉佑华夏太平之基先王克相後人上帝为生贤佐虽远猷辰告暂违帐殿之深严然大臣暑行式慰辕门之徯望复河关其自此知龟筮之悉从恭惟某官气压羣公才周万务识若蓍龟之先见论如山岳之不摇湖海襟怀正在大床之独卧庙堂风采不妨一壑之初心兹辍近司来恢远略弼臣同德何难运帷幄之筹真儒为邦寧止学俎豆之事已庆登坛而授钺遄观推轂而出师先天下而深忧方远同於文正即军中而大拜岂专美於熙寧某流落无归栖迟可叹青衫去国十载於兹白首佐州一人而已顾尚賒於委骨犹复觐於伸眉仰跂光躔虽阻服弓刀之役铺张勲业或能助金石之传过此以还未知所措

贺叶枢密启

恭审显膺明诏进贰鸿枢道大材全固视功名为余事任隆位重盖倚精神之析冲衆志交孚太平可冀伏闻今昔有不移之形势华夷有一定之土疆故彼不可越燕蓟而南侵犹我不能跨辽碣而北守尧舜尚无冠带百蛮之理天地岂忍羶腥诸夏之区又况以本朝积累而当荒陋崛起之小夷以陛下神武而讨衰弱仅存之孱虏重以军民之愤切加之庙祐之威灵当一震於雷霆宜坐消於氛祲夫何玩寇久使逋诛九圣故都视同弃屣两河近地进若登天莫宣方叔之壮猷更类棘门之儿戏坐殫民力孰奋士心上方抚髀而喟然公宜出身而任此恭惟某官负沈雄迈往之略躬英发絶人之姿抚卷慨慷夙有四方之大志立朝开济晚收九牧之

重名果副简求肆当柄任以元龙湖海之气参子房帷幄之筹北斗以南一人谁其伦儗长安之西万里行矣清夷某识面莫先托身最早侧听延登之渥自悲沦落之余虽意气推藏非复雕鹗离风尘之望然饥寒蹙迫犹怀弩马恋栈豆之思敬布於微诚冀少回於曩睠

除制司参议官谢赵都大启

摄郡垒之左符已逾素望备宾僚之右席复玷明恩虽可知己老之头颅犹幸得本来之面目伏念某下愚不肖至拙无能陪蓬峤之後尘最为薄命省桃源之昨梦恍若前身泛然不系之舟莫知税驾之地岂图末路更污除书盖将问道质疑求备老聃之役岂独褻牋染翰预赓严武之诗乐哉斯行幸甚过望兹盖伏遇某官学窥圣域望冠时髦根於高明用以忠恕执诗书之正印司翰墨之衆盟富贵不骄有伟周宗之百世诚明自得屡班汉诏之六条方当日有九迁之荣何难身兼数器之地施及萍蓬之孤迹亦叨俎豆於羣英但不称之是虞岂辱知之敢望已遵台檄即发山城纪文饶戎幕之谈当从兹日窥逸少兰亭之帖或在?春过此以还未知所措

贺叶丞相启

恭审诞告大廷延登真相永惟夷夏戴宋之旧思见太平时则祖宗在天之灵为生贤佐海内幸甚国势岿然某少从史氏之游麤习星官之说去岁之杪垂象有开太微紫垣忽一新於景气神州赤县将?复於提封曾未閱时遽闻休命昭哉天人精祲之际见於君臣会遇之初恭惟某官鍾河岳英灵之姿应乾坤开泰之运器函魁硕论极崇鉉万卷读书尽是经纶之蘊十年遇主独高康济之功比邇井络之归式赞斗枢之重俄进陪於大政果首建於永图股肱良哉耻君不及尧舜期月可也致治庶几成康方将修未央长乐之故宫筑马邑雁门之絶塞兴值礼乐於僵仆之後整齐法制於抢攘之余威懾殊邻玉輦受渭桥之谒治偕邃古金泥增岱岳之封然後遨游谢傅之东山偃息萧何之甲第委成功而不处享眉寿於无穷某远寄殊方久孤隆眷驥老伏枥知难効命於驰驱狐死首丘但拟祈哀於造化

贺龚参政启

恭审光膺明诏进贰政机为治不难其道顾何如耳用人若此吾国其庶几乎传闻四方驩喜一意某闻公论未尝尽废常恐不在於朝廷小人岂必无材惟患与闻於国事诚使元臣大老守纪纲而不紊近习外戚保富贵而有终政一出於庙堂权弗移於贵幸岂独坐消於外侮固将驯致於太平孰成伊尹格天之功其在孟子敬王之学恭惟某官材负超轶器局恢阔造道深故能泛应而不穷进身正故敢尽言而无讳建久安之势成长治之业已收效於立谈开衆正之路塞羣枉之门曾不劳於变色荐绅相贺史册有光然而仁人先天下而忧重矣自任贤者备春秋之责韞哉克终某十年独荷於异知万里敢虚於忠告辄因尺牋罄写寸诚未死殊方或见丕天之伟绩犹期末路终为盛世之幸民

畲交代陈太丞启

抚铜人而叹息方感旧游拾竹马之弃遗偶叨新命曾驰书之未暇愧飞翰之鼎来恭惟某官
鸿渐贤关凤仪朝着杰作纪永和之会邈矣风流清言继正始之音超然名胜初叱乘轺之驭
已勤侧席之思峻陟容台?阶清禁某自怜末路获踵後尘君遣使而有光华即载驱於原埜匠
诲人而以规矩尚窃望於门墙

与钱运使启

犇走九年仅补州麾之选来归万里遽叨使传之华踰分已多置慙无所伏念某稟资甚陋赋
命多艰跌宕文辞本是书生之常态蹉跎名宦独为天下之畸人比由西蜀之归获俟东华之
对进趋梗野占奏空疎谓摈斥之是宜岂超逾之敢望此盖伏遇某官道参圣域学擅经郛爱
惜人材每因借之余论维持公道尤深悯於穷途致此妄庸亦叨临遣某服膺已久拥篲有期
大匠之规矩可师方日亲於函丈小夫之竿牋自见姑少述於万分

畚南劔守林少卿启

比解边城猥叨使传顾惓惓之寡助宜挈挈而亟行揣分已踰置慙靡所伏念某百罹薄命九
折穷途跌宕文辞已困诸生之小技沉迷簿领又无俗吏之能声乃者来归颓然迟暮进趋梗
野占奏空疎宜居摈斥之科敢辱光华之命兹盖伏遇某官道该圣蘊学擅经郛独倡诸儒躬
伊尹天民之先觉兴怜末路念正元朝士之无多致此妄庸亦叨临遣某方图驰问已辱诒书
墨妙笔精虽喜窥於近制头童齿豁更自感於残年

与建寧苏给事启

奔走九年仅补州麾之选来归万里遽叨使传之华忝冒过优慙惶莫喻伏念某多奇薄命子
立孤生小智自私守纸上区区之糟粕大惑不解蹈人间汹汹之风波比由陇蜀之归获奉宣
温之对朴学不足以恭承清问芜辞不足以罄写丹衷谓摈斥之是宜何超逾之敢望此盖伏
遇某官材高而善下道峻而兼容哀元佑之党家今其余几数绍兴之朝士久矣无多曲借余
光少伸末路某逖违燕语喜望提封大匠之规矩可师方亟趋於函丈小夫之竿牋自见姑少
述於万方

与本路郡守启

比奉宸纶躡乘使传方惧误恩之及敢勤流问之先伏念某潦倒寒生沉迷薄宦曲江禁柳早
旅食於京华东阁观梅晚狂吟於蜀道偶然不死复此来归岂其顛顛之余亦玷光华之选此
盖伏遇某官天资其茂朝望素高俯怜萍梗之孤踪每借齿牙之余论遂令留落忽有超逾某
弛担云初登门尚阻川途悠邈敢辞叱驭之行风度清真先想凝香之地

福建谢史丞相启

大钧播物万化悉付之无心小已便私一宦获从於所欲可谓难遭之会空怀莫报之恩伏念某早出门闾尝尘班缀士於知己寧无管鲍之情人之多言诬为牛李之党既逡巡而自引因委弃而莫收晚参戎府之游始被边州之寄知者希则我贵矣何嫌流俗之见排加之罪其无词乎至以虚名而被劾甫周岁律复畀守符会未绾於印章已遽膺於号召行能亡取资望尚轻便朝才毕於对扬使指遂叨於临遣此盖伏遇某官两朝元老千载真儒以道德性命训迪人材以礼义廉耻维持国势哀穷悼屈如伐木故旧之不遗怀昔感今异积薪後來之居上遂容辱琐犹被甄收某敢不斂散视丰凶之宜阜通去农末之病观近臣以其所主期无负於深知非俗吏之所能为或羸施於素学过此以往未知所裁

渭南文集卷九

卷十

钦定四库全书

渭南文集卷十

宋 陆游 撰

上赵参政启

造于王庭既尽除於宿负试以使事复躡被於明恩岂惟寬沟壑之忧遂亦有桑榆之望大钧难报末路知荣伏念某固陋不通迂疎寡合虽抱宿道乡方之志了无赴功趋事之能迨从幕府之游始被边州之寄方漂流於万里望饱暖於一麾岂图下石之交更起铄金之谤素无实用以为颇放则不敢辞横得虚名虽曰侥幸而非其罪甫周岁律再畀守符曾未綰於印章已遽膺於号召遂以羈旅入朝之始首预光华遣使之行此盖伏遇某官造德精微宅心忠厚念锦里十年之卜筑已是蜀人怜萍踪万里之来归特捐汉节繭然迟暮被此恩荣某敢不敛散视丰凶之宜阜通去农末之病观近臣以其所主期无负於深知非俗吏之所能为或羸施於素学过此以往未知所裁

上安抚沈枢密启

造于王廷既尽除於宿负试以使事复躡被於明恩岂惟寬沟壑之忧遂亦有桑榆之望慙汗为之浹背感涕至於交颐伏念某固陋不通迂疎寡合虽抱宿道乡方之志了无赴功趋事之能自屏迹於寬间已頽心於荣进徒中起废方蒙熨道之除望外召还忽奉燕朝之对然而进趋梗野论奏空疎徒叨三接之荣莫陈一得之虑循名责实所宜伏司败之诛含垢匿瑕特俾玷外台之寄兹盖伏遇某官望隆而善下道峻而兼容哀元佑之党家今其余几数绍兴之朝士久矣无多曲借余光少伸末路某敢不求民疾苦絕吏竝缘敛散视时益广仓箱之积阜通助国庶无农末之伤过此以还未知所措

贺泉州陈尚书启

恭审显奉玺书起临藩府庙堂虚位固宜大老之遂归岳牧得人聊见太平之有象恭惟某官道参圣域德冠民彝下视诸公负元龙湖海之豪气独尊九牧擅诸葛宇宙之大名风云自际於明时金石靡渝於素履超然去国之久绰有高世之风虽力避宠名亟欲急流而勇退顾眷求旧德未容袖手而旁观姑暂起於名邦即延登於政路某久违德宇喜听除音承顏接辞恍不殊於曩日质疑问道尚自慰於穷途

畚建寧陈通判启

伏审显膺新渥出貳藩藩逖闻旌旆之临宜有神明之相伏惟某官风规高秀德宇粹夷含英咀华早预?莱道山之选飞英腾茂暂为治中别驾之行虽澹然克守於家风顾藉甚难淹於国器即闻追诏遂陟显途某托契至深开缄窃喜自怜下客久孤国士之知犹冀残年及见郎君之贵

富漳州石通判启

伏审被命佐州涓辰视印士心甚郁谓敛经济以惠小邦天意孰知盖储名望而须大用伏惟某官好是正直择乎中庸崇论宏言挺松栢贯四时之操高文大册擅河江流万古之名谓宜凌厉以横翔乃复逡巡而小却使为治中乃展骥耳虽暂试於外庸不有君子其能国乎当亟还於近列某未遑驰问先辱寄声祭竈而请比邻叹高怀之莫测烹鱼而得尺素藏妙语以为荣

江西到任谢史丞相启

诣行在所方承命以北驰驾使者车复改辕而西上训词甚宠地望加优本宜使之省循乃更增其侥幸伏念某性资鄙陋学问荒唐虽慕长者之余风岂闻君子之大道早亲函丈偶窃绪余曾未免於乡人乃见待於国士知怜覆护殆尘沙旷劫之难逢颓堕摧藏无丝髮微劳之上报昨者甫还吴会即使甄陶超躐既多便安尤极徒以久违於公袞怅然愿事於师门山川间之日月逝矣方坐驰於梦想忽祇奉於诏追深惟幸会之非常但惧奔驰之弗及夫何奇蹇更累生成方仇怨造言投鼠不思於忌器乃保全极力舍牛寧废於衅钟此盖伏遇某官伟量包荒深仁笃旧念招之来而麾之去若匪近於人情谓舍其短而取其长犹可胜於官使故推余润以及枯茆而某筋力疲於往来疾恙成於忧畏质疑问道自怜卒业之何时讼过戴恩尚冀收身於末路

谢赵丞相启

诣行在所方承诏以北驰驾使者车复改辕而西上仰戴公朝之寬大重为远吏之光华伏念某卷曲散材聱牙末学衣食不继自窜夔楚之邦齿髮寢衰倦游陇蜀之境惟习气未忘於笔砚每苦心自力於文词藏之名山本欲麤传於後世待以国士岂期亲遇於钜公记忆不忘诏除屡下虽复顛躓於薄命要为比数於明时而况仍皇华临遣之荣易江表清闲之处优游甚适侥幸难名此盖伏遇某官诞保民彝坚持国是致君密勿伟治具之必张望古慨慷闵道术之将裂务广人文之化仰扶主断之明念此穷途为之择地更令破万卷之读或可成一家之言某敢不开益旧闻激昂懦意稍窃簿书之暇日试求学问之新功櫛栳侏儒傥未捐於大匠雕虫篆刻尚少进於故时庶仰荅於圣知亦麤酬於钧播过此以往未知所裁

谢王枢使启

诣行在所方承诏以北驰驾使者车复改辕而西上训词甚宠地望加优伏念某拳曲散材遭

回末路浪游山泽不知岁月之屡迁笃好文辞自是书生之一癖裴然妄作本以自娱流传偶至於中都鉴赏遂坐於乙夜既阅期年之久两膺诏节之颁虽改命於半途尚乘輶於名部始终侥幸进退光荣兹盖伏遇某官谟明弼谐任重道远以国土待我卓为特达之知於古人求之每极吹嘘之论诏除屡下器使不遗虽云薄命之顛隲要是公朝之记省某敢不窃簿书之暇日求学问之新功櫛栴侏儒愧未捐於大匠雕虫篆刻尚少进於曩时庶仰荅於上恩亦羸酬於钧播过此以往未知所裁

谢钱参政启

诣行在所方承诏以北驰驾使者车复改轅而西上训词甚宠地望加优伏念某少苦贱贫长更忧患名場躑躅几白首以无成宦海漂流顾青衫而自笑不图远戍乃误明恩一麾在巴蜀之间万里促宣温之对清光咫尺睿獎再三略有司资格之常备奉使询谋之选方虞官谤又辱诏追半道遣行虽叹栖迟之薄命频年记录要为比数於公朝兹盖伏遇某官培植衆材主张公论怜其跋前疐後姑令全进退之宜谓其尺短寸长或可责驰驱之効曲加擦拭俾窃便安某谨当增所不能修其可愿侵寻迟暮虽嗟已失於东隅激励衰疲尚及未先於朝露

谢待从启

祈天请命冀循省於丛祠便道之官复驰驱於近甸始终侥幸俯仰竞慙伏念某鄙朴不材荒唐寡学生逢盛际无尺寸之可称久戍远方乞斗升而自活昨蒙临遣已剧超逾但虞薄佑之难胜寧复异恩之敢望未温坐席遽辱赐环初疑误报者再三俄乃真承於尺一文词吏事何者羸堪物论人情居然不允非赖密加於覆护固难终追於顛隲此盖伏遇某官义薄九天量容百辈念器盈则覆推轂无所复施然令出惟行反汗岂其得已遂容末路获忝优除虽愧招麾之频亦惊吊贺之速而某昨缘奔走积困沉绵顾影独悲岂久堪於从宦服勤不怠尚少赎於空餐

谢台谏启

祈天请命冀循省於穷阎便道之官复驰驱於近甸始终侥幸俯仰竞慙伏念某鄙朴不材荒唐寡学生逢盛际无尺寸之可称久戍远方赖斗升而自活昨蒙临遣已剧超逾但虞薄佑之难胜寧复异恩之敢望未温坐席遽辱赐环初疑误报於姓名俄乃真承於诏命人才吏事何者羸堪自计旁观居然不允敢谓并包之广大更令进退之从容此盖伏遇某官山立英姿海涵伟量尽言剧论虽震聳於朝端用恕持平每保全於士类遂容末路获忝优除俯伏以思论报何所而某昨缘奔走积困沉绵顾影独悲岂久堪於从宦服勤不怠尚少赎於空餐

与本路监司启

诣行在所方奉诏以北归驾使者车复改轅而西上稍息道途之役获全沟壑之身揣分已踰置慙靡所伏念某颓然入暮久矣漂流戍陇十年形容尽变还吴万里交旧半空骑马而听朝

鸡已冥心於昨夜卖刀而买耕犊将扫轨於穷阎敢谓频年屡膺严召既衆知其不可亦自揆之甚明所期独往於山林乃得本来之面目此盖伏遇某官英姿山立大度海涵爱借人材每阴借之余论维持公道尤深悯於穷途施及妄庸未忘记省某登门维旧拥簪有期大匠之规矩可师即趋函丈小夫之竿牋自见姑致万分

富本路郡守启

末路赐环本出圣知之旧半途畀节尚承宠命之新揣分实逾置慙靡所伏念某易摇弱植无用散材辙环天下而老於行寧非薄命舟近神山而引之去殆有宿缘方力丐於退藏乃更叨於临遣此盖伏遇某官指南公议推轂时髦顾虽流落之余亦在揄扬之末某方勤驰传未卜登门颂咏之私敷宣罔既

荅寄居官启

赐环半道易节回轅去闽中瘴疠之区得江表清闲之地优游甚适侥幸难名此盖某官义重嘘枯情深推轂每假揄扬之助俾叨临遣之荣【黄抚干宴签判云】老夫髦矣而无能寧有澄清之効君子居之而何陋尚陪名理之余【范干提云】尺素惊传喜论交之未替一樽相属怅道旧之何由【陈检法云】汨没簿书敢冀澄清之効从容谈笑尚为衰晚之光

贺葛正言启

恭审保直北扉方演出纶之命拾遣西省遂输补袞之忠上虚伫於嘉言士美归於硕望恭惟某官英辞擅世伟识絶人诸老先生闻名而愿交学士大夫望风而知敬讐书羣玉之府视草承明之廷比传夜对之从容屡动天顔之忻恻主圣臣直美知千载之逢言听谏行独任七人之责木从绳而必正石投水以奚难某属以乘轺阻陪贺厦比年十渐必尽告於吾君一日九迁将孰先於门下其为拚跃罔罄敷陈

贺周参政启

恭审显奉廷扬进陪国论号令涣焉可述乃专讨论润色之功畴咨若时登庸遂处辅弼疑丞之位国有隆儒之盛士知稽古之荣?以典谟实列於六经臣主难逢於千载高文大册或托之不得其人老师宿儒有死而莫见於世维时鸿硕之彦早冠清华之途成功告於神明大业刻之金石发德音下明诏大哉王言建显位施尊名震於方外一变猥酿枝骈之体复还雄深灏噩之风搢绅窃诵而得师夷狄传观而动色顾於昭代可谓殊勲虽箕颖之志屡陈然莘渭之求焉往恭惟某官任重而宏毅谟明而弼谐以穷深测远之才坐酬衆务以极高蟠厚之气阴折遐冲至於擅世之英辞本皆全德之余事仅少施於一二已见谓於崇飭岂客卷怀经济之图遂欲袖手寛闲之地公母困我初诵留行之言上诚知人亟下延登之命然易简者圣君之命难居者天下之名方仰对於宠光愿益思於挹损茂迪谦尊之吉永为善类之依

贺谢枢密启

恭审显膺出綍进贰本兵蛮夷夺气而息谋朝野动容而相庆恭惟某官英猷经远敏识造微秉心如金石之坚论事若权衡之审主知千载际圣世之风云言责三年极人才之泾渭士恃公平而不恐上嘉孤直之无朋遂由常伯之聯进贰中枢之任较一时之同进得丧孰多付四海之僉言忠邪自见固将力回薄俗尽见明谟网漏吞舟示太平之寬大云兴肤寸泽庶物之焦枯岂惟康济於兹时固足仪刑於後世某早迂记省晚荷甄收虽知薄命之多奇犹复诵言而不置使弩马妄思於十驾而沉舟未羨於千帆求之古人可谓旷世难逢之会报以国士敢忘终身自励之心

渭南文集卷十

卷十一

钦定四库全书

渭南文集卷十一

宋 陆游 撰

贺礼部郑侍郎启

恭审笔橐陞华资论思於禁路丝纶出令兼润色於皇猷共知儒术之益尊孰谓太平之无象恭惟某官好是正直择乎中庸大册高文固已写之琬琰崇言欲议皆可质於鬼神殆将与日月而争光奚止当雷霆而独立惟上圣克勤於总揽察羣臣各尽於才能谓其代予言既久烦於鸿硕求能典朕礼宜无易於老成况以南省之要司仍寓西垣之旧直惟时异数实冠清途然而文关国之盛衰官以人而轻重吁俊尊上帝岂止在玉帛钟鼓之间敛福锡庶民其必有典谟训诰之盛视古无愧非公而谁所冀复如三代礼乐大备之时抑亦追还两汉文辞尔雅之体顾虽老矣尚及见之

畲抚州发解进士启

士论推贤方恨定交之晚乡书擢秀遽勤授贄之恭恭惟某官奥学海涵英姿玉立山川信美生大儒名世之邦弦诵相闻陶圣主右文之化将鹏抃於宦海姑鸿渐於名场某偶此乘轺遂叨劝驾宸廷射策岂惟庆榜帖之驰藏室讐书尚及见云霄之举【解魁云藉甚关名方恨定交之晚褒然擢秀遽勤授贄之恭】

贺施中书启

伏审蓬壶清閤早冠羣仙之游词掖高华旋观一佛之出得人之盛吾道有光恭惟某官秉德醇明宅心夷粹高文大册非复骚人墨客感寓之词崇论欲言尽得宗庙朝廷严重之体久矣絶世而独立固难袖手而旁观况今圣政之新方建太平之业推明天子惻怛爱民之措开慰海内奔走向化之心德意达於四夷号令媲乎三代清议所属匪公而谁且甘泉均号於从臣而西省独称於政本国侨润色虽槩取儒学之长山甫将明必深通天下之务正官名者盖已百祀称职业者凡有几人憂乎其难理若有待动心骇目自兹观大手笔之传削牍濡毫又当庆真学士之拜

上丞相参政乞宫观启

年运而往益知涉世之艰职思其忧独幸侍祠之乐倦倦微志恳恳自陈伏念某臃肿凡材聾牙曲学既无甚高论足以譁世岂有他繆巧用以致身随牒半生问津万里虽誓图微报不胜

狗马之心而俯迫颓龄已罹霜露之疾壮志累然而欲尽残骸悴尔以难支拉朽摧枯竟为排陷哀穷悼屈孰借声光敢图廊庙之尊未弃门阑之旧曲怜不逮力谓无他至於跌宕之文辱在褒称之域二百年无此作矣固难称愜於獎知万户侯岂足道哉私亦激昂於衰懦然而揣数奇之薄命惧徒费於鸿钧与其度越羣材留朱云於东阁曷若稍捐薄禄置陶令於北窗伏望某官仁风翺及物之恩赫日照覆盆之陋念前跋胡而後?尾惟当自屏於江湖方上昭天而下漏泉忍使独挤於沟壑假以毫端之润宠其林下之归某谨当刻骨戴恩刳心慕道诵丹台之蕊笈少尉素怀拜玉局之水衡用华晚景

知严州谢王丞相启

故里浮沉窃玉局再期之禄公朝擦拭付桐江千里之民瓜戍非遥竹符甚宠感沦病骨愧溢衰顏伏念某元佑党家绍兴朝土池鱼瀟灑本思自放於江湖社栎支离久已难施於斤斧繇治生之素拙因从宦以忘归顷自吴中久留劔外顾彼衣冠之所萃颇以文字而相从方深去国之悲敢有择交之意流偶殊於泾渭风自隔於马牛睚眦见憎本出一朝之忿挤排尽力几如九世之讐藐是羈孤孰为别白纵免投荒之大罰亦宜置散以终身且定远来归惟望玉关之生入轻车已老犹护北平之盛秋岂有朝为閭閻废斥之人?窃畿辅承宣之寄兹盖伏遇某官学穷灾奥勲塞堪輿南山岩岩冠公师之重任赤舄几几同宗社之宏休念人才之实难悼士气之不振挺陶至广收拾无遗方与物以皆春悯向隅之独泣變和輿论濶略彝章起安国於徒中较恩未大还管寧於海外为力尚轻而某少非列於通才晚徒专於朴学弃鸡肋而犹惜虽仰戴於深仁续鳧胫则自悲恐难逃於薄命

谢梁右相启

故里投闲久窃奉祠之禄清时起废遽叨出守之荣挈於九折之途置之一饱之地感深至骨涕溢交颐伏念某乡校孤生京尘下吏学徒尽力徐而察之则鷁退飞仕已冥心非敢後也而马不进顷者南游七泽西上三巴繆见推於文辞因颇交其秀杰爱憎遂作誉毁相乘肆为部党之才规动朝端之听虽渐能忍事听唾面之自乾犹竞起浮言至擢髮而莫数湏洞风波之上流离道路之旁幸逢皞日之中天固宜潦水之归壑矧此江山之郡介於吴越之间先世尝临尚有召伯憩棠之爱提封甚迓仅同买臣衣綉之归蕞尔何堪居然非称此盖伏遇某官身扶昌运手斡化钧一气鸞鱼咸遂飞潜之性衆材桀桷各安大小之宜俯怜?下之余尝沐笔端之润摧颓虽久省録未忘谓人士舍之则藏固当慕昔贤显晦之节然朝廷养非所用何以待异时缓急之求既启迪於渊衷遂變和於輿论而某年龄抵此意气萧然律召东风虽幸春回於寒谷手遮西日敢希身到於修门

谢周枢使启

起由散地付以名州朝迹久踈忽喜长安之近戍期未及先寬方朔之饥靖言孤踪可谓过望伏念某簞瓢穷巷土木残骸早已孤危马一鸣而辄斥晚尤顛沛龟六铸而不成羽翮摧伤风波震荡薄禄作无穷之?虚名结不解之讐邴生自谓非狂甚矣见知之寡韩愈何恃敢傲若为

取怒之深乘下泽之车忽过半生挂神武之冠今无多日偶然未死得此少伸制出西垣地连右辅顾视必恭之梓阡陌相望封培勿翦之棠乡里太息此盖伏遇枢使丞相学优圣域道觉民先卓尔为衆正之宗毅然开孤进之路自太公已久望子仰关宗庙之灵有夷吾可无复忧尽释荐绅之虑方广求於隗杰乃首记其姓名生物功深奚啻吹律召东风之妙回天力大未觉挟山超北海之难而某少颇激昂老犹矍铄志士弗忘在沟壑固当坚马革裹尸之心薄福难与成功名第恐有猿臂不侯之相

谢黄参政启

病余揣分薪续食於黻祠望外疏恩俾牧民於近郡感深雪涕慙剧駢顔伏念某早岁多艰晚途益困岷嶓嶮絶身行禹贡之书云梦苍茫口诵楚骚之句未葬支离之骨辱招羈旅之魂八千之路虽还五十之年已过视荒荒而益废髮种种以堪哀断港絶潢徒有朝宗之愿朽株枯木何施造化之功虽存沟壑之余生已是簪绅之弃物惊宿愆之尽洗知孤迹之少安如丝如纶命出西垣之润色有民有社地连右辅之封圻矧复严濂遗祠桐山故隐企高风之如在顾俗状以自慙此盖伏遇参政相公黼黻皇猷权衡国是衆仰规模之大天知议论之公谓设廉耻以遇羣臣士斯自好且蹈仁义则为君子人亦何常务与惟新不求其备某谨当铭膺感德擢髮思愆弱羽绕枝姑低回於晚景灵丹点砾傥邂逅於初心

谢施参政启

起由散地畀以专城命出词垣仰戴丝纶之宠名居节镇俯慙章绶之华伋倭拜恩谿渚叙感伏念某薄才绵力多病早衰窃慕长者之余风每思砥砺未闻君子之大道徒益顛危零丁稷下之游寂寞漳滨之卧尚无漂母哀王孙而进食况有故人怜范叔而赠袍牛欲衅钟谁其弗忍妇非束緼何以自还敢期累年不振之踪忽有一旦殊常之遇光生分表喜溢情涯惟兹山水之邦自昔诗书之俗修门在望曾无日近之嗟先世尝临获慰露濡之感此盖伏遇参政相公至仁善下盛德兼容一引坐一解顔士托终身之重三吐哺三握髮埜无片善之遗贤能借势以騫腾孤远望风而倾属自悲蓬梗独远门阑向使不为万里之行固亦久在诸生之末诵文章於方册窃喜得师闻道义於荐绅亦尝愿学既积精诚之至果归甄冶之公旅进无阶叹空驰於清梦余年有几惧终负於初心

谢台谏启

贫忘代耕之禄恳乞奉祠恩开使过之门复令治郡方穷阎之待尽非公议而畴依慙极駢顔感深雪涕伏念某遭回薄命顛顛余生肄业荒唐小学仅通於苍雅属辞卑弱奇文徒慕於庄骚髮种种以将童心摇摇而欲折食粥动逾於累月陈絺或至於隆冬不能引分以挂冠廉隅已丧更复贪荣於怀绶愧惧可知况此名城今为近辅九霄嘉气日未迺於长安千载遗祠星尝从於帝座孰为之地使有此行兹盖伏遇某官伟量海涵英姿山立【正言云义急嘘枯仁先念旧】衆恶之而必察俯怜久困於风波今老矣而无能尚使少纾於沟壑为国广旁求之路示人无终弃之才曾是妄庸曲蒙全护除书已下徒叨湔洗之恩羸疾益侵无复激昂之日

谢葛给事后

杜门讼六十年之非久安散地起家忝二千石之重忽奉明恩惊衅垢之渐除扶衰残而下拜【舍人云起自穷阎叨临近郡为农为圃三年之冗不治如丝如纶一字之褒过宠】伏念某学由病废仕以罪归冥心鹄鹭之行投迹鸡豚之社海三山之缥缈钓鳌已媿於初心楚七泽之苍茫殪兕亦成於昨梦但欲负耒慕许行之学岂复叩角歌甯戚之诗偶逢公朝使过之时躡畧近郡承流之寄所蒙过矣自揆茫然天际郁葱望九重之云气道周蔽芾扫四世之棠阴得遂此行孰为之地此盖伏遇侍讲给事道本文王之正学师孟氏之醇腾茂实而蜚英声久隆上睠息邪说而距詖行遂擅儒宗方与万物而皆春不忍一夫之独泣某偶阶末契遂借余光【舍人云议论四方之望文章百世之师余谈激水之斗升穷鳞悉逝丽藻生云於肤寸甘泽无穷方与万物而皆春不忍一夫之独泣而某适有怀章之幸首叨泚笔之荣】虽饭豆羹藜不敢望功名之老大然书绅铭座尚思复玷缺之艱难

畚交代陈判院启

病求玉局但怀优游卒岁之心恩畧桐庐获继超轶絕尘之迹方自嫌於通问乃遽辱於移书公真快哉我则陋矣伏念某少而落魄老益迂疎顛顛关河万里客岷嶓之境驰驱节传三年使闽楚之交迨此退归颓然迟暮投帻已安於蟹舍起家忽奉於鱼符此盖伏遇某官秉节以贯四时端世而翔千仞经行早推於庠序谋猷晚着於朝廷謠诵上闻岂独最列城之课规模甚远又足为来者之师某偶幸怀章遂将接武虽取弃竹马望英躅以增慙然获旧青氈在衰门而甚宠发春伊始坐歛多闲愿遵辅养之宜即庆禁严之拜

严州到任谢王丞相启

恳求祠禄乃叨便郡之除甫及戍期亟奉燕朝之对身既复归於钩播衆知未弃於明时伏念某浅智褊能薄才绵力栖迟屏迹但欲射猛虎以终残年辛苦着书不足藏名山而俟後世偶为贫而求仕旋触罪以免归雁食无储鹑衣不补凡百君子悠悠非特达之知平生故人往往处嫌疑之际欲言谁听投老奚归岂期庙堂任使之公挈出沟壑漂流之地此盖伏遇某官孟韩道统伊吕王功黼黻圣猷谓言之不文则行之不远甄陶士类每舍其所短而取其所长慨念孤生已侵暮境傥使抱所闻而不试则将齎遗恨於无穷何止屡陈於斧扆之前盖亦昌言於搢绅之上故虽久斥亦复渐收而某已知悔童子之雕虫未免守古人之糟粕决无可可用寧不自知续鍾斧之禄以待挂冠尝面祈於大造効尺寸之劳而垂汗简怅永负於初心

谢梁右相启

玉局二年已窃伐耕之禄桐庐千里复叨起废之恩望睟表之顛昂抚编氓之繁夥退惟忝冒徒积兢慙伏念某四壁寒家一簞贱士刻舟求劒固匪通材惩羹吹壺已消壮志比由蟹舍起领鱼符永言久斥之余亦有少伸之望然而察簿领稽违之细撻吏胥隐伏之微一皆非其素知又不可以遽习渊明之寄事外已迫頽龄安国之擢徒中曷胜烦使此盖伏遇某官才全经

纬气塞堪輿博取衆材屡抗延英之论宏开公道靡须光范之书施及妄庸未忘夙昔温饱一
门之衣食洗湔累岁之罪愆使为全人以毕余日某敢不好是正直择乎中庸戒舞智以贼民
寧取椎鲁少文之诮务尽心於折狱庶无冤枉失职之嗟苟不辱知其敢言报

谢周枢使启

入望清光出临近郡天威不违咫尺既谐就日之心父命惟所东西况彼牧民之寄感恩至矣
揣分茫然伏念某下愚难移大惑莫解不能高飞远举求避横目之民乃复直情径行自掇噬
脐之悔永言穷薄数蹈遭回毁靡待於德高灾非由於福过断云零落敢怀出岫之心病鹤?褫
忽忝乘轩之宠此盖伏遇某官道穷灾奥气塞堪輿南山之石岩岩帝资宿望綈?之意恋恋士
感诚言哀细德之嶮微开鸿钧之块北念兹积譴虽擢髮而有余察彼衆谗亦吹毛之已甚未
加显弃聊复少收虽不在於英才乐育之中实创见於薄俗相挺之际而某扶衰自笑迫老宜
归无复入关西日举钓竿之手惟希度世东封谒玉辂之尘倾倒具陈慙惶无措

谢台谏启

挂洪景之衣冠宜还故里怀买臣之印绶尚冒明恩触热即途扶衰领郡伏念某身常短褐家
本衡门一官惟妻子之谋万里极关河之远景翳翳以将入余日几何芳菲菲其弥章素心空
在比者窃水衡於玉局筑云屋於镜湖惟俟引年遂将没齿散地方蕲於因任除书忽畀於专
城宫阙中天有就日望云之幸乡间接壤逾过家上冢之荣此盖伏遇某官望重朝纲学通国
体取真才於水落日出之後坐销浮伪之风察定理於舟行岸移之时尽黜谗诬之巧稍收久
废用示至公某谨当勉効微勤坚持素守吏犯法而法在先务去姦政近民则民归敢忘用恕
或羸逃於大譴庶少荅於深知

谢监司启

挂?景之衣冠宜还故里怀买臣之印绶尚冒明恩触热即途扶衰领郡伏念某身常短褐家本
衡门一官惟妻子之谋万里极关河之远景翳翳以将入余日几何芳菲菲其弥章素心空在
比者窃水衡於玉局筑云屋於镜湖惟俟引年遂将没齿散地方蕲於因任除书忽畀於专城
宫阙中天有就日望云之幸乡间接壤逾过家上冢之荣此盖伏遇某官学贯经郭望隆国器
绣衣持斧姑小试於使轺豹尾属车即超登於禁路尚容衰頽之迹暂托澄清之余某谨当勉
効微勤坚持素守吏犯法而法在先务去姦政近民则民归敢忘用恕或羸逃於大譴庶少荅
於深知

畚方寺丞启

年运而往怅久隔於英游道阻且长忽恭承於荣问情文甚宠衰晚增光伏念某笠泽渔家绍
兴朝士扞参历井久困客游煮海摘山屡乘使传既罪愆之未洗复衰疾之相乘骨相宜穷头
颇可揣穿延和之细仗恍若隔生分新定之左符更叨起废此盖伏遇某官义存推轂德重匿

瑕哀其顛顛之百罹借以揄扬之一诺遂叨芙理之寄亦及归耕之余而某缘病废书迫贫随牒能古文何用於今世徒慙长者之见知居是邦不非其大夫殊非小人之所望伫奉丁寧之海用寬瘵旷之虞

贺王提刑启

恭审绣衣玉节肃王畿风宪之严宝画奎文新内阁图书之直方揽澄清之轡已腾謠诵之声恭惟某官学道爱人至诚格物德秉民彝之粹才惟国器之英中外践扬自际风云之会始终操履靡移金石之坚将阶言语侍从之除洊被礼乐光华之遣钦恤副九重之指平反奉一笑之春始乞外庸即跻近列计乘轺之未几旋颁诏以趣归某意广才疎心劳政拙伏枥志在千里怅暮景之已侵巢林不过一枝幸卑栖之有托

与汪郎中启

去蜀归吴已侵寻於晚景乞祠得郡尚记录於明时夙戒行舡已临敝邑方切依仁之幸敢稽告至之恭伏念某笠泽农家绍兴朝士扞参历井久困客游煮海摘山屡乘使传既罪愆之未洗复衰疾之相乘骨相宜穷头颅可揣穿延和之细杖恍若隔生分新定之左符更叨起废恭惟某官义存推轂德重匿瑕哀其顛顛之百罹借以揄扬之一诺遂容共理之寄亦及归耕之余而某扶惫以来罔功是惧快景星之先覩虽尚阻於瞻承分隣烛之余光遂密依於覆护其为慰幸曷究敷陈

与沈知府启

乘传江皋偶同一道分符畿内复幸隣邦公将假道於虞仆其得御於李胡交臂而失此亟削牒而布之恭惟某官厚德镇浮英姿迈往富贵固有命矣未尝枉尺以自谋将相岂无种哉方且抁风而直上虽仰急流之勇退寧容袖手而旁观果奉明纶起临近甸丰年高廩想謠诵之已闻燕寝清香知文书之益简愿精调於列鼎即归覲於凝旒瞻咏之私敷宣曷既

贺留枢密启

恭审行玉关之万里方喜遄归陈泰阶之六符亟闻殊眷地禁处承明之遽仕崇参宥密之严成命诞扬师言允穆切以艺祖鉴五代之弊不偏重於中书裕新六官之名亦旁开於西府岂独竝隆於文武固将兼注於安危至以明诏特预於訏谟尤为本朝久虚之盛举中原多故首用种忠宪之伟人圣政方新则有虞雍公之近事或名光於竹帛或位极於庙堂恭惟某官躬闳深魁硕之资负刚大直方之气早推雅望寢历近班以至公服小人故虽疎而不怨以大节事明主故既去而见思世方譊譊以自营公固落落而难合迨此宠光之自至益知巖险之徒劳渊乎一心应彼万事七擒七纵已成服远之功三起三留果有处中之命方且端委冠钩衡之位挽河洗夷虜之尘复列圣在天之讐摅遗民泣血之愤某幸身未死见国中兴材馆旁求虽莫陪於下土浯溪深刻尚自力於斯文

贺蒋中丞启

伏审显膺帝制进总台评公道大开在廷为之相贺正人益进吾国殆其庶几仰惟庙社之休非复门阑之庆某闻人情不远立朝谁乐於抨弹仕者自谋干世本求於遇合皆使从容而徐进自非怨嫉之所归一居三院七人之官遂任四海九州之责至於谏大夫之助成主德中执法之振肃朝纲知不可以不言言不可以不尽雷霆在上独立自如鼎鑊当前直趋不避始也负当世之名而人不我舍今也居得言之地则责将谁归卓乎伟人更此重任恭惟某官英姿迈往奥学造微论必尽忠得堪輿刚大之气仕常思退有耕钓高逸之风位逾达而谦有加权益隆而量莫测姑小烦於绳肃即进与於弼谐岂惟斯民被化於春风和气之中亦使多士吐气於青天白日之下今其始矣幸孰甚焉某尝辱王翰卜隣之荣妄怀贡禹弹冠之喜崇言欲议已观魁磊光信史之传过计私忧妄有一二为执事之献傥少寬於斧鑕尚嗣布於腹心

渭南文集卷十一

卷十二

钦定四库全书

渭南文集卷十二

宋 陆游 撰

贺贾大谏啓

恭审显膺一札之旰首冠七人之选主贤臣直国势岿然言听谏行天下幸甚某闻昔在本朝之官制参稽前代之旧章南台不置大夫中宪任纪纲之重寄北省久虚常侍谏坡率遗补以尽规选求既躋畀托尤重故政在中书而常开言路事由独断而不废争臣仰观十一圣家法之传兹为三百年治功之本继昔之盛非公而谁恭惟某官学造精微器函闳远许国弗渝於夷险忧时如抱於渴饥造膝告猷浩浩江河之决倾心爱士拳拳泾渭之分慨然死生祸福不入於中常若天地鬼神实临其上以今日陈善闭邪之效成异时赞元经体之功同出此心夫孰能御某侵寻暮景蹭蹬孤生迹本甚疎妄欲依归於公道分当永弃特蒙擦拭於穷途何以仰荅门阑特达之知惟有稍陈郡县利病之实傥少寬於斧鑕尚嗣布於腹心

贺谢殿院啓

恭审显膺帝制进贰台端手缩褱以逡巡久已抱独立无朋之操髮冲冠而愤切自兹皆尽言不讳之时在庭耸观有识相庆伏以御史分职本以论事任耳目之司忠臣设心盖欲去邪为宗社之福抗雷霆而独立凜山岳之不摇非以近名固将竭节天子为之改容而垂听大臣不敢持必而自私国有纪纲治自形於四海九州之远士笃名义效或见於数世百年之余今兹孰配於古人识者固归於门下恭惟某官道德醇备议论正坚灰寒木槁而誉益高鯤击鹏抃而才乃见默究朝廷之利病尽得源流徐观天下之是非若指白黑放斥者有愧心而无怨更革者虽害已而谓然太平之功指日可待某侵寻暮景蹭蹬孤生迹本甚疎妄欲依归於公道分当永弃特蒙擦拭於穷途何以仰荅一见特达之知惟有稍陈千里利病之实傥少寬於斧鑕尚嗣布於腹心

贺周丞相啓

恭审梦卜袭祥扬王庭而涣号典册备物熙帝载以宅师国其庶几民以寧壹实惟宗社无疆之佑非复门阑旅贺之常窃以时玩久安辄生天下之患国无远略必有意外之虞方今风俗未淳名节弗励仁圣焦劳於上而士夫无宿道向方之实法度修明於内而郡县无赴功趋事之风边防弛於通和民力坐穷於列戍每静观於大势惧难待於非常至若靖康丧乱而遗平城之忧绍兴权宜而蒙渭桥之耻高庙有盗环之逋寇乾陵有斧栢之逆俦江淮一隅夫岂仗卫久留之地梁益万里未闻腹心不贰之臣文恬武嬉戈朽钺钝谓宜博采衆谋之同异然後

上资庙论之崇严非素望之伟然谁出身而任此恭惟某官降神维岳生德自天居安资深学洞六经之韞探赜索隐识穷万务之微盖尝独立以当雷霆何止贵名之揭日月运筹帷幄每当上心端委庙堂遂持国柄玉烛肇时和之庆云龙协圣作之辰清未央长乐之宫将肃六飞之御筑碣石榆林之塞永奠四夷之封於古有光自今以始某侧闻盛举实拚欢惊恤百口之饥寒岂无窃觊拔四方之英俊愿付至公庶未死之余生覩太平之盛际

贺施知院啓

恭审诞布明纶进专筹幄用真儒而无敌翊扶宗社之基得大老以来归开慰华夷之望恭惟某官英姿迈往精识造微居安资深韞六艺渊源之学任重道远炳两朝开济之心明辩足以拆遐冲果敢足以断几事自初拔用迄此延登大节全名松柏挺岁寒之操同心一德风云协圣作之期堪舆清夷星纬明润致太平其自此将魁柄之焉归曩暂入於修门窃有闻於行路谓明公之得政以人物为最先自隆师尹南山之瞻复见平津东阁之盛扬庭荐拔造膝开陈凡人所难以身独任今虽总本兵之地愿益尸善类之盟公能以士而报国家士亦以身而归门下某侵寻暮境顛顛偏州志气已衰无复献狗盗鸡鸣之技文辞自力尚能助稗官野史之传过此以还未知所措

贺丘运使啓

恭审上印帅藩乘轺畿甸得人若是则吾国其庶几乎先声隐然非俗吏之所能也公论为之慰愜大用此其权輿伏以寛猛异施古今莫一子产号衆人之母用於郑而弗救陵夷申商为法家者流弊至秦而卒以颠覆历考简编之迹莫先儒术之功惟蹈君子之时中斯得古人之大体方其尊瞻视正顔色教化固已有成虽使空圉图画衣冠法令其谁敢犯恭惟某官英姿迈往敏学造微夷途蚤践於高华隆委偏当於繁剧所临辄治虽千变万化而不穷自守弗阿终特立独行之如此上将引而自近公其有以告猷某早陪谈燕之余误辱赏知之异敢图暮境获备属城闻里亡聊每揽涕下催科之笔事功靡着更忍慙修候问之牋尚加惠於始终俾羸全於进退归依之切敷绎奚殫

贺蒋尚书出知婺州啓

恭审解中执法以暂均劳佚拜大宗伯而入侍禁严虽若不得其言固亦未为弗用乃抗投闲之请力蘄就养之荣诏谕靡从藩条初布上倚承宣之绩士高廉退之风恭惟某官直哉惟清渊乎似道恳欵许国肝胆凜其轮囷慷慨疾邪山岳为之震动进率由於独断即早见於尽言未移桑?之淹入总栢台之峻国方增九鼎之重身已如一叶之轻鲁人获麟以为不祥虽爱憎之叵测塞翁失马未必非福抑倚伏之何常某幸托里门获趋宾席身世等蒹葭之弃孰闵余生姓名托甄冶之公尚须异日

除直华文阁谢丞相啓

秩视大蓬已窃垂车之宠恩加邃阁更叨出綍之荣初闻道路之传犹谓姓名之误迨兹被命重以怀慙伏念某承学迂疎稟资蕞陋幼生京洛尚为全盛之编氓长缀班聯曾是中兴之朝士福未容於盈眦崇已駭於烧城西征至岐凤之间南戍掠瓠闽之境晚仅升於省闕旋即返於乡关鹤归辽天狐死丘首蓬户十移於岁律幔亭四閱於祠官久遂屏居非始挂冠之日尽捐半俸真为纳禄之人岂期垂尽之光阴忽玷殊常之惠泽复缘诏札并窃身章里巷聳观共仰恩光之下烛儿孙扶拜不知衰涕之横流兹盖伏遇某官降命应期奋庸熙载神无方易无体心独运於道枢尺有短寸有长士悉归於钧播虽迫崦嵫之景亦归块圯之公而某意气空存筋骸已惫草具明堂辟雍之礼虽遭甚盛之时涂窜清庙生民之诗其在方来之隼

修史谢丞相啓

七十告老誓待尽於山林尺一召还恍复瞻於观阙内祠禄厚信史事严容孤迹於其间知鸿钧之有自恭以高皇之盛德大业虽号中兴而实同开创之难孝庙之内修外攘躬享太平而不忘恢复之志治躋古昔威震裔夷俄属鼎成之悲肆修麟趾之緒固已网罗轶事润色皇猷备述巍巍荡荡之功曲尽业业兢兢之指岂繫迟莫能与讨论伏念某天予散材家承孤学生逢盛旦蒙六圣之涵濡身缀清班被四朝之识拔常恐倏先於朝露遂将莫报於秋毫岂期及耄之余龄猥得効勤於大典兹盖伏遇某官材全经纬气塞堪輿平生陈谟决策之言焕乎可诵十载知人安民之绩底於有成殊邻欵塞而奉琛多士乡风而释屣内而台阁极稽古礼文之选外而郡县有宜民恺悌之风肇辟大公至正之途不弃偏能一曲之士故如某辈亦在数中谨当益广见闻更勤采掇老骥伏枥修途已非其所堪小草出山薄効尚期於自见

贺谢丞相除少保啓

恭审命出渊衷廷扬显册人主之论一相方寄肠心少保兹为三公益隆体貌传闻所逮驩颂惟均恭以某官谟明弼谐任重道远协天心於崑崙旁魄之际动必有成隆主眷於蝸蝻蠖濩之中言无不用自登近辅允迪大猷畴咨虽首於羣公谦畏不殊於一日每稽首而逊稷契终选衆而举伊臯三年有成四海用乂农扈告丰登之候戎韬臻偃息之期熙运方兴周召并为於师保衆心所系平勃均任於安危是宜大号之继敷昭示元臣之同体羣生咸遂协气横流谨乃宪而屡省则成熟测化钧之妙本无事而庸人实扰始知静治之功某获缀清班欣逢盛事无好无恶而遵王路共欣圣政之大成不愆不忘而由旧章更冀庙谟之无倦敢効涓尘之助辄干礚斧之诛冒渎实深兢惶罔措

贺张参政修史啓

恭审诞布明纶总提鉅典固已动鷺鹭行之喜色而况在牛马走之後尘不能自已於寸诚是敢冒陈於尺牋恭惟某官自天生德降命应期闡温厚尔雅之文经纬万象蘊超轶絶尘之识镇抚四夷位居台鼎而有山泽清臞之容礼絶措绅而无王公骄泰之意心虚静而观复道冲用而不盈周公太公方隆夹辅之望尧典舜典更专点窜之功实以袞衣黄阁之尊下兼兰台石室之事在天三后巍乎下临作宋一经信矣无憾某偶蒙简拔获预讨论已侵投老之残年

何补不刊之信史仰傳岩之霖雨幸预在廷归社曲之桑麻尚劳泚笔想典刑於诸老已媿空疎竭精力於是书敢忘策励

除宝谟阁待制谢丞相啓

册府秩清偶至鰲峰之顶禁途地密遂穿豹尾之中虽造化之至公实恩怜之曲被欲叙丹衷之感莫知雪涕之横伏念某虽起耕畴羸传家学书藏屋壁尚摈斥而不容迹遯园庐岂荣华之敢望虚名作崇聚谤成雷幸於先狗马塞沟壑之前遂其赐骸骨归卒伍之请任子以世其禄寓直以华其行固已负耒学耕饰巾待尽身还民服口诵农书从故里渔樵之游拜高年羊酒之赐忽从廐置逖奉诏除所愧忝大门之官敢愧夺匹夫之志惟俟奏篇之御即伸告老之诚简牘未终丝纶已降半生淹泊沉舟真閱於千颿一旦遭逢开印适当於三日已扶衰而拜命旋曳蹇以造庭兹盖伏遇某官德懋忧恂化均块圯作成土类兼小大而不遗筋相皇家混异同於无迹泽东渐而西被功上际而下蟠才或取於寸长罪不捐於一眚故虽么麼亦被生成某敢不顶踵知恩冰霜励节少不自力坐沉废者半生老当告休怅报酬之无地

谢费枢密啓

猥被恩纶躋持从橐处内阁谏咨之地继大门扬历之荣揣分奚堪置慙靡所伏念某百罹薄命九折穷途迹久困於多言年已侵於大耄都门屡入壮游恍似於前身册府再来衆吏多非其旧识扶衰残而就列刮腎膜以紬书非从莫揜於旁观每亦不胜其自媿惟埃奏篇之御即伸请老之诚敢谓遭逢曲蒙识拔兹盖伏遇某官道尊皇极学统圣传虽吐哺握髮之劳曾靡遗於一士然引坐解顔之遇顾岂在於他人每居崇严不移畴昔爰自东壁图书之府俾躋西清鵷鹭之班骥伏枥以悲鸣曩谁念者犬舐丹而仙去今乃仍之某灯火尚亲簞瓢未厌修世官而不坠益体上恩继家学於?衰或传来裔庶几瞑目无愧初心

致仕谢丞相啓

优诏谕归已荷乾坤之造异恩及幼更沾雨露之私非公台力假於敷陈则草野何从而甄録感铭刻骨涕泗交颐伏念某少乏通材晚嬰羸疾史闋八月常怀愒日之慚祠禄三时洊上引年之请初但虞於烦渎旋曲被於矜从而沉从中明降於德音任子特逾於常制桑榆已迫俾华垂白之年豚犬何能遽有拾青之幸里闾叹息门户敷荣兹盖伏遇某官降命应期奋庸熙载告猷於内时已措於太平祝鯁在前礼每加於诸老亶亶诚明之学巍巍忠厚之风坐格华裔之寧有光简册之载故推余泽俯及衰门重念穉儿虽非异稟善和之书幸在敢虚弃於光陰太常之第可收尚仰酬於长育

荅权提刑啓

伏审抗章请外纁轡入东谓宜因对而复留故欲驰书而未敢遽先垂问莫喻愧心恭惟某官英识造微宏材经远学术得前言往行之要议论有羣公先正之风践扬蚤历於清华锥能自

见寄任靡辞於黻委刃每有余兹乃勇退急流旁观袖手明刑以弼五教诵诗而使四方虽暂试於外庸顾岂符於金瞩还节旄於少府行被诏追司笔橐於甘泉孰居公右某退依耕陇密迕台纲躬岂弟以宜民既蒙赐矣用春秋而决狱行且见之颂咏惟深敷陈罔既

荅胡吉州啓

伏以累疏乞归既拜赐骸之命华牋赞喜更烦泚笔之劳异书怜老学之勤厚币笃嘉宾之礼顾惟衰悴曷称眷私伏惟某官絶识超然英声藉甚简编插架早推师友之渊源绅佩在廷旋庆君臣之际遇兹暂烦於共理即归告於嘉猷而某已返农畴愈矜阒寂徒藏椟以为荣咏德虽深愧占辞之莫既

渭南文集卷十二

<集部,别集类,南宋建炎至德佑,渭南文集>

卷十三

钦定四库全书

渭南文集卷十三

宋 陆游 撰

代二府与夏国主书【癸未正月二十一日二府请至都堂撰】

隆与元年正月二十二日特进尚书左仆射同中书门下平章事兼枢密使信国公陈康伯等谨致书夏国主殿下昔我祖宗与夏世修盟好岂惟当无事时共享安平之福亦惟缓急同休戚恤裁患相与为无穷之托中更变故壤地阻絶虽玉帛之聘弗克往来然朝廷未尝忘祖宗之志也乃者皇天悔祸輿图寢归会今天子绍登宝位慨然四顾宣谕大臣曰夏二百年与国也岂其不念旧好而忘齐盟哉某等恭以国主英武聪哲闻於天下是敢辄布腹心於执事愿留神图之惠以报音当告於上议所以申固欢好者同心协义义均一家永为善隣传之万世岂不美哉有少币仪具如别幅伏惟炤察不宣某等谨白

贴黄【前件事宣臣等虽已面陈缘利害至大陛下反覆省览故敢辄具此奏】

上执政书【辛巳四月】

某官合下文人之在天下用之徒以为治世之观太平之饰不用则亦已耳非如兵刑钱谷之吏不可一日无也然为国者每每收取不忍弃去岂固为是不急哉盖天下之事惟此为最难非诚好之捐三二十年之勤耗心疲力雕瘁齿髮饮食寢梦悲欢得丧一在於是者殆未易可以言工信工矣然且高不足以为功名下不足以得财利尘编蠹简束而藏之幸世有知此道者叹息称工呜呼可谓钝哉以天下之至勤苦为天下之至钝待千万中一二人之知此贤公卿以人物为己任者所以不忍弃也某小人生无他长不幸束髮有文字之愚自上世遗文先秦古书昼读夜思开山破荒以求圣贤致意处虽才识浅闇不能如古人迎见逆决然譬於农夫之辨粟麦盖亦专且久矣原委如是派别如是机杼如是边幅如是自六经左氏离骚以来历历分明皆可指数不附不絶不诬不紊正有出於奇旧或以为新横鹜别驱层出间见每考观文词之变见其雅正则纓冠肃衽如对王公大人得其怪奇则脱?大叫如鱼龙之陈前臬卢之方胜也间辄自笑曰以此娱忧舒悲忘其贫病则可耳持以语人几何其不笑且骂哉诚不自意诸公闻之或以为可书生所遭如此虽穷死足以无憾矣然师慕下风而未得一望履舄此心歉然不敢遑宁恭惟明公道德风节师表一世当功名富贵之会而不矜践山林鍾鼎之异而不变非大有得於胷中其何以能此夫文章小枝耳然与至道同一关捩惟天下有道者乃能尽文章之妙此某所以忘其贱且愚而愿有闻於左右也

上虞丞相书

某闻才而见任功而见録天下以为当君子曰是管仲相齐卫鞅相秦之法耳有人於此才不足任功不足録直以穷故哀之天下且以为过君子则曰是三代之俗周公孔子之政也何也彼有才吾赖其才因以高位处之彼有功吾藉其功因以厚禄报之上持禄与位以御其下下挟才与功以望其上非市道乎故齐秦用之虽足济一时之急而俗以大坏君子羞称焉若夫三代之俗周公孔子之政则不然无才也无功也是直无所用也无所用之人虽穷而死者百千辈何损於人之国哉自薄者视之尚奚恤君子顾深哀之视其穷若自我推以与之之不敢安也矜怜抚摩衣之食之曰彼有才有功者何适而不遇吾所急者其惟无所用而穷者乎此心父母也推父母之心以及於天下无所用之人非圣贤孰能哉谓之三代之俗周公孔子之政则宜故王霸之分常在於用心之薄厚而昧者不知也恭惟大丞相道学精深力量广大庶几以周公孔子之政而复三代之俗者浑浑巍巍不可窥测平时挟功恃才锱铢较计者皆自失退听若某之愚不才无功留落十年乖隔万里而终未敢自默持曰身之穷大丞相所宜哀耳某行年四十有八家世山阴以贫悴逐禄於夔其行也故时交友醵緡钱以遣之硤中俸薄某食指以百数距受代不数月行李萧然固不能归归又无所得食一日禄不继则无策矣儿年三十女二十婚嫁尚未敢言也某而不为穷则是天下无穷人伏惟少赐动心捐一官以禄之使粗可活甚则使可具装以归又望外则使可毕一二婚嫁不赖其才不藉其功直以其穷可哀而已此气象自秦以来世以功利相高没不见者累二千年今始见於门下所愿持之不摇行之不疑则岂独某之幸哉

上辛给事书

某官合下君子之有文也如日月之明金石之声江海之涛澜虎豹之炳蔚必有是实乃有是文夫心之所养发而为言言之所发比而成文人之邪正至观其文则尽矣决矣不可复隐矣爝火不能为日月之明瓦釜不能为金石之声潢污不能为江海之涛澜犬羊不能为虎豹之炳蔚而或谓庸人能以浮眩世乌有此理也哉使诚有之则所可眩者亦庸人耳某闻前辈以文知人非必鉅篇大笔苦心致力之词也残章断藁愤讥戏笑所以娱忧而舒悲者皆足知之甚至於邮传之题咏亲戚之书牋军旅官府仓猝之间符檄书判类皆可以洞见其人心术才能与夫平生穷达壽夭前知逆决毫芒不失如对棊枰而指白黑如观人面而见其目衡鼻纵不得思虑搜索而後得也何其妙哉故善观晁错者不必待东市之诛然後知其刻深之杀身善观平津侯者不必待淮南之谋然後知其阿谀之易与方发策决科时其平生事业已可望而知之矣贤者之所养动天地开金石其胸中之妙充实洋溢而後发见於外气全力余中正闳博是岂可容一毫之伪於其间哉某束髮好文才短识近不足以望作者之藩篱然知文之不容伪也故务重其身而养其气贫贱流落何所不有而自信愈笃自守愈坚每以其全自养以其余见之於文文愈自喜愈不合於世夫欲以此求合於世某则愚矣而世遂谓某终无所合某亦不敢谓其言为智也恭惟合下以皋陶之谟周公之诰清庙生民之诗启迪人主而师表学者虽乡殊壤絶百世之下犹将想望而师尊焉某近在属部而不能承下风望余光则是自絶於贤人君子之域矣虽然非敢以文之工拙为言也某心之为邪为正庶几合下一读其文而尽得之唐人有曰士之致远先器识而後文艺是不得为知文者天下岂有器识卑陋而文词超然者哉狂率冒犯死有余罪

畚邢司户书

五月二十六日笠泽陆某顿首再拜复书司户廸功足下某辱赐书及圣人之道与古作者之文章又以世之称师弟子而徒事科举求利禄者为羞卓乎伟哉非某所敢仰望万一也某少之日学文而不工及其老妄意於道亦未敢谓得也身且弗给而何以及人及庸衆人且弗能其况有以助足下乎惶恐惶恐虽然足下顾我厚某其敢有所弗尽吾曹有衣食祭祀婚嫁之累则出而求禄恐未为非既不免求禄则从事於科举恐亦未为可憾科举之文固亦尊王而贱霸推明六艺而诵说古今虽小出入要其归亦何负於道哉若言之而弗践区区於口耳而不自得於心则非独科举之文为无益也近时颇有不利場屋者退而组织古语剽裂奇字大书深刻以眩世俗考其实更出科举下远甚读之使人面热足下谓此等果可言文章乎尚不可欺仆辈安能欺足下哉故自科举取士以来如唐韩氏柳氏吾宋欧氏王氏苏氏以文章擅天下者莫非科举之士也此无他徒以在場屋时苦心耗力凡陈言浅说之可病者已知厌弃如都市之玉工珉玉杂治积日既久望而识之矣一旦取荆山之璞以为黄琮苍璧万乘之宝珉其可复欺邪凡今不利場屋而名古之文者往往多未尝识珉者也又安知玉哉乃如足下识之可识精矣当弃珉剖玉而已至於圣人之道足下往昔朝夕所讲习者岂外於是言之而必踐焉心之而不徒口耳焉无余道矣某文既不工闻道又甚浅则今所以进於左右者其果近乎一读置之无重吾过不宣

畚刘主簿书

某才质愚下又儿童之岁遭罹多故奔走避兵得近文字最晚年几二十始发愤欲为古学然方是时无师友渊源之益凡古人用心处无所质问大率以意度或中或否或始疑其非终乃大信或初甚好之已而徐觉不可者多矣然亦竟不知所谓是且非者卒何如也方窃媿叹不自意如足下学术文章足以雄长一世者乃不鄙其愚而欲与之交惠然见临赐之以言以为可与言古学者文词伟丽读之惕然夫道遇乞人责之千金足下固过矣然遂谓足下为非则不可往者前辈之学积小以成大以所有易所无以能问於不能故其久也汪洋浩博该极百家而不可涯涘如足下所称诸公盖皆如是也至中原丧乱诸名胜渡江去前辈尚未甚远故此风犹不坠不幸三二十年来士自为畦畛甚狭已所未知者辄讪薄人以为不足学排抑沮折惟恐不力诋穷经者则曰传注已尽矣诋博学者则曰不知无害为君子呜呼陋哉夫世既未有仁智之足如孔孟而师焉则亦各出所长相与讲习从其可者去其不可者自六经百氏历代史记与夫文词议论礼乐耕战锺律星历官名地志姓族物类之学今四方之士亦不可谓无人虽不能兼该衆长要为各有所得往往皆捐数十年之功耗心疲力雕齔齿髮而为之岂可易哉如足下之所已得者某愿就学焉其未者颇愿与足下从诸君子历探其所有足下亦宜尽发所淳蓄以与朋友共之某所闻诚最浅薄亦愿再拜以进惟足下与诸君子之所决择使前辈风俗由吾辈复少振而挟陋之病不遂沉痾岂细事哉属两日苦眩未得面陈而先以书布谢惶恐惶恐

与尉论捕盗书

某昨莫闻以逐盗遽出虽小事亦有难处置者此十许人皆负重辟相与窜伏山林中昏夜伺便小劫比官知之则已分散逃匿无次舍旗鼓可以物色求无徧裨部伍可以策画破无粮可烧无巢穴可穷骤集忽散如鬼物然又实小盗官兵计其不能为甚害所以久不获也今未言能万一驯至大盗但无辜之民时时遭劫亦不可云细事方其劫时执缚恐迫计民之冤与遭大盗亦有何异今日偶见一退卒说此事颇若可采不敢效庸人以非职事故默默不以告卒言此十许人虽出没合散不常似难遽获然昼不食夜必息得金帛必卖劫掠往来至近亦须行四五里岂有都无一人见之之理盖自顷民言见贼官辄意其与贼通捕系笞掠久之无所得始释去是官自塞耳目为贼计则多为捕贼计则疎矣一二年来民间惩创此事虽与贼交臂而过归家噤默不敢以语比邻而况於告官乎故官兵动息贼皆先知而贼虽近在十步内官兵终不得知某思其言实中事情亦尝窃度之环三县弓手土兵为人几何逐捕十许贼连岁弗获不可不思其故也四境无事秋稼如云谁肯为贼囊橐者纵有亦不应人人皆然吾辈儒者当有大略愿足下旷然无疑於胸中不当效武夫俗吏但知守故常也夫战而献馘自三代以来用之不可谓非古然近世至贼杀平人以为功靖康建炎间不胜其弊始更制凯还勿献馘使将校列上功最而已由是妄杀之旤十去八九然则三代圣人之遗法尚可改以便事而况近岁妄庸者所为乎自今有言见盗者当一切慰藉遣去即度其不妄或羸有补则又稍旌别之虽目前未得力但使人人敢言见贼贼纵迹益露势益穷蹙远不过数月获矣足下试熟策之秋暑野次自爱

畚陆伯政上舍书

九月六日某再拜复书伯政学士宗友兄合下即日初寒伏惟尊候万福春中蒙见顾衰疾无聊不得款承絶尘迈往之论至今悒悒忽贤郎上舍携所贶书及新诗来已深开慰又得杂着诗文一编置百事读之所以开益殆非一端古声不作久矣所谓诗者遂成小技诗者果可谓之小技乎学不通天人行不能无愧於俯仰果可以言诗乎仆绍兴末在朝路偶与同舍二三君至太一宫闻中有高士斋皆名山高逸之士欣然访之则皆扃户出矣褰老松流水之间久之一丫髻童负琴引鹤而来风致甚高吾辈相与言曰不得见高士得见此童亦足矣及揖而问之则曰金日董御药生日高士皆相率往献香矣吾辈遂一笑而去今世之以诗自许者大抵多太一高士之流也不见笑於人几希矣而望其有陶渊明杜子美之余风果可得乎杂文数篇多甲寅以来所着言论风旨皆非同乎俗合乎世者与平甫书用意尤至则石守道李泰伯气格相上下而师友渊源未可以望吾伯政也然所以告平甫者尚恐有所含蓄不欲尽发此非面莫究昨日儿子自城中来知方伯薨已卒天乎有是哉计老兄亦同此哀也贤子表表超絶当为名士不止取科第而已奉为宗家赞喜无已黄精奇妙感激千万囟囟不既所欲言者亦坐老惫耳渐寒珍重珍重

会王樵秀才书

十一月二日山阴陆某再拜复书先辈足下贡举之法择进士入官者为考试官官以考试名当日夜专心致志以去取士不可兼蒞他事则又为设一官谓之监试监试羸官不复择盖夫人而可为也甚至法吏流外平日不与清流齿者亦得为之故又设法曰监试母辄与考校则

所以待监试可知矣某乡佐洪州适科举岁当以七月到官遂泊舟星子湾几月闻已锁院不敢进非独畏监试事烦实亦羞为之今年在夔府府以四月试试前尝白府师愿得移疾已见许矣会部使者难之某弩弱畏以避事得罪遂黽勉入院某与诸试官皆不相识惴惴恐其以侵官犯律令见诟自命题至揭榜未尝敢一语及之不但不与也间偶见程文一二可爱者往往遭涂抹疵诋令人气涌如山然归卧室中财能向壁叹息盖再三熟计虽复强聒彼护短者决不可回但取诟耳若可回虽诟固不避也如足下之文又不止可爱诚可敬且畏者而一旦以疑黜此岂独足下不能无言虽试官与拔解诸人亦啧啧称屈某至是直欲以羸官不与考试自恕其可乎将因绍介再拜请罪於门墙而未敢也不图足下客之察之更辱赐书讲修朋友之好而以前者不能无言为悔方是时使足下遂能无言固大善然士以功名自许非得一官则功名不可致虽决当黜尚悒悒不能已况以疑黜乎某往在朝见达官贵人免去不忧沮者盖寡彼已贵虽免贵固在其所失孰与足下多然犹如此今乃责足下以不少动心亦非人情矣前辈有钱希白少时试开封得第二希白豪迈自谓当第一乃诣阙上书诋主司当时不以为大过希白卒为名臣夫科举得失为重高下细事耳希白不能忍其细而责足下默默於其重者可不可邪是皆已往事不足复言区区仰叹足下才气思有以奉广故详及之某吴人凡吴之陆皆同谱所谓四十九枝谱是也如龙图公虽差远顾尚可纪则於足下亦有瓜葛蒙敦?尤感旦莫诣见先此为谢

渭南文集卷十三

卷十四

钦定四库全书

渭南文集卷十四

宋 陆游 撰

容斋燕集诗序

廉宣仲葺其燕居之室曰容斋既成置酒乐之举觴属客曰吾闻东郭顺子之为人人貌而大
清而容物吾虽不能而窃慕焉诸君以为何如或曰方公盛壮时以郡文学高第入为博士公
卿尽倾名流彦士执贄求见者肩摩而袂属车骑雍容行者趋避议论英发闻者倾听傲色不
至於目嫚言不接於耳方是时容物固无甚难也及转徙江湖白首下吏舍於邸者争席遇於
途者相谁何则公之容固难矣至於罹口语絀吏议少年之喜谤前辈者哄然成市公犹容之
则岂不甚难哉敢问所以能此者何也宣仲笑曰是亦有道焉可容者吾以其情容之不可容
者吾以其人容之故吾遇客而驩然遇酒而醺然遇怒骂姍侮如风叶之过吾前候虫之鸣吾
旁也子欲闻其说乎方子之饮酒也俳谐者箕踞角觥者裸裎子何以不怒岂不以其为此者
非嫚耶此吾所谓以其情容之也世有服谗菟愿习於为恶勇於为不义者诚若可疾矣吾则
徐思之曰彼君子邪固不至此彼小人邪此固小人之常而吾以动心则去彼亦无几何耳此
又吾所谓以其人容之也二者可容何所不容而子独何怪於是坐客媿且叹曰吾侪诚小人
哉某在衆人中尤号褊率盖屡叹也酒酣客皆赋诗而属某为叙既不得辞则因以识其媿将
览观之以自儆焉

京口唱和序

隆兴二年闰十一月壬申许昌韩无咎以新番阳守来省太夫人於润方是时予为通判郡事
与无咎别盖逾年矣相与道旧故问朋游览观江山举酒相属甚乐明年改元乾道正月辛亥
无咎以考功郎徵念别有日乃益相与游游之日未尝不更相和荅道羣居之乐致离濶之思
念人事之无常悼吾生之不留又丁宁相戒以穷达死生毋相忘之意其词多宛转深切读之
动人呜呼风俗日坏朋友道 士之相与如吾二人者亦鲜矣凡与无咎相从者六十日而歌
诗合三十篇然此特其大略也或至於酒酣耳热落笔如风雨好事者从旁掣去日或流传乐
府或见於僧窗驿壁恍然不复省识者盖又不可计也润当淮江之冲予老益厌事思自放於
山颠水涯与世相忘而无咎又方用於朝其势未能遽合则今日之乐岂不甚可贵哉予文虽
不足与无咎并传要不当以此废而不録也二月庚辰笠泽陆某务观序

送关漕诗序

李固杜乔臧洪之死士以同死为荣范文正之贬士以不同贬为耻今著作之免归也御史以

风闻言之天子以无心听之与前事固大异而坐客赋诗或危之何也风俗异也某既列名衆诗之次又承命作序二罪当并按矣乾道六年十二月七日笠泽陆某序

云安集序

济南治历城汉故县也带泺水而表历山其山川杂见於春秋孟子史记诸书舜之遗迹盖至於今可考士生其间多通儒名卿秀杰之士而以笔墨驰骛相高往往多清丽雄放警絶之词与山川称若今夔府连帅王公是已公自少时寓秘阁直晚由尚书郎长三院御史出牧於夔实督硤中十五郡资忠厚故政令简心乐易故民夷亲乃因暇日登临瞩望徘徊太息吊丞相之遗词想拾遗之高风醉墨淋漓放肆纵横实为一代杰作顾夔虽号大府而荒絶瘴疠户口寡少曾不敌中州一下郡如某辈又以忧患留落九死之余才尽志衰欲强追逐公後而不可得向使公当承平时为并为雍为镇为定尽得四方贤士大夫以为宾客相与览其河关之势以骋笔力则公衆作森列岂特此而已哉虽然是犹未也必极公之文弦歌而荐郊庙典册而施朝廷然後曰宜今乃犹啸咏於荒山野水之滨追前世放逐羈旅之士而与之友虽小夫下吏或幸得之於虐是可叹欤公以乾道七年八月移牧永嘉行有日奉节令右从政郎普慈安离哀公在郡文章若干篇为云安集且属通判州事左承议郎山阴陆某为十月二十六日序

送范西叔序

乾道壬辰二月予道益昌始识范东叔後月余遂与东叔兄西叔为僚於宣威幕府又三月西叔以枢密使荐趣召诣行在所二君皆中书侍郎荣公孙也昔荣公对制策於治平争诏狱於熙宁论河事边事刑名赦令於元佑虽用舍或小异而要皆不合故用不极其材以没没又列党籍其门户为世排诋讳恶者几四十年又四十年而西叔兄弟始复奋发为蜀知名士世之论盛衰者谓人衆胜天天定亦胜人予独鄙此说夫盛衰皆天也人何与焉天将祸人之国则小人得志而君子废其将福之也则君子见用而小人绌国有祸福而君子无屈伸彼区区者乃诚谓天与人以衆寡疾徐为胜负岂不可悲也哉九月丁丑西叔始东下同舍相与临漾水置酒赋诗而属予为序夫吾曹之望於西叔所以继荣公者岂独爵位隆赫文辞行中朝而已哉虽然予与西叔皆党籍家也既以励西叔亦以自励且励吾东叔云

东楼集序

余少读地志至蜀汉巴夔辄怅然有游历山川揽观风俗之志私窃自怪以为异时或至其地以偿素心未可知也岁庚寅始泝硤至巴中闻竹枝之歌後再岁北游山南凭高望鄠万年诸山思一醉曲江溪陂之间其势无繇往往悲歌流涕又一岁客成都唐安又东至於汉嘉然後知昔者之感盖非适然也到汉嘉四十日以檄还成都都因索在笥得古律三十首欲出则不敢欲弃则不忍迺叙藏之乾道九年六月二十一日山陰陆某务观序

范待制诗集序

石湖居士范公待制敷文阁来帅成都兼制置成都潼川利夔四道成都地大人衆事已十倍他镇而四道大抵皆带蛮夷且北控秦陇所以临制扞防一失其宜皆足致变故於呼吸顾盼之间以是幕府率穷日夜力理文书应期会而故时巨公大人亦或不得少休及公之至也定规模信命令弛利惠农选将治兵未数月声震四境岁复大登幕府益无时公时从其属及四方之宾客饮酒赋诗公素以诗名一代故落纸墨未及燥士女万人已更传诵被之乐府弦歌或题写素屏团扇更相赠遗盖自蜀置师守以来未有也或曰公之自桂林入蜀也舟车鞍马之间有诗百余篇号西征小集尤隹伟蜀人未有见者盍请於公以传屡请而公不可弥年乃仅得之於是相与刻之而属某为序淳熙三年上巳日朝奉郎成都府路安抚司参议官兼四川制置使司参议官山阴陆某序

持老语録序

持禅师明州靳人世为士一旦弃髮?学佛得法於白牛卿初住余姚法性数年忽谢去越牧欲以雍熙邀致疑不就试一问之师欣然曰顾即得檄牧大喜师怀负包笠即曰徒步入院兼节如金石说法如雷霆虽从之游者不过四五十辈而名震吴越尽交一世名卿贤大夫予先君会稽公知之最深予时甫数岁侍先君旁无旬月不知师至今想其抵掌笑语了然在目前夷粹真率真山林间人也後又徙居雪窦护圣二山年德益高如径石杲公辈皆以丈人行尊事之其灭也谈笑如平时盖以真率为佛事者邪得法弟子子询行光如寂广懃或出世说法或遁迹衆中皆不幸早逝去而法扬用璋独在扬於是亦住护圣岿然为叢林耆宿璋老且病犹自力刻师语録且合辞属予为序师可谓有子矣予以先君故不敢辞淳熙六年五月二十五日山阴陆某序

师伯浑文集序

乾道癸巳予自成都适犍为识隐士师伯浑於眉山一见知其天下伟人予既行伯浑餞予於青衣江上酒酣浩歌声摇山水鸟皆惊起伯浑饮至斗许予素不善饮亦不觉大醉夜且半舟始发去至平羌酒解得大轴於舟中则伯浑醉书纸穷墨燥如春龙奋蛰奇鬼搏人何其壮也後四年伯浑得疾不起予怀祖集伯浑文章移书走八千里乞余为序呜呼伯浑自少时名震秦属东被吴楚一时高流皆尊慕之愿与交方宣抚使临边图复中原制置使并护梁益兵民皆巨公大人闻伯浑名将闻於朝而卒为忌者所沮夫伯浑既决不肯仕即无沮者不过有司岁时奉粟帛牛酒劳问极则如孔?徐复辈赐散人号书其事於史而已於伯浑何失得而忌已如此乡使伯浑出而事君为卿为公则忌者当益衆排击沮挠当不遗力徙比景输左掎殆未可知安得如在眉山躬耕妇织放意山水优游以终天年邪则伯浑不遇未见可憾或曰伯浑之才气空海内无与比其文章英发钜丽歌之清庙刻之彝器然後为称今一不得施顾退而为山巔水涯娱忧纾悲之言岂不可憾哉予曰是则有命识者为时惜不为伯浑叹也淳熙某月某日山阴陆某序

晁伯咎诗集序

传密居士东里晁公伯咎诗四百六十有一篇其孙教授君百谈集为四卷以授予请序卷首伯咎少以文学称自其诸父景迂具茨先生皆叹誉之诸公贵人亦往往闻其名顾党家不敢取靖康之元党禁解伯咎召为开封掾且显用矣阻兵不能造朝比乘輿过江中原方兵连不解士大夫多以甲兵钱谷进故家名流乃见谓不切事机伯咎落江湖者数年久之虽起乘传岭海复坐微文斥卒弃不用以死而伯咎傲倪忧患不少动心方扁舟往来吴松啸歌饮酒益放於诗其名章秀句传之士大夫皆以为有承平台阁之风盖晁氏自文元公以大手笔用於祥符天禧间方吾宋极盛时封泰山礼百神歌颂德业冶金伐金极文章翰墨之用汪洋淳澹五世百余年文献相望以及建炎绍兴公独殿其後又少时所交皆中州名胜讲习磨礪之益深矣是岂窳书生闻见局陋者敢望其涯哉伯咎学问赡博胷中恢疎勇於为义视死生祸福无如也至他文亦皆豪奇不独其诗可贵尚力求而尽传之伯咎讳公迈仕至某官淳熙七年十一月十七日山阴陆某序

长短句序

雅止之乐微乃有郑卫之音郑卫虽变然琴瑟笙磬犹在也及变而为燕之筑秦之缶胡部之琵琶箜篌则又郑卫之变矣风雅颂之後为骚为赋为曲为引为行为謡为歌千余年後乃有倚声制辞起於唐之季世则其变愈薄可胜叹哉予少时汨於世俗颇有所为晚而悔之然渔歌菱唱犹不能止今絶笔已数年念旧作终不可掞因书其首以识吾过淳熙己酉炊熟日放翁自序

徐大用乐府序

古乐府有东武吟鲍明远辈所作皆名千载盖其山川气俗有以感发人意故骚人墨客得以驰骋上下与荆州邯鄲巴东三峡之类森然并传至於今不泯也吾友徐大用家本东武呼吸食饮於邾淇之津盖有以相其轶思者故自少时文辞雄於东州比南归以政事议论显闻荐绅顾不肯轻出其文以沽世取富贵三十年犹屈治中别驾澹然莫测涯涘独於悲懽离合郊亭水驿鞍马舟楫间时出乐府辞赡蔚顿挫识者贵焉或取其数百篇将传於世大用复不可曰必放翁以为可传则几矣不然姑止予闻而叹曰温飞卿作南乡九阕高胜不减梦得竹枝讫今无深赏音者予其敢自谓知君哉独感东武山川既堕风尘中而大用之才久伏不耀故为之一言绍兴五年三月庚寅笠泽陆某务观序

吕居仁集序

天下大川莫如河江其源皆来自蛮夷荒忽辽絶之域累数万里而後至中国以注於海今禹之遗书所谓岷积石者特记禹治水之迹耳非其源果止於是也故尔雅谓河出崑崙墟而传记又谓河上通天汉某至蜀穷江源则自蜀岷山以西皆岷山也地断壤絶不复可穷河江之源岂易知哉古之学者盖亦若是惟其上探虞夏唐虞以来有源有委不以远絶不以难止故能卓然布之天下後世而无媿凡古之言者皆莫不然自汉以下虽不能如三代盛时亦庶几焉宋兴诸儒相望有出汉唐之上者迨建炎绍兴间承丧乱之余学术文辞犹不愧前辈如故

紫微舍人东莱吕公者又其杰出者也公自少时既承家学心体而身履之几三十年仕愈蹏学愈进因以其暇尽交天下名士其讲习探讨磨砢浸灌不极其源不止故其诗文汪洋闳肆兼备衆体间出新意愈奇而愈浑厚震耀耳目而不失高古一时学士宗焉晚节稍用於时在西掖尝兼直内庭草赵丞相鼎制力排和戎之议忤秦丞相桧秦公自草日历载公制辞以为罪而天下益推公之正公平生所为诗既已孤行於世嗣孙祖平又尽裒他文凡若干首为若干卷而属某为序某自童子时读公诗文愿学焉稍长未能远游而公捐馆舍晚见曾文清公文清谓某君之诗渊源殆自吕紫微恨不一识面某於是尤以为恨则今得托名公集之首岂非幸欤庆元二年九月既望中大夫提举建宁府武夷山冲佑观山阴陆某谨序

佛照禅师语录序

拙庵禅师以佛法际遇孝宗皇帝问畬之语既刻金石传天下久矣晚庵居阿育王山中其徒相与尽裒五会所说法凡数万言为五卷遣侍者正球走山阴泽中请某作序某曰拙庵之道栋梁大法无语可也拙庵之语雷霆百世无録可也又何以序为哉然五会之外别有一会数万言之外别有一句是可録是不可録诸人试下语若也道得老农赞叹有分庆元三年九月壬子陆某谨序

赵秘阁文集序

汉孝武帝好文淮南王安以高帝孙为诸侯王而学问文辞在汉庭诸儒甲乙中其所着大小山至与雅颂离骚竝魏陈思王唐太白长吉则又以帝子及诸王孙落笔妙古今冠冕百世河出崑仑墟首四渎经天下以入于海彼源委固自不同无足异也宋兴宗室深居宫中不与外庭接故虽博学轶材不得着见然以诗文飞白书诏藏秘府者亦不乏人熙宁元丰间始与羣臣并进於朝积数十年而德麟伯山属文英妙寢见推於诸公间矣汉王五世孙秘阁公讳不拙字若拙少以进士奋主司及流辈皆伏其工初苦贫无以养乃教授诸生以自给其勤苦殆有非窈人子所堪者既得第犹不废也晚入蜀为州遂持使者节学益不厌文益妙予行南充阆中小益至成都历山邮津亭及浮屠老子之庐见穹碑巨板多公遗文每观之至忘食已而故尚书孙公仲益端明汪公圣锡侍御王公龟龄文益出於世往往见公名字於其间许与甚至然後知天下自有公论也公之子善发善零皆取世科善发字正已尤以文学称其为汉州判官也囊公之文万里请予於山阴泽中曰愿有冠冠篇右顾公平生知已久已雕落予材下徒以後死不得让媿可量哉庆元六年三月丁巳中大夫直华文阁致仕赐紫金鱼袋山阴陆某序

方德亨诗集序

诗岂易言哉才得之天而气者我之所自养有才矣气不足以御之淫於富贵移於贫贱得不偿失荣不盖媿诗由此出而欲追古人之逸驾詎可得哉予自少闻莆阳有士曰方德亨名丰之才甚高而养气不挠吕舍人居仁何着作搢之皆屈行辈与之游德亨晚愈不遭而气愈全观其诗可知其所养也既歿若干年待制朱公元晦以书及德亨之诗示予於山阴曰子为我

作德亨集序往时有方响者与德亨同族为予言德亨遇疾卒於临安逆垂垂困犹能起坐正衣冠手自作书与其族人官临安者使买棺棺至乃歿色辞不异平日非养气之全能如是乎请以是为序庆元六年四月丁酉山阴陆某序

会稽志序

昔在夏禹会诸侯於会稽历三千岁而我高宗皇帝御龙舟横涛江应天顺动复禹之迹驻蹕弥年定中兴之业羣盜削平强敌退遁於是用唐幸梁州故事陞州为府冠以纪元大驾既西幸而府遂为股肱近藩称东诸侯之首地望盖视长安之陕洛汴都之陈许所命牧守皆领浙东安抚使其自丞相执政来与去而拜丞相执政者不可遽数而又昭慈圣烈皇后及永佑以来四陵攢殿相望於郁葱佳气中朝谒之使舩衔穀击中原未清今天下鉅镇惟金陵与会稽耳荆扬梁益潭广皆莫敢望也则山川图谍宜其广载备书顾未暇及者縣数十年大卿沈公作宾待制赵公不迹继为守皆慨然以为己任乃与通判军事施君宿安抚司干辦公事李君兼韩君茂卿及郡士冯景中邵持正陆子虞王度朱鼐等上参禹贡下考太史公及历代史金匱石室之藏旁及尔雅本草道释之书稗官野史所传神林鬼区幽怪恍惚之说秦汉晋唐以降金石刻歌诗赋咏残章断简靡有遗者若父老以口相传不见於文字者亦间见层出积劳累月乃成是虽本之图经图经出於先朝非藩郡所可附益乃用长安河南成都相台之比名会稽志会稽为郡虽迁徙靡常而郡本以山得名又禹所巡也故卒以名之而属某为之序嘉泰元年二月庚子中大夫直华文阁致仕陆某谨序

渭南文集卷十四

卷十五

钦定四库全书

渭南文集卷十五

宋 陆游 撰

施司谏注东坡诗序

古诗唐虞赓歌夏述禹戒作歌商周之诗皆以列於经故有训释汉以後诗见於萧统文选者及高帝项羽韦孟杨惲梁鸿赵壹之流歌诗见於史者亦皆有注唐诗人最盛名家者以百数惟杜诗注者数家然槩不为识者所取近世有蜀人任渊尝注宋子京黄鲁直陈无已三家诗颇称详赡若东坡先生之诗则援据闳博指趣深远渊独不敢为之说某顷与范公至能会於蜀因相与论东坡诗慨然谓予足下当作一书发明东坡之意以遗学者某谢不能他日又言之因举二三事以质之曰五亩渐成终老计九重新埽旧巢?遥知叔孙子已致鲁诸生当若为解至能曰东坡窜黄州自度不复收用故曰新扫旧巢?建中初复召元佑诸人故曰已致鲁诸生恐不过如此耳某曰此某之所以不敢承命也昔祖宗以三馆养士储将相材及官制行罢三馆而东坡盖尝直史馆然自謫为散官某去史馆之职久矣至是史馆亦废故云新埽旧巢?其用字之严如此而凤巢西隔九重门则又李义山诗也建中初韩曾二相得政尽收用元佑人其不召者亦补大藩惟东坡兄弟犹领宫祠此句盖寓所谓不能致者二人意深语缓尤未易窥测至如车中有布乎指当时用事者则犹近而易见白首沉下吏緑衣有公言乃以侍妾朝云尝叹黄师是仕不进故此句之意戏言其上僭则非得於故老殆不可知必皆能知此然後无憾至能亦太息曰如此诚难矣後二十五年某告老居山阴泽中吴兴施宿武子出其先人司谏公所注数十大编属某作序司谏公以絶识博学名天下且用工深历岁久又助之以顾君景蕃之该洽则於东坡之意盖几可以无憾矣某虽不能如至能所托而得序斯文岂非幸哉嘉泰二年正月五日山阴老民陆某序

达观堂诗序

朝请郎致仕吴公景先少尝从洛川先生朱公希真问道朱公为名所居堂曰达观手书以遗之且赋诗一章属之曰子为人深静简远不富贵必壽考故吾以此事相期景先出仕五十年不求速化不治生产位仅至二千石晚为东诸侯客遂引年以归距八十不远望其容貌不腴不?视听步趋如五六十人非亲朱公密传亲付殆不能尔朱公之逝甚异世以为与尹先觉譙天授苏养直俱解化僊去则吾景先亦其流亚欤自朱公赋诗後士大夫继作凡若干篇属予为序嘉泰二年十一月癸丑放翁陆某务观序

梅圣俞别集序

宛陵先生遺詩及文若干首實某官李兼孟達所編輯也先生當吾宋太平最盛時官京洛同時多偉人巨公而歐陽公之文蔡君謨之書與先生之詩三者鼎立各自名家文如尹師魯書如蘇子美詩如石曼卿輩豈不足垂世哉要非三家之比此萬世公論也先生天資卓偉其於詩非待學而工然學亦無出其右者方落筆時置字如大禹之鑄鼎練句如后夔之作樂成篇如周公之致太平使後之能者欲學而不得欲贊而不能況可得而訛評去取哉歐陽公平生常自以爲不能望先生推爲詩老王荊公自謂虎圖詩不及先生包鼎畫虎之作又賦哭先生詩推仰尤至晚集古句獨多取焉蘇翰林多不可古人惟次韻和陶淵明及先生二家詩而已雖然使本無此三公先生何歉有此三公亦何以加秋毫於先生予所以論載之者要以見前輩識精論公與後世妄人異耳會李君來請予序故書以予之嘉泰三年正月己卯山陰陸某序

楊夢錫集句杜詩序

文章要法在得古作者之意意既深遠非用力精到則不能造也前輩於左氏傳太史公書韓文杜詩皆熟讀暗誦雖支枕據鞍間與對卷無異久之乃能超然自得今後生用力有限掩卷而起已十亡三四而望有得於古人亦難矣楚人楊夢錫才高而深於詩尤積勤杜詩平日涵養不離胸中故其句法森然可喜因以暇戲集杜句夢錫之意非爲集句設也本以成其詩耳不然火龍黼黻手豈補綴百家衣者邪予故爲表出之以告未深知夢錫者嘉泰三年正月丁亥笠澤陸某序

陸伯政山堂類稿序

古之學者始於家塾鄉校而貢於天子之辟雍始於抱關擊柝而至於公卿始於賦物銘器師旅會盟之辭而至於陳謨作誥其所遇雖不同然於明聖人之道闡性命精微之理則一也周衰道術裂於百氏士各以所見着書授徒於是稽之堯舜禹文王周公孔子之遺書始有大不合者今六經散缺不全而諸子之書則往往具在又其辭怪偉辯麗足以動蕩世之耳目乃欲學者之文辭一合於道而不悖戾於經可謂難矣吾宗伯政諱煥之唐丞相文公希聲之九世孫文公上距丞相元方五世中間子孫遇五季之亂獨不失譜至今世次皆可序述伯政家世爲儒力學篤行至老不少衰所爲文皆本六經无一毫汨於釋老雖其徒有從之求文者伯政尊所聞猶毅然不爲之貶至如楊公時近世名儒獨以立論少入釋老伯政正色斥之不遺余力使死而有知吾伯政有以見周公孔子矣其孤集遺文爲二十卷來請余爲序伯政之文可稱述者衆余獨言其學術文辭之正以序之尚不失斯人之本意又進其子孫云嘉泰四年二月丁巳笠澤陸某謹序

普燈錄序

粵自曠大劫來至神應迹開示天人未有不以文字語言相授者今七佛偈是其一也至於中夏則三十萬年之前包牺氏作已畫八卦造書契矣釋迦之興固亦無異今一大藏教可謂富矣乃獨於最後舉華示其上足弟子迦叶迦叶欣然一笑不立文字不形言語謂之正法眼藏

师举华而传弟子一笑而受既书之木叶旁行之间矣亦未见其与古圣异也岂谓之文而非文谓之言而非言邪昔有景德传灯三十卷者盖非文之文非言之言也此门一开继者相望其尤杰立者续灯广灯二书也然皆草创简略自为区别虽圣君贤臣之事有不能具载者独旁见间出於诸祖章中识者以为恨吴僧正受始着普灯凡十有七年成三十卷前日之恨毫髮无遗矣而尤为光明崇显者我祖宗之明诏睿藻哀集周悉一一皆有据依足以传示万世宝为大训其有功於释门最大方且上之御府副在名山而又以其副示某俾得纪述梗槩於後某自隆兴距嘉泰五备史官今虽告老待尽山泽犹於祖宗遗事思以尘露之微仰足山海不自知其力之不逮也嘉泰四年三月乙酉太中大夫充宝谟阁待制致仕山阴县开国子食邑五百户赐紫金鱼袋陆某谨序

澹斋居士诗序

诗首国风无非变者虽周公之豳亦变也盖人之情悲愤积於中而无言始发为诗不然无诗矣苏武李陵陶潜谢灵运杜甫李白激於不能自己故其诗为百代法国朝林逋魏野以布衣死梅尧臣石延年弃不用苏舜卿黄庭坚以废绌死近时江西名家者例以党籍禁锢乃有才名盖诗之兴本如是绍兴间秦丞相桧用事动以语言罪士大夫士气抑而不伸大抵窃寓於诗亦多不免若澹斋居士陈公德召者故与秦公有学校旧自揣必不合因不复与相闻退以文章自娱诗尤中律吕不怨不怒而愤世疾邪之气凜然不少回挠其不坐此得祸亦仅脱尔及秦氏废始稍起为吏部郎为国子司业秘书少监遽没於官後四十余年有子知津为高安守最其诗得三卷属某为序某少识公於山阴方公召还以诗诗赠别及公为郎时故相汤岐公一日语公曰陆务观别君诗方传世非公之贤何以发其语如此时绍兴己卯岁也因高安之请重以感歆某於是年八十有一矣开禧元年九月太中大夫宝谟阁待制致仕山阴县开国子食邑五百户赐紫金鱼袋陆某序

傅给事外制集序

国家自崇宁来大臣专权政事号令不合天下心卒以致乱然积治已久文风不衰故人材彬彬进士高第及以文辞进於朝者亦多称得人祖宗之泽犹在党籍诸家为时论所贬者其文又自为一体精深雅健追还唐元和之盛及高皇帝中兴虽披荆棘立朝廷中朝人物悉会於行在虽中原未平而诏令有承平风识者知社稷方永太平未艾也故给事中傅公以是时典西省文书得名尤盛公天资忠义絶人自金人蹂躏中原建炎中大驾南渡敌吞噬不遗力几犯属车之尘眇眇然书生位未通显独涕泗感激请提孤军横遏其冲卫乘輿论功埒诸大将及驻驂会稽公遂为浙东帅始隐然有大臣望虽摈斥不容而士论愈归及在东省御史力诋去之然犹知公为一代大儒盖公论不可揜如此公遗文百余卷嗣孙穉贫甚手自钞録以传後世未能竟乃先缉外制数百篇属某为序公之文固天下所愿见而取法某未成童时公过先少师每获出拜侍立被公教诲距今七十余年幸犹後死得论序公文亦幸矣某闻文以气为主出处无媿气乃不挠韩柳之不敌世所知也公自政和讫绍兴閱世变多矣白首一节不少屈於权贵不附时论以苟登用每言敌言畔臣必愤然扼腕裂眦有不与俱生之意士大夫稍有退缩者辄正色责之若讐一时士气为之振起今观其制告之词可概见也公讳崧卿字

子駿於虜賢哉開禧元年九月某日太中大夫充寶謨閣待制致仕山陰縣開國子食邑五百戶賜紫金魚袋陸某謹序

聞顰錄序

元丰初置武學先太師以三館兼判學事今學制規模多出於公而策問亦具載家集中後百余年某從子朴作聞顰錄若干篇論孫吳遺意欲上之朝且乞序於某某儒且老非能知武事者朴許國自奮之志亦某所媿也乃從其請開禧元年十一月丁卯陸某序

周益公文集序

天之降才固已不同而文人之才尤異將使之發冊作命陳謨奉議則必畀之以閎富淹貫溫厚爾雅之才而處之以帷幄密勿之地故其位與才常相稱然後其文足以紀非常之事明難喻之指藻飾治具風動天下書黃麻之詔鏤白玉之牒藏之金匱石室可謂盛矣若夫將使之闡道德之原發天地之秘放而及於鳥獸蟲魚草木之情則畀之才亦必雄渾卓犖窮幽極微又畀以遠游窮處排摈斥疎使之磨礪齟齬瀕於寒餓以大发其藏故其所賦之才與所居之地亦若造物有意於其間者雖不用於時而自足以傳後世此二者造物豈真有意哉亦理之自然古今一揆也大丞相太師益公自少壯時以進士博學宏詞疊二科起家不數年歷太學三館予實定交於是時固多豪雋不羣之士然落筆立論傾動一座無敢嬰其鋒者惟公一人中雖暫斥而玉烟劍氣三秀之芝非窮山腐壤所能湮沒復出於時極文章禮樂之用絕世獨立遂登相輔雖去視草之地而大詔令典冊孝宗皇帝猶特以屬公於虜聖主之心亦如造物非私公以富貴蓋大官重任不極不久則無以盡公之才也公既薨逾年公之子綸以公遺文號省齋文稿者屬予為之序公在位久崇論宏議豐功偉績見於朝廷傳之夷狄者何可勝數予獨論其文者墓有碑史有傳非集序非當及也開禧元年十二月甲子太中大夫寶謨閣待制致仕山陰縣開國子食邑五百戶賜紫金魚袋陸某謹序

宣城李虞部詩序

宣之為郡自晉唐至本朝地望常重來為守者不知幾人而風流咏咏謝宣城實為之冠生其鄉者幾人而歌詩復古梅宛陵獨擅其宗此兩公蓋與敬亭之山俱不磨矣故宣之士多工於文而五七字為尤工唐有李推官以詩名當代其家傳遺詩得數百篇以詩考之蓋與皮陸同時欤自推官後世世得能詩聲當元丰間有虞部公作詩益工推官清新警邁極鍛鍊之妙而虞部則規模思致宏放簡遠自宛陵出如劉子駿文學不盡與父同議者亦不能優劣之也予得其兩世遺編於虞部之曾孫臨海太守兼字孟達孟達固詩人蓋淵源二祖而能不媿者推官虞部之家世諱字與其學術行治蓋各見於其墓刻家牒予獨志其詩云開禧三年六月丙午太中大夫寶謨閣待制致仕渭南縣開國伯食邑八百戶賜紫金魚袋陸某謹序

曾裘父詩集序

古之说诗曰言志夫得志而形於言如皋陶周公召公吉甫固所谓志也若遭变遇谗流离困悴自道其不得志是亦志也然感激悲伤忧时闵己托情寓物使人读之至於太息流涕固难矣至於安时处顺超然事外不矜不挫不诬不怗发为文辞冲澹简远读之者遗声利冥得丧如见东郭顺子悠然意消岂不又难哉如吾临川曾裘父之诗其殆庶几於是乎予绍兴己卯庚辰间始识裘父於行在所自是数见其诗所养愈深而诗亦加工比予来官临川则裘父已没欲求其遗书而予蒙恩召归至今以为恨友人赵去华彥稹寄裘父艇舫小集来曰愿序以数十语然裘父得意可传之作盖不止此遗珠弃璧识者兴叹去华为郡博士尚能博访之稍增编帙计无甚难者敢以为请裘父讳季狸及与建炎过江诸贤游尤见赏於东湖徐公嘉定元年二月丁酉山阴陆某序

送岩电道人入蜀序

王衍一生酣豢富贵乃以口不言钱自高岩电本张氏子施药说相不受人一钱乃自称姓钱以滑稽玩世古今相反有如此者忽来告放翁言将西入蜀乃书以遗之他日到青城大峨眉中鹄鸣诸名山见孙思邈朱桃椎张四郎尔朱先生姚小太尉譙天授尹先觉辈有问放翁安否者可出此卷相与一笑

邢刍甫字序

卫诗美武公之德一章曰瞻彼淇澳绿竹猗猗终之曰有斐君子终不可谖兮淇大川也见淇而思武公可也王刍篇竹草之微者亦见而思焉则思之至矣此所谓终不可谖兮者欤吾友邢子名淇请字於予予复之曰士之仕者能使一国一邑之人安其政而无怨疾嘲讥亦已难矣况见其乡閭而咨嗟追慕岂不甚难哉今卫人於武公见其地而思之见其草木而思之见其草之微者如王刍篇竹而思之况遇其子孙又将何如哉人不我忘於我何加然使人不怨疾嘲讥又咨嗟追慕久而不忘必有以得之矣故为士者於此不可不知勉也请字子曰刍甫刍甫勉之仕而使一国一邑之人不忘相处而使乡閭党友不忘相与记其行事以为法传其言论风旨诵习而勉於善岂不美哉嘉定元年四月己未山阴陆某序

曾温伯字序

尧舜去今远矣其言传於今者盖寡惟直而温与寬而栗之言再见焉方是时教化之所覃人才之所慕全德如夔皋陶所言是岂戒其不足哉至商周之间始有得圣人之清圣人之和者清近直和近温则既分而二矣若汉汲长孺事君无隐天下为之直然去古之全德又益以远贛川曾君黯方其入家塾也大父大卿公用苏子由张芸叟字其子孙例字之曰温伯盖以古全德训之有其义而亡其说温伯请於予曰愿有以补之以终大父之意予慨然叹曰自大卿至温伯三世传嫡德亦克肖其有以承此训矣序其敢辞嘉定元年五月辛酉山阴陆某序

天童无用禅师语録序

慮羲一画发天地之秘迦叶一笑尽先佛之传净名一默曾点一唯丁一牛刀扁一车轮临济一喝德山一棒妙喜一竹篋子皆同此关捩但恨欠人承当天童无用禅师盖卓尔能承当者未见妙喜大事已毕岂有住山示衆之语可累编简哉放翁谓若不投之水火无有是处惟韩退之所云火其书其语差似痛快又恐退之亦止是说得耳五百年後此话大行方知无用与放翁却是同参嘉定元年秋九月丙辰序

陈长翁文集序

汉之文章犹有六经余味及建武中兴礼乐法度粲然如西京时惟文章顿衰自班孟坚已不能望太史公之淳深崔蔡晚出遂坠卑弱识者累歎而已我宋更靖康旣变之後高皇帝受命中兴虽艱难颠沛文章独不少衰得志者司诏令垂金石流落不偶者娱忧纾愤发为诗骚视中原盛时皆略可无媿可谓盛矣久而寢微或以纖巧摘裂为文或以卑陋俚俗为诗後生或为之变而不自知方是时能居今行古卓然杰立於颓波之外如吾长翁者岂易得哉其子师文来乞予为长翁集序乃寓吾叹以慰其子且以慰长翁於地下云长翁高邮陈氏讳造字唐卿嘉定二年三月丁巳渭南伯陆某务观序

渭南文集卷十五

卷十六

钦定四库全书

渭南文集卷十六

宋 陆游 撰

成都府江渎庙碑【淳熙四年五月一日】

自古水土之功莫先乎禹纪其事莫备乎禹贡之篇禹贡之所载莫详乎江汉曰嶓冢导漾东流为汉又曰岷山导江某尝登嶓冢之山有泉涓涓出两山间是为汉水之源事与经合及西游岷山欲穷江源而不可得盖自蜀境之西大山广谷谿谷起伏西南走蛮夷中皆岷山也则江所从来尤荒远难知而汉过三谿至大别之麓亦卒附江以达於海故江为四渎之首三代典祀秩视诸侯而楚大国亦以为望有事必祷祠焉可谓盛哉成都自唐有江渎庙其南临江唐末节度使高骈大城成都庙与江始隔历五代之乱淫昏割裂神弗受职庙亦弗治宋兴乾德三年平蜀越八年当开宝六年有诏自京师绘图遣工侈大庙制杰阁广殿修廊邃宇闻於天下庆历七年故太师忠烈潞公以枢密直学士来作牧则又筑大堂并庙东南以为彻祭饮福之所而庙益宏丽矣厥後虽屡缮治有司不力寢以大坏上漏旁穿风雨入屋支倾苴罅苟偷岁月淳熙二年六月今尹敷文阁待制范公之始至也躬执性币祇肃祀事既退读开宝中修庙碑惕然改容曰此太祖皇帝之诏敢弗?南出登堂见忠烈公之识则又叹曰潞国予自出也敢弗嗣始有葺庙意矣会岁旱公洁斋以祷曰三日而雨且大治祠宇以报如期高下洽足岁以大穰公饶私余蛮夷顺服乃自三年某月庀工讫四年五月庙成总其费木以章计者八千一百二十有八竹以个计者四万九千四百七十甍甍钉以枚计者十八万七千七百二十有四丹青黝垩以斤计者一万八十有七梓匠役徒以口计者二万三千八百为屋二百有九间墙六千八百七十尺庙之制度复还开宝庆历之盛而有加焉於是府之属吏来请其刻文丽牲之石且系以诗诗曰井络之躔下应岷山蟠踞华夷江出其间奔蹴三峡放於荆扬我考禹迹九州茫茫千础之宫肇自开宝吏靡严恭庭有茀草范公来止事神是力庙未克成当食太息江流东倾於海朝宗庙成公归与某俱东壮哉汤汤环我蜀城万古不竭亦配公名

行在宁壽观碑

绍兴二十年十月诏赐行在三茆堂名曰宁壽观因东都三茆宁壽院之旧也初章圣皇帝建会灵观实为崇奉之始至是高宗皇帝方跻天下於仁壽之域尤垂意焉廼命道士蔡君大象知观事蒙君守亮副之许其徒世守又命中贵人刘君敖典领置吏胥给清卫兵略用大中祥符故事後十年敖遂请弃官专奉宁壽香火诏如所请赐名能真改左右街都道録仍领观事实又用至道中内侍洪正一故事上心眷顾每示优假如此然迨今岁月寢久未有纪之金石以侈上赐者绍熙五年六月知观事冲素太师邵君道俊始礲石来请某为文传示後世某实绍兴朝士屡得对行殿同时廷臣零落殆尽某适後死获以草野之文登载盛事顾不幸欤伏

观宁壽观实居七宝山之麓表里湖江拱辅宫阙前带驰道後枕崇阜尽得都邑之胜广殿中峙修廊外翼云章宝室籤帙富丽浩浩乎道山蓬萊之藏也钟经二楼翬飞霄汉飘飘乎化人中天之居也金符象简羽流毕集进趋有客肃恭斋法济济乎茹灵芝饮沆瀣之衆也导以霓旌节以玉磬侍者翼从以登讲席琅琅乎彻九天震十方之音也佑陵之御画德壽重华之宸翰焕乎河雒之图书也鸿鍾大鼎华盖宝剑褚遂良吴道子之遗迹卓乎秘府之怪珍也荣光异气夜烛天半所以扶卫社稷安镇夷夏者於是乎在非他宫馆坛宇可得而比永惟我高宗皇帝实与三茆君自浑沌溟涬开辟之初赤明龙汉浩劫之前俱以愿力应世济民虽时有古今迹有显晦其受命上帝以福天下则合若符券及夫风御上宾威神在天与三十六帝翱翔太虚三茆君亦与焉时临熙坛顾享明荐用敷佑於我圣子神孙降福发祥时万时亿於虞休哉某既述观之所繇兴且系之以铭曰

炎祚中否开真人以大誓愿济下民左右虚皇友三真坐令化国风俗淳乃营斯宫示宿因丹碧岌嶭天与隣神君龙虎呵重闥鲸钟横撞震无垠锦旛宝盖高嶙峋天花龙烛昼夜陈历载九九符尧仁超然脱屣侍帝晨遗泽渗漉万均岁丰兵偃无吟呻咨尔衆士严冠巾以道之真治子身服膺圣训常如新冲霄往从龙车尘

严州乌龙广济庙碑

山川之祀自虞书以来见於载籍与天地宗庙并或谓山川兴云雨泽枯槁宜在秩祀非必有神主之以予考之殆不然维岳降神生甫及申山川之神降而为人与人死而为山川之神一也岂幸而见於经则可信後世则举不可信邪柳宗元死为罗池之神其传甚怪而韩文公实之张路斯以人为龙庙於颍上其传尤怪而苏文忠公实之盖二神者所传虽不可知而水旱之祷卓乎伟哉不可泯没则二公亦不得而掩也予适蜀见李冰张恶子庙於离堆梓潼之山皆血食千载非独世未有疑者盖其灵响暴着亦不容置疑者矣严州乌龙山广济庙之神曰忠显仁安灵应昭惠王旧碑以为唐贞观中人姓邵氏所记甚详虽幽显殊隔不可尽质然神灵动人如罗池变化不测如颍上历数百年未尝少替而朝廷之所褒显吏民之所奉事亦犹一日此乌可以幸得哉至於绍兴辛巳东海之师羣胡见巨人皆长丈余戈戟麾旄出没烟云间则相告曰乌龙神兵至矣或降或遁去无敢枝梧者是又与东晋八公山及庆历嘉岭神之事相埒然彼皆在近境而此独见於山海阻絶数千里之外岂不尤异也哉不得韩苏之文以侈大其传而邦人进士沈奂顾以属笔於某辞卑事伟有足恨者迺作送迎神诗一章使并刻之实庆元五年十月甲子也其辞曰

王之生兮值唐初基龙翔於天兮英雄是资独沉草莱兮默不得施巉然万仞兮胸中之奇使得小试兮冒白刃而搴朱旗丈夫战死兮固亦其宜死於不遭兮精神曷归王亦何怵兮人则为悲乌龙之山兮跨空巍巍筑杰屋兮奉祠酿桂兮羞芝弹箜篌兮吹参差王舍斯民兮逝何之锡以祉兮燕及惇嫠岁屡丰兮长无凶饥拥羽盖兮驾玉螭时节来飡兮民之依国有征诛兮克相王师长戈大纛兮肃肃阴威埽平河雒兮前功弗隳隆名显爵兮永世有辞

德勲庙碑

自古王者经纶草昧戡定乱略必有熊黑之士不贰心之臣内任心膂之寄外宣股肱之力而庙谟国论密赖以决实兼将相之任者在我高宗皇帝时有若太师循忠烈王张公实维其人粤自高宗历试於外开大元帅府总天下兵首以山西豪杰入侍帷幄龙飞顺动避狄南渡公则有扶天夹日之功萧墙衅起羣公暗拱公则倡勤王复辟之大策氛祲内侵戎马豕突公则奋却敌御侮之奇略巨盗乘间羣凶和附公则建剪除安辑之成绩由是不数年间国势安强夷狄夺气请和而一二重将未还宿卫论者咸非为非长久计公则率先请罢宣抚使事奉朝请章再上引义?款於是议始定士大夫咸谓其得大臣体而高宗亦每谓之腹心旧将又曰从来待卿如家人又曰是人与他功臣相去万万盖高宗蹈履艱危身济大业沉机独智烛微察远以为方海内横流巡幸四方暴衣露盖周卫单寡非如中都高拱蝓蜗蠖濩之居江流阻艱海道阨危非如平时安行清蹕驰道之中不有如公者协心同德均祸福共安危譬之一家父兄有急子弟不召而自至譬之一身头目有患手足不令而自力则天下之计将以谁诿袁盎谓绦侯功臣非社稷臣则社稷臣与功臣果异建炎以来功臣则有矣至可名社稷臣者非公而谁故国家所以褒表崇异常出等夷之上非私恩也及配享高宗庙庭其次偶居其後或者疑焉是不然唐名将前曰英卫後曰李郭卫公汾阳之勲德巍如泰山终不以姓名次序为歉钦宗皇帝下诏褒显故老而范文正公次司马文正之下司马公之贤不过於范公等范公辅政先数十年声诗所载以配夔高而顾乃居次世岂以此为有抑扬之意哉公之曾孙鎡三世传嫡长始筑庙於居第之东庙成以高宗御书德勲二大字为庙之名自忠烈以下为三室忠烈之配曰秦国夫人魏氏汉国夫人章氏第二室曰少傅公讳子厚配曰汉国夫人萧氏第三室曰少师公讳宗元配曰楚国夫人刘氏惟忠烈王勲业之详与夫世讳字系官爵葬有碑諡有诰史有传此不复载顾庙祭宜有歌诗刻於丽牲之碑乃作诗曰

宋传九圣高宗是承化龙渡江天开中兴维忠烈王翼从帝旁捐身弃孥独当豺狼烟尘未息变生肘腋首倡义师气沮金石大业复隆退不矜功雪涕行罪身卫行宫国有大难我则出扞功成愈谦将士畏叹既空盗藪鏖战淮右柘皋之捷梁楚无寇河雒将平敌畏乞盟亟上虎符就第王城茂勲明德烂然史册燕及家国匪王孰克筑庙作主三室同宇岁时奉享丰豆硕俎国有世臣家有元孙咨尔後人祇栗庙门

泰州报恩光寺禪寺最吉祥殿碑

天下无不可举之事亦无不可成之功始以果终以不倦此事之所以举而功之所以成也海陵通川之间自建炎後为盗区战場中虽息兵然犹鬼啸狐嗥於藜莠瓦砾中自官寺民庐皆略具尔未几复有绍兴辛巳之祸前日之略具者又践蹂燔烧涤地而尽乾道淳熙以来中外无事函养滋息且以国力兴葺之迨今四十年而城郭邑屋尚未能复承平之旧至於浮图之庐又非郡县所急或盛或衰皆在仕者所不问则其举事若尤难者呜呼是特不遇浮图之杰耳信有之未见其果难也泰州报恩光孝禪寺是已寺始为天宁万壽寺今名盖用绍兴诏书改赐亦火於辛巳之变有祖彦师者复葺之未成而化中间屡易主者至绍熙中今长老德范师应转运陈公损之之请而至寺虽麤建而大役多未之举有巨钟千石方寺坏於兵时楼焚钟堕扁而不坏范始至奋曰钟不坏寺将兴之符也吾举事将自钟始乃建楼百尺以栖钟钟始铸岁在乙卯至是三乙卯矣而楼成人咸异之遂议佛殿殿之役最大度费钱数千万见者

缩经曰使可为岂至今日邪范曰不然吾当与有缘者力成之不敢以难故止已而有居士刘洪首施钱五百万施者不劝而集积为四千万有奇乃伐木於黄冈蔽流而下方役之兴以关征为惧常平使者王公宁闻之曰斯殿以资永佑陵在天之福孰敢议者吾当任其事於是所至皆为弛禁殿以崇成为重屋八楹东西百三十六尺南北九十六尺高百一十尺佛菩萨阿罗汉三十有一躯会王公去而後使者韩公奭取华严经语书殿之顔曰最吉祥殿范又为阁六楹以奉今天子昔在潜邸赐前住持觉深碧云二大字阁之广袤雄丽亦略与殿称余芳方丈寢堂厨库水陆堂两庀累数十年不能成者皆不淹岁而备最其费为缗钱二十万在它人若寢食不遑暇范独终日从容倡道以进其徒一警欬一顾视皆具第一义学者往往得入而其师别峯之法遂盛行於江淮间矣凡一寺内外莫不粲然复兴是殿实为之冠庆元六年夏四月范使其书记蜀僧祖兴来求予作碑予既尽述其始末且为之铭铭曰海陵奥区名寰中长淮大江为提封於皇徽祖御飞龙臣民荐福遐迩同是邦巍然千柱宫中有广殿奉大雄环材蔽江西徂东波神呵护是云从璇题藻井翔虚空丹碧髹垩无遗工劫火不能坏鸿钟雷震鲸吼声隆隆层阁閼奉龙鸾踪荣光夜起腾长虹徽祖圣德齐天崇泽覃草木函昆虫咨尔梵衆极严恭熙运芙庆千载逢余福渐被兼华戎长佑农扈消兵烽

洞霄宫碑

造化之初昆仑旁薄一气既分天积气於上地积块於下明为日月幽为鬼神聚为山岳海渌散为万物万物之最灵为人人之最灵为圣哲为僊真而道为天地万物之宗幽明钜细之统此虚羲皇帝老子所以握乾坤司变化也其书为易六十四卦道德五千言阴符西昇度人生神之经列御冠庄周关喜之书其学者必谢去世俗练精积神栖於名山乔岳略与浮图氏同而笃於父子之亲君臣之义与尧舜周公孔子遗书无异浮图氏盖有弗及也临安府洞霄宫旧名天柱观在大涤洞天之下盖学黄老者之所庐其来久矣至我宋遂与嵩山崇福宫独为天下宫观之首以宠辅相大臣之去位者亦有以提举洞霄召拜左相者则其地望之重殆与昭应景灵醴泉万壽太一神霄宝籙为比它莫敢望在真宗皇帝时始制诏改宫名赐金宝牌又赐仁和县田十有五顷奉斋醮悉除其租赋至政和间宫以历岁久穿坏漫漶徽宗皇帝降度牒三百命两浙转运司复兴葺之岁度童子一人道士建炎中又废於兵火高宗皇帝中兴大业闻之当宁太息乃绍兴二十五年以皇太后之命建昊天殿钟楼经阁表以崇闕繚以修庀费出慈宁宫梓匠工役具於修内步军司中使临护犒赐踵至既不以命有司而山麓之民亦晏然不知有役一旦告成金碧之丽光照林谷钟磬之作声摩云霄见者疑其天降地涌而神运鬼输也可谓盛矣及上脱屣万几颐神物表遂以乾道二年自德壽宫行幸山中驻蹕累日勅太官进蔬膳亲御翰墨书度人经以赐自有天地即有此山殊尤之迹未有若此者庆元六年九月葆光大师宫都监潘三华与知宫事高守中同知宫事水丘居仁以告山阴陆某曰愿有纪以为无穷之传某以疾未能属稿後三年同知宫事王思明与其徒李知柔枕涛江入东继以请乃叙载其本末如此且为之铭曰在宋祥符帝锡之书乃作昭应比隆羲图元丰景灵列圣攸居元佑上清以祝帝储栋宇煌煌焕於天衢徽祖神霄诞弥九区迨我高皇东巡於吴睠言天柱镇兹行都警蹕来临神明翊扶乃御幄殿穆清斋居天日下照雨露普濡迨今遗民注望属车三圣嗣兴光绍圣谟千础之宫騫腾太虚宝磬鸿钟震於江湖肆作颂诗用纪絕殊

渭南文集卷十六

<集部,别集类,南宋建炎至德佑,渭南文集>

卷十七

钦定四库全书

渭南文集卷十七

宋 陆游 撰

云门寿圣院记

云门寺自晋唐以来名天下父老言昔盛时繚山并谿楼堍重复依岩跨壑金碧飞踊居之者忘老寓之者忘归游观者累日乃徧往往迷不得出虽寺中人或旬月不相覩也入寺稍西石壁峯为看经院又西为药师院又西繚而北为上方已而少衰於是看经别为寺曰显圣药师别为寺曰雍熙最後上方亦别曰寿圣而古云门寺更曰淳化一山凡四寺寿圣最小不得与三寺班然山尤胜絶游山者自淳化历显圣雍熙酌炼丹泉闕笔仓追想葛稚川王子敬之遗风行听滩声而坐?木影徘徊好泉亭上山水之乐餍饫极矣而亭之旁始得支径逶迤如綫修竹老木怪藤丑石交覆而角立破崖絶涧奔泉迅流喊呀而喷薄方暑凜然以寒正昼仰视不见日景如此行百余步始至寿圣崭然孤絶老僧四五人引水种蔬见客不知拱揖客无所主而去僧亦竟不知辞谢好奇者或更以此喜之今年予来南而四五人者相与送予至新谿且曰吾寺旧无记愿得君之文磨刻崖石予异其朴槩而能知此也遂与为记然忆为儿时往来山中今三十年屋益古竹树益苍老而物色益幽奇予亦有白髮久矣顾未知予之文辞亦能少加老否寺得额以治平某年某月後九十余年绍兴丁丑岁十一月十七日吴郡陆某记

宁德县重修城隍庙记

礼不必皆出於古求之义而称揆之心而安者皆可举也斯人之生食稻而祭先嗇衣帛而祭先蚕饮而祭先酒畜而祭先牧犹以为未则凡日用起居所赖者皆祭祭门祭竈祭中溜之类是也城者以保民禁奸通节内外其有功於人最大顾以非古黜其祭岂人心所安哉故自唐以来郡县皆祭城隍至今世尤谨守令谒见其仪在他神祠上社稷虽尊特以令式从事至祈禳报赛独城隍而已则其礼顾不重欤宁德为邑带山负海双岩白鹤之岭其高摩天其嶮立壁负者股栗乘者心掉飞鸢关井之水涛澜汹涌蛟鳄出没登舟者涕泣与父母妻子别已济者同舟更相贺又有气雾之毒鼃龟蛇蚕守宫之蛊邮亭逆旅往往大署墙壁以道出宁德为戒然邑之吏民独不得避则惟神之归是以城隍祠比他邑尤盛祠故在西山之麓绍兴元年知县事赵君诜之始迁於此二十八年五月权县事陈君摠复增筑之高明壮大称邑人尊祀之意既成属某为记某曰幽显之际远矣惟以其类可感故古之祭者必思其所嗜好夫神之所以为神惟正直所好亦惟正直君傥无愧於此则擷涧谿之毛挹行潦之水足以格神不然丰豆硕俎是谄以求福也得无与神之意异邪既以励君亦以自励又因以励邑人八月一日右迪功郎主簿陆某记

濞亭记

濞山道人广勤庐於会稽之下伐木作亭苦之以名之曰濞亭而求记於陆子吾闻乡居邑处父兄子弟相扶持以生相安乐以老且死者民之常也士大夫去而立朝散之四方功名富贵足以老而忘返矣犹或以不得车骑冠盖雍容於途以夸其邻里而光耀其族嫻为憾惟浮屠师一切反此其出游惟恐不远其游之日惟恐不久至相与语其平生则计道里远近岁月久暂以相高呜呼亦异矣勤公之心独不然言曰吾出游三十年无一日不思濞而适不得归未尝以远游夸其朋侪其在濞亭语则濞也食则濞也烟云变灭风雨晦冥吾视之若濞之山樵牧往来老稚啸歌吾视之若濞之人疏一泉移一石艺一草木率以濞观之恍然不知身之客也夫人之情无不怀其故者浮屠师亦人也而忘其乡邑父兄子弟无乃非人之情乎自尧舜周孔其圣智千万於常人矣然犹不以异於人情为高浮屠师独安取此哉则吾勤公可谓笃於自信而不移於习俗者矣故与为记绍兴三十年十二月十二日记

烟艇记

陆子寓居得屋二楹甚隘而深若小舟然名之曰烟艇客曰异哉屋之非舟犹舟之非屋也以为似坎舟固有高明奥丽踰於宫室者矣遂谓之屋可不可邪陆子曰不然新丰非楚也虎贲非中郎也谁则不知意所诚好而不得焉麤得其似则名之矣因名以课实子则过矣而予何罪予少而多病自计不能效尺寸之用於斯世盖尝慨然有江湖之思而饥寒妻子之累劫而留之则寄其趣於烟波州岛苍茫杳霭之间未尝一日忘也使加数年男胜鉏犁女任纺绩衣食麤足然後得一叶之舟伐荻钓鱼而卖芰苡入松陵上严濑历石门沃洲而还泊於玉笥之下醉则散髮扣舷为吴歌顾不乐哉虽然万鍾之禄与一叶之舟穷达异矣而皆外物吾知彼之不可求而不能不眷眷於此也其果可求欤意者使吾胸中浩然廓然纳烟云日月之伟观揽雷霆风雨之奇变虽坐容膝之室而常若顺流放櫂瞬息千里者则安知此室果非烟艇也哉绍兴三十一年八月一日记

复斋记

仲高於某为从祖兄某盖少仲高十有二岁方某为童子时仲高文章论议已称成材冠裳带博车骑雍容一时名公卿皆慕与之交诸老先生不敢少之皆谓仲高仕进且一日千里自从官御史识者惟恐不得如仲高者为之及其丞大宗正出使一道在他人亦足称美仕在仲高则谓之蹉跌不偶可也顾曾不煖席遂遭口语南迁万里凡七阅寒暑不得内徙与仲高亲厚者每相与燕游辄南望叹息出涕因罢酒去如是数矣然客自海上来言仲高初不以迁谪瘴疠动其心方与学佛者游落其浮华以反本根非复昔日仲高矣闻者皆怅然自以为不足测斯人之浅深也隆兴元年夏某自都还里中始与兄遇视其貌渊乎似道听其言简而尽所谓落浮华反本根者乃亲见之尝对榻语至丙夜谓某曰吾名吾燕居之室曰复斋子为我记某自念少贫贱仕而加甚凡世所谓利欲声色足以败志汨心者一不践其境兀然枯槁似可学道者然从事於此数年卒无毛发之得若仲高驰骋於得丧之场出入於忧乐之域而自得者乃如此非深於性命之理其孰能之某盖将就学焉敢极道本末以为复斋记

青州罗汉堂记

隆兴改元秋九月某访故人弈公於青山之下与弈公别盖十有余年矣闻某至曳杖出迎松间黔瘠腊如残雪覆顶相与握手访问朋旧且悲且喜既至其居修廊邃屋曲折皆有意已而入法堂之东室忽见涧壑岩窦飞泉迅流菩萨阿罗汉翔游其中使人如身在峨眉天台应接不暇弈公从旁笑曰此吾使工人幻为之者也始王君某筑是庵於墓左以资其先人之福而请吾居焉王君闭门读书未尝少贬於世顾於吾独委曲周尽吾亦感其意为之留而弗去者十年凡此土木金碧以为像设供养之具者积费千金王君无丝毫计惜而吾之心志亦竭於是矣子为我记呜呼某不天少罹凶今且老矣而益贫困每游四方见人之有亲而得致养者与不幸丧亲而葬祭之具可以无憾者辄悲痛流涕怆然不知生之为乐也闻王君之事既动予心又况弈公勤勤之意乎记其可辞明年七月一日甫里陆某记

镇江府城隍忠佑庙记

汉将军纪侯以死脱高皇帝於荥阳之围而史失其行事司马迁班固作列传弗载也维宋十一叶天子驻蹕吴会改元乾道正月甲子右中奉大夫直敷文阁知镇江府方滋言府当淮江之冲屏卫王室号称大邦自故时祠纪侯为城隍神莫知其所以始然实有灵德以庇其邦之人祷祈禴禴昭荅如响绍兴隆兴之间虏比入塞金鼓之声震於江壖吏民不知所为则惟神之归虽虏畏天子威德折北不支退舍请盟府以无事至於流徙蔽野兵民参错而居处弗惊疾疠以息则神实陰相之吏其敢贪神之功以为已力乎谨上尚书愿有以褒显之以慰父兄子弟之心越三月癸丑有诏赐庙额曰忠佑诏下而方公为两浙转运副使右朝散大夫直徽猷阁吕公擢来知府事侈上之赐五月癸亥大合乐盛服齐庄躬致上命神人协心雾雨澄霁灵风肃然来享来临於是吕公以属某曰愿有纪焉某惟纪侯忠奋於一时而暴名於万世功施於汉室而见褒於圣宋身陨於荥阳而血食於是邦土惟力於为善而已岂有有其善而不享其报者乎吏之仕乎是邦者必将有事於庙有事於庙者必将有考於碑其尚知所勉焉母为神羞六月癸未记

黄龙山崇恩禅院三门记

自浮屠氏之说盛於天下其学者尤喜治宫室穷极侈靡儒者或病焉然其成也无政令期会惟太平久公私饶余师与弟子四出丐乞积累岁月而後能举其坏也无卫守谁何一日寇至则立为草莽丘墟故天下乱则先坏治则後成予於是盖独有感焉黄龙山方南公时学者之盛名天下而其居亦称焉中更夷狄盗贼大乱之後学者散去施者弗至昔之闳壮鉅丽者尝委地矣自庚申迄丁亥二十余年之间乃能粲然复兴楼堦殿阁空翔地踊钟鱼之声闻十余里法席之盛殆庶几南公时是非兵革之祸不作远方之氓蕃息阜安得以其公赋私养之余及於学佛者则此山且为虎狼魑魅之所宅矣而安能若是哉禅师升公於其寺门之成也属予为记予谓升公方以身任道起其法於将坠门盖未足言独书予所感使凡至山中者皆知前日之祸乱尝如此而国家之覆焘函育斯民若是其深吏勤其官民力其业相与思报上之施焉升公岂不得所愿哉乾道三年正月十四日左通直郎陆某记

王侍御生祠记

乾道七年二月知夔州济南王公新作贡院成越三年夔归万施梁山大宁六郡之士不谋同辞曰夔虽号都督府而僻在巴硖无赢财美工公之为是役也寸寸铢铢心计而手度之累月乃成形容为癯发为尽白其德於士岂有既邪盍思所以报者乃相与筑祠於院之东堂画像惟肖又相与属予记之予曰公之施厚矣祠未足报也士则曰吾等将日夜勉於学父兄诏子弟於家长老先生训诸生於乡期有以应有司之求如是足乎予曰未也郡国贡士於天子天子命近臣与馆阁文学之士选其尤者而亲策之於廷策既上天子为亲第其名谓之进士进士将相储也自是而起於朝其任政事毋伏嘉言毋丑衆正其任言责毋比大吏毋置宵人其任百执事守节秉谊宿道乡方毋怀谗毋服谄使天下称之史臣书之曰是夔州所贡士也士以是报公公以是报天子乃可无媿而予於记亦无媿辞矣若何皆曰唯敢不力乾道七年三月十五日左奉议郎通判军州主管学事兼管内劝农事陆某记

东屯高斋记

少陵先生晚游夔州爱其山川不忍去三徙居皆名高斋质於其诗曰次水门者白帝城之高斋也曰依药饵者瀘西之高斋也曰见一川者东屯之高斋也故其诗又曰高斋非一处予至夔数月吊先生之遗迹则白帝城已废为丘墟百有余年自城郭府寺父老无知其处者况所谓高斋乎瀘西盖今夔府治所画为阡陌裂为坊市高斋尤不可识独东屯有李氏者居已数世上距少陵才三易主大历中故券犹在而高斋负山带谿气象良是李氏业进士名襄因郡博士雍君大椿属予记之予太息曰少陵天下士也早遇明皇肃宗官爵虽不尊显而见知实深盖尝慨然以稷卨自许及落魄巴蜀感汉昭烈诸葛丞相之事屡见於诗顿挫悲壮反覆动人其规模志意岂小哉然去国寢久诸公故人熟睨其穷无肯出力比至夔客於柏中丞严明府之间如九尺丈夫俛首居小屋下思一吐气而不可得予读其诗至小臣议论絶老病客殊方之句未尝不流涕也嗟夫辞之悲乃至是乎荆卿之歌阮嗣宗之哭不加於此矣少陵非区区於仕进者不胜爱君忧国之心思少出所学佐天子兴正观开元之治而身愈老命愈大谬坎壈且死则其悲至此亦无足怪也今李君初不践通塞荣辱之机读书弦歌忽焉忘老无少陵之忧而有其高少陵家东屯不浹岁而君数世居之使死者复生予未知少陵自谓与君孰失得也若予者仕不能无媿於义退又无地可耕是直有慕於李君尔故乐与为记乾道七年四月十日山陰陆某记

乐郊记

李晋寿一日图其园庐持示余曰此吾荆州所居名乐郊者也荆州故多贤公卿名园甲第相望自中原乱始以吴会上流常宿重兵而衣冠亦遂散去太平之文物前辈之风流盖略尽矣独吾乐郊日加葺文竹奇石蒲萄来禽芍药兰茝菱芡菡萏之富为一州冠其尤异者往往累千里致之子幸为我记予官硖中始与晋寿相识长身铁面音吐鸿畅遇事激烈奋发以全躯保妻子为可鄙其意气岂不壮哉及为客置酒出佳侍儿陈书画琴奕相与娱嬉则雍容都雅风味乃甚可爱虽梁宋间少年贵公子不能过盖其多材艺知弛张如此然自少时不喜媒声

利有官不仕穷园林陂池之乐者且三十年每自谓泉石膏肓及来夔州诸公始大知之合荐於朝议者谓晋寿当以少伸於世为喜而晋寿顾不然独眷眷於乐郊不忍暂忘呜呼出处一道也仕而忘归与处而不能出者俱是一癖未易是泉石非钟鼎诸公之荐盖砭晋寿膏肓而使为世用异时晋寿成功而归高牙在前千兵在後擅昼绣之荣以贲斯园荆楚多秀民尚有能赋其事者乎乾道七年六月十日笠泽陆某记

对云堂记

巫故郡自秦以来见於史其後罢郡犹为壮县杜少陵扁舟下白帝过焉为赋归字韵五字诗传天下由是巫县名益重宋建中靖国之元黄太史始脱鉤党自蜀之荆访少陵遗迹客县治之东堂留字壁间有坐卧对南陵云山陰晴变态之语距乾道辛卯逾一甲子无举出者鄧城李德修来为令风流儒雅翩翩佳公子因废址作堂与客落之举酒属山陰陆务观曰子为予名且记复兴之岁月务观既取太史语名之且曰仆行年五十阅世故多矣所谓朝夕百变者奚独云山哉一日进此道幻瞥消情尘灭真实相见虽巍乎天地浩乎古今变坏不停与浮云游尘空华胥晕初无少异也德修方吏退时清坐堂上试以仆言观之德修名普务观名某腊月乙卯之夕大醉中秉烛梅花下记

静镇堂记

四川宣抚使故治益昌枢密使清源公之为使也始徙汉中即以郡治为府郡自兵火滁地之後一切草创公至未几凡营垒廐库吏士之庐皆筑治之使坚壮便安可以支久而府独仍其故西偏有便坐日受羣吏谒见与筹边治军燕劳将士靡不在焉而其坏尤甚公既留三年官属数以请始稍加葺易其倾挠彻其蔽障不费不劳挟日而成会上遣使持亲诏赐黄金匳宝熏珍剂以彰殊礼公遂摭诏中静镇坤维之语名新堂曰静镇而命其属陆某记之某辞谢不获命则再拜言曰以才胜物易以静镇物难以静镇物惟有道者能之泰山乔岳之出云雨明镜止水之照毛发则静之验也如使万物并作吾与之逝衆事错出吾为之变则虽弊精神劳思虑而不足以理小国寡民况任天下之重乎岁庚寅某自吴适楚过庐山东林山中道人为某言公尝憩此院闭户面壁终夏不出老宿皆愧之则公之剗心受道盖非一日矣世徒见公驰骋於事功之会而不知公枯槁澹泊盖与山栖谷汲者无异徒见公以才略奋发不数岁取公辅而不知公道学精深尊德义斥功利卓乎非世俗所能窥测也而上独深知之故诏语如此传曰知臣莫若君诎不信哉虽然某以为今犹未足见公也金暴中原久腥闻於天天且悔甌尽以所覆界上而公方弼亮神武绍开中兴异时奉鸾驾奠京邑屏符瑞之奏抑封禅之请却渭桥之朝谢玉关之质然後能究公静镇之美云乾道八年七月二十五日门生左承议郎权四川宣抚使司干办公事兼检法官陆某谨记

渭南文集卷十七

卷十八

钦定四库全书

渭南文集卷十八

宋 陆游 撰

藏丹洞记

汉嘉郡治之西偏望云楼东有石穴天将雨辄出云气予疑而发之则石室屹立室之前地中获瓦缶耀矮贮丹砂云母奇石或烂然类黄金意其金丹之余也悉敛而楮藏输诸府库緘识惟谨予尝读丹经言古得道至人藏丹留於名山非当僊者辄不见虽见亦辄变化今是丹不藏名山而近在官寺之侧予以尘垢衰病之余又辄见之是与丹经之说大异或谓丹藏於此远矣方上古未为城邑时西望三峩东带大江山川秀杰盖宜为僊真链药腾举之地至予辄见之者岂神物隐见有时而予适逢其时与丹之伏而不见者常多见者常寡虽嵇叔夜葛稚川不免齎恨以蛻而予顾得见焉兹非幸与乾道九年秋八月辛未山陰陆某记

筹边楼记

淳熙三年八月既望成都子城之西南新作筹边楼四川制置使知府事范公举酒属其客山陰陆某曰君为我记按史记及地志唐李卫公节度劔南实始作筹边楼废久无能识其处者今此楼望犍为熨道黔中越嶲诸郡山川方域皆略可指意者卫公故址其果在是乎楼既成公复按卫公之旧图边城地势险要与蛮夷相入者皆可考信不疑虽然公於边境岂真待图而後知哉方公在中朝以洽闻强记擅名一时天子有所顾问近臣皆推公对莫敢先者其使敌而归也尽能道其国礼仪刑法职官宫室城邑制度自幽蓟以出居庸松亭关并定襄五原以抵灵武朔方古今战守离合得失是非一皆究见本末口讲手画委曲周悉如言其國內事虽使耆老大人知之不如是详也而况区区西南夷距成都或不过数百里一登是楼在目中矣则所谓图者直按故事而已请以是为记公慨然曰君之言过矣予何敢望卫公然窃有幸焉卫公守蜀牛奇章方居中每排沮之维州之功既成而败今予适遭清明寬大之朝论事荐吏奏朝入而夕报可使卫公在蜀适得此时其功烈壮伟讎止取一维州而已哉某曰请并书公言以诏後世可乎公曰唯唯九月一日记

铜壶阁记

天下郡国自譙门而入必有通達达於侯牧治所惟成都独否自劔南西川门以北皆民庠市区军垒折而西道北为府府又无台门与他郡国异考其始盖自孟氏国除矫霸国之僭侈而然至蒋公堂来为牧乃南直劔南西川门西北距府五十步筑大阁曰铜壶事书於史崇宁初以火废政和中吴公栻因其矩复侈大之雄杰閎深始与府称淳熙二年夏六月今敷文阁直

学士范公以制置使治此府始至或以阁坏告公曰失今不营後费益大於是躬自经画趣令而缓期广储而节用急吏而寬役一旦崇成人徒骇其山立翬飞巖然摩天不知此阁已先成於公之胸中矣夫岂独阁哉天下之事非先定素备欲试为之事已纷然始狼狈四顾经营劳弊其不为天下笑者鲜矣方阁之成也公大合乐与宾佐落之客或举觴寿公曰天子神圣英武荡清中原公且以廊庙之重出抚成师北举燕赵西略司并挽天河之水以洗五六十年腥羶之污登高大会燕劳将士勒铭奏凯传示无极则今日之事盖未足道识者以此知公举大事不难矣其可阙书四年四月己卯朝奉郎主管台州崇道观陆某记

彭州贡院记

国家三岁一贡士天子先期为下诏书与郊祀天地埒及试於礼部既中选矣天子亲御殿发策询天下事第其高下又亲御殿赐以科名其礼可谓重矣盖以为所与共代天理物而守宗庙社稷於无穷者实在是也然则郡国贡士顾可不重邪彭州旧无贡院每科举辄寓佛祠祠乃在城外士不以为便淳熙三年知州事王公敦诗通判州事邓公枢始采进士穆滂陈仲山杨伦苏松等议取废驿故地为贡院凡郡之士奔走後先肩袂相属璧坚材良山积云委自正月壬子至七月癸亥讫事用缗钱万五千六百有奇役工称是重门大堂高閤邃深繚以修庀沈沈翼翼分职庀事各有攸处既成王公徙利州路转运判官书来属予为记邓公又继以请明年正月朝奉大夫王公序来知州事则又以请予发书叹曰俗坏久矣上下相戾後先相倾者天下皆是也今彭之士大夫与王公邓公谋同心协若出一人固已异矣後王公事不出已而不忌其成不掩其能惟惧後之无传可不谓贤哉使士之贡於朝而仕者揆时之宜从人之欲以举万事如王公邓公视人之善若已有之如後王公则利泽被元元勲业垂竹帛将孰御焉士尚知所勉哉四年五月丁未朝散郎主管台州崇道观陆某记

抚州广寿禅院经藏记

淳熙己亥冬十二月予使江西治在抚州其东是为广寿禅院每出辄过焉僧守璞方为轮藏予之始至也才屹立十余柱其上未瓦其下未甃其旁未垣经未匭其止山立其作雷动神呵龙负可怖可愕丹堊金碧殆无遗功而守璞俨然燕坐为其徒说出世间法土木梓匠之间不至丈室若未尝有是役者比明年冬十一月予被命诣行在所璞乃礲石乞予为记予慨然语之曰子弃家为浮屠氏祝发坏衣徒跣行乞无冠冕轩车府寺以为尊也无官属胥吏徒隶以为奉也无鞭笞刀锯圜圉桎梏与夫金钱粟帛爵秩禄位以为刑且赏也其举事宜若甚难今顾能不动声气於期岁之间成此奇伟壮丽百年累世之迹予切怪士大夫操尊权席利势假命令之重耗府库之积而翫岁愒日事功弗昭又遗患於後其视子岂不重可愧哉既诺其请又具载语守璞者以励吾党云是月十九日朝请郎提举江南西路常平茶盐公事赐绯鱼袋陆某记

成都犀浦国宁观古楠记

予在成都尝以事至沈犀过国宁观有古楠四皆千岁木也枝扰云汉声挟风雨根入地不知

几百尺而陰之所庇车且百两正昼日不穿漏夏五六月暑气不至凜如九秋成都固多寿木然莫与四楠比者予盖爱而不能去者弥日有石刻立庑下曰是仙人蘧君手植予叹曰神仙至人手之所触气之所呵羸疾者起盲瞶者愈荣茂枯朽而金玉瓦石不难况其亲所培植哉久而不槁不死固宜欲为作诗文会多事不果尝以语道人蘧昌老真叟以为恨予既去蜀三年而昌老以书万里属予曰国宁之楠几伐以营缮郡人力全之仅乃得免惧卒不免也君为我终昔意予发书且叹且喜夫勿翦憩棠恭敬桑梓爱其人及其木自古已然姑以蜀事言之则唐节度使取孔明祠柏一小枝为手板书於图志今见非诋蒋堂守成都有美政止以筑铜壶阁伐江渎庙一木坐謡言罢亦书国史且王建孟知祥父子专有西南穷土木之侈沈犀近在国城数十里间而四楠不为当时所取彼犹有畏而不敢者况今圣主以恭俭化天下有夏禹卑宫室汉文罢露台之风专阃方面皆重德伟人岂其残灭千岁遗迹侈大栋宇为王孟之所难哉意者特出於吏胥梓匠欺罔专恣以自为功而已使有以吾文告之者读未终篇禁令下矣然则安可不书淳熙九年六月一日朝奉大夫主管成都府玉局观山陰陆某记

书巢记

陆子既老且病犹不置读书名其室曰书巢客有问曰鹊巢於木巢之远人者燕巢於梁巢之袭人者凤之巢人瑞之梟之巢人覆之雀不能巢或夺燕巢巢之暴者也鸠不能巢伺鹊育雏而去则居其巢巢之拙者也上古有有巢氏是为未有宫室之巢尧民之病水者上而为巢是为避害之巢前世大山穷谷中有学道之士栖木若巢是为隐居之巢近时饮家者流或登木杪酣醉叫呼则又为狂士之巢今子幸有屋以居牖户墙垣犹之比屋也而谓之巢何邪陆子曰子之辞辩矣顾未入吾室吾室之内或栖於椳或陈於前或枕藉於床俯仰四顾无非书者吾饮食起居疾痛呻吟悲忧愤叹未尝不与书俱宾客不至妻子不覲而风雨雷雹之变有不知也间有意欲起而乱书围之如积槁枝或至不得行则辄自笑曰此非吾所谓巢者耶乃引客就观之客始不能入既入又不能出乃亦大笑曰信乎其似巢也客去陆子叹曰天下之事闻者不如见者知之为详见者不如居者知之为尽吾侪未造夫道之堂奥自藩篱之外而妄议之可乎因书以自警淳熙九年九月三日甫里陆某务观记

景迂先生祠堂记

明州?场新作故侍读晁公祠成监场事襄阳王君铅因通判州事丹阳苏君玘移书某为之记自春徂秋凡十许书请不勸某於公为弥甥方踉蹌学步时已获拜公则於今为记诚不当以薄陋辞谨按公讳说之字以道一字伯以父自号景迂生元丰元佑间已为知名士崇宁後坐上书邪等斥不得立朝临民故连为祠庙筦库吏其为?场则大观政和间也寓舍直桃华渡而官寺有亭曰超然公方为世戮人士夫遇诸途噤莫敢语况有拜床下者簿书稍暇则以读书为乐时时见於文章如汪伯更哀辞祭邹忠公文皆传天下亦间与为佛学者延庆明智师游论着所谓天台教至今其徒以为重虽然此犹未足言公也公之学深且博矣於易自商瞿下至河南邵先生於书自伏生下至泰山姜先生於诗杂以齐鲁韩三家不桎於毛郑於春秋考至贾谊董仲舒不胶於啖赵其所引据多先秦古书藏山埋冢之秘卓乎独立确乎自信虽引天下而与之争不能夺卒成一家之说与诸儒并传向非摈斥疏置於荒远寂寞之地如在?场

时则虽公之敏此功未易成也於康士之弃日岂皆驰骛於富贵功名哉弊精神於事为之末谋衣食於涯分之外忽焉不知老之至者多矣登堂而望公之风采读记而稽公之学术其亦可自省哉公之文章本二百卷中原丧乱後其家复集之益以南渡至歿时所作才得六十卷而士大夫犹未尽见也郡人能言公旧事者曰一日部使者来治船事诟责甚峻公从容对曰船待木乃成木非钱不可致今无钱致木则无船适宜使者为发愧去观公平生大节一言折庸人之骄盖不足书而郡人所愿书故亦不敢略云淳熙十年九月丁丑朝奉大夫主管成都府玉局观山陰陆某记并书

圓觉阁记

淳熙十年某月某日径山兴庆万寿禅寺西阁落成会是岁某月某日诏赐住持僧宝印御注圓觉经且命某为之序於是道俗咸曰赐经与阁成同时宜榜曰圓觉之阁且刻石以侈盛事於是又咸曰陆某宜为记宝印以衆言来谕某於山陰大泽中某蹴然不敢辞恭惟圣天子以聪明睿智之资体尧蹈舜深造道妙悟一心於万法之中既已博极皇坟帝典羲图鲁史之秘而象胥所传木叶旁行亦莫不究极以大圓觉为我世界悼士之陋多岐私智昧乎大同乃以万几之余亲御训释凡十二士之所问调御之所说佛陀波罗之所译宗密之所注裴休之所言皆氷释缕解於宸笔之下十日并照物无遁形百川东归海无异味如既望月无有缺减如大宝镜莫不照了东夷南蛮西戎北狄霜露所坠日月所照莫不共此大圓觉中鲁之逢掖楚之黄冠竺乾之染衣祝发平时相与为矛盾为氷炭者亦莫不共在此大圓觉中不偏不欠不迷不谬垂之千万亿世亦莫不然而宝印以山林枯槁之士名彻九重得以大觉禅师怀璉入侍仁宗皇帝故事覲清光承圣问受好赐序鉅典又此阁壮丽首冠一山费至三十万钱其落成也适当赐经之时山川动色神龙踊跃於康盛哉方阁之未建也东偏有千僧阁绍兴中大慧禅师宗杲法门之杰方住山时衆溢千数故以是名阁然自今观之虽阿僧祇衆犹为有限量也岂若圓觉之广大无边也哉顾某衰且病学问废落文思局澁而名山盛事本末閎濶非区区笔力所能演述实以为愧惧云淳熙十年十一月十四日朝奉大夫主管成都府玉局观陆某记

能仁寺舍田记

淳熙十三年三月乙巳承节郎河东薛纯一诣绍兴府自言生长太平蒙被德泽念亡益县官不胜悽悽报国之心愿以家所有山陰田千一百亩岁为米千三百石有奇入大能仁禅寺祝两宫圣寿安抚使龙图丘公视牒异之问所以然纯一曰昔汉卜式上书愿输家财半助边且曰天子诛匈奴愚以为贤者宜死节有财者而输之如此可灭也今天子垂拱穆清北方讐服岁时奉贡纯一弗获倾貲备军兴一日费故因像教为两宫祈年诚愚戇不识法令罪死不宥愿言之朝即伏斧鑕不敢悔於是龙图公嘉其意为上尚书户部纯一乃因寺之住持僧子听来告予请撰次本末为记予辞谢不可则语之曰子虽列在勇爵曩尝举进士试礼部继今能益修其业以自致於显荣则所以报国者岂若是而已虽然是已足以励风俗助教化使贪冒者廉怠忽者奋享禄赐而忘报者愧岂不可书也哉田之顷亩赋役及别以钱权其子本以待凶岁则具书於碑陰俾後有考焉五月十三日记

常州开河记

隋疏大渠自今京口毗陵姑苏嘉兴以抵於临安初以备巡幸而後世因为漕运大利故得不废渠贯毗陵城中徐行东注独南水门受荆溪之水为惠明河酺为二股皆会於金斗门庆历中太守国子博士李公余庆始疏顾塘河益引惠明水注之漕渠顾塘地势在漕渠後故俗又谓之後河崇宁初太守给事中朱公彦复增濬之方是时毗陵多先生长者以善俗进後学为职故儒风蔚然为东南冠及余公中霍公端友皆策名天下士第一则说者遂归之後河曰是为东南文明之地邹忠公方居乡士所尊事而化服者忠公避不敢居因以後河实之而为作记淳熙十四年今太守林公下车逾年既尊礼其诸老先生延见其秀民所以表励风俗而激励儒学者日夜不敢少怠弦歌之盛殆轶於承平时矣而或以後河告者亦不废也後河自崇宁後不治者积数十年中更兵乱民积瓦砾及治家弃滓故地益坚滓夏六月林公乃蒐闲卒捐美金分命其属治之不淹旬渠复故道袤若干深若干修若干乃以书属予曰愿记其事予谓渠之兴自为一郡之利不必为士之举有事者设然城南衣冠以杜固凿而顿减则後河成废与士之举有司者相为盛衰亦自有理太王迁岐成王都洛皆观川原咨卜筮其由来盖尚矣则林公兼取焉顾不可哉士益勉之以毋负公之意公名祖洽字子礼明州鄞人世以经行显云渠成之岁十二月二日记

渭南文集卷十八

卷十九

钦定四库全书

渭南文集卷十九

宋 陆游 撰

明州育王山买田记

绍兴元年高皇帝行幸会稽诏明州阿育王山广利禅寺上仁宗皇帝赐僧怀璉诗颂亲札念无以镇名山慰衆志乃书佛顶光明之塔以赐又申以手诏特许买田贍其徒逾五十年未能奉诏佛照禅师德光以大宗师自灵隐归老是山慨然曰僧寺母辄与民质产令也今特许勿用令高皇帝恩厚矣其可弗承且昔居灵隐时寿皇圣帝召入禁闕顾问佛法屡赐金钱其敢为他费乃尽以所赐及大臣长者居士修供之物买田岁入谷五千石而遣学者义鈇求记於陆某某方备史官其纪高皇帝遗事职也不敢辞惟兹四明表海大邦自嘉佑绍兴两赐宸翰云汉之章下饰万物於是山君波神効珍受职鼃鼃蛟鳄弭伏退听恶气毒雾收敛澄廓万里之舶五方之贾南金大贝委积市肆不可数知陂防峭坚年谷登稔於虞盛哉今德光又广上赐薪两宫之寿植天下之福无疆惟休时万时亿刻之金石於是为称咨尔学者安食其间明已大事传佛大法报上大恩将必有在不然不耕而食既饱而嬉厉民以自养岂不甚可愧哉淳熙十六年十一月二十四日朝议大夫尚书礼部郎中兼实录院检讨官陆某记

建宁府尊胜院佛殿记

建宁城东永安尊胜禅院成於唐僖昭间坏於建炎之末稍葺於绍兴之?申自佛殿始方是时院大坏涂地趣於复立以慰父老心故不暇为支久计未四十年遽复颓圯适怀素者来为其长老乃慨然曰殿大役也舍是弗先吾则不武乃广其故基北南西东各三尺意气所感助者四集坏材珍产山积云委其最巨者石痕村之杉修百有三十尺围十有五尺其余盖称是凡费钱三百万有奇而竹木甃甃黝垩之施者工人役夫之乐助者不在是数其成之岁月淳熙戊申冬十一月庚子也越四年绍熙辛亥五月予友人方君伯谟移书为怀素求文为记予为之言曰世多以浮屠人之举事诮吾士大夫以为彼无尺寸之柄为其所甚难而举辄有成士大夫受天子爵命挟刑赏予夺以临其吏民何往不可而熟视蠹弊往往憚不敢举举亦辄败何邪予谓不然怀素之来为是院固非有积累明白之効佛殿方坏而院四壁立今日食已始或谋明白之食怀素坐裂瓦折桷腐柱颓垣之间召工人持矩度谋增大其旧计费数百万未有一钱储也使在士大夫语未脱口已得狂名有心者疑有言者谤逐而去之久矣浮屠人则不然方且出力为之先後为之辅翼为之御侮历十有四年如一曰此其所以岿然有所成就非独其才异於人也以十四年言之不知相之拜者几人免者几人将之用者几人黜者几人礼乐学校人主所与对越天地作士善俗与夫货财刑狱足用而弼教藩翰之臣古所谓侯国者大抵倏去忽来更不胜纪彼怀素固自若也则其有成曷足怪哉且怀素之为是院不独致

力於佛殿凡所谓堂寝之未备者廊庑之朽败者皆一新之今老矣无他徙意使不死复十四年或过十四年皆未可知也则是院之葺又可前知邪而士大夫凛凛拘拘择步而趋居其位不任其事护藏蠹萌传以相谗顾得保禄位不蹈刑祸为善自谋其知耻者又不过自引而去尔天下之事竟孰任之於瘝是可叹也已怀素三衢人少从道行禅师游能得其学伯谟名士繇莆阳人六月甲申中奉大夫提举建宁府武夷山冲佑观陆某记

绍兴府修学记

八卦有画三坟有书经之原也典教有官养老有庠学之始也历世虽远未之或异不幸自周季以来世衰道微俗流而不返士散而无统乱於杨墨贼於申韩大坏於释老烂漫横流不可收拾始有重编纂简栖以巨轮象龙寓人饰黄金珂璧怪珍之物诱骇愚稚而六经寝微穹阁杰屋上摩霄汉黝垩髹丹穷极工技其费以亿万计而学校弗治自周衰至五代几二千岁而後我宋诞生天命崇经立学以为治本十二圣一心罔或怠忽然窃尝考之方周盛时天子所都既竝建四代之学而又党有庠遂有序畿内六乡乡有党百五十六遂遂有鄙如党之数遂序党庠盖互见之则是千里之内为序十有二为庠三百何其盛也今畿内之郡皆仅有一学较於周不及百之二而又不治则为之牧守者得无任得责邪会稽拱行在所为东诸侯之冠宜有以宣圣化倡郡国而学未称给事中枯苍王公信来为是邦政成令行民物和乐台榭弗崇陂池弗广而惟学校是先燕游弗亲厨传弗饰而惟养士是急下车未久奥殿崇阁邃宇修廊讲说之堂弦诵之舍以葺以增不曰乞事以其饗殮未足也则为之售常平之田以其见闻未广也则为之求四方之书食有余积书罕未见然公犹以为慊曰上丁之礼服器未复古也又为之新冕弁衣裳带绅佩舄之属自邦侯至诸生各以其所宜服鼎俎尊彝豆笾簠簋之属自始奠至受胙各以其所宜用无一不如礼式公乃斋心修容来宿於次质明陟降揖逊进退踧起俯首屏气如惧弗克礼成士僉曰公以躬行先我我处於乡弗笃於孝悌忠信出而仕弗勉於廉清正直不独不可见公仰天俯地其何心见父兄长老其何辞教授陈君自强与诸生以其言来告曰愿有纪某老病不获奉俎豆以从公後喜士之能承公也於是乎书绍熙二年九月癸酉中奉大夫提举建宁府武夷山冲佑观陆某记

重修天封寺记

淳熙丙午春予以新定牧入奏行在所馆於西湖上曰与物外人游多为予言净慈有慧明师者历抵诸方如汗血驹所至蹴蹋万马皆空方是时知其得法而不知其能文後四年予屏居镜湖上明来访予谈道之余纵言及文辞卓然偶伟非凡子所及方是时知其能文而不知其有才明既从予游纂日乃曳杖负笠入天台山为天封主人是山也岩嶂嶄絕为天台四万八千丈之冠林麓幽邃擅智者十二道场之胜然地偏道远游者既寡施者益落明居之弥年四方问道之士以天封为归植福乐施者踵门而至虽却不可於是自佛殿经藏阿罗汉殿锺经二楼云堂库院莫不毕葺敞为大门缭为高垣周为四庑屹为二阁来者以为天宫化成非人力所能也又哀其余作二库曰资道曰博利以供僧及童子紉浣之用彼庸道人日夜走衢路丐乞聚畜盖未必能办此明方为其徒发明大事因缘钱帛谷粟之问不至丈室而其所立乃超卓絕人如此岂非一世奇士哉予尝患今世局於观人妄谓长於此者必短於彼工於细者

必略於大自天封观之其说岂不浅陋可笑也哉慧明以书来求予文记其寺之废兴因告以予说使并刻之庶几览者有所儆焉绍熙三年三月三日中奉大夫提举建宁府武夷山冲佑观山陰县开国男食邑三百户陆某记

严州重修南山报恩光孝寺记

浙江自富春泝而上过七里瀨桐君山山益秀水益清乌龙山崛起千仞鳞甲爪鬣蜿蜒盘踞严州在其下有山直州之南与乌龙为宾主乌龙以雄伟南山以秀邃形势壮而风气固是为太宗皇帝高宗皇帝受命赐履之邦登高四望则楼观雉堞蹇腾萦带在郁葱佳气中两山对峙紫翠重复信天下名城也南山报恩光孝禅寺实为诸刹之冠质於地志及父老之传唐末有僧结庐於山之麓名广灵庵庆历中始斥大之为广灵寺绍圣中易禅林佛印大师□祖实为第一代始徙寺於山巔今寺是也崇宁中赐名天宁万寿绍兴中易今名初郡长者江氏为塏七级与寺俱毁於宣和之盜厥後文则来居而寺复法琦来助而塏建及得智廓仲圮而学者云集廓不期年示灭凡今之营繕崇成者皆圮也如来大士有殿演法会斋有堂安衆有寮栖鍾有楼寢有室游有亭浴有泉又以余力为门为庑为库为垣为磴路为御侮力士之像未五六年百役踵兴无一弗备郡人童天佑天锡方珍出貲为最鉅老僧智贵倾其衣囊助施为尤难若夫以宿世愿力来为外护取郡之积水以终成之者太守殿中侍御史冷公世光也寺之役既成冷公适有归志遂奉祠以去岂非缘法哉予亦尝来为守廓及圮皆予所劝请则於是山不为无凤昔缘故圮来求予为记予行天下多矣览观山川形胜考千载之遗迹未尝不慨然也晚至是邦观乌龙似赤甲白盐南山似锦屏一水贯其间纡余澄澈似渭水而南山崇塏广殿层轩修廊山光川霭鍾鸣鲸吼游者动心过者骇目又甚似汉嘉之凌云盖兼天下之异境而有之骚人墨客将有徙倚太息援笔而赋之者予未死尚庶几见之绍熙四年二月庚申记

会稽县重建社坛记

古者侯国地之别三爵之等五皆有宗庙社稷秦黜封建置郡守县令於是古之命祀惟社稷尚存陵夷千余载士不知学古吏不知习礼其祀社稷徒以法令从事畿封坛壝服器牲币一切苟且取便於事无所考法宋兴文物浸盛自朝廷达於下州最邑社稷之祀略皆复古不幸中更金人之觥兵氛南被吴楚中兴七十年郡县之吏往往惟饷军弭盜簿书讼狱为急及吏以期告漫应曰如令至期又或移疾弗至虽朝廷所班令式或未尝一视况三代之旧典礼乎会稽之为邑实奉陵寢旦在安抚使提点刑狱提举常平治所有将迎造构之役有符檄期会之烦敕使内家及宗室近属一岁屡至亭传道路舟车徒役一有不供责在会稽者十居七八故令於祀事尤不身亲稽祀典所祀之神曰社曰稷曰风师曰雨师曰雷神凡五坛皆弗不治祀则茭舍以为次凡祀之费一出於吏雨则寓於吴越王祠之门承议郎四明王君时会之来为令始至周视坛所喟然难曰幸为政於此得有人民社稷事孰大於是者乃即其地为垣八十丈筑屋四楹有门以时其啓闭有库以储其器物用宋之栢丰之粉榆故事艺松五十又稽合制度稟秸莞席币筐樽俎豆笾簠簋勺罍莫不如式粢盛酒醴牲牢莫不共给献有次祝有位齐有禁省饌食爵奠币饮福望燎望瘞有仪祝事各以其曰王君祇敬齐栗与其僚从事礼

成而退无违者会稽岁比不登及是雨阳时若岁以大丰民歌於途农拊於垆皆曰吾令致力於神神实响畚五其可忘於是父老子弟相与告予请记其事予曰为政之道无他知先後缓急之序而已王君设施知所先急如此虽欲不治得乎虽然是皆朝廷以班郡县者王君特能举之尔後来者顾独不能邪故予详记始末所以告无穷也庆元二年五月二十日中大夫提举建宁府武夷山冲佑观山陰县开国男食邑三百户陆某记

广德军放生池记

古者臣之爱其君何其至也其祷祈之辞曰受天百禄曰子孙千亿曰如南山之寿一话言一饮食未尝忘君然不闻有以羽毛鳞介之族祈其君之福者盖先王盛时山泽有虞川林有衡渔猎有时数罟有禁洋洋乎浩浩乎物各遂其生养之宜所谓漉陂竭泽者盖无有也所谓相响以涇相濡以沫者盖未见也至於後世德化弗行厉禁弗施广杀厚味暴殄天物放而不知止舍耒耜而事网罟者曰以益衆於是有以放生名池用祝寿祺者而唐顔真卿之石刻始传於世宋兴十三圣相继以深仁盛德极高蟠厚鸟兽鱼鼈咸若矣而四方郡国犹相与筑陂储水修放生故事所以广圣泽之余有不敢忽者惟广德军旧以郡圃後池为之地隘水泉浅涸不与事称承议郎曾侯?以庆元二年来领郡事顾而太息会以事至子城西稍南得亘溪者延袤百步泓渟澄澈蒲柳列植藻荇萦带水光天影荡摩上下为一郡絶景候因其故而加治焉筑屋於其会名曰溪堂民不劳财不费焕然告成重明即率僚吏放鳞介千计望行在拜手稽首礼成而退父老童穉纵观兴叹以为广德为郡以来逾二百年所未之有侯移书笠泽陆某俾为记某复之曰侯奉天子诏来为守於此一赋役非其时一讼狱非其请穷僻下里匹夫匹妇有一愁叹侯之责也能不负此责然後足以对扬天子休命而致归美报上之意放生之举盖贤守善其职之一事尔岂特是而止哉期年政成将屡书之中大夫提举建宁府武夷山冲佑观山陰县开国男食邑三百户陆某记

镇江府驻劄御前诸军副都统厅壁记

镇江府驻劄御前诸军副都统武功大夫和州防御使淄川夏侯君书来谂予於山陰泽中曰五军有都统为一军大将内以屏卫行在外以控扼梁楚隐然一长城也又置副都统一员以佐其长智勇相资寛猛相济有事则或居或行更出迭归无事则同筹共画於帐中而制敌於千里之外其任可谓重矣而副都统自设官以来今三十有八年历官十人再至者一人未有壁记後将无所考质子为我书而刻其姓名可乎予与夏侯君南北异乡东西异班出处壮老异致然每见其抚劒抵掌谈中原形势兵法奇正未尝不太息恨不与之周旋於军旅间也君亦谓予非龔龔老书生以兄事予甚敬则今日之请尚何辞然今天子神圣文武承十二圣之传方且拓定河洛规恢燕赵以卒高皇帝之武功则宿师江淮盖非久计夏侯君亦且与诸将移屯玉关之西天山之北矣予虽老尚庶几见之庆元四年正月甲子陆某记

法云寺观音殿记

浙东之郡会稽为大出会稽城西门循漕渠行八里有佛刹曰法云禅寺寺居钱塘会稽之冲

凡东之士大夫仕於朝与调官者试於礼部者莫不由寺而西饒往迎来常相属也富商大贾捩柂挂席夹以大櫓明珠大贝翠羽瑟瑟之宝重载而往者无虚日也又其地在镜湖下灌溉湑泄最先一邦富比封君者家相望也故多施者寺易以兴然建炎庚戌兵燹之旤亦以近官道首废於火一瓦不遗主僧曰道亨为一方所信度弟子三十二人慨然自任以兴复之事未成者十七而没其後有自修者始为三门法堂经藏等予适得华严船若涅盘宝积数百卷以施之草创未毕而修谢去自是寺以不得人又废木剪竹伐钟鼓不鸣白衣攘居之屠牛牧豕莫敢孰何初先楚公为尚书左丞请於朝以证慈及法云为功德院岁度僧一人三年间证慈得其二法云得其一故太傅与楚公祠堂肖像具存予自蜀归始言於府请逐白衣而命契彝者主之彝与亨俱东阳人人固已喜而彝又有器局才智居之且二十年创佛殿及像设费甚厚谈笑而成重建三门翼以两庑巍然大刹矣彝没予以告府牧尚书叶公以其弟子道泽继之泽少年志节清苦言议英发人皆畏其严而服其公於是予以大屋四楹施以为观音大士殿虽然尚未易成也泽即日走四方谋之三年遂建殿殿之雄丽冠於一刹予又施以禅月所画十六大阿罗汉像龕於两壁观者起敬施者踵至自火於庚戌及今庚申实七十载殆若有数然卒成之者繫彝与泽父子积勤不懈之力也予尝谓事物废兴数固不可逃而人谋常参焉予游四方凡通都大邑以至遐陬夷裔十家之聚必有佛刹往往历数百千岁虽或盛或衰要皆不废而当时朝市城郭邑里官寺多已化为飞埃鞠为茂草过者吊古兴怀於狐嗥鬼啸之区而佛刹自若也岂独因果报应之说足以动人而出其财力亦其徒坚忍强毅不以丰凶难易变其心子又有孙孙又有子必於成而後已彼之不废固宜予因彝与泽之事而有感焉并载其说士大夫过而税驾者读之其亦有感也夫庆元五年秋七月庚午记

会稽县新建华严院记

会稽五云乡有山曰黄琢山之麓原野旷水泉冽冈峦抱负崑嶂森立而地弗不治者不知几何年或谓古尝立精舍以待天衣云门游僧之至者有石刻具其事其後寺废石亡独鼃趺犹在父老类能言之庆元三年有信士马君正卿闻而大息乃与其弟崧以事亲收族之余貲买地筑屋择僧守之凡僧若士民之道出於此者皆得就憩犹以为未广也则为堂殿门庑仓廡庖湑凡僧居之宜有者悉备而殖产使足以贍足其徒犹惧其不能久也告於府牧丞相葛公以华严院额徒置焉可谓尽矣而其意犹未已也曰年运而往或者欺有司而寓其孥则院废矣家世隆替不可常万分一有子孙以贫故规院之产侵院之事则僧散矣於是因其同学於佛者朝奉郎致仕曾君迅叔迟来请予文刻之石庶来者知此院经理之艱勤则不忍寓其孥子孙知乃祖乃父志愿之坚确则不忍规其产侵其事设若有之而至於有司则贤守善令必有以处此虽至於数百千岁此院犹不废也予报之曰僧居之废兴儒者或谓非吾所当与是不然韩退之着书至欲火其书庐其居杜牧之记南亭盛赞会昌之毁寺可谓勇矣然二公者卒亦不能守其说彼浮图突兀三百尺退之固喜其成而老僧挈衲无归寺竹残伐牧之亦赋而悲之彼二公非欲纳交於释氏也顾乐成而恶废亦人之常心耳则君之志叔迟之请与予之记之也皆可以无愧矣庆元五年八月甲子中大夫致仕山陰县开国男食邑三百户陆某撰并书丹

卷二十

钦定四库全书

渭南文集卷二十

宋 陆游 撰

居田记

陆子治室於所居堂之北其南北二十有八尺东西十有七尺东西北皆为窗窗皆设帘障视晦明寒燠为舒卷启闭之节南为大门西南为小门冬则析堂与室为二而通其小门以为奥室夏则合为一室而辟大门以受凉风岁莫必易腐瓦补罅隙以避霜露之气朝晡食饮丰约惟其力少饱则止不必尽器休息取调节气血不必成寐读书取畅适性灵不必终卷衣加损视气候或一日屡变行不过数十步意倦则止虽有所期处亦不复问客至或见或不能见间与人论说古事或共盃酒倦则亟舍而起四方书疏略不复遣有来者或亟报或守累日不能报皆适逢其会无贵贱疎戚之间足迹不至城市者率累年少不治生事旧食奉祠之禄以自给秩满因不复敢请缩衣节食而已又二年遂请老法当得分司禄亦置不复言舍後及旁皆有隙地蒔花百余本当敷荣时或至其下尚羊坐起亦或零落已尽终不一往有疾亦不汲汲近药石久多自平家世无年自曾大父以降三世皆不越一甲子今独幸及七十有六耳目手足未废可谓过其分矣然自计平昔於方外养生之说初无所闻意者日用亦或默与养生者合故悉书之将质於山林有道之士云庆元六年八月一日山陰陆某务观记

邵武县兴造记

大平兴国五年诏即建州邵武县置邵武军而县为属其治在军之东建炎三年盜起闽县邵武亦被兵焚官寺民庐略尽绍兴十年作谯门十六年作守丞治所於是学宫军垒圉圉仓廩以次皆复其旧独县故地废为教场而县寓尉廨至二十一年知县事叶邃始复县治未及成安抚使用兵官王存之请即日撤除涂地皆尽而县徙寓武阳驿乾道六年县事事尤昂始作县门它犹未暇及庆元四年宣义郎史君定之来为县始至而叹曰县古子男国也因时之治忽政之善否以为盛衰自建炎己酉讫今岁在戊午凡七十年自高宗皇帝至今天子历四圣寬赋薄征休养元元岁且屡丰公饶私余生齿繁滋考之九域图郡户八万七千九百有奇今增五万四千二百有奇为户十四万二千一百有奇可谓盛矣而邵武一邑独当户五万六千四百有奇为郡境十之四则吾邑顾不又盛哉而反寓其治於传舍诏勅法令图志符檄护藏不严栖列无所决讼问囚延见丞佐与宾客之来者其地皆褊迫庳陋仰漏旁穿非所以宣布德泽示民以上下之分也念非所先始置弗议比为政期年家无弗伸之冤庭无弗直之讼善无滥刑恶无佚罰太守赵候不譎知君为深君所设施郡未尝以势挠焉以故君之政成民之俗变有所为辄共成之於是始有意於新县治矣会得吏蠹与用度之余为钱百余万自五年七月甲午鳩工至十月己巳落成出令有所燕息有次劳宾有馆胥吏徒役咸有宁宇货布器

物各司其局事立令行老稚舞歌视承平旧观有加焉而木章竹个瓦甃髹丹悉视时低昂交手界予梓匠圻镘百工之来者得直皆如私家乞事民不及知吏不得治以为姦非君之才有余顾能若是哉堂之名有九曰昼帘曰无私曰近民曰仁平曰居敬楼曰瞻云轩曰读书曰如水亭曰海棠其扁榜多君自书有笔法其命名之意即其地可知故不详着君盖故丞相太师魏公之孙予魏公客也故君与赵侯皆以记县之兴造为请予受知魏公时甫壮岁尔俯仰四十余年同时宾客凋丧略尽而予偶独後死见君以才称於世且犹能秉笔有所纪述亦可谓幸矣故不复辞庆元六年九月癸酉中大夫谓华文阁致仕陆某记并书

诸暨县主簿厅记

建炎绍兴间予为童子遭中原丧乱渡河沿汴涉淮絕江间关兵间以归方是时天子暴衣露盖栉风沐雨巡狩四方曾不期月休也大臣崎岖於山海阻险之地草行露宿不敢告劳宜宜矣况於州牧郡守以降籓籓一厦以治其事者相望又况降而为县令丞簿者哉及王室中兴内外麤定然郡县吏寓其治於邮亭民庐僧道士舍者尚比比皆是积累六七十年四望相授天下日益无事兵寝岁登用度饶余然後皆得稍复承平之旧至於县则有迨今苟且因循者主簿在县官中卑於令丞而冷於尉非甚有才则其举事为尤难若诸暨主簿丁君密者可谓才矣君海陵人也今居吴世有显人为吏精察而平恕学工文辞而不忽簿书期会之事尝兼掇丞久之得添给不取一钱皆用以新主簿之廨诸暨旧无丞元丰间置丞徙主簿以居之而主簿更得廨乃故盐廨藉湿支倾殆不可居然阅百二十年为主簿者凡几人至君乃更新之不亟不徐不侈不陋不费於公不斂於民竹个木章瓦甃丹堊不蠹不苦窳不漫漶堂後旧有池自君来比二岁产异莲骈跗邑人謹传以为君且通贵之祥相与名其池上之亭曰双莲君故不喜怪而邑人之意如此亦足知其得民也君与予之子子虞游乃因子虞请记岁月予不得辞也昔我艺祖肇造区夏当乾德六年二月癸亥尝诏郡县吏代归者皆上其官舍敝坏或兴葺之数於有司以为殿最於虞祖宗明诏具在汗简而近世乃有相戒以为非急务且徒速谤者独安取此哉予尝备太史牛马走获窥金匱石室之藏故敢并记之以晓他在仕者嘉泰元年十月二十七日中大夫直华文阁山陰县开国男食邑三百户致仕陆某记

婺州稽古阁记

大观二年九月乙丑天子既大兴学校举经行之士於是诏天下州学经史阁皆赐名稽古婺州稽古阁者本以阁之下为讲堂而阁用大观诏书易名绍兴中学废於火及再建讲堂虽复其故不暇为阁至嘉泰元年太守丁公逢乃即讲堂後得旧直舍地以为阁而请於今参知政事许公大书其顔公书宏伟有汉法於是阁一日而传天下丁公既代去曾公桌来为郡阁之役尚未既也於是窗户阑楯瓦甃髹丹粲然皆备又为两庑达於讲堂高广壮丽无遗力南山在其上双谿缭其下烟云百变朝莫献牀阁之後有仰高堂旧祠资政宗公泽尚书梅公执礼中书舍人潘公良贵三公皆郡人有忠义大节而祠庳陋且弗葺曾公彻而大之始奕奕与阁称会公以邦人之请及州学教授潘君梦得所叙移书史官山陰陆某愿记其始末时方修孝宗光宗两朝实录业大事竣而奏篇有程久乃能如曾公之请夫尧舜禹皋陶书纪其事虽不同然未尝不同者稽古也稽古必以书前乎尧舜之书其易之始画与典坟乎易之画幸在至

今而三坟五典自楚倚相以後不闻有能尽读者世所共叹也虽然今读易不能知伏羲之心读典谟不能知尧舜禹皋陶之心虽典坟尽在亦何益於稽古故予以为士能玩易之画与身新见虞羲等反覆尽心於典谟与身亲见尧舜禹皋陶等能亲见圣人而不能佐其君兴圣人之治理岂有是哉士之放逸惰偷不力於学者固所不论学而不亲见圣人犹未学也亲见不疑而不用於天下则有命焉进则不负所学退则安吾命而无愠期可仰称大观诏书与贤守复阁之意矣士尚免之嘉泰二年閏月二十五日中大夫直华文阁提举佑神观兼实录用修撰兼同修国史陆某谨记

智者寺兴造记

婺州金华山智者广福禅寺浮图氏所谓梁楼约法师道场国朝开宝九年始为禅寺自净悟禅师全肯传三十七代二百余年至庆元之五年而仲玘实来方是时事废不举地弗不粪栋桡柱腐垣断甃缺若不可复为者玘植杖而四顾曰智者之为寺天造地设者至矣而人事不能充焉故寢坏至於此天其使我兴此地欤乃諏诸为地理学者则其言与玘略合盖寺在金华山之麓峰嶂屹立林岫间出日月映蔽风云吞吐而前之形势无以留之如王公大人南向坐帷幄中宜其前有列鼎大牲之养盛礼备乐之奉宾客进趋相檐翼将吏武士执槌孰何然後为称今乃巍然独坐而侍卫者皆奔趋而去则其威重无乃少损乎於是始议凿大池瀦水於门梁其上通大路而增门之址高於故三之二异时所谓奔趋而去者皆肃然就列恪然执事则王公大人之尊於是始全则其施置建立号令赏罚亦何可少訾邪方议之初或谓门有大木数十必尽去乃可兴池役而木所从来久以是未决忽一夕大风木尽拔若有鬼神相其役者其亦异矣玘之来百役皆作修廊杰阁虚堂广殿至於栖衆养老之室庖湍帑庾之所繚为垣墙引为道路莫不美於观而便於事後虽有能者无以加焉玘有道行为其徒所宗而才智器局又卓然不凡如此故荐绅多喜道之予又与有夙昔且尝记其严州南山兴造之盛故玘今又从予求作智者兴造记而予友人宁远军节度使提举佑神观姜公邦杰复以手书助之请未及属稿而邦杰歿予尤感焉虽耄不敢词也今兹之役池为大故书之特详嘉泰三年十月二十九日记

常州犇牛闸记

岷山导江行数千里至广陵丹阳之间是为南北之冲皆疏河以通餽饷北为瓜州闸入淮汴以至河洛南为京口闸历吴中以达浙江而京口之东有吕城闸犹在丹阳境中又东有犇牛闸则常州武进县以地势言之自荆为餽河时是三闸已具矣盖无之则水不能节水不节则朝溢莫涸安在其为餽也苏翰林尝过犇牛六月无水有仰视古堰之叹则水之苦涸固久地志槩述本末而不能详也今知军州事赵侯善防字若川以诸王孙来为郡未滿岁政事为畿内最考古以验今约已以便人裕民以束吏不以难止不以毁疑不以费惧於是郡之人僉以闸为请侯慨然是其言会知武进县丘君寿隽来白事所陈利病益明侯既以告於转运使且亟以其役专界之丘君於是凡闸前後左右受水之地悉伐石於小河元山为无穷计旧用木者皆易去之凡用工二万二千石二千六百钱以缗计者八千米以斛计者五百皆有奇又为屋以覆闸皆宏杰牢坚自鸠材至讫役阅三时其成之日盖嘉泰三年八月乙巳也明年正月

丁卯侯移书来请记予谓方朝廷在故都时实仰东南财赋而吴中又为东南根柢语曰苏常熟天下足故此闸尤为国用所仰迟速丰耗天下休戚在焉自天子驻蹕临安牧贡戎?四方之赋输与邮置往来军旅征戍商贾贸迁者途出於此居天下十六七其所系岂不愈重哉虽然犹未尽见也今天子忧勤恭俭以抚四海德教洋溢如祖宗时齐鲁燕晋秦雍之地且尽归版图则龙舟仗卫复沂淮汴以还故都百司庶府熊黑貔虎之师翼卫以从戈旗蔽天舳舻相衔然後知此闸之功与赵侯为国长虑远图之意不特为一时便利而已侯吾甥也请至四五不卷故不以衰耄辞三月丙子太中大夫充宝谟阁待制致任山陰县开国子食邑五百户赐紫金鱼袋陆某记

盱眙军翠屏堂记

国家故都汴时东出通津门舟行历宋亳宿泗两堤列植榆柳槐楸所在为城邑行千有一百
里汴流始合淮以入於海舟必自盱眙絶淮乃能入汴北舟亦自是入楚之洪泽以达大江
则盱眙实梁宋吴楚之冲为天下重地尚矣粤自高皇帝受命中兴驻蹕临安岁受朝聘始诏
盱眙进郡除馆治道以为迎劳宿饯之地而王人持尺一牒怀柔殊邻者亦皆取道於此是
地望益重城郭益缮治选任牧守重於曩岁及吴兴施侯之来为知军事也政成俗阜相地南
山得异境焉前望龟山下临长淮高明平旷一目千里草木蔽亏鳬雁翔泳盖可坐而数也乃
筑杰屋衡为四楹纵为七架前为陈乐之所後有更衣之地而傍又有丽牲击解与夫吏士更
休之区翼室修廊以陪以拥斲削髹丹皆极工致最二十有六间而堂成既取米礼部带之诗
名之曰翠屏且疏其面势於简绘其栋宇於素走骑抵山陰泽中请记於予侯与予故相好也
予闻方国家承平时其边郡游观有雅歌之堂万柳之亭以地胜名天下虽区脱间犹能咏叹
以为盛事然尝至其地者皆谓不可与淮水南山为比翠屏之盛又非雅歌万柳可及则亦宜
有雄文杰作以素出之而予之文不足称也虽强承命终以负媿侯名宿字武子於是朝散
郎直秘阁开禧元年春正月癸酉记

上天竺复庵记

嘉泰二年上天竺广慧法师筑退居於寺门桥南名之曰复庵後负白云峰前直狮子乳宝二
峰带以清溪环以美箭嘉木凡屋七十余间寝有室讲有堂中则为殿以奉西方像设殿前辟
大池两序列馆以处四方学者炊?湍浴皆有所床敷巾鉢云布鳞次又以为传授讲习梵唄
之勤宜有游息之地以休其暇曰则又作园亭流泉以与学者共之既成命其弟子了怀走山
陰镜湖上从予求文以记岁月予告之曰进而忘退行而忘居知趋前而昧於顾後者士大夫
之通患也故朝廷於士之告归每优礼之而又命有司察其有不知止者以励名节而厚风俗
士犹有不能决然退者又况物外道人初不践是非毁誉之途名山大衆以说法为职业愈老
而愈尊愈久而人愈归之虽一坐数十夏何不可者如法师道遇三朝名盖万衲自绍熙至嘉
泰十余年间诏书褒録如日丽天学者归仰如泉赴壑非有议其後者而法师慨然为退居之
举倾竭橐装无所顾惜虽然以予观之师非独视天竺之衆不啻弊屣加以岁年功成行着遂
为西方之归则复庵又一弊屣也死生去来无常予老甚矣安知不先在宝池中俟师之归语
今日作记事相与一笑乎开禧元年三月三日记

东篱记

放翁告归之三年辟舍东茆地南北七十五尺东西或十有八尺而羸或十有三尺而缩插竹为篱如其地之数甃五石瓮潜泉为池植千叶白芙蕖又杂植木之品若干草之品若干名之曰东篱放翁日婆娑其间掇其香以嗅撷其颖以玩朝而灌莫而鉏凡一甲坼一敷荣童子皆来报惟谨放翁於是考本草以见其性质探离骚以得其族类本之诗尔雅及毛氏郭氏之传以观其比兴穷其训诂又下而博取汉魏晋唐以来一篇一咏无遗者反覆研究古今体制之变革间亦吟讽为长谣短章楚调唐律酬畚风月烟雨之态度盖非独娱身目遣暇日而已昔老子着书末章自小国寡民至甘其食美其服安其居乐其俗邻国相望鸡犬之声相闻民至老死不相往来其意深矣使老子而得一邑一聚盖真足以致此於虜吾之东篱又小国寡民之细者欤开禧元年四月乙卯记

严州钓台买田记

嘉泰四年诏以严州久不治命朝散郎直秘阁浙西路安抚司参议孙公叔豹为知州事公至数月州以大治闻狱无淹系庭无滞讼幙府闲暇符檄简少榜笞之声不闻於屏外向之逋赋佚罚皆以时举仓有余粟府有余帛公天资近道不乐燕游歌舞优戏之奉又不喜以土木无益之事劳其民治事少休则宴坐别室自夜至旦盥漱而出终岁如一日独念初赴郡过七里瀨汉严先生钓台下读唐兴元中崔儒钓台记以为上有平田百亩足以力耕下临清流足以垂钓今投钓之地具在而田则亡有乃以属县令访之则田亦具在旁有流泉虽大旱不竭可给灌溉而或者辄有之公乃遗语以当归田直而取田以为先生岁时祭享之奉其人难之公难曰光武欲与先生共天下而先生不屑也千有余岁後吾乃欲必取百亩之田以奉祀事乎且吾教化未孚而遽望人以辍耕逊畔难矣因置不问会有没官田又从傍买民田足百亩除其泛科歛以界浮屠之奉祠者又即祠之右创为佛院栖钟於楼匱经於室僧庐客馆略皆有所度岁入可以食其徒七人而樵汲之役又在其外则先生之祠可以永世不废乃奢美石请记於予予曰严名城也自大驾巡幸临安以朝士出守者与夫人对行殿被临遣而来者大抵多取道於富春入谒祠下有高山仰止之叹而恨祠屋弊坏椒桂不以时荐往往咨嗟踟蹰久而後去及其下军则日困於簿书米盐将迎燕劳之事忽焉忘前日之言寒暑再更复上车去则又过祠下负初心戴媿面而去者袂相属也闻孙公之举得无少自咎哉予二十年前盖尝来为此邦亦自咎者之一也故喜道孙公之举且以励来者云开禧元年十二月辛未太中大夫宝谟阁待制致仕山陰县开国子食邑五百户赐紫金鱼袋陆某记

渭南文集卷二十

<集部,别集类,南宋建炎至德佑,渭南文集>

卷二十一

钦定四库全书

渭南文集卷二十一

宋 陆游 撰

仁和县重修先圣庙记

圣人之道位天地育万物可谓大矣然常寓之於宫室祭祀器服度数之间非如後世佛老子废礼弃乐扫除名分务为玄默寂灭浩然不可致诘也夫子生於周故其尊以为师者文王周公也使夫子生於今有不奉孔子顔子孟子以为先圣先师者乎则今之即学校以春秋舍奠於先圣先师者非独甲令也方先朝学校盛时县有学与郡等後以海内多事县学往往废坏而所以奉先圣先师者亦苟而已知临安府仁和县事谢君庭玉独慨然以为急务重责寝食不敢安捐已之公租钱二十万以经始会得废寺当没官钱以佐其费又取吏舍以益其址自开禧元年十二月至二年正月庙乃告成最其费为钱五十万吾夫子被袞服冕巍然当坐既悉如旧制配享从祀亦皆就列出入有门陟降有阶设燎有庭三献及受胙瘞币皆有位储峙祭器则又有库是岁二月上丁将有事於庙吏言异时惟丞以下执事令以剽剧率不行谢君曰岂有是哉於是告於府肃恭斋明以时讫事且来告请记其始末天子中兴大业讲太平典礼方自学校始学校之设方自两赤县始则兹庙又学校之权舆也其可阙书三年正月戊寅太中大夫宝谟阁待制致仕渭南县开国伯食邑八百户赐紫金鱼袋陆某记

湖州常照院记

昔在高宗受命中兴全功至德圣神武文昭仁宪孝皇帝龙兴河朔克济大业祀宋配天三十有六年涵养生齿其数无量遗弓故劒羣臣皆当追慕号泣思所以报在天之灵至千万世无怠无斁而况山林外臣以道艺供奉仗内尝被异礼厚赐者乎镇江府延庆寺僧梵隆以异材赡学高操絶艺自结上知不由先容得对内殿先是隆师固已结庐於湖州菁山号无住精舍一时名士如叶左丞梦得葛待制胜仲汪内翰藻陈参政与义皆为赋诗勒铭传於天下矣至是诏赐庵居於万松岭金地山江涛湖光映带几席寿藤老木岑蔚夭矫隆师方力辞愿归故巢既至悦其地且侈上赐幡然愿留久之示化上为怅然不恚赐金归葬故山及孝宗皇帝嗣位又命创常照院於无住故址以隆师弟子上首至叶嗣其事赐田以赡其徒又命充丁亥丁未本命道场以祈两殿之福高宗皇帝御德寿宫赐御书寂而常照照而常寂八字以示名院本指且赐天申金刚无量寿阁扁榜及紫檀刻佛号如来阁榜悉御书也又一再赐万几暇日所临晋王羲之帖二十二纸唐陆柬之兰亭诗一卷及米芾史略帖一卷题团扇二柄又赐白金助建立於是院悉崇成有释迦文殊普贤十六阿罗汉殿左则观音大士道场右则法轮藏室食息有堂钟经有楼熏浴炊?储积各有其所犍椎鼓钟器亦备足至於游息临眺种艺疏凿莫不极思致区处之妙而西岩尤为胜絶旷快之地叶师以老疾请罢院事屏居西岩今皇帝

诏从之且命改院为禅院专以仰荐高宗神游世择其徒有道行者嗣住持事而本澄首被是选实嘉泰四年甲子岁之四月也叶师乃来告曰愿有述焉某实绍兴朝士历事四朝三备史官名列策府诸儒之右则与隆师及其子孙虽道俗迹异而被遇则同今叶澄父子晨香夜灯梵呗禅定虽世外枯槁亦有以伸其图报万一之意某则不然饱食而安居日复一日饰巾待终而已视叶澄岂不有媿哉故遂秉笔而不敢辞上以纪三朝眷遇山林学道者之盛德下以识某媿云开禧三年二月壬子谨记

法慈懺殿记

东出庆元府五十里曰小溪有僧舍曰法慈院院创於唐咸通中旧号凤山院历五季至宋兴院常不废治平二年始赐今名虽世以院僧主之然其徒多出游四方学经论问祖师第一义或终其身不归淳熙十四年老宿及後來者始议作懺殿而如戒等十辈愿尽力营之久而不成十人或死或缘不偶独如戒智玻行慈誓不怠废必遂其始愿行乞劳苦积细微以成高大於是施者墙立助者麇至闻者兴叹见者起敬木章竹个山积云委伐石於山陶甃於竈丹漆黝垩致於四方以绍熙壬子三月癸酉始土工明年八月庚申始匠事十一月土木皆告成南北八丈六尺东西五丈八尺而栋之高四丈一尺耽耽奕奕穷极艺巧虽庆元多名山巨刹然懺堂之盛未有加法慈者奉释迦於中而左则弥勒右则无量寿又以天地鬼神之像陪拥四旁於虜亦盛矣院僧因余姚普明院僧则华求予为记则华尝游蜀予识之於成都今三十余年以故旧不忍拒也乃为之书而刻施者姓名於碑陰云

东阳陈君义庄记

东阳进士陈君德高因吾友人吕君友德来告曰德高不幸早失先人举进士又辄斥念昔先人进德高辈於学盖将使之事君使之字民以广我先人之志今虽自力而不合於有司之绳尺如其遂负所期望付托生何面以奉祭享死何辞以见吾亲於地下不获施於仕进为时雨为丰年矣独不可退而施於宗族乎於是欲为义庄略用范文正公之矩度而稍增损之以适时变敢求文於执事者且载其凡於碑陰予复之曰美哉吾子之志也人之情於其宗族远则疏之弥远则益疏而至於忘之盖以身为亲疏而不以先人为亲疏也视兄之子或不若己之子己之子与兄之子自吾父视之有异乎能以父之心为心则己之子与兄之子且不知其同异矣推而上之大父之孙为从父兄弟曾大父之曾孙为从祖兄弟又推而上之至於无服虽天下长者不能无亲疎之杀矣於虜制服不得不若是也若推上世之心爱其子孙欲使之衣食给足婚嫁以时欲使之仕而不欲使之流为工商降为皂?去为浮图老子之徒则一也死而有知岂以远而忘之哉义庄之设盖基於是然举天下言之能为是者有几非以为不美而不为也力不足也若陈君者自其先人勤劳节约以致饶余而陈君不敢私有之其地在脰头昭福寺之傍初期以千亩今及十之七而吾地在脰头者止此比邻感其义皆欲期年间贸易以成之又植桑畜牛筑陂以丰衣食之源其详见碑陰又有最当虑者吾子之心则尽矣後人或贪而专利或嗇而吝出或夸而广费或狭长挟仕挟有力之助而败约非有司者别白之则庄且坏不支府牧邑长丞掾曹吏及乡之卿大夫先生处士其必纲维主张之使久而如一日陈氏布衣也其贍产非能絶出一乡之上而义倡於乡如此吾徒仕於朝於四方虽未必皆厚

祿然聞陳氏之風而不知媿且慕者豈人情也哉於是并書以遺焉君之先君子蓋諱士澄字彥清云開禧三年七月辛丑記

廬帥田侯生祠記

開禧二年八月詔以開封田侯琳為淮南西路安撫使兼知廬州節制淮西軍馬時虜方入塞侯既受命謂廬州為淮西根本而古城又為州之襟要堅守廬州則淮西有太山之安修復古城則廬州有金城湯池之固異時議者知守南城而已古城不復繕治一日有警如有太阿之利而不持鐔柄七尺之軀而授人腰領幾何其不敗也古城雖不甃而其實峭堅利以禦寇且西北堅城多止用土雖潼關及赫連氏統萬城亦土爾乃躬臨視之芟夷草棘則城果屹如石壁戈戟皆廢衆始駭服於是增陴浚壕大設樓櫓又有月城亦得地利而卑不可恃則又為筑羊馬城厚六尺高倍之且為重塹設釣橋而月城亦不可復犯矣然自興役至訖事不三閱月將士爭奮民不與知一旦巍然若役鬼神可謂奇偉不世之功矣城甫畢敵果大入道執鄉民問知侯在是相顧曰殊不知乃鐵面將軍也蓋金自王師攻蔡州時已習知侯名未戰氣先奪矣棄城拒守甚力夜遣偏將自屯所攻其營杀伤數千人萬戶死者二人侯聞捷曰是且伏兵東門夜攻吾水柵以幸一勝乃提親兵隨所向御之莫不摧破敵知廬州不可近遂解而趨和州侯又亟遣親信間道督光州戍將斷桥梁燒賊艦絕其饗道奪俘敵復取安豐軍又遣萬騎由梁縣援和州会和州亦堅壁敵窮乃盡遯侯又出兵濠州以战车敗敵屯兵战车久不用侯以意為之果取勝策勲真拜達州刺史且以车制頒之諸軍侯猶不敢自以為功方益修水門之備濬河深二丈乃得昔人撒星桩横亘兩城間始知昔固有此舉遂益植新桩而城之其崇五丈有奇樓櫓稱焉將吏士民聚而謀曰侯之所立如此郡人無以報萬一則不可相與筑生祠於城中而移書於予請書歲月予以衰疾辭比書復來則侯捐館舍矣請既益堅予亦痛若人之不淑而不获卒大勲業也故采之金論以叙其始末昔劉汭城水洛趙立城山陽汭所遇非堅敵立虽死事而不能全其城犹皆庙食載在祀 况如侯之功光明卓絕如此則祀典之請必有任其事者尚继书之以垂示後世為忠義之勸云嘉定元年春二月己巳謹記

吳氏書樓記

天下之事有合於理而可為者有虽合於理而不可得為之者士於可為者不可不力力不足則合朋友鄉閭之力而為之又不足告於在仕者以卒成之成矣又慮其坏則吾有子子又有孫孫又有子虽數十百世吾之志犹在也豈不賢哉彼不可得為之者則有命焉有義焉不知命義徒嘖嘖紛紛奚益故君子不為也然為此者寡也或易之為彼者輒可以得名於流俗故士之為此者寡也吾友南城吳君伸與其弟倫初以淳熙之詔建社倉其詳見於侍講朱公元晦所為記其後又以錢百萬剏為大樓儲書數千卷會友朋教子弟其意甚美於是朱公又為大書書樓二字以揭之樓之下曰讀書堂堂之前又為小閣閣之下曰和豐堂旁復有二小閣左則象山陸公子靜書其顏曰南牕右則艮齋謝公昌國書其顏曰北牕堂之後榮木軒則又朱公實書之於虞亦可謂盛矣蓋吳君未命之士爾為社倉以惠其鄉為書樓以善其家皆其力之所及自是推而上之力可以及一邑一郡一道以至謀謨於朝者皆如吳君自力而不媿則民殷俗媿兵寢刑厝如唐虞三代可積而至也吳君兄弟為是迄今已十五六年使皆壽考

康宁则仓与楼皆当益治乡之民生业愈给足安乐日趋於寿富而君之子弟孝悌忠信亦皆足以化民善俗是可坐而俟也然年运而往天人之际有不可常者则又当有以垂训於无穷子读唐李卫公文饶平泉山居记有曰鬻平泉者非吾子孙也以平泉一木一石与人者非佳子弟也平泉特燕游地木石之怪奇者亦奚足道而其言且如此况义仓与书楼乎後之人读吾记至此将有涣然汗出霰然涕下者虽百世之後常如吴君时有不难者矣嘉定元年五月甲子记

灵秘院营造记

出会稽城西门舟行二十五里曰柯桥灵秘院自绍兴中僧海净大师智性筑屋设供以待游僧名接待院久而寢成始徙废寺故额名之海净年九十坐八十三夏而终以其法孙德恭领院事恭少尝学於四方有器局迨今二十年食不过一簞衣不加一称而惟衆事是力夕思昼营心揆手画施者自至魔事不作用能於二十年间或改作或增葺光明伟丽毫发无憾上承先师遗志下为子孙基业閤堂杰阁房奥廊序栖钟之楼读经之堂馆客之次下至庖厨溲浴无一不备为屋仅百间自门而出直视旁览道路绳直而原野砥平一远山在前孤峭奇秀常有烟云暎带其傍卜地者以为在法百世不废且将出名僧今院才一传其兴如此後乌可量哉院之崇成也恭来请记曰先师之塏公实与之铭今院当有记非公谁宜为哉予报之曰子庐於此凡东之会稽四明与西入临安者风飏日相属也彼其得志於仕宦获利於商贾者宁可计邪有能家世相继支久不坏如若之为父子者乎有能容衆聚族變和安乐如若之处兄弟者乎至於度地筑室以奢丽相夸斤斧之声未停丹堊之饰未乾而盛衰之变已遽至矣亦有如若之安居奠处子传之孙孙又传之子者乎此无他彼其初与若异也虽曰有天数然人事常参焉人事不尽而诿之数於虐其可哉嘉定元年夏五月庚申记

桥南书院记

吾友西安徐载叔豪隽人也博学善属文所从皆知名士方其少壮时视功名富贵犹粪内物一第直泐我尔然出游三十年蹭蹬不偶异时知己零落且尽家赀本不薄载叔常粪壤视之权衡仰俯算筹衡纵一切不能知惟日夜从事於尘编蠹简中至食不足不问也中年卜居城中号桥南书院地僻而境胜屋庑而人杰清流美竹秀木芳草可玩而乐者不一而足载叔高卧其中裾不曳刺不书客之来者日益衆行者交迹塞者结辙诃殿者笼坊陌虽公侯达官之门不能过也名不可妄得客不可强致载叔盖有以得此於人矣乃者数移书於予请记所谓桥南书院者嗟乎汉梁伯鸾入吴赁舂於臯伯通庑下至今吴有臯桥盖以伯鸾所寓得名载叔之贤不减伯鸾而桥南乃其居则後世不薶没决矣尚何待记然载叔之请不可终拒也乃为之书嘉定元年夏六月庚寅山陰陆某务观记

心远堂记

大卿朱公以开禧元年筑第於昭武城东取陶渊明诗语名其堂曰心远既成与士大夫落之而以书来告曰子为我记始嘉泰壬戌予蒙恩召为史官朱公丞秘书日相从甚乐公去为御

史予领监事闲剧异趣会见甚疏然每与同舍焚香煮茶於图书钟鼎之间时时言及公未尝不相与兴怀絶叹也明年国史奏御之明日予乞骸骨而归俄而公亦自寺卿得请外补不复相闻者累岁比书来予方卧病作而言曰朱公真可人哉士得时遇主施其才於国退居闾里闲暇之日为多樽俎在前琴奕迭进欣然自得悠然遐想问馈宴乐以修亲旧夙昔之好讲解诵说以垂後进无穷之训进退两得可谓贤矣予独相望累千里不得持一觴为公寿且庆斯堂之成顾方以为歉今乃得以不腆之文自托於後世亦可谓幸矣夫嘉定元年秋七月甲子记

万卷楼记

学必本於书一卷之书初视之若甚约也後先相参彼此相稽本末精麤相为发明其所关涉已不胜其衆矣一编一简有脱遗失次者非考之於他书则所承误而不知同字而异诂同辞而异义书有隶古音有楚夏非博极羣书则一卷之书殆不可遽通此学者所以贵夫博也自先秦两汉迄於唐五代以来更历大乱书之存者既寡学者於其仅存之中又卤莽焉以自便其怠惰因循曰吾惧博之溺心也岂不陋哉故善学者通一经而足藏书者虽盈万卷犹有憾焉而近世浅士乃谓藏书如鬪草徒以多寡相为胜负何益於学呜呼审如是说则秦之焚书乃有功於学者矣昭武朱公敬之粹於学而笃於行早自三馆为御史为寺卿出典名藩尊所闻行所知亦无负於为儒矣然每悵然自以为歉益务藏书以栖於架藏於椟为未足又筑楼於第中以示尊阁传後之意而移书属予记之予闻故时藏书如韩魏公万籍堂欧阳兗公六一堂司马温公读书堂皆实万卷然未能絶过诸家也其最擅名者曰宋宣献李邯郸吕汲公王仲至或承平时已丧或遇乱散軼士大夫所共叹也朱公齿发尚壮方为世显用且澹然无财则声色之奉悦网罗不倦万卷岂足道哉予闻是楼南则道人三峰北则石鼓山东南则白渚山烟岚云岫洲渚林薄更相映发朝莫万态公不以登览之胜名之而独以藏书见志记亦详於此略於彼者盖朱公本志也嘉定元年秋七月甲子记

渭南文集卷二十一

卷二十二

钦定四库全书

渭南文集卷二十二

宋 陆游 撰

梅子真泉铭

距会稽城东北七里有山曰梅山山之麓有泉曰子真泉游者或疑焉智者及道人求笠泽渔父为之铭铭曰梅公之去汉犹鸱夷子之去越也变姓名弃妻子舟车所通何所不閱彼吴市门人偶传之而作史者因着其说傥信吴市而疑斯山不几乎执一而废百梅公之去如怀安於一方则是以颈血丹莽之斧钺也山麓之泉甘寒澄澈珠琲玉雪与子徊徘徊酌泉饮之亦足以尽公之高而叹其决也

司马温公布被铭

公孙丞相布被人曰诈司马丞相亦布被人曰俭布被可能也使人曰俭不曰诈不能也【此铭予二十岁时作今传以为秦少游非也】

金崖砚铭

我游三峡得砚南浦西穷梁益东掠吴楚挥洒淋漓鬼神风雨百世之下莫予敢侮

延平砚铭

延平双龙去无迹收斂光气锺之石声如浮磬色苍璧予文日衰愧匪敌

蛮谿砚铭

斯石也出於汉嘉之蛮谿盖夷人佩刀之砺也琢於山陰之镜湖则放翁笔墨之瑞也质如玉文如縠则黟龙尾之羣从而溜韞玉之仲季也

钱侍郎海山砚铭

云涛三山饰此怪珍谁其宝之天子侍臣煌煌绣衣福我远民一字落纸活亿万人勿谓器小其重千钧从公遄归四海皆春

桑泽卿砖砚铭

古名砚以瓦今名砚以甗瓦以利於用甗以全其天甗乎甗乎宁用之纯而保其全乎尚无媿之日陈於前【放翁铭桑甥泽卿砚甗绍熙二年六月九日老学庵书】

崔伯易画像赞

崔公名公度字伯易高邮人刘相沆举贤良方正不赴以任为三班差使韩魏公荐之诏易文资为国子监直讲亦辞元佑中再召为郎又皆固辞补外郎诸公力白於朝强起为国子司业讫不肯复出为郡以起居郎秘书少监召亦不肯超绍圣中复以为秘书少监辞如初遂请宫观寻致仕予喜其白首一节乃求画像於高邮而为赞曰

古之君子学以为己可行则行可止则止仕以行义止以远耻世衰道微岂复知此蚩蚩始学青紫思拾万马竝驰孰能独立始虽弗急後亦汲汲我思崔公涕泗横集

东坡像赞

我游钧天帝之所都是老先生玉色敷腴顾我而叹闵世垢浊笑谓侍僊畀以灵药稽首径归万里天风碧山巉然月堕江空

王仲信画水石赞

亡友王仲信为予作水石一壁仲信下世二十年乃为之赞恨仲信之不及见也其词曰

导江三硖神禹之蹟王子写之汹汹撼壁後三十年尘暗苔蚀澹墨色之欲尽尚观者之惨栗或曰是学蜀两孙者非邪放翁曰吾但见其有欧阳信本柳诚悬之笔力也

鍾离真人赞

五季之乱方酣於兵叱嗟风云卓乎人英功虽不成气则莫夺煌煌金丹粃糠陶葛

吕真人赞

一粒之粟有国有民二升之釜浩渺嶙峋我游巴陵始识公面青蛇监然求之不见

又

天下家家画吕公衣冠顔鬢了无同劝君莫被丹青误那有长绳可系风

僧师源画观音赞

三世如来同一哄大士亦作补陀梦佛子无财可修供尺纸寸毫俱妙用宝纓天冠俨四衆长年造极笔愈纵唯师鲁公为作颂十方世界俱震动

宏智禅师真赞

死诸葛走生仲达死姚崇卖生张说看渠临了一着子诸方倒退三十里

大慧禅师真赞【为昭觉文老作】

平生嫌遮老子说法口巴巴地若是灵利阿师参取画底妙喜

万庵禅师真赞【为处良长老作】

洒洒落落五十年一句不说祖师禅妙喜堂中正法眼等闲灭在瞎驴边

涂毒策禅师真赞

骨相瓌奇风神萧散貌肃而和语尽而简画得者英气逼人画不得者顶门上一只眼

又

涂毒不自赞留待三山老试问卿上人赞好莫赞好海中忽起劫初风北斗柄折须弥倒

佛照禅师真赞

名动三朝话行四海撒手归来云山不改人言大觉同龕师云老僧掩彩

大洪禅师赞

发长无心剃衣破无心补大洪山上有贼大洪山下有虎非但白刃杀尽儿孙更能一口吞却佛祖

中岩圆老像赞

我游中岩拜师於床巍巍堂堂风举龙骧公住无为访我成都雄辩纵横玉色敷腴别未十日梁木告摧我如飞蓬万里南来孰谓穷山乃瞻仪形墙壁说法况此丹青

奉圣淳山主年八十有四放翁为作真赞

两住名山一老禅目光如电照人天行藏不用占蓍草卦气全来二十年

芋庵宗慧禅师真赞

煨懒残芋打涂毒鼓舌本雷霆毫端风雨

广慧法师赞

东土震旦西方极乐一緇草鞋到处行脚

敷净人求僧赞

光雉头净洗鉢头头拈起头头活有时与有时夺受用现前活泼泼敷道者一短褐欠个什麼更要恶水汨将错就错也不妨只在檀那轻手拨【道敷净人求伽佗见施主求买度牒为说此数语嘉泰辛酉四月十日放翁书】

钱道人赞

栟榈冠青芒屨上天下天不骑鹤唤作神仙渠不肯道是凡人我又错会稽城中且卖药

放翁自赞

遗物以贵吾身弃智以全吾真劒外江南飘然幅巾野鹤驾九天之风涧松傲万木之春或以为跌宕湖海之士或以为枯槁陇亩之民二者之论虽不同而不我知则均也【淳熙庚子务观自赞时在临川年五十有六】

又

名动高皇语触秦桧身老空山文传海外五十年间死尽流辈老子无才山僧不会

又

皮葛其衣巢穴其居烹不糝之藜羹驾秃尾之草驴闻鸡而起则和甯戚之牛歌戴星而耕则稽泛胜之农书谓之瘁则若腴谓之泽则若癯虽不能草泥金之检以纪治功其亦可挟兔园之册以教乡闾者乎【周彦文令画工为放翁写真且来求赞时年八十】

又

进无以显於时退不能隐於酒事刀笔不如小吏把锄犁不如健妇或问陈子何取而肖其像曰是翁也腹容王导辈数百胸吞云梦者八九也【陈伯予命画工为放翁记顔且属作赞时开禧丁卯翁年八十三】

记太子亲王尹京故事

隋齐王暕尹河南唐秦公世民尹京兆卫王重俊为洛州牧皆亲王尹京故事也然尚未甚以为重後唐秦王从荣以长子为河南尹又为天下兵马大元帅故当时遂以尹京为储贰之位至晋天福中郑王重贵周广顺中晋王荣皆尹开封用秦王故事也国朝太祖皇帝建隆二年七月以太宗皇帝为开封尹开宝末太宗嗣位才八日即以齐王廷美为开封尹【後封秦王】太平兴国七年秦王出为西京留守自是开封不置尹止命近臣权知府而已【权知府自李符始】雍熙二年始以陈王元僖为开封尹盖是时太宗元子楚王元佐被疾废则陈王亦储君也淳化三年薨後二年真宗皇帝自襄王为开封尹【後封寿王】至道元年正东宫议者谓尹有品秩非太子所宜兼领乃改判府事自後唐以来虽以尹京陰为储副之位然皆藩王以太子判京府则自至道始也故事开封尹之上有牧虽具员而初未尝置国朝惟亲王乃除尹余但为权知府事自太祖至徽宗八朝百七十年未尝改蔡京为相始建议置尹尹非独故事须亲王乃除又太宗真宗潜藩所领人臣所宜避天下皆罪京之不学其後宣和末钦宗皇帝自东宫为开封牧是时已有尹尹之上惟有牧故以命之然牧故事序位在太子少保之下御史大夫六曹尚书之上亦非太子所宜兼盖有司失考至道判府之制也尹之下故事有少尹位在少府将作少监之下太子少詹事之上後唐秦王时尝以刘陟为之而建隆以来率不置惟置判官推官各一员或二员通掌府事竝以常参官充亲王为尹则判官以给谏充【今太中大夫以上】推官差降焉真宗为尹时判官二员推官三员盖特置也或问太宗以来尹京则谓之南衙何也曰开封府治所本在正阳门南街东然太宗为尹乃就晋邸视事晋邸又在大内及府治之南故曰南衙亦曰南宫秦王许王因之及真宗为尹太宗以秦王许王皆不利始命还就府治焉

渭南文集卷二十二

卷二十三

钦定四库全书

渭南文集卷二十三

宋 陆游 撰

姚平仲小传

姚平仲字希晏世为西陲大将幼孤从父古养为子年十八与夏人战臧底河斩获甚衆贼莫能枝梧宣抚使童贯召与语平仲负气不少屈贯不悦抑其赏然关中豪杰皆推之号小太尉睦州盗起徽宗遣贯讨贼贯虽恶平仲心服其沉勇复取以行及贼平平仲功冠军乃见贯曰平仲不愿得赏愿一见上耳贯愈忌之他将王渊刘光世皆得召见平仲独不与钦宗在东宫知其名及即位金人入边都城受围平仲适在京师得召对福宁殿厚赐金帛许以殊赏於是平仲请出死士斫营擒敌帅以献及出连破两寨而敌已夜徙去平仲功不成遂乘青骡亡命一昼夜驰七百五十里抵邓州始得食入武关至长安欲隐华山顾以为浅奔蜀至青城山上清宫人莫识也留一日复入大面山行二百七十余里度采药者莫能至乃解纵所乘骡得石穴以居朝廷数下诏物色求之弗得也乾道淳熙之间始出至丈人观道院自言如此时年八十余紫髯郁然长数尺面奕奕有光行不择崖堑荆棘其速若犇马亦时为人作草书颇奇伟然秘不言得道之由云

族叔父元煮传

族叔父元煮名 一字居安自山陰徙家余姚性恭谨纯厚闭门力学不妄与人交尤好乐律每言乐所以成人才今世所用皆胡部虽郑卫亦不得闻况韶濩乎因考按古关雎鹿鸣诸诗抑扬皆合音律时时自歌之中正简古闻者兴起欲上书请用之乡饮酒会疾病不果所居濒江一室萧然数十年间几席书册琴樽之属皆未尝易好饮酒然不肯自酿或馈以家所醖亦辞不取曰法不可也其谨如此有子洙登进士第为盐官尉迎养官舍期年洙卒元煮护其丧归亦能自释久之以疾卒年七十与元煮同时有郑从革者名鼎之丹徒人自三舍法行已在乡校能自刻苦口诵手钞日常兼数人然试有司辄黜从革亦不以黜故少怠终始如一日事父笃孝建炎中客山陰遇寇从革欲奉父避之父不听从从革乃束带立床前鬻糜粥奉汤液悉如平时寇至则迎门拜泣曰父老不能去惟哀怜之寇为感动乃署其门使其属勿犯终乱定父子俱得全年六十余贫益苦比卒衣衾不能具而一乡皆推其贤云

陈氏老传

会稽五云乡陈氏老年近八十生三子有孙数人皆业农惟力耕致给足凡兼并之事抵质贾贩以取赢者一切不为耕桑之外惟渔樵畜牧而已子孙但略使识字不许读书为士婚姻悉

取农家非其类皆拒不与通室庐不妄增一椽器用皆朴质坚壮不加漆饰衣惟布襦裙取适寒暑之宜行之四五十年如一日子孙亦皆化之无违陈氏所居在剌涪山下地名曰南溪云陆子曰予尝悲士之仕者若苟名位而已则为负国必无负焉则危身害家忧其父母有所不免耕稼之业一舍而去之复其故甚难予先世本鲁墟农家自祥符间去而仕今且二百年穷通显晦所不论竟无一人得归故业者室庐桑麻果树沟池之属悉已芜没族党散徙四方盖有不知所之者过鲁墟未尝不太息兴怀至於流涕也闻陈氏事因为述其梗槩传之庶观者有感焉

绍兴府衆会黄籀青词

上帝福善祸淫虽各繇於类应大道回骸起死或俯徇於哀祈敢露忱词仰干聪鉴伏念臣等所居绍兴府地连三辅人杂五方任职居官当闾閻之太半鲜衣美食昧稼穡之所从习俗莫还神明积譴方凶饥之荐至加疫疠之相杰疾痛呻吟未及三医之谒焄蒿凄怆已悲万鬼之隣念升济之无方敢号呼而有请伏望少回洪造一洗衆辜逝者脱泉路之冥冥生者安王民之皞皞天职生覆地职形载敢忘夙夜之归冬无愆阳夏无伏陰永冀生成之赐

江西祈雨青词

天惟至仁久寛水旱之譴吏实有罪仰累陰阳之和既闵雨之历时敢叩閤而请命伏念臣濫膺上指出使近畿深惟冥顽固陋之资莫副惻怛丁宁之训徒积勤於夙夜冀无负於幽明然而风采不足以警服豪强惠爱不足以抚绥鰥寡政媮愒日田畴旷陂泽之修讼积淹时囹圄困桁杨之系务均力役而或蔽於所见思广賑恤而或缘以为姦既莫致於善祥惧卒罹於饥饉是用諏辰之吉稽首以陈伏望推善贷之慈霈曲成之惠虽有司旷职宜伏雷霆之诛然比屋何辜流为沟壑之瘠若复未回於洪造遂将絶望於有秋敢殫皇皇哀迫之诚冒贡恳恳吁嗟之祷庶格九霄之泽少纾一道之忧稼穡顺成傥仅蒙於中熟里閭疾苦誓靡壅於上闻

谢雨青词

旱太甚以是虞不遑启处天盖高而可叩思罄精诚方祇祓於斋场已亟沾於膏泽尚惧丰凶之未决敢忘祈报之交修仰企丛霄少回冲驭伏愿哀黎民之匱食宥衆吏之瘵官申敕有神更终大惠一谷不升谓嗛岂胜夙夜之忧三日以往为霖实赖乾坤之造

严州祈雨青词

岁律肇新农功伊始居者虑陰淫阳伏之寇耕者怀旱乾水溢之虞仰惟上穹职是元化俯遂羣黎之育式均六气之平敢即熙坛恭陈薄荐所冀岁丰民乐寛九重宵旰之忧赋足刑清道衆吏简书之责敢忘惕励仰对生成

谢雨青词

天九关之在上精诚可以彻闻雨三日而成霖枯槁为之尽起恭陈薄荐冒贡丹衷伏念臣领此徧州迨今累月上无以布宣寬大而追屯膏之咎下不能抚摩凋瘵而格解泽之施局蹐靡遑吁嗟上诉敢谓鼓霄之应曾无挟日之淹月离毕以示期山出云而効职风霆下击涧壑交流井汲如初家享一瓢之乐粟储可继士寬半叔之忧商旅通行道途鼓舞彼有遗秉此有滞穗方将均惠於惇嫠冬无愆阳夏无伏陰更冀默消於疾病敢忘兢惕仰对生成

保安青词

道垂光而下济罔不兴慈情至敬则无文惟当直诉伏念臣少多罪垢晚乏功能寓形寢迫於九齡定着遂阶於四品先世被迫荣之典已冠三孤诸儿荷延赏之恩例沾寸禄首坐满盈之久自挺灾衅之来时涉夏秋疾生经络有药必试靡神不祈呻吟之声晨莫不絕惟归诚於洪造或少追於往愆么然微衷亟以自列伏望曲回聪听俯佑残躯俾毫及之余生获奠居於故社耕桑安乐父子团栾天实无私敢汲汲希望外之福人谁不死愿熙熙须数尽之期

天申节枢密院开启道场疏

得道者上为皇啓帝图之广大有德者得其寿当化日之舒长率吁衆情?伸善祝光尧寿圣太上皇帝伏愿三灵介祉九庙储休无黄屋之心虽退藏於渊默如南山之寿冀茂对於天祺

满散道场疏

惟天其申命用休诞御无疆之历有德者必得其寿共输归美之诚敢叩梵宫仰申善颂光尧寿圣太上皇帝陛下伏愿颐神物外布泽寰中福祿万年丕介厯鸿之祉本支百世永奉诒燕之谋

天申节功德疏

得吾道而上为皇算自齐於箕翼有天下而传之子福方寢於华夷敢因震夙之期申致延鸿之祝恭惟光尧寿圣太上皇帝陛下聪明时宪清静无为黄屋非心共仰尧仁之大玉卮为寿益瞻汉殿之尊光尧寿圣太上皇帝恭愿茂对昌辰丕承景贶以圣传圣增光奕世之休为天中天永享万方之奉

又

得道上为皇诞受泰元之册重华协於帝光临孝治之朝敢殫向日之诚仰祝後天之算尊号陛下恭愿又新汤德丕显文谟日舒以长燕处益探於衆妙道冲而用陰功广被於羣生

瑞庆节功德疏七

有开必先天地肇开於景运无远弗届华夷毕效於贡珍矧备迓联敢稽寿祝皇帝陛下伏愿
诞膺戩谷端拱穆清以八千岁而为春永御舒长之景十七百年而过历用符爱戴之诚

又

诞弥厥月丕昭震夙之期长发其祥共致彪鸿之祝皇帝陛下恭愿後天难老如日正中绍十
二圣之睿睿开三百年之景运金泥玉检肇修稀濶之仪栒矢石磬永享贡输之盛

又

叨荣禁路千龄获遇於圣明归老故山一饭敢忘於君父敬修梵供仰祝尧年皇帝陛下恭愿
光照大千寿躔时万继统燕无为之治御邦跻有道之长上际下蟠永享化国舒长之日东封
西祀嗣修太平稀濶之仪

又

节纪千秋实踵开元之盛神呼万岁洵膺嵩岳之祥顾虽遯迹於丘园敢怠弛诚於轩陛皇帝
陛下伏愿道极高而蟠厚治咸五而登三碣石河源尽复輿图之旧泰山梁甫嗣修检玉之仪

又

惟皇之极欣逢熙洽之辰於万斯年共效彪鸿之祝敢趋净域荐控丹衷皇帝陛下伏愿允叶
帝心诞膺神策化东渐而西被功上际而下蟠降德於衆兆民坐致唐虞之治上瑞至千百所
永符箕翼之祥

又

圣恩念旧犹叨四品之崇景运开先敢後万年之祝皇帝陛下恭愿当宁抚盈成之业垂衣绍
积累之休朔易南讹绵锄耰於率土东渐西被会玉帛於中朝

又

恩沾遗老幸联上雍之班身遇明时敢後祝尧之请皇帝陛下恭愿乾端广大日毂正中髦蚩
奉九译之琛农扈告三登之候应帝王之运故聪明睿智足以有临集天地之祥皆算数譬喻
所不能及

祈雨疏

九秋伊始百谷将登念零雨之稍愆率羣情而致祷仰惟慈?曲鉴丹诚三日为霖俯慰云霓之

望大田多稼上寬宵旰之忧

谢雨疏

诸佛愿心本常存於泽物衆生业果或自召於凶年民愚无良吏惰不职骄阳之作害闵零雨之弗时内罄寸诚方吁嗟而遍祷起瞻四野已枯槁之一苏自惟莫格於太和乃至上勤於慧力敢忘祇报用畚鸿慈

道宫谢雨疏

上帝至仁本不忘於泽物下民胡罪几坐致於凶年由官吏之惰偷致政刑之疵疢骄阳作害零雨弗时内罄寸诚方吁嗟而仰祷起瞻四野已枯槁之尽苏自惟莫格於太和廼至辄干於鸿造敢忘祇报用畚好生

严州祈雨疏

倬彼云汉尚愆霖雨之期害於粢盛俯剧渊冰之惧敢输丹悃仰叩真慈冀占离毕之祥少道屯膏之咎

又

时雨少愆上劳宵旰诏音亟下恭致祷祈敢冀【觉慈洪恩】诞敷惠泽

又

龟占墨而尚违凜有屯膏之惧龙蟠泥而未举方繄解泽之施冀軫【觉鸿】慈曲成乐岁俯慰闾境云霓之望上寬渊衷宵旰之忧

严州施大斛疏

旱魃为虐念莫释於衆忧饭香普熏敢恭陈於净供伏愿云从龙而效职月离毕以告祥解泽亟行屯膏一洗如来施无量食既靡间於圣凡史臣书大有年庶上寬於宵旰

严州谢雨疏

时雨愆期方軫焦劳之虑【天心佛慈】从欲遽蒙霈泽之施敢择良辰敬伸昭报

严州谢雪疏

万邦屡丰幸际中天之熙运平地尺雪郁为嗣岁之嘉祥敢忘【净供薄荐】之【修陈】少
谢【觉慈霰霄】之颺尚祈【垂佑洪造】益介纯禧

严州久雪祈晴疏

时雪屡应已占嗣岁之登春气未和宁免祈寒之怨敢趋【秘梵】宇仰叩【真觉】慈冀日
丽於层霄俾民安於比屋上寛旰食俯慰輿情

渭南文集卷二十三

卷二十四

钦定四库全书

渭南文集卷二十四

宋 陆游 撰

法云寺建观音藏殿疏

补落伽之道场藁芜已久修多罗之妙典函匳仅存先师每志於经营四衆亦思於协助天时默定佛事将成伏望巨公大人居士长者深戒着鞭之後共合浮图之尖庶得万瓦鳞差修梁虹举紺容辉日梵呗陵云结难值之胜因作无穷之壮观

开元寺重建三门疏

巍然古刹实居大府之喉衿卓尔高閤复为一寺之眉目历数百载极祇园之盛乃七十年犹劫火之残伏望大发积藏亟成鉅丽粲髹丹於久废伟扁榜之一新雨霁尘清碧瓦势凌於霄汉雾开日出金铺光射於康庄还壮观於承平垂美名於不朽

安隐寺修钟楼疏

金钟大镛盖以声为佛事雄楼杰阁宛在水之中央历岁既深须人乃复敢徧投於信士祈同结於胜缘浮翠流丹傥复还於鉅丽撞昏击晓实大警於沉冥

重修光孝观疏

天覆地载之间饮啄皆由於道?跂行喙息之类涵濡悉荷於国恩岂独忠义之心人人具有抑亦生成之赐物物皆同永惟光孝之道场实荐徽皇之飏御神祠佛刹尚营缮之相望琳馆珍台岂修崇之可後某等叨恩冠褐庀职宫庭敢忘夙夜之勤冀复规模之旧既侈先朝之遗迹遂新大府之荣观

圆通寺建僧堂疏

如来香饭取时已遣化人开士鉢单展处又须得所营兹华屋延我胜流念非极栋宇之功何以称龙象之衆木鱼哮吼千僧阁也在下风露柱证明九梁星直须退步

重建大善寺疏

劫火之坏大千虽云有数长者之施亿万要岂无时悦阿练若获了大缘则宰堵波亦还旧观
可谓非常之举惟须不退之心

道像五藏疏

道虽与貌固非耳目口鼻之施天本无心尚何肝胆肺肠之有既云肖像盖亦同人愿共发於
信心不须疑着庶亟成於盛事垂示无穷

鹫峰寺重建三门疏

建寺年深筑门役钜虽不下禅牀相接用此何为然倒骑佛殿出来少它不得伏望念古阿兰
若之胜地结檀波罗密之大缘或备土木甄璧之材或施黝垩髹丹之费初发心处已有诸圣
证明一落笔时自然大地震动

重修大庆寺疏

佛出本为一大缘初无差别越城昔有六尼寺五已丘墟惟大庆之名蓝实故唐之遗址兹蒙
贤牧命复旧规方广募於衆财冀亟成於伟观魔王魔民魔女尽空蜂蚁之区法鼓法炬法幢
一新龙象之衆傥承金诺敢请永衍

福州请仁王坚老疏

勇退急流虽具衲子参寻之眼旁观袖手要非邦人向慕之诚爰择名蓝往迎高士某人芙蓉
正????真歇诸孙默观已得於本心自重每轻於外物不合则去蹈儒士之难能知我者希得老
氏之所贵付越山於昨梦听石岭之悦来埜鹤溪云岂有去留之迹斋鱼粥鼓一随宿昔之缘

福州请九峰圆老疏

鬧籃里入头不妨奇特悬崖边撒手只要承当须遇作家方了此事某人参临济正法眼得补
陀大辩才虽则跛跛挈挈走诸方不认昭昭灵灵作自己伏请如云出岫似月印潭放下鉢袋
衣囊打起斋鱼粥鼓直到佛祖不知处犹是半涂且向父母未生前试道一句

福州请圣泉穎老疏

少室玄机阳岐正脉最端的处只要言下承当有多少人尽向面前蹉过某人谈锋峻峭心地
圓明当初向竹篋子头偶然筑着磕着而今踞宝华王座选甚胡来汉来便须拈起钳鎚打开
窠臼以铁酸醪普供大衆与木上座同演宗风钟鼓铿鍠旛幢炳焕岂惟流辈知不由兔径之
高要使师翁发撞破烟楼之叹

能仁请昕老疏

视世如庵摩勒果虽外物之本轻说法如优鉢昙华要应时而出久已名行於海内岂容身
隱於云根敬虚金布之园往致空飞之锡某人材高龙象辯震雷霆潜闽岭者十年遇寒岩而
一笑始初叹赏明窗下特地安排最後殷懃鉢帋子亲自分付幸念先师之遗语亟为故人而
远来要传无尽灯当观第一义

雍熙请最老疏

山陰道中万壑水依旧潺湲云门寺里一炉香久成寂寞忽於旁邑得此高人某人立雪饱参
隔江大悟通威音以前消息蹋毗卢向上机关血指汗顏诸方不供一笑抟风击水万里始自
今朝岂惟续且庵家传更喜得可斋道伴

乡士请妙相讲主疏

杂华设教犹日照山大士应缘如云出岫某人英姿迈往雋辯絕伦早集布金之园久造笑云
之室伏望俯从衆志来继道场且要於谈笑间取上方香积之饭然後以神通力成夜摩覩史
之宫

千秋观修造饭

一曲澄湖千秋古观琼楼玉宇正须月斧之修蕊笈琅函未极云章之奉至於杰阁翬飞於天
半长桥虹卧於波心皆拟繕营用成絕胜况丞相肇新於真馆与邦人仰禱於帝龄覆载之间
共陶化日发肤之外皆是圣恩愿垂不朽之名更效无疆之祝

光孝请廓老疏

孤峰顶上一口吞三世如来七里濂边只手接十方衲子既是随缘自在便须信手承当某人
号真作家有大力量拈起拂子且与陆大夫同举宗风放下鉢囊不妨陈尊宿暂为隣舍

雍熙请机老疏

诸方到处只解抱不哭孩儿好汉出来须会打无面餠飴举起一枝拂子勘破四海禪和某人
心地超然谈鋒?甚最初游历倒却门前刹竿末後承当分付先师鉢袋十年涵养一旦阐扬请
木上座作先驰拈铁酸赚施大衆鲸钟鼉鼓无非涂毒家风萝月谿云尽是放翁供养

雍熙请锡老疏

瞿唐峡湫湏堆万里不生寸草若耶谿云门寺三人即是鼓林要看云居锡上座点检诸方须

与宣城陆大人激扬此事某人得来孤峻用处纵横巍巍堂堂洒洒落落半月嵩戴起簪子好
泉亭脱下草屨水宿山行平日只成露布刀耕火种从今别是生涯

求僧疏

掀禅床拗拄杖虽属具眼厮儿搭袈裟展鉢盂却要护身符子伏望尊官长者达士通人共燃
续慧命灯不惜判虚空笔起难遭想结最胜缘向僧堂前喝参幸离俗谛以比丘身得度敢负
厚恩

又

佛有八万四千法门出家最胜僧受二百五十戒利物无边方今云门诸山莫如净智一境
必度优婆塞俾成比丘僧巍巍堂堂聿观龙象之衆雍雍肃肃不媿旃檀之林悦许结缘垂淑
笔

紫霄宫女童徐居庆求披戴疏

云山栖隐虽从金门羽客之游冠佩焚修尚欠白水真人之力敢输微恳仰叩高闳伏望推博
施之心植衆妙之本仙槎乞得支机石既遇有缘天风飘下步?声是为报德

成都大圣慈寺念经院僧法慧为行者雷印定求度牒疏

拈华会上正法眼虽是自明割草殿前护身符少伊不得故乡踰八千里路空手要七十万钱
欲办大缘莫嫌俗气从此鉢盂两度湿受赐不赀忽然平地一声雷酬恩有在

雍熙请伦老疏

修竹茂林久作兰亭之客青屨布鞵忽寻秦望之盟此有宿因宁容力避某人渡河香象跋浪
长鲸初得法於室中耳聋三日晚抽身於林下壁观九年道价虽高世缘未契方公言之共叹
亦胜地之将兴百草头祖师本来知见一毫端宝刹今日神通但办肯心必无难事

梁氏子求僧疏

名家有千里驹本意折一枝桂忽厌鲁章甫拟着僧伽黎可谓人英堪承佛种长者若能成就
放翁为作证明

孙余庆求披戴疏

孤云埜鹤山林自属闲身布袜青屨巾褐本来外物伏念心久游於尘外迹尚寄於人间傅翕

虽然头戴道冠王恭终要身披鹤氅直须白水真人力共了青谿道士缘

陶山庵行者求化度牒疏

昔於如来所发心盖非一世今以比丘身得度夫岂小缘况贞白先生昇僊之区实文昌左辖植福之地遍投信施庶获圆成七条九条二十五条傥无魔障一佛二佛百千亿万佛当共证明

傅妙龢求僧疏

四十劫前记作佛已定出家百尺竿头坐底人正须进步兹述悽悽之请敬趋赫赫之门伏望王公大臣长者居士挥云烟於纸上运财宝於库中出现优鉢昙花成就僧伽黎相十方诸佛同声赞可谓胜缘一日鉢盂两度开敢忘大施

叶可忻求僧疏

七宝布施作福止属有为一人发心归源方名大事非赖贤豪之助曷弘清淨之缘所冀见闻各怀喜舍续佛寿命成苾刍不坏之身为国焚修効芥石无疆之祝

镇江谒诸庙文

某以隆兴改元夏五月癸巳自西府掾出佐京口明年春二月己卯至郡洪惟上恩不可量数敢不夙夜祇惕图称所蒙区区之心神其监之

祭富池神文

某去国八年浮家万里徒慕古人之大节每遭天下之至穷登揽江山徘徊祠宇九原孰起孤涕无从虽薄奠之不丰冀英魂之来举

福建谒诸庙文

某闻聪明正直神之所以为神也靖共尔位好是正直吏之所以事神也一戾於此神且殛之其何福之敢望某蒙恩出使一道告至之始祇栗於祠下

福州城隍昭利东岳庙祈雨文【代】

闽之风俗祭祀报祈比他郡国最谨以故祠庙之盛甲於四方斧斤丹堊靡有遗巧重门杰阁焕然相望则神之所以福其人者亦宜与他郡国异而自夏迄秋骄阳为害水泉浅涸草木焦卷多稼弥野将茂而槁夫幽显之际虽远然岂有享其奉而不恤其害者惟神聪明宜动心焉

福州谢雨文【代】

吏受命天子牧养百姓神受命上帝保卫一方其责则均然而祠宇貌像孰与府寺之雄牺牲醪币孰与廩饩之厚巫覡尸祝孰与官属之盛吏隋政纪无以格丰年之祥不自责而望神宜拒而弗享矣区区之祷曾未信宿云兴东山之麓雨被千里之内雷发而不怒风行而不疾祁祁霖霖如哺如乳起视四野莫不沾足愁叹之声变为欢谣呜呼吏之愧於神多矣酒冽牲肥乐歌送迎匪报也以识吏之愧也

福州準赦祷诸庙文【代】

乙未诏书慈宁殿服药敷大有於四方分命郡国祷山川神示之在典祀者惟神受职钦承上意

福州欧冶池龙鰾谿河口五龙庙祈雨祝文【代】

繚垣閼宇瀦水灌木窈然而幽陰者龙之神也升天御云济世泽物霈然而成功者龙之仁者也聪明正直有祷必应者又其所以食於民也历时不雨粢盛将害则龙亦何心视民之穷如越人之视秦也变化呼吸转灾为丰在龙之力其易如指之屈伸也牺牲醪币吏之所以报龙者其敢怠而弗亲也

福州闽王闽忠懿王祈雨祝文【代】

维神之生御灾扞患有功德於此邦之人没而祀之非独父老子弟不忘神之功德意者神亦眷眷於此邦没而不已也历时不雨稼穡将害吏虽不言神其忍安视弗拯邪虽然敢不以告

严州谒诸庙文

新定为郡地陋民贫而回禄冯夷数见谴告布邑萧然至今未复某蒙恩来守是邦宜知所报如或黷货以厉民淫刑以饰怒事燕游以废政纳请谒以挠法是宜即罪於有神死不敢悔使其能羸践今兹之言则神亦宜哀矜之调节雨阳驱逐疠疫使与吏民仰戴明神之休牲酒鼓歌以时来报岂不幽显各得其职哉

谒大成殿文

某闻之夫子曰言不忠信行不笃敬虽州里行乎哉某家世山陰被命来守不三舍而至殆与古之仕於其国者无以异然一於忠敬有所不力则吏与民且合其智诈浇浮以欺其守岂不殆哉视事之始歟谒先圣先师非独以令甲也敢告夙夜祇惧之意

谒社稷神文

某蒙上恩来守新定邦虽小有社稷焉其敢不恪以获戾於神敬以到郡之三日周视坛壝

严州秋祭祝文

秋有祀国之典也筮日之良爰举祀事牲酒乐歌靡敢不饬惟尔有神来格来歆惠我吏民神亦永飨典祀

严州祈雨祝文

新定为郡介於谿山之间雨阳少愆辄能病稼戊申水溢方祷於神会未再旬复以旱告吏政无以格陰阳之和而惟神之渎羣趋庙庭仆仆亟拜神固不以吏罪而弃斯民吏独无愧於神乎尚力厥事以盖兹媿神其监临之

又

甲辰诏旨以闵雨命郡守致祷惟神受职钦承上命

又

某被命来守幸及终更不敢以去郡有期怠荒厥事屏逐?吏慰安疲民稽於幽明傥追咎责而嘉谷方秀时雨未渥维神正直宜监於兹敢列忱辞恭俟嘉泽

严州马目山祈雨祝文

维神有祠兹山尚矣唐刺史韩泰以祷雨获应载新庙貌今又四百余年而未列命祀无以慰父老祝史之心今兹旱势已极某虽愚蒙恩假守得以专达於朝敢与尔神期以三日甘泽沾足槁苗复兴当列奏乞封以侈神之威灵顾以守郡不获亲行谨遣廸功郎建德县主簿汪仲仪即事祠下而某帅郡僚望拜於军门俛以俟命

又

考於图志得神之威灵而致祷焉既累日矣诚弗能格虽间得小雨地不及濡尘不及歛而赫日复出矣然父老之言以为比夕云物多起神之祠傍意者神哀悯斯民终有以活之也敢复以请悽悽之诚神尚鉴之

严州祈晴祝文

雨势未止溪流?溢民庐官寺仓库狱户皆有意外之忧惟神聪明亟俾开霁约束涨水以时返壑某与吏民其敢忘报

严州谢雪祝文

四时冬为元英闾里母虞於疠疫平地尺为大雪麦禾预卜於丰穰敢忘薄荐之陈少畚明神之赐尚祈孚佑永保安宁

严州久雪祈晴祝文

雪虽嘉瑞过则为灾春气未和民屡告病郡政乖刺惟神之归尚祈兴哀以卒大赐牲酒之报其敢弗？

严州广济庙祈雨祝文

不雨且再旬矣井泉涸竭蔬菽告病闾巷讲救焚之备郡庭决争汲之讼秋阳益炽疾疠将作吏虽愚犹知恐惧岂神之聪明而忘之乎出云兴雨以一洗之神之德於斯民岂有既哉

严州谢雨祝文

比承诏旨致祷灵祠果遂感通沛然甘泽敢涓吉日祇报灵休

严州戊申谢蚕麦祝文

乃者蚕老而未茧麦秋而未获天作霪雨将害於成惟神降康陰沴消弭牲登於俎酒湛於觴维以荐诚匪敢言报

渭南文集卷二十四

卷二十五

钦定四库全书

渭南文集卷二十五

宋 陆游 撰

夔州劝农文

仰惟天子临遣牧守每以务农劝课之指丁宁训敕虽遐陬僻邑如在畿甸惟惧一谷之不登一夫之失职也硃中之郡夔为大其於奉明诏以倡属郡慰齐民者尤不敢不勉继自今不纵掊克不长鬻讼不伤尔力不夺尔时尔父兄子弟其亦恭承天地惠泽毋为隋游毋怠东作毋怠收敛毋嫚盖藏勤以殖产俭以足用有司与民交致其爱使公私之蓄日以富饶无貽朝廷宵旰之忧岂不韪哉

丁未严州劝农文

盖闻农为四民之本食居八政之先丰歉无常当有储蓄吾民生逢圣世百谷顺成仰事俯育各遂其性太守幸得以礼逊相与从事於此故延见高年劳问劝课致诚意以感衆心非特应法令为文具而已今兹土膏方动东作维时汝其语子若孙无事未作无好终讼深 广耜力耕疾耘安丰年而忧歉岁太守亦当寛期会简追胥戒兴作节燕游与吾民共享无事之乐而为後日之备岂不美哉

戊申严州劝农文

盖闻为政之术务农为先使衣食之麤充则刑辟之自省当职自蒙朝命来剖郡符虽诚心未格於丰穰然拙政每存於抚字觴酒豆肉曷尝妄蠹於邦财铢漆寸丝不敢辄营於私利所冀追胥弗扰垦辟以时春耕夏耘仰事俯育服劳南亩各终薰蓂之功无犯有司共乐舒长之日今者土膏既动穡事将与敢延见於耆年用布宣於圣泽清心省事固守令之当为旷土游民亦父兄之可耻归相告戒恪务遵承上以寛当宁之忧忧下以成提封之美俗

书通监後

司马丞相曰天地所生财货百物止有此数不在民则在官其说辩矣理则不如是也自古财货不在民又不在官者何可胜数或在权臣或在贵戚近习或在强藩大将或在兼并或在老释方是时也上则府库殫乏下则民力穷悴自非治世何代无之若能尽去数者之弊守之以悠久持之以节俭何止不加赋而上用足哉虽捐赋以予民吾知无不足之患矣彼桑弘羊辈何足以知之然遂以为无此理则亦非也

又

周世宗既服江南諭使修守备通监以为近於大邦畏其力小邦怀其德是比之文王也方是时世宗将有事於燕晋其谋以为若南方有变虽不能为大害然北伐之师势亦不得不还故先思有以安江南之心又疲其力於大役使不得动比北伐成功江南折简可致矣此世宗本谋也遽谓之近於文王岂不过哉然世宗之谋则诚奇谋也盖先取淮南去腹心之患不棄胜取吴蜀楚粤而举胜兵以取幽州使幽州遂平四方何足定哉甫得三关而以疾归则天也其後中国先取蜀南粤江南吴越太原最後取幽州则兵已弊於四方而幽州之功卒不成故虽得诸国而中国之势终弱然後知世宗之本谋为善也

书贾充传後

言一也情则三也其惟论兵乎自古惟用兵最多异论以其有是三者也祸机乱萌伏於隱微人知兵之利不知有害有识者焉逆见而力止之王猛之於秦是也投机之会转盼已移而常人闇於事机私忧过计冯道之於周是也猛固贤矣道虽闇犹有忧国之心焉至於贾充当晋武时力沮伐吴之举至请斩张华则何说哉自汉之季百数十年间庸人习见南北分裂谓为故常赤壁之役以魏武之雄乘破竹之势而大败涂地终身不敢南乡充之心盖窃料吴未可下因为先事之言以徼後日之福而不料天下之遂一也要之战危事也以舜为君禹出师不能一举而定三苗以唐太宗自将李积在行不能遂平区区之高丽故为充之说者常有利焉此人臣之阴为身计者所以多出於此也冯道不足言矣王猛贾充之论所谓差毫厘而谬千里者可不察哉

书郭崇韬传後

後唐庄宗初得天下欲立爱姬刘氏为后而韩夫人正室也伊夫人位次在刘氏上庄宗虽出夷狄又承天下大乱礼乐崩坏之际然顾典礼人情亦难其事未知所出羣臣虽往往阿諛亡学术然亦无敢当其议者豆卢革为相郭崇韬为枢密使崇韬功高迹危思为自安计而革庸懦无所为惟谄崇韬以自安因相与上章言刘氏当立於是庄宗遂立刘氏为后刘氏既立黷货蠹政残贱忠良天下遂大乱庄宗以弑崩李氏之子孙殲焉呜呼革不足言矣崇韬佐命大臣忠劳为一时冠其请立刘氏非有他心也只不过为天子所宠昵而自结焉将赖其助以少安而已然唐之亡实由刘氏是亡唐者崇韬也後唐之先皆有勲劳於帝室晋王克用百战以建王业庄宗因之遂有天下同光之初海内震动几可指麾而定矣而崇韬顾区区之私引刘氏以覆其社稷而灭其後嗣宗庙之灵其肯赦之乎崇韬卒以尽忠赤其族革亦无罪诛死岂不天哉昔唐高宗欲立武昭仪为后大臣褚遂良等力争以为不可者皆得祸独李积劝成之穷极富贵而死自谓得计矣及武氏得志唐高祖太宗之子孙诛戮几尽而积虽已死亦卒以孙敬业故发墓剖棺夷其宗族遂良等虽得祸不至此也天理之不可逃如此虽然岂独天理哉彼积与崇韬皆武夫烈士勇於报德乃以此心揣妇人以为自安之奇策安知妇人之性阴忤忍毒果於背德方其得志自肆若豺虎然岂复思得立之所自哉然则二人之祸虽微天理固有不可逃者矣悲夫

书安济法後

当安济坊法行时州县医工之良者憚於入坊越州有庸医曰林彪其技不售乃冒法代它医造安济今日傳容当来则林彪也明日丁资当来又林彪也又明日僧宁当来亦林彪也其治疾亦时効遂以起家然里巷卒不肯用比安济法罢林彪已为温饱家矣年八十余乃终开禧乙丑四月七日务观书

书空青集後

建中靖国元年景灵西宫成诏丞相曾公铭於碑以诏万世碑成天下传诵为宋大典且叹曾公耆老白首而笔力不少衰如此建炎後仇家尽斥曾公文章始行於世而独无此文或谓中更丧乱不复传矣淳熙七年某得曾公子宝文公遗文於临川然後知其宝文公代作盖上距建中八十年矣呜呼文章钜丽闳伟至此使得用於世代王言颂成功施之朝廷荐之郊庙孰能先之而终宝文公之世士大夫莫知也汪翰林平生故人及铭其墓惟曰始为家贤子弟中为时胜流晚为能吏是岂足以言公哉公家世固以文章名天下又自少时所交皆诸父客天下伟人出入试用亦数十年朋旧满朝犹世犹不尽知之如此况山林之士老於布衣所交不出闾巷其埋没不耀抱材器以死者可胜数哉可胜叹哉九月十九日山阴陆某书

书浮屠事

浮屠师宗杲宛陵人法一汴人相与为友资皆豪杰负气好游出入市里自若已乃折节同师蜀僧克勤相与磨礪浸灌至忘寝食遇中原乱同舟下汴杲数视其笠一怪之伺杲起去亟视笠中果有一金钗取投水中杲还亡金色颇动一叱之曰吾期汝了生死乃为一金动邪吾已投之水矣杲起整衣作礼曰兄真宗杲师也交益密於虜世多诋浮屠者然今之士有如一之能规其友者乎藉有之有如杲之能受者乎公卿贵人谋进退於其客客之贤者不敢对其不肖者则劝之进公卿亦以适中其意而喜谋於子弟亦然一旦既祸其客其子弟则曰使吾公早退可不至是而公卿亦叹曰向有一人劝吾退岂至是哉然亦晚矣

书渭桥事

中大夫贾若思宣和中知京兆栎阳县夏夜以事行三十里至渭桥夜漏欲尽忽见二三百人驰道上车幘鲜华最後车骑旌旄传呼甚盛若思遽下马避於道傍民家且使从吏询之则曰使者来按视都城基汉唐故城王气已尽当求生地此十里内已得之而水泉不壮今又舍之矣语毕驰去如飞时方承平若思大骇明日还县亟使人访诸府则初无是事也若思河朔人自栎阳从蔡靖辟为燕山安抚司管勾机宜文字靖康中自燕遯归入尚书省为司封郎而卒陆某曰河渭之间奥区沃楚周秦汉唐之遗迹隐鳞故在自唐昭宗东迁废不都者三百年矣山川之气郁而不发艺祖高宗皆尝慨然有意焉而羣臣莫克奉承予得此事於若思之孙逸祖岂关中将复为帝宅乎夷暴中原积六七十年腥闻於天王师一出中原豪杰必将响应决策入关定万世之业兹其时矣予老病垂死惧不获见故私识若思事以示同志安知士无脱

挽辂以进说者乎

书包明事

包明者不知其乡里少为兵事汤岐公自枢密至左相明常在府绍兴末岐公以御史论罢故例一府之人皆罢遇拜执政则往事焉久之御史中丞汪公澈拜参知政事一府皆往汪公盖前日劾岐公者也於是明独不肯往曰是尝论击吾公者持何面目事之虽妻子饥寒不之顾未几以病死方岐公贵时所荐达士大夫多矣至其失势不反嚙以媚权门者几人且岐公平日待明非有异於衆人也汪公之拜一府俱往非独明也明而往事汪公非有负也泥涂贱隶又非清议所及而其自信毅然不移如此盖有古烈士之风矣书其始末使读者有感焉

书神僊近事

昔道士侯道华喜读书或问其意荅曰天上无凡俗神僊後果腾举而去吕洞宾陈抟贺元施肩吾皆本书生近岁有譙定雍孝闵尹天民亦皆以儒士得道定今百二十余岁故在青城山中采药道人有见之者读易尚不辍也孝闵或自称木先生往来沔鄂间天民客青城储福宫一日大骂所与往来道士即闭门睡道士明旦相率谢之而门不啓坏壁视之危坐死矣方相与惊叹俄失所在此三人者皆显人故其事传间巷山泽之士名迹湮晦本不为人知者又可悉数哉予从子慧绰为浮屠为予言豫章西山香城寺之傍有桡人身被緑毛每雨霁多坐石上暴日见人辄避去追之不可及有识者曰此马祖弟子亮座主者乃知长生久视之道人人可以得之初不必老氏之徒也因书置座右以自励云

书屠觉笔

建炎绍兴之间有笔工屠希者暴得名是时大驾在宋都在广陵又南渡幸会稽钱塘希尝从驾自天子公卿朝士四方士大夫皆贵希笔一筒至千钱下此不可得晁侍读以道作诗称誉之有吴先生师中字茂先得其笔以一与先少师希之技诚絶人入手即熟作万字不少败莫能及者後七十余年予得其孙屠觉笔财价百钱入手亦熟可喜然不二百字败矣或谓觉利於易财而速售是不然价既日削矣易败则人竞趋它工觉固不为书者计独不自为计乎乃书希事庶觉或见之

书二公事

郑价夫名侠以刚直名天下晚居福清自号一拂居士布衣粝食而杂植华木於舍傍觴咏自适客至必与饮食不过五爵蔬果之外一肉而已遇贫士过者亦薄赈之止於千钱饮具皆白鑱或遗以银盃辞不取好强客奕碁有辞不能者则留使旁观而自以左右手对局左白右黑精思如真敌白胜则左手斟酒右手引满黑胜反是如是几二十年如一日谢昌国名谔尝闻道於颐正郭先生居临江名其庐曰艮斋晨兴烹豆腐菜羹一釜偶有肉则缕切投其中客至亦不问何人辄美食有贫士及医卜之类饭已辄语之曰吾无钱予君岂欲诗乎取幅纸作絶

句贈之以为常二公皆予所乡慕也予贫甚欲学介夫办五盃千钱亦复未易又不解奕碁或可力贫学昌国耳书之座右当徐图之绍熙之元十二月八日九曲老樵书

渭南文集卷二十五

卷二十六

钦定四库全书

渭南文集卷二十六

宋 陆游 撰

真庙赐冯侍中诗

某家藏藏孝严殿绘像先正侍中冯公在焉冠剑伟然与太行黄河气象相埒每稽首叹首侍中辅相两朝更天下大变而社稷尊安夷狄讐服鉏耰万里无犬吠之警有以也夫晚待罪新定公之孙頎出示章圣皇帝赐诗又以想见一时盛事恨不生其时俯伏沙堤旁窥望风采云

高宗圣政草

某被命修光尧皇帝圣政草勑凡例网罗放逸虽寢食间未尝置也然不敢以稿留私篋暇日偶追记得此命儿辈録之隆兴二年十月一日左通直郎通判镇江军府事陆某记

高宗赐赵延康御书

右知金坛县赵君师?録高宗赐其大父延康公书及延康移伪楚书共为一编以示史官陆某某曰延康在宣和靖康间声望风采震曜一时及守宛丘百战御狂寇卒全其城视唐代张巡许远顔真卿皆过之来朝行在高皇盖欲以左辖命之议者谓宗室辅政非故事遂止方公之南徙也谢表有云臣本支百世侍从三朝又云坚壁以保近畿慨前功之俱废登坛而陪盛礼怀曩遇以自怜读者悲之某又尝於公从孙师严有翼家见公建炎奏议稿一编皆人所至虽言者不知此稿皆在监堂集中否或可访於有翼院中以补逸遗敢并以告嘉泰癸亥岁三月丙申臣某谨识

高皇御书二

臣某少时与胡尚书之子杞同学於云门山中见高皇帝赐尚书御题扇曰文物多师古朝廷半老儒盖黄体也与此手诏絶相类後数年蒙收召得面天顔距今四十四年矣伏读霑涕不知所云嘉泰癸亥五月一日史官臣陆某谨题

又

臣某伏觀高皇帝御天下几三十年进用谏官御史皆出圣选故往往躡至相辅其不合者犹为侍从乃去如施公财任遗补即出守小郡盖无几人则其犯顔拂指不挠於权幸可以想见

而上之知人受尽言有仁祖用范仲淹唐介之风矣惜乎施公遽逝去不及召用於虜悲夫开禧乙丑九月一日故史官陆某谨书

今上皇帝赐包道成御书崇道庵额

开禧某年某月甲子皇帝亲御翰墨书崇道庵三字赐妙行先生臣包道成以示故史官臣陆某将刻之石具载岁月及被赐之由示天下後世臣某窃闻臣道成实晋陵人少学黄老之说以劬身济衆为事寓迹都城三十余年筑堂以居凡以黄冠褐衣至者靡不馆之往来千人盖尝有神僊异人混於衆中道成独默识之而不言会稽光孝观故名乾明天圣间章献明肃皇后遣中使筑之久坏不葺道成谈笑复其旧凡都城桥梁道路皆力治之费至缗钱百余万建东岳庙吴山上即成又即其傍筑室以奉真武又江右湖气象雄丽而道院屹立于庑外钟磬步虚之声在云霄间都人为之心骇神竦於是皇帝闻而异之故有扁榜之赐臣某犬马之年駸駸九十获在圣主仁壽域中且尝获紬绎三朝金匱石室之藏今虽耄犹幸未病废得以纪稀濶盛事岂非幸哉开禧二年岁在丙寅三月某日太中大夫充宝谟阁待制致仕山阴县开国子食邑五百户赐紫金鱼袋臣陆某昧死稽首再拜谨书

跋尹耕师书刘随州集

佣书人韩文持束纸支头而睡偶取视之刘随州集也乃以百钱易之手加装褫绍兴二十五年正月八日陆某记

尹耘师耕乡里前辈与九伯父及先君游此集盖其手抄云绍熙元年七月望某再跋

跋唐御览诗

右唐御览诗一卷凡三十人二百八十九首元和学士令狐楚所集也按卢纶墓碑云元和中章武皇帝命侍臣采诗第名家得三百一十篇公之章句奏御者居十之一今御览所载纶诗正三十二篇所谓居十之一者也据此则御览为唐旧书不疑然碑云三百一十篇而此才二百八十九首盖散逸多矣姑按定讹谬以俟完本御览一名唐新诗一名选集一名元和御览云绍兴乙亥十一月八日吴郡陆某记

跋文武两朝献替记

学者当以经纶天下自期此书不可不见也但传本缪误几不容读以它书寻绎之十得四五云绍兴丙子腊日务观题

跋杲禅师蒙泉铭

右妙喜禅师为良上人所作蒙泉铭一首往予尝晨过郑禹功博士坐有僧焉予年少气豪值

据上坐时方大雪寒甚因从禹功索酒连引径醉禹功指僧语予曰此妙喜也予亦不辞谢方说诗论兵旁若无人妙喜遂去其後数年予老於忧患志气摧落念昔之狂痛自悔责然犹冀一见作礼懺悔孰知此老遂弃世而去邪虽然良公盖一世明眼衲子不知予当时是即今是试为下一转语隆兴改元十一月五日笠泽渔隐陆某书

跋修心监

右高祖太傅公修心监一篇初公生七年家贫未就学忽自作语有神僊语观者惊焉晚自号朝隐子尝退朝见异人行空中足去地三尺许邀与俱归则古僊人嵩山栖真施先生肩吾也因受链丹辟谷之术尸解而去然其术秘不传今惟此书尚存某既刻版传世并以七岁吟及自赞附卷末庶几志方外之士读之有所发焉亦公之遗意也隆兴二年七月二日元孙某谨书

跋邵公济诗

先子入蜀时与邵子文遇於长安同游兴庆池有诗倡酬相得驩甚夜读公济诗超然高逸恨未尝得讲世旧与文盟也乾道元年五月十八日笠泽渔隐陆某书

跋坐忘论

司马子微师体玄先生潘师正体玄师昇玄先生王远知昇玄师贞白先生华阳隐居陶弘景故体玄语子微曰吾得隐居正一法逮汝四世矣乾道二年天庆节借玉隆藏室本传渔隐子手记

跋查元章书

李份事士大夫谨以故得书帖多不可数然閤其书至不敢与他札偕藏者元章吏部一人而已份一吏耳知敬元章如此岂知元章仕於朝既不容去而居幙府又不容自引於数千里外赤甲白盐之间乃少安呜呼亦可叹也夫丙戌上元後三日渔隐书

跋高象先金丹歌

右玉隆万壽观本序言有注解而不传亦不知序者为何人也丙戌二月八日务观书

又

国初有高象先淳化中为三司户部副使少从戚同文学与宗度许让陈象舆郭成范王砺膝涉齐名不言其所终亦不知其乡里恐即此人然序言名先字象先又似别一人神仙隐显不可必知聊记之耳辛亥炊熟日书

跋天隱子

最後易簡漸門二說非天隱子本語他日錄本當去之丙戌三月中休傳本於玉隆萬壽宮漁隱

東坡先生以為天隱子真司馬子微所著也傳本後二十五年紹熙庚戌冬至日書

跋造化權輿

先楚公著埤雅多引是書然未之見也乾道三年 夏十八日傳自玉隆藏室甫里陸某謹題

跋老子道德古文

右漢嚴君平著道德經指歸古文此經自唐開元以來獨傳明皇帝所解故諸家盡廢今世惟此本及貞觀中太史令傅奕所校者尚傳而學者亦罕見也予求之踰二十年乃盡得之玉笈藏道書二千卷以此為首漁隱陸某題乾道二年十月十日

跋卍庵語

乾道庚寅十月入蜀舟過公安二聖見祖珠長老得此書珠自言南平軍人得法於卍庵云

跋武威先生語錄

丰清敏公為中執法論事上前曰司馬光呂公著皆忠賢何為引赦復官赦當及有罪耳無罪何赦也徽祖曰光等變先帝法度非罪乎清敏公頓首曰誠當變無可罪者方元符建中中間衆正畢集於朝天下喁喁相望太平清敏公與陳忠肅公俱極諫官御史之選而所以言則有婉直之異吾先大父楚公每以為二公之論皆不可廢蓋忠肅似孟子說齊而清敏似伯夷諫周其歸一也今觀武威先生之論又甚似清敏百世之下志士仁人得此書讀之當有太息流涕者矣乾隆七年立秋日山陰陸某書

跋關公作行記

著作關公出使夾中風采峻甚仕者人人震栗莫敢仰視某以孤生起輿籍萬里佐州淺闇滯拙自期且汰去而關公獨厚遇之舉酒賦詩談台閣舊事忘其位之重也公免歸之明年某以事至卧龍山咸平寺長老惠璉言公往有行記今將刻之石因屬某書其末某曰方關公之門可炙手時此書伏不出今公歸卧青城山中賓客解散形勢一變而璉方刻其書為不朽計嗟乎足以愧士大夫矣乾道七年七月七日左奉議郎通判夔州軍州主管學事陸某謹識

跋司馬子微餌松菊法

乾道初予见异人於豫章西山得司马子微饵松菊法文字古奥非妄庸所能附托八年又得别本於蜀青城山之丈人观斋戒手授传之同志十二月六日笠泽渔翁陆务观书於玉华楼

跋周茂叔通书

濂谿之生也世但以佳士许之耳既死蒲左辖作志黄太史作诗其称述亦不过如此向使无二程先生後世岂知濂谿为大儒传圣人之道者邪以此知士之埋没无闻者何可胜计乾道壬辰十二月十五日成都驿南窗书

跋岑嘉州诗集

予自少时絶好岑嘉州诗往在山中每醉归倚胡床睡辄令儿曹诵之至酒醒或睡熟乃已尝以为太白子美之後一人而已今年自唐安别驾来掇犍为既画公像斋壁又杂取世所传公遗诗八十余篇刻之以传知诗律者不独备此邦故事亦平生素意也乾道癸巳八月三日山阴陆某务观题

跋二贤像

右孟贞曜欧阳率更二像皆唐人笔墨北湖者吴则礼子傳也无悔者刘焘无言也最後实先君会稽公茶山先生曾文清公书万里羈旅不自意全抚卷流涕乾道九年九月既望刻石置汉嘉月榭上山阴陆某识

跋山谷先生三荣集

予集黄帖得赠元师及王周彦三诗甚爱之有黄淑者家三荣见而笑曰绍兴中再刻本也旧石方党禁时已磨毁矣乃出此卷曰是旧石本其笔力精劲盖如此因录藏之淳熙之元二月二日务观书

跋砚录香法

砚录旧有本而亡之香法盖未之见师房者济南卫昂也娶婆娑先生崔德符女晚官巴硤死焉乾道辛卯冬予得此编於巫山县师房手钞也已腐败不可读乃录藏之後三年淳熙之元二月三十日蜀州漱玉南窗务观书

跋唐修撰手简

某之曾外大父质肃唐公守并州故给事中吕公实为幙客质肃为人方严少许可或面折人临川王和甫同时在幙中每言见唐公退辄汗满握然遇吕公特欢他客莫敢望也淳熙元年某在蜀州得质肃仲子修撰公与给事手帖读之盖元佑初修撰使河北给事为御史时也书

论黄河市易辞指激烈无一语及其私与世俗责报父客至有违父者何其远哉修撰字君益元佑中建议弃渠阳城绍圣初坐贬团练副使元符建中之间起守许昌方治事得报召蔡京抚案愤咤即日疽发背卒某不及拜公而先夫人为言公大节如此敢并记之以遗给事之孙教授君云七月二十三日山阴陆某谨书

跋蔡君谟帖

近岁苏黄米芾书盛行前辈如李西台宋宣献蔡君谟苏才翁兄弟书皆废此两轴君谟真行草隶皆备石在仙井可宝也淳熙元年九月八日蜀州手装

跋瘞鹤铭

瘞鹤铭予亲至焦山摹之止有此耳残璋断玦当以真为贵岂在多邪淳熙之元九月一日蜀州重装

跋西岷酬唱集

通直郎张玠河阳人吕汲公家外甥藏书甚富淳熙二年正月八日夜读此集灯架忽仆坏书时传毕方一日岂欧尹诸人亦有灵邪记之为异时一笑

跋历代陵名

三荣守送来近世士大夫所至喜刻书版而略不校讎错本书散满天下更误学者不如不刻之愈也可以一叹淳熙乙未立冬可斋书

跋温庭筠诗集

先君旧藏此集以华清宫诗冠篇首其中有早行诗所谓鸡声茅店月人迹板桥霜者久已坠失得此集於蜀中则不复见早行诗矣感叹不能自己淳熙丙申重阳日某识

跋王君仪待制易说

王公易学虽出於葆光张先生然得於心者多矣建炎间敌骑在钱塘明越俱陷王公端居於严曰敌决不至此且狼狈而归自此穷天地不复渡江矣其妙於易数盖如此淳熙丁酉元日山陆陆某书於锦官阁下

跋崔正言所书书法要诀

德符诗名一代书则未之见也观此编中字瘦健有神采亦类其诗乃知前辈未易以一技名

也戊戌重午务观书

跋後山居士诗话

谈鼓诗话皆可疑谈鼓尚恐少时所作诗话决非也意者後山尝有诗话而亡之妄人窃其名为此书耳後山二子丰登登过江为会稽曹官李邺降敌登亦被驱以北悲夫淳熙戊戌十月二十四日可斋

跋佛智与升老书

此一编佛智禅师与其法子寒岩升公书也议论超卓殆非世儒所及三复叹仰淳熙己亥三月九日建安双清堂书

跋古柏图

此图吾家旧藏予居成都七年屡至汉昭烈惠陵此柏在陵旁庙中忠武侯室之南所谓先主武侯同閤宫者与此略无小异则画工亦当时名手也淳熙六年龙集己亥六月一日陆某识

渭南文集卷二十六

<集部,别集类,南宋建炎至德佑,渭南文集>

卷二十七

钦定四库全书

渭南文集卷二十七

宋 陆游 撰

跋中和院东坡帖

此一卷皆苏仲虎尚书所藏鉴定精审无一帖可疑者者刻石在成都大圣慈寺中和胜相院
淳熙六年六月十七日陆务观题

跋汉隶

汉隶十四卷皆中原及吴蜀真刻淳熙己亥集於建安公署友人莆阳方士繇伯謩亲视装褙
故无一字差谬者六月二十一日山阴陆某书

跋晁百谷字叙

名者士所愿也而或惧太早何哉吾测之审矣少而得名我不能不矜人不能不忌以满假之
心来谗慝之口几何其不蹶也吾元归年甫二十笔力扛鼎不患无名患太早耳虽然□道方
力张其名而吾独欲其退避揜覆元归未必乐也异时出入朝廷更历世故会当思吾言也夫
淳熙庚子二月三日山阴陆某书

跋陵阳先生诗草

右陵阳先生韩子苍诗草一卷得之其孙籍先生诗擅天下然反覆涂乙又历疏语所从来其
严如此可以为後辈法矣予闻先生诗成既以予人久或累月远或千里复追取更定无毫髮
恨迺止则此草亦未必皆定本也大歇庵诗一章徐师川作而先生手录之亦足见其无昔人
争名之病矣故附见卷中淳熙庚子四月二十二日笠泽陆某书

跋荆公诗

右荆公手书诗一卷前六首赠黄庆基後七首赠邓铸石刻皆在临川淳熙七年七月十七日
陆某谨题

跋续集验方

予家自唐丞相宣公在忠州时着陆氏集验方故家世喜方书予宦游四方所获亦以百计择其尤可传者号陆氏续集验方刻之江西仓司民为心斋淳熙庚子十一月望日吴郡陆某谨书

先左丞使辽语录

右先楚公使辽录一卷三十八伯父手书伯父自幼被疾以左手书然笔力清健如此平生凡钞书至数十百卷云淳熙八年四月五日某谨识

跋朝制要览

先君会稽公晚岁喜观此书间为子弟讲论因革率至夜分先君捐官舍三十有四年统得此於故庐伏读悲哽敬识卷末淳熙八年龙集辛丑十一月二十五日山陰陆某书

跋东坡问疾帖

东坡先生忧其亲党之疾委曲详尽如此则爱君忧国之际可知矣其曰勿使常医弄疾天下之至言读之使人感叹弥日淳熙九年五月乙未甫里陆某书

跋东坡诗草

东坡此诗云清吟杂梦寐得句旋已忘固已奇矣晚谪惠州复出一联云春江有佳句我醉堕渺莽则又加於少作一等近世诗人老而益严盖未有如东坡者也学者或以易心读之何哉淳熙九年五月二十六日玉局祠吏陆某书於镜湖下鸥亭

跋孙府君墓志铭

方五代割裂时自一郡一上非其国子弟则大将功臣也士大夫仕为令掾者已为达官钱氏土境尤蹙而孙公至专城盖其国显人也观杜公所述亦试有以得之矣淳熙壬寅立秋日甫里陆某

跋苏魏公百韵诗

右首一卷丞相魏公谢事归第且八十时所作也苏端明贺赵清献公得谢启云念平生之百为一无可恨某於魏公亦云淳熙壬寅立秋日吴郡陆某谨识

跋家藏造化权輿

右造化权輿六卷楚公旧藏有九伯父大观中显字淳熙壬寅得之故第废纸中用别本鈔校

而阙其不可知者两本俱通者亦具疏其下六月四日山阴陆某谨记後十有四年庆元元年八月十二日重校凡三日而毕时年七十一

跋三苏遗文

此书蜀郡吕商隐周辅所编

周辅入朝为史官得唐安守以归未至家暴卒可悲也淳熙十一年正月十一日陆务观识

跋兼山先生易说

郭立之从程先生游最久程先生病革犹与立之有问畚语着於语録而尹彦明独谓立之自党论起即与程先生絶死亦不吊祭盖爱憎之论也立之子雍字子和屏居峡中屡聘不起亦着易说得其家学盖程氏易学立之父子实传之淳熙甲辰二月三十日甫里陆务观云

後六年得谢昌国所赠颐正先生辨尹公说乃知予此言麤合也颐正即雍也已酉八月二十八日某书

跋郑虞任昭君曲

自张文潜下世乐府几絶吾友郑虞任作昭君曲如羊车春草空芊芊及重瞳光射搔头偏之类文潜殆不死也但愿夕烽长不惊甘泉妾身胜在君王前能道昭君意中事者淳熙甲辰三月二十三日甫里陆某书

跋傅正议至乐庵记

伏波将军困於壶头曳病足土室中以望夷贼左右哀之莫不为流涕定远侯在西域三十年年老思土上书自言愿生入玉门关键词指甚哀彼封侯富贵矣然戚戚无聊乃如此其他盈满脆脆畏祸忧诛愿为布衣不可得者又何可胜叹然则富贵果不如贫贱之乐邪曰此自富贵者言之耳贫贱之士仕则无路处则无食自非有道君子其忧又有甚者矣正议傅公在学校二十年声震京师同舍生去为公卿者袂相属而公始仅得一第既仕矣适时艰难妄男子往往起闾巷取美官公又弃不用则亦何自乐哉及读所作至乐庵记自道其胸中恢疎磊落所以乐而忘忧者文辞辩丽动人有列御寇庄周之遗风然後知公盖有道者或曰使天以富贵易公之乐公其许之乎予曰公所以处贫贱者则其所以处富贵也顔回之簞瓢周公之衮绣一也观斯文者盍以是求之淳熙十一年七月十一日山阴陆某识书

跋中兴间气集

高适字仲武此乃名仲武非适也评品多妄盖浅丈夫耳其书乃传至今天下事出於幸不幸固多如此可以叹淳熙甲辰八月二十九日放翁书

高适字仲武此集所谓高仲武乃别一人名仲武非适也议论凡鄙与近世宋百家诗中小序可相甲乙唐人深於诗者多而此等议论乃传至今事固有幸不幸也然所载多佳句亦不可以所托非其人而废之

跋斋驱集

此集刻版於宣和三年方是时党禁犹未解文字盖仅有见者故本多误然好事者冒法刻之亦奇矣淳熙甲辰重午日陆务观书

跋柳柳州集

此一卷集外文其中多後人妄取他人之文冒柳州之名者聊且裒类於此子京

右三十一字宋景文公手书藏其从孙最家然所谓集外文者今往往分入卷中矣淳熙乙巳五月十七日务观校毕

跋说苑

李德刍云馆中说苑二十卷而阙反质一卷曾巩乃分修文为上下以足二十卷後高丽进一卷遂足淳熙乙巳十月六日务观书

跋章氏辨诬錄

徽宗皇帝盛德大度自秦汉以来人主莫能及者尤在友爱蔡王寬貸章惇而史臣不能发明可为太息淳熙丙午十月望陆某谨题

跋钓台江公奏议

某乾道庚寅夏得此书於临安後十有七年蒙恩守桐庐访其家复得三表及赠告墓志因并刻之以致平生尊仰之意淳熙十三年十一月十有六日笠泽陆某书

先太傅遗像

先太傅皇佑中以吏部郎中直昭文馆自会稽移守新定期年请老得分司西京以归迨今百四十年而某自奉祠玉局起为是邦实继遗躅於是知建德县事苏君林以父老之请筑祠宇於兜率佛寺淳熙十四年春正月丙辰备车旗仪物大合乐奉遗像於祠且以公自赞道?羽服像刻之坚珉慰邦人无穷之思朝隐子盖公自号云元孙朝请大夫权知严州军州事陆某谨书

跋高康王墓志

王岐公文章閎丽有西汉风而宋常山公书法森严实传锺张古学方裕陵致孝宝慈极天下养故并命两公彰显高氏先王功烈以诏万世可以为宠光矣中更乱离而墨本宝藏如新殆有神物护持云淳熙十四年二月三日笠泽陆某谨识

跋半山集

右半山集二卷皆荆公晚归金陵後所作诗也丹阳陈辅之尝编纂刻本於金陵学舍今亡矣淳熙戊申上巳日笠泽陆某书

跋李深之论事集

唐丞相司空李公深之论事集有两本其一本七卷无序其一本一卷史官蒋偕作序然以序考之则偕所序盖七卷者也淳熙戊申四月十九日笠泽陆某识

跋李庄简公家书

李文参政罢政归乡里时某年二十年时时来访先君剧谈终日每言秦氏必曰咸阳愤切慨慷形於色辞一日平旦来笑饭谓先君曰闻赵相过岭悲忧出涕仆不然谪命下青鞵布襪行矣岂能作儿女态邪方言此时目如炬声如钟其英伟刚毅之气使人兴起後四十年偶读公家书虽徙海表气不少衰丁宁训戒之语皆足垂范百世犹想见其道青鞵布袜时也淳熙戊申五月己未笠泽陆某书

跋之罍先生藁

肩吾文忠公四世孙博学工文章与予盖莫逆也晚来行在诸公贵人颇知之欲引置要津有毁之者肩吾既不偶乃调桂阳令去客姑苏未系舟暴疾一夕死哀哉嘉父榘为人肩吾没後数年始以进士起家淳熙戊申秋社日放翁书

跋吴梦予诗编

山泽之气为云降而为雨勾者伸秀者实此云之见於用者也子尝见旱水之云乎嵯峨突兀起为奇峰足以悦人之目而不见於用此云之不幸也君子之学盖将尧舜其君民若乃放逐顛顛娛悲舒忧为风为骚文人之不幸也吾友吴梦予藁其歌诗数百篇於天下名卿贤大夫之主斯文盟者翕然叹誉之末以示余余愀然曰子之文其工可悲其不幸可吊年益老身益穷後世将曰是穷人之工於歌诗者计吾吴君之情亦岂乐受此名哉余请广其志曰穷当益坚老当益壮丈夫盖棺事始定君子之学尧舜其君民余之所望於朋友也娛悲舒忧为风为骚而已岂余之所望於朋友哉淳熙十五年十一月二十六日甫里陆某书

跋松陵集三

淳熙十六年四月二十六日车驾幸景灵宫予以礼部郎兼膳部检校赐公卿食讫事作假会陵阳韩籍寄此集来云东都旧本也欣然读之时寓瓢街巷街南小宅之南楼山阴陆某务观手识

此集蔡景繁旧物复尝归韩子苍子苍之孙籍以遗予盖百年前本也

景繁元丰中尝为开封推官此所题开封南司者是也景繁二子居厚居易此题居厚者其长也景繁临川人而韩子苍居临川故得此书务观手记

跋王仲言乞米诗

仲言贷米本自欲就鲁肃辈人而艮斋又戒以勿取陶胡奴米仲言治己可谓严而艮斋告之亦可谓忠矣数年来仲言以贫甚客长安中豪子资给殊厚今春忽舍去主人叩首乞少留不可岂独能践初言亦不负艮斋期待矣淳熙己酉四月二十七日陆某务观书

跋金奁集

飞卿南乡子八阙语意工妙殆可追配刘梦得竹枝信一时杰作也淳熙己酉立秋观於国史院直庐是日风雨桐叶满庭放翁书

跋韩非子

右韩非子一卷绍兴丁卯先君年六十时传吴棫才老本後四十有二年淳熙己酉某重装而藏之时年六十有五月九日史院东合手识

跋却扫编

此书之作敦立犹少年故大抵无绍兴以後事淳熙己酉十一月十四日书於仪曹直庐

跋彩选

绍兴甲戌七月三日子宅过此彩选毕景丙子二月五日同季思访务观云门山草堂复为此戏子宅记绍兴十九年正月十有七日友人王仲友父自京江来以是书为赠酴醾庵记

官制左右丞不为平章事自侍郎拜者皆躡迁尚书此书盖失之

子宅季思下世忽已数年予今年六十有七览此太息然予方从事金丹丹成长生不死直余

事耳後五百年过云门草堂故趾思昔作彩戏岂非梦邪绍熙元年上元日放翁书去子宅题字时三十年矣

跋陕西印章二

绍熙庚戌正月十九日夜閱故书得此追思在山南时已二十年同幙惟周元吉阎才元章德茂张季长及余五人尚亡恙尔拊卷累欷放翁题

又十有五年当嘉泰之四年岁在甲子因暴书再观则元吉才元德茂又皆物故数年矣季长在蜀累岁不得书存亡有不可知者而予年已八十感叹不已八月十六日务观书

跋诗藁

此予丙戌以前诗二十之一也及在严州再编又去十之九然此残藁终亦惜之乃以付子聿绍熙改元立夏日书

跋秘阁续帖张长史率意帖

此一帖在故签书枢密王伦家伦出使时得之故都予少日尝见之绍熙改元五月甲子甫里陆某识时年六十有六距初见时四十有五年矣

跋王深甫先生书简二

深甫先生以治平二年七月二十八日卒而此卷末畚其弟容季书是年六月一日相距无两月矣悲夫绍熙元年六月望陆某书

此书朝夕观之使人若居严师畏友之间不敢萌一毫不善意

跋郭德谊墓志铭

仲晦先生识郭公墓或恨其太简然吾夫子铭季札曰於虖有吴延陵季子之墓财十字耳至今传以为宝彼卖菜求益之论可付一叹绍熙二年正月二十三日陆某谨书

又

顏鲁公麻姑坛记东坡先生经藏记此有大字小字两本盖用羊叔子岷山故事千载之後陵谷变迁尚冀其一存尔德谊之名固自不朽然吾元晦为斯人计亦至矣岂希吕兄弟孝爱?至有以发之邪绍熙二年正月壬申笠泽陆某识

跋郭德谊书

予童子时尝避兵东阳山中距今六十年予长德谊三岁计其年可以相从而不及也观此遗墨为之太息绍熙二年正月二十三日笠泽老渔陆某谨书

渭南文集卷二十七

卷二十八

钦定四库全书

渭南文集卷二十八

宋 陆游 撰

跋後山居士长短句

唐末诗益卑而乐府词高古工妙庶几汉魏陈无已诗妙天下以其余作辞宜其工矣顾乃不然殆未易晓也绍熙二年正月二十四日雪中试朱元亨笔因书

跋苏氏易传

此本先君宣和中入蜀时所得也方禁苏氏学故谓之毗陵先生云绍熙辛亥七月二十日陆某识

跋资暇集

吾家旧有此本先左丞所藏书字简朴疑其来久矣首曰陇西李扈文济翁编扈字犹成文也久已沦坠忽尤延之寄刻本来为之怆然绍熙二年十一月二十九日陆某识

跋法帖

此本尝见之清劲可爱及移之石乃尔失真拙工误人如此乾符元年十一月乃改元此云三月何邪蔡君谟用?字颢字俱非是又何邪绍熙三载正月二十二日三山下沔亭书

又

鲁公书殊不类纸乃烟熏周副之语尤俚俗罗绍威用罗氏世宝印犯唐讳益可疑跋语诗句亦鄙甚也君谟岂至是哉惟钱希白字奇古可喜然非题顔帖乃翦它轴附卷後耳

跋兰亭乐毅论并赵岐王帖

某恭闻太宗皇帝天纵圣学跨?百王万几之余尤留神翰墨文昭武穆世受笔法有若岐简献王得稿书之妙盖其为学上稽三代两汉以象其高古下专以晋右将军王羲之为法以极其变化所藏鲁公作文王尊彝伯禽祀文王之器绍圣间诏取藏秘阁宣和博古图亦列於他周器上又政和中关中发地得竹简皆东汉讨羌书檄字作章草好事者争取而王独多获之则

王之穷深造微岂寒窶书生所及哉至兰亭修禊序乐毅论又王所爱玩天下名本王之於书名尊一代固无足异今周器汉札虽不可复见而修禊序乐毅论如鲁灵光岿然独存意有神物护持非适然也王遗墨藏家庙者今虽仅存某尝获观皆奇丽超絶动心骇目往时米芾於书少许可独推王以为能学古人语在芾作着书画史王之孙不流以从官长东诸侯惧书家不能尽见是奇蹟迺谏良工并刻乐石置会稽郡斋而属某书其後惟王历事累朝典司宗盟嘉言善行不可胜载文章尤长於诗有唐人余风此物论其书而已绍熙四年正月辛卯中奉大夫提举建宁府武夷山冲佑观山阴县开国男食邑三百户陆某谨书

跋蔡肩吾所作蘧府君墓志铭

蔡迨肩吾与予同官犍为郡文辞字画皆过人自蜀入吴持予书见友人许昌韩无咎无咎时为吏部侍郎荐之甚力且有除命矣蜀士有排之者肩吾遂从铨部得桂阳令行至吴门暴死舟中每念之未尝不流涕也不识肩吾者读此文亦足知其不凡矣蘧昌老字真度亦佳士盖与肩吾为方外友云绍熙癸丑立夏日笠泽陆务观书

跋原隶

故吏部郎宇文卷臣所着卷臣为郎数月坐口语亟去晚守临邛广汉有能名然亦以谤绌遂卒於家可哀也绍熙癸丑四月二十一日老学庵书

跋京本家语

本朝藏书之家独称李邯郸公宋常山公所蓄皆不减三万卷而宋书校讐尤为精详不幸两遭回禄之祸而方策扫地矣李氏书属靖康之变金人犯阙散亡皆尽收书之富独称江浙继而敌骑南鹜州县悉遭焚劫异时藏书之家百不存一纵有在者又皆零落不全予旧收此书得自京师中遭兵火之余一日於故篋中偶寻得之而虫齧鼠伤殆无全幅缀缉累日仅能成乃命工裁去四周所损者别以纸装背之遂成全书呜呼予老嬾日昏虽不复读然嗜书之心固未衰也後世子孙知此书得存之如此则其余诸书幸而存者为予宝惜之绍兴戊午十月七日双清堂书

後五十有七年复脱坏不可挟子聿亟装缉之持以相示方先少保书此时某年十四今七十矣不觉老泪之濡睫也绍熙甲寅闰月四日第三男中大夫某谨识

跋李徂徕集

中野去鲁归周三诗可以追嬾退之琴操而世不甚传使予得见李公当百拜师之不特愿为执鞭而已绍熙甲寅六月二日书

跋刘文老使君义居遗戒

祥符中天子封禪讲坠典以文太平诏求孝义之门於是天下以名闻者数十家远不过十世独吾乡裘承询自齐梁以来十九世如一日郡国莫先焉吾亡友刘文老歿当上一子世其祿而长子复辞以予其季盖文老所未尝命者於未尝命者如此况其所命者乎将见世世守遗训不坠十九世岂足道哉绍熙甲寅中秋日陆某识

跋无逸讲义

按实录元佑五年二月壬寅迺英阁讲毕无逸篇诏详录所讲以进今後具讲义次日别进壬寅是月七日也与此卷首所云面奏乞候讲毕录进乃不同恐当以此为正绍熙五年八月十日陆某谨识

跋东坡帖

此碑盖所谓横石小字者邪顷又尝见竖石本字亦不絶大数简行笔尤奇妙可贵与成都西楼十卷中所书郭熙山水诗颇相甲乙也绍熙甲寅十月二十三日务观题

跋东坡祭陈令举文

东坡前後集祭文凡四十首惟祭贤良陈公辞指最哀读之使人感叹流涕其言天人予夺之际虽若出愤激然士抱奇材絶识沉压摈废不得少出一二则其肝心凝为金石精气去为神明亦乌足怪彼愤愤者固不知也绍熙甲寅十二月二十九日笠泽陆某谨书

跋刘凝之陈令举骑牛图

公卿贵人方黄金络马传呼火城中时欲如二公骑牛山谷萧散遗物固不可得若予者仕既龃齬及斥归欲买一黄犍代步其费二万有畸作栏蓄童又在此外遂一笑而止徒有此生犹着几两屐之叹乃知二公风流亦未易追也绍熙甲寅十二月二十九日陆某识

跋东坡七夕词後

昔人作七夕诗率不免有珠玑绮疏惜别之意惟东坡此篇居然是星汉上语歌之曲终觉天风海雨逼人学诗者当以是求之庆元元年元日笠泽陆某书

跋张监丞云庄诗集

敌覆神州七十年东南士大夫视长淮以北犹伧荒也以使事往者不复黍离麦秀之悲殆无以慰富父老心今读张公为奉使官属时所赋歌诗数十篇忠义之气郁然为之悲慨弥日庆元改元九月二十七日陆某书

跋淵明集

吾年十三四时侍先少傅居城南小隐偶见錄床上有淵明诗因取读之欣然会心日且莫家人呼食读诗方乐至夜卒不就食今思之如数日前事也庆元二年岁在乙卯九月二十九日山阴陆某务观书於三山龟堂时年七十有一

跋陆史君庙籤

昔者龐德公未曾入州府襄阳耆旧间处士节独苦岂无济时策终竟畏罹罟林茂鸟有归水深鱼知聚举家隐鹿门刘表焉得取

射口陆史君庙以杜诗为籤极灵余自蜀被召东归将行求得此籤後十四年乃决意不复仕宦媿吾宗人多矣绍熙辛亥十二月十日山阴陆务观书

跋巴东集

予自乾道庚寅入蜀至淳熙戊戌东归九年间两过巴东登秋风白云二亭观莱公手植桧未尝不怅然流涕恨古人之不可作也又十有七年庆元丙辰六月二十四日山阴陆某书时年七十二

跋吕侍讲岁时杂记

承平无事之日故都节物及中州风俗人人知之若不必记自丧乱来七十年遗老凋落无在者然後知此书之不可阙吕公论着实崇寧大观间岂前辈达识固已知有後日邪然年运而往士大夫安於江左求新亭对泣者正未易得抚卷累歎庆元三年二月乙卯笠泽陆某书

跋许用晦丁卯集

许用晦居於丹阳之丁卯桥故其诗名丁卯集在大中以後亦可为杰作自是而後唐之诗益衰矣悲夫庆元丁巳六月四日放翁识

跋李涪刊误

王行瑜作乱宗正卿李涪盛陈其忠必悔过及行瑜传首京师涪亦放死岭南疑即此人也丁巳七月十六日识

跋归去来白莲社图

予在蜀得此二卷盖名笔规模龙眠而有自得处季子子聿手自装褫藏之庆元丁巳中秋前

三日放翁识

跋释氏通记

予少时避兵东阳山中有沈师者丞相恭惠公之裔近有僧来往天衣山自言欧阳文忠公家今又得修公所着释氏通纪观之则建炎枢臣卢公诸孙也近世不以世类求人名门大家散而为方外道人者多矣如修公既弃衣冠犹能博学强记寓史氏法於是书亦贤矣夫庆元丁巳重九日放翁陆某务观识

跋毛仲益所藏兰亭

龙燄云气而上天凤凰翔於千仞吾见旧定本兰亭其犹龙凤邪庆元丁巳十一月二十日笠泽陆某务观书

跋魏先生草堂集

按国史野陕人沈存中笔谈以为蜀人居陕州不知何所据也予在蜀十年亦不闻野为蜀人笔谈盖误也庆元戊午得之书肆十月十九日龟堂病叟手识时年七十有四矣

跋王辅嗣老子

晁以道谓王辅嗣老子题曰道德经不析乎道德而上下之犹近於古此本乃已析矣安知其他无妄加窜定者乎庆元戊午十月晦书

跋前汉通用古字韵编

古人读书多故作文时偶用一二古字初不以为工亦自不知孰为古孰为今也近时乃或钞缀史汉中字入文辞中自谓工妙不知有笑之者偶见此书为之太息书以为後生戒己未三月二十四日龟堂识

跋胡少汲小集

少汲之兄名僧孺字唐臣在元佑绍圣间亦知名士也少汲十诗中一篇所谓阿兄惊世才者是也周秀实名蔚予亡姑之子及与前佑前辈游绍兴十六七年犹亡恙有文集数十集王性之作序少汲倡酬最多班班见於此集秀实有子名昙文者乃翁每称其穎异自先少师捐馆两家相去地远不复相闻每为之惻怆於怀也因读少汲小集并书之庆元己未七月一日老学庵书

跋晓师显应錄

法华之为书天不足以喻其大海不足以喻其深利根之士一经目一历耳自不能舍虽举天下沮之彼胥不动尚何劝相之有哉然人之根性利钝盖有如天渊者善知识谆谆告语诱之以福报惧之以祸罚亦有不得已者譬之世法道德风化固足坐致唐虞三代之治矣而赏以进善罚以惩恶亦乌可废哉观晓师显应录者当作是观庆元己未立秋日山阴陆某书

跋范巨山家训

人莫不爱其子孙爱而不知教之犹弗爱也人莫不思其父祖思而不知奉其教犹弗思也使为人父祖者皆如范氏之先为人子孙者皆如吾友巨山世其有不兴者乎吾所谓兴者天地鬼神与之乡人慕之学者尊之是为兴不然虽门列戟床堆笏德弗称焉何兴之有巨山之子既以文章擢高科公卿将相之储也故予思广其意而书其家训後如此巨山父子不以予为老悖则将有感也夫巨山名中立其子名薰庆元己未八月晦山阴陆某谨书

跋张安国家问

东坡先生书遍天下而黄门公所藏至寡盖常以为易得虽为人持去不甚惜也紫微张舍人书帖为时所贵重锦囊玉轴无家无之今大宗伯兄弟自为知己家书往来盖以百计矣相称相勉期以远者亦何可胜计而今所存财五纸耳方紫微亡恙时岂亦以为易得故多散逸邪【某】昔者及为紫微客今老病卧家而大宗伯犹以世旧寄此卷命寓姓名於後某自浮玉别紫微三十六年之间摧颓抵此紫微若尚在而见之且不能识则大宗伯尚何取哉援笔至此慨然不知衰涕之集也庆元五年十一月戊申笠泽陆某书

跋坐忘论

此一篇刘虚谷刻石在庐山以予观之司马子微所着八篇今昔贤达之所共传後学岂容置疑於其间此一篇虽曰简略详其义味安得与八篇为比兼既谓出於子微乃复指八篇为道士赵坚所着则坚乃子微以前人所着书渊奥如此道书仙传岂无姓名此尤可验其妄予故书其後以祛观者之惑己未十一月二十一日放翁书

跋唐卢肇集

子发尝谪春州而集中误作青州盖字之误也题清远峡观音院诗作青州远峡则又因州名而妄窜定也前辈谓印本之害一误之後遂无别本可证真知言哉病马诗云尘土卧多毛已暗风霜受尽眼犹明足为当时佳句此本乃以已为色犹为光环尽一篇语意未必非妄按之罪也也可胜叹哉庆元庚申二月三日放翁灯下书

跋居家杂仪

王性之言熙宁初有朝士集於相蓝之烧朱院俄有一人未至问之则王元泽也时荆公方有

召命衆人问舍人不坚辞否元泽言大人亦不敢不来然未有一居处衆言居处固不难得元泽曰不然大人之意乃欲与司马十二丈卜隣以其修身齐家事事可为子弟法也某闻此语六十年矣偶读居家杂仪遂识之庆元庚申五月四日书

跋皇甫先生文集

右一诗在浯溪中兴颂傍石间持正集中无诗诗见於世者此一篇耳然自是杰作近时有容斋随笔亦载此诗乃曰风格殊无可采人之所见恐不应如此或是传写误尔庆元六年五月十七日龟堂书

跋南堂语

予入蜀时南堂入灭已久独有一二弟子在然皆破斋犯律诸禅皆诋訾之予亦以衆毁意薄其为人及其死也乃卓然颢脱人亦不得而议是诚未易测也庚申五月壬戌书於龟堂

跋注心赋

世之未通佛说者观此亦得其梗槩矣庆元庚申七月庚申龟堂老人书

跋朱新仲舍人自作墓志

秦丞相擅国十九年而朱公甯峽南者十有四年仅免僵仆於炎瘴中耳以此胸中浩然无愧将终自识其墓辞气山立向使公谄附以苟富贵至莫年世事一变方忧愧内积惟恐闻人道其平日事其能慨然奋笔自叙如此乎庆元六年秋社日笠泽陆某谨书

跋黄鲁直书

老子曰豫兮若冬涉川犹兮若畏四邻山谷此卷盖有得於此庆元庚申重九日笠泽陆某书

渭南文集卷二十八

卷二十九

钦定四库全书

渭南文集卷二十九

宋 陆游 撰

跋兰亭序

观兰亭当如禅宗勘辨入门便了若待渠开口堪作什麼识者一开卷已见精麤或者推求点画参以耳监瞞俗人则可但恐王内史不肯尔余平生见佳本亦多然如武子所藏不过三四真可宝也庆元庚申重九日笠泽陆某书

跋李少卿帖

宣城李氏自推官至今八九世诗人不絶盖时有如少卿者振起之也庆元庚申九月二十日笠泽陆某书

跋乐毅论

乐毅论纵横驰骋不似小字瘞鹤铭法度森严不似大字此後世作者所以不可仰望也庚申重九陆某书

跋东方朔画赞

胡唐臣僧孺少汲直孺兄弟为江西名士其朋友亦皆知名朝议公盖其一也庆元庚申重九日陆某书

跋东方朔画赞

元丰间有德州士人携画赞示东坡自言二百年前本家藏数世矣东坡为题之曰画赞世多本惟德州者第一君所藏又为德州第一或晓之曰此言君是德州人耳其人虽不伏亦大笑止因观武子所藏聊识卷末庆元六年九月甲子陆某务观书

跋李虞部与范忠宣公啓

某家藏先大父遗书其牍背多当时士大夫牋啓刺字不过曰尚书左丞或曰左丞中大而已数十百人无一人异者此建中靖国之元也上距元佑又十余年风俗淳厚可知况丞相忠宣

公与虞部李公之相与亲厚者乎宜其不为谄也诸公或以今日耳目求之过矣夫庆元庚申九月二十一日陆某书

跋范文正公书

观文正范公书札如欲与韩魏公同荐李泰伯见其进贤之诚戒余安道石守道避祸见其爱惜人材之意於虐贤哉然泰伯卒弃不用安道守道俱陷患难或至死不解志士仁人至今以为叹信乎明哲保身之难也庆元庚申九月二十九日笠泽病叟陆某书

跋东坡帖

成都西楼下有汪圣锡所刻东坡帖三十卷其间与吕给事陶一帖大略与此帖同是时时事已可知矣公不以一身祸福易其忧国之心千载之下生气凛然忠臣烈士所当取法也予谓武子当求善工坚石刻之与西楼之帖并传天下不当独私囊褚使见者有恨也

跋卢衷父絕句

客怀耿耿自难寬老傍京尘更鲜欢远梦已回窗不晓杏花同度五更寒

右卢衷父絕句衷父名蹈青社人今寓犍为郡夹江县佳士也

跋四三叔父文集

先楚公捐馆时叔父未成童已从章贡黄先生安时学丧礼覆讲无小差盖天资精敏如此谨附书於遗文之後以示後人

跋王右丞集

余年十七八时读摩诘诗最熟後遂置之者几六十年今年七十七永昼无事再取读之如见旧师友恨间阔之久也嘉泰辛酉五月六日龟堂南窗书

跋欧阳文忠公疏草

庆历之盛盖庶几汉文景矣而贤人君子犹如是之难文忠公之奏议非独不明诸公之谗也身亦堕排陷滁州之谪是已於虐悲夫嘉泰二年人日笠泽陆某书

跋盘涧图

绍兴己卯庚辰之间予为福州决曹延平张仲钦为闽县大夫朝莫相从後四年予佐京口仲

钦佐金陵数以檄往来於鍾阜浮玉间把酒道旧甚乐又二十年予使闽中仲钦间居延平数相闻方约相过而予蒙恩召还遂有生死之异言之怅然仲钦之子为西和守寄此轴来求诗盖又二十余年予年七十有七矣嘉泰改元岁辛酉五月十九日陆某书时予纳禄已三年居会稽山陰之三山

跋为琛师书维摩经

乡僧琛上座求予书维摩诘所说法欲刻石施四衆以荐其母会予病不能即如其请琛十返不厌孝哉此僧吾徒所乐从也乃力疾为书嘉泰壬戌正月二十一日放翁书

跋东坡谏疏草

天下自有公论非爱憎异同能夺也如东坡之论时事岂独天下服其忠高其辩使荆公见之其有不抚几太息者乎东坡自黄州归见荆公於半山剧谈累日不厌至约卜邻以老焉公论之不可揜如此而绍圣诸人乃遂其伎心投之岭海必死之地何哉此疏藏冯氏三世八十年矣真可读哉嘉泰壬戌二月七日笠泽陆某谨书

跋东坡代张文定上疏草

张安道实一时伟人以其论新法谏用兵则不得不为忠以其力排吴育深恶石介欧阳文忠公司马文正公斥之於前吕正献公抑之於後则似有可议者然东坡此疏则自与日月争光安道之为人不与焉元佑初尽起旧老安道独置不问近臣请加恩礼亦不报更夺其宣徽使议者以为多出正献公之意云嘉泰壬戌二月七日笠泽陆某谨书

跋杨处士村居感兴

一壶村酒胶牙酸十数胡皴彻骨乾随着四婆羣子後杖头挑去赛蚕官

右毕仲荀景儒所记杨处士诗也四婆即处士之配也苏峤季真家有处士夫妻像埜逸如生恨不曾传摹得之他日见苏氏子孙尚可毕此志也嘉泰癸亥放翁书於三山老学庵北窗

跋朱氏易传

易道广大非一人所能尽坚守一家之说未为得也元晦尊程氏至矣然其为说亦已大异读者当自知之嘉泰壬戌四月十二日老学庵识

跋晁以道书传

晁以道着书专意排先儒故其言多而不通然亦博矣凡予家所录本多得於以道孙子闾子

闕本自多誤予方有吏役故所錄失誤又多不暇校定及謝事居山陰欲得別本參考又不能致可恨也壬戌四月十八日老學庵記時年七十八

跋嵩山景迂集

景迂鄜時排悶詩云莫言無妙麗土稚動金門蓋鄜人善作土偶兒精巧雖都下莫能及宮禁及貴戚家爭以高價取之喪亂隔絕南人不復知此句遂亦難解可嘆嘉泰壬戌四月二十四日放翁識

跋任德翁藥桴集

德翁感遇篇云言行身不用無乃我所欲長沙地卑濕正可高閣足其議賈生可謂善矣所抱如此排擯至死天下之不幸也壬戌五月一日老學庵書

跋洪慶善帖

某兒童時以先少師之命獲給掃洒丹陽先生之門退與子威講學則兄弟如也每見子威言洪成季慶善學行然皆不及識今獲觀慶善遺墨亦足少慰衰病廢學負師友之訓如媿何嘉泰二年五月丁卯陸某謹題

跋蒲郎中易老解

易學自漢以後浸微自晉以後與老子并行其說愈高愈非易之舊宋興有酸棗先生以易名家同時種豹林亦開門傳授傳至邵康節遂大行於時然康節欲以授伊川程先生乃拒弗受而伊川每稱胡安定王荊公易傳以為今學者所宜讀惟此二家王公乃自毀其說以為不足傳着論悔之易之難知如此夜讀蜀蒲公易傳老子解喟然嘆曰公於易與老子蓋各自立說迹若與晉諸人同而實異也書以遺其族孫申仲試以予言請問信何如也嘉泰二年九月丁卯笠澤陸某書

跋陸子強家書

吾友伯政持其先君子家問來讀之累日不厭使學者皆能如此孰得而訾病之雖有訾者吾可以無愧矣乃令子聿鈔一通置篋中時覽觀焉嘉泰壬戌十月二十三日宗人某書

跋子聿所藏國史補

子聿喜蓄書至輟衣食不少吝也吾世其有興者乎嘉泰壬戌閏月几望放翁記時年七十有八以同修國史兼秘書監居六官宅第六位

跋火井碑

予昔在征西幙府尝得小校言火山军地枯燥不可耕鋤犁入地不及尺烈火随出今江吴间穿地尺余则见水北人闻之亦未必信也夜读蜀彭君火井碑乃知天地间何所不有亦喜彭君之善记事也嘉泰壬戌闰月十有五日山陰陆某务观书

跋韩晋公牛

予居镜湖北渚每见村童牧牛於风林烟草之间便觉身在画图自奉诏紬史逾年不复见此寝饭皆无味今行且奏书矣奏後三日不力求去求不听辄止者有如日嘉泰癸亥四月一日笠泽陆某务观书

跋画橙

嘉泰癸亥四月十六日两朝实录将进书予以史官兼秘书监宿卫於道山堂之东直舍茶罢取此轴摩挲久之觉香透指爪此物着霜时予归镜湖小园久矣山陰陆某务观书

跋临帖

此书用笔霭霭多态度如双鉤锤王遗书可宝藏也笠泽陆务观跋时年七十九当嘉泰癸亥四月二十八日居於六官宅老学行庵

跋米老画

画自是妙迹其为元章无疑者但字却是元晖所作观者乃并画疑之可叹也嘉泰癸亥四月二十九日陆务观书

跋潘 老帖

潘 老诗妙絶世恨不见其字今见此卷无复遗恨矣癸亥五月一日笠泽陆某书

跋芑林帖

先少师使淮南实与芑林向公为代芑林作雍熙堂於廨中堂之前有井泉甘寒宜茶洪驹父闻之寄诗云何如唤取陆鸿渐石鼎风炉来试茶诗与除代堂帖同日到芑林大以为异手书报先少师今尚在也伏观公移文奏牋稿大节贯金石然诸公所书已可传世赘书之亦屋下架屋耳而某家世所传足补芑林逸事者则不可不书以遗後人嘉泰三年五月十日陆某谨书

跋陈鲁公所草亲征诏

绍兴辛巳壬午之间某由书轴西府掾亲见丞相鲁公经纶庶务镇服中外有人所不可及者然犹不知此诏为出於公也後四十有三年某行年且八十偶幸未先犬马获见公手稿於虓公之谦厚不伐与露才扬已者相去何啻千万哉追怀盛德大度如巨山乔岳凜然犹在目前为之霑涕嘉泰三年五月十二日门人前史官陆某谨书

跋蔡忠怀送将归赋

予读送将归之赋为之流涕不为蔡氏也宋兴百余年累圣致治之美庶几三代熙宁元佑所任大臣盖有孟杨之学稷卨之忠而朋党反因之以起至不可复解一家之祸福曲直不足言也为之子孙者能力学进德不为偏諛则承家报国皆在其中矣嘉泰三年五月十五日山陰陆某书於浙江亭

跋东坡书髓

成都西楼下石刻东坡法帖十卷择其尤奇逸者为编号东坡书髓三十年间未尝释手去岁在都下脱败甚乃再装缉之嘉泰三年岁在癸亥九月三日务观老学庵北窗手记

跋范元卿舍人书陈公实长短句後

绍兴庚申辛酉间予年十六七与公实游时予从兄伯山仲高叶晦叔范元卿皆同场屋六人者盖莫逆也公实谓予小陆兄後六十余年五人皆已隔存歿予年七十九而公实郎君 字伯广者出此轴恍然如与公实元卿联杖屨均茵凭也为之太息弥日因识其末虽然使死而有知吾六人者安知不复相从如绍兴间乎会当相与挈手一笑尚何叹嘉泰癸亥十月二十九日笠泽钓叟陆某书

跋谢师厚书

谢师厚早岁与欧阳兗公王荊公梅直讲江记注诸人游名甚盛晚更蹭蹬居穰下二十余年学愈进文章愈成独後诸公死子愔惊甥黄鲁直皆知名天下然年运而往士大夫鲜能知师厚者今观吾友傅汉孺所藏其上世墓刻实师厚遗文至送行诗杂之宛陵诗中殆不可辨字则宋宣献父子之流亚也为之太息嘉泰癸亥立春後四日笠泽陆某书时年七十九

跋云丘诗集後

宋兴诗僧不愧唐人然皆因诸巨公以名天下林和靖之於天台长吉宋文安之於凌云惟则欧阳文忠公之於孤山惠勤石曼卿之於东都秘演苏翰林之於西湖道潜徐师川之於庐山祖可盖不可殫纪潜可得名最重然世亦以苏徐两公许之太过为病余则徒得所附托故闻

後世非能岿然自传也予观云丘诗平淡闲暇盖庶几可以自传者政使不遇吕居仁苏养直朱希真王性之范至能亦决不泯没况如予者乌足为斯人重哉其徒觉淨以遗稿来求题其後十欸吾门不厌故为之书嘉泰四年二月乙巳笠泽陆某书

跋吕舍人九经堂诗

前辈以文章名世者名愈高则求者愈衆故其间亦有徇人情而作者有识之士多以为恨如吕公九经堂诗盖自少时与昭德尊老诸公师友渊源讲习渐渍所得又为其子孙而发故雄笔大论如此於虜凜乎其可敬畏也哉嘉泰四年六月庚子陆某书

跋韩忠献帖

方曩霄犯边时忠献王首当御戎重任功冠诸公後入辅帷幄陈谟画策驾馭人材镇服敌情自曾集贤以降皆协赞而已观此帖可槩见也嘉泰四祀六月辛丑故史官山陰陆某谨识

跋高大卿家书

子长大卿娶予表从母之女故自少时相从後又同入征西大幕情分至厚读此数书如见其长身苍髯意象轩举也嘉泰甲子岁夏六月壬寅放翁陆某书

渭南文集卷二十九

卷三十

钦定四库全书

渭南文集卷三十

宋 陆游 撰

跋诸晁书帖

某之外大母清丰君实巨茨先生女兄而墓刻则景迂先生所作故某每见昭德及东眷中表每感怆也况今行年八十饰巾待尽伏读此卷其情可知嘉泰甲子六月既望山陆某谨识

跋南城吴氏社仓书楼诗文後

南城吴君子直兄弟作社仓略仿古者敛散之法筑书楼用为子孙讲习之地其设意深远流俗殊未易测也或者乃谓吴氏捐貲以为社仓凶岁免民於死徙其有德於人甚大後世当有兴者子孙不学则不足以承之此其筑书楼之意使吴氏之意信出此乃市道也市道不可以交鄉党自好之士其可以与天交乎吴君之意盖曰吾为是举非一世也吾兄弟他日要当付之後人人不可知吝则嗇出贪则渔利怠荒则废事虽面命之或不听於遗言何有惟学则免是三者之患而社仓虽百世可也此吾兄弟之本指若夫富贵贫贱我且不能自知乃为後人谋而责报於荒忽不可致诘之地亦愚矣吴君遣书行千余里示予以社仓本末因及诸公书楼纪述予慨然叹以为知吴君兄弟心者莫予若也故书之嘉泰四年六月某日山陰陆某书

跋六一居士集古录跋尾

始予得此本刻画精致如见真笔会有使入蜀以寄张季长及再得之才相距数年讹阙已多知古人欲传远者必托之金石有以也夫嘉泰甲子六月二十二日笠泽陆某谨识

跋林和靖诗集

和靖人物文章初不赖东坡公以为重况黄秦哉若李端叔者尤不足录读竟使人浩叹书之所以慰和靖於泉下也嘉泰甲子六月二十四日放翁识

跋米元晖书先左丞海岱楼诗

右米侍郎元晖书先大父题海岱楼诗一首春秋公羊传曰山川有能润於百里者天子秩而祭之触石而出肤寸而合不崇朝而徧雨乎天下者惟泰山耳故大父云起为霖雨从肤寸盖言徧雨天下之泽自肤寸而始也米所书误以从为成遂失本意可为太息嘉泰四年秋八月

壬寅山陰陆某书於三山老学庵

跋苏丞相手泽

某之先大父左丞平生所尊事愿学者惟丞相魏公每为门生言国朝辅相德量岿然莫如魏公与王文贞公旦所谓筑太平之基壽宗社之脉养天下之气者他相虽贤莫敢望观此奏稿可槩见也嘉泰四年秋八月丙辰山陰陆某谨识

跋韩干马

大驾南幸将八十年秦兵洮马不复可见志士所共叹也观此画使人作关辅河渭之梦殆欲霑涕矣嘉泰甲子十月二十一日山陰陆某书

跋义松

黄子迈之为莲城以最闻予以相距远不能知其详然草木无知造物无心太平无象其所感犹如此则是邑之民其有以不友不敬至庭造狱者乎予将求诸邑人而纪之未暇也嘉泰甲子岁十一月甲子山陰陆某书

跋林和靖帖

祥符天禧间士之风节文学名天下者陕郊魏仲先钱塘林君复二人又皆工於诗方是时天子修封禪告太平有二人在天下麟凤芝草不足言矣君复书法又自高胜絶人予每见之方病不药而愈方饥不食而饱忽得观上竺广慧法师所藏二帖不觉起敬立法师能捐一石刻之山中使吾辈皆得墨本以刮目散怀亦一奇事也嘉泰甲子岁十二月丁卯山陰陆某务观书

跋东坡集

此本藏之三十年矣嘉泰甲子岁十二月遗烬几焚之予缉成编比旧本差狭小乃可爱遂目之曰焦尾本云十四日山陰陆某书

跋陶靖节文集

张演季长学士自遂宁寄此集来道中失调护前後皆有坏处遂去之而存其偶全者末有年谱辨正别缉为编云开禧元年正月四日务观书

跋三近斋余录

右外兄元城王正夫所作正夫名从元丰中书舍人震字子发之子仕至上饶守云开禧改元正月庚申务观识

跋望江麴君集

徐常侍鼎臣送望江张明府诗云无使千年後空传麴令名则麴令之名在唐着矣开禧改元岁乙丑二月二十七日山陰陆务观书时年八十有一

跋吴越备史

钱氏讳佐故以左为上凡官名左字者悉改为上此书所谓上右者乃左右也

又

吴越在五代及宋兴最为安乐少事然废立诛杀犹如此方斯时吾家先世守农桑之业於鲁墟梅市之间无一人仕於其国者真保家之法也开禧乙丑九月四日山陰陆某书於三山书巢

跋僧帖

方外之士发扬其先德累世不懈吾辈亦可少愧矣开禧乙丑九月五日陆某书赠观师余年八十一识其家四世矣安得不为陈人乎因以寓叹

跋卿师帖

本朝小楷至宋宣献後仅有道士陈碧虚一人今见吾里中前辈卿师所书则萧散小不逮碧虚而法度森严无媿者亦名笔也後人善藏之开禧元年乙丑岁九月丁亥山陰陆某务观题时年八十有一

跋松陵倡和集

皮袭美当唐末遯於吴越死焉有子光业为吴越相子孙业文不坠家声至袭美四世孙公弼以进士起家仕庆历嘉佑间为韩魏公所知虽不甚贵显亦当世名士也方吴越时中原隔絕乃有妄人造谤以谓袭美隳节於巢贼为其翰林学士新唐书喜取小说亦载之岂有是哉比唐书成时公弼已死莫与辨者可叹也开禧元年九月十四日山陰陆某务观书於松陵倡和集之後

跋潜虚

学者必通易乃能以其绪余通玄玄既通矣又以其余及虚非可以一旦骤得也刘君谈虚如此则其於易与玄可知矣司马丞相乃谓已学不足知易故先致力於玄盖谦云耳开禧乙丑十一月十八日笠泽陆某书

跋吕成肃和东坡尖义韵雪诗

古诗有倡有和有杂拟追和之类而无和韵者唐始有之而不尽同有用韵者谓同用此韵耳後乃有依韵者谓如首倡之韵然不以次也最後始有次韵则一皆如其韵之次自元白至皮陆此体乃成天下靡然从之今苏文忠集中有雪诗用尖义二字王文公集中又有次苏韵诗议者谓非二公莫能为也通判澧州吕文之成肃乃顿和百篇字字工妙无牵强凑泊之病成肃诗成後四十余年其子栻乃以示予予固好诗者然读书有限用力尠薄观此集有愧而已乃书集後而归其本吕氏开禧元年乙丑十一月丙申笠泽陆某务观书

跋花间集

花间集皆唐末五代时人作方斯时天下岌岌生民救死不暇士大夫乃流宕如此可叹也哉或者亦出於无聊故邪笠泽翁书

又

唐自大中後诗家日趣浅薄其间杰出者亦不复有前辈闳妙浑厚之作久而自厌然桔於俗尚不能拔出会有倚声作词者本欲酒间易晓颇摆落故态适与六朝跌宕意气差近此集所载是也故历唐季五代诗愈卑而倚声者辄简古可爱盖天宝以後诗人常恨文不迨大中以後诗衰而倚声作使诸人以其所长格力施於所短则後世孰得而议笔墨驰骋则一能此不能彼未易以理推也开禧元年十二月乙卯务观东篱书

跋韩晋公字母牋

予平生见三尤物王公明家韩干散马吴子副家薛稷小鹤及此字母牛是也不知未死间尚复眼中有此奇伟否开禧二年四月甲子陆务观老学庵北窗书

跋韩立道所藏兰亭序

观此本兰亭如见大勲业钜公於未央庭中大冠若箕长剑拄颐风采凛凛虽单于不觉自失况余子有不汗洽股栗者哉丙寅岁四月十有三日陆某年八十二

跋龚氏金花帖子

右龚氏家藏其先世金花帖子嘉泰中陈翰林考质史牒以为先书姓名散报始於端拱中宋

太素尚书知贡举时自建隆至端拱取士已久始克举此故事然予按宋公有追念策名时诗凡千言略云吉音来碧落帖子报红牋清夜惊神王矐明到省前风中宫漏尽日出榜绳悬宋公盖建隆二年进士则国初已有前一夕报帖之事唐制初未尝废若曰五代草创止用红牋至端拱初乃如金华如唐时则亦细事耳不得云始举唐故事也世必有知者予复书此於後以待博洽君子云开禧丙寅夏四月丙寅山陰陆某书

跋曾文清公奏议稿

绍兴末金兵入塞时茶山先生居会稽禹迹精舍某自勅局罢归略无三日不进见见必闻忧国之言先生时年过七十聚族百口未尝以为忧忧国而已後四十七年先生曾孙黼以当日疏稿示某於今某年过八十仕忝近列又方王师北讨之时乃不能以尘露求补山海真先生之罪人也开禧二年岁在丙寅五月乙巳门生山陰陆某谨书

跋曾文清公诗稿

河南文清公早以学术文章擅大名为一世龙门顾未尝轻许可某独辱知无与比者士之相知古盖如此方西汉时专门名家之师衆至千余人然能自见於後世者寡矣扬子惟一侯芭至今诵之故识者谓千人不为多一人不为少某何足与乎此读公遗稿不知衰涕之集也开禧丙寅五月乙巳门生笠泽陆某谨识

跋鱼计赋

某恭闻徽祖宣和末将下罪己诏学士王孝迪当直不召顾谓辅臣曰非小字不能作遂召肃愍公公初不在北门既至辞以非职守不许遂授以圣意下笔亶亶不数刻进御今载在国史与三代训诰并驱盖千百年间诏令所未有也晚读鱼计堂赋瞻丽超轶如此则施之大手笔固宜絶人远甚某尝见公遗像於友人赵恬家英气如生恨不得独拜牀下致欣慕之意今得记所闻於赋後亦幸矣开禧二年六月己巳笠泽老民陆某谨书

跋徐待制诗稿

予以乾道庚寅入蜀几十年而归故人在朝者惟许昌韩无咎握手道旧因相与论当世知名士无咎独称待制徐公以为文辞辩论有贞元元和间诸贤之遗风恨予不及识因诵其诗句信奇作也後三十年徐公之子植以遗稿一编示予属以序引予与待制虽出处不同时然尝叹爱其笔墨则亦愿托名卷首而待制之文厄於火所余财百之二则序亦无自作乃姑书此附於後他日得全书紬绎其妙处而论载之尚未晚也开禧二年六月某日山陰陆某书

跋周益公诗卷

绍兴辛巳予与益公相从於钱塘去题此诗时十一年予年三十七益公少予一岁後二年相

继去国自是用舍分矣今益公舍我去所不知者相距几何时耳开禧丙寅九日二十五日山陰陆某谨识

跋樊川集

唐人诗文近多刻本亦多经校讐惟牧之集误缪特甚予每欲求诸本订正而未暇也书以示子通尚成吾意开禧丙寅十一月二十七日放翁书

跋周侍郎奏稿

某生於宣和末未能言而先少师以畿右转输饷军留泽潞家寓茱阳及先君坐御史徐秉哲论罢南来壽春复自淮徂江间关兵间归山陰旧庐则某少长矣一时贤公卿与先君游者每言及高庙盗环之寇乾陵斧栢之忧未尝不相与流涕哀恻虽设食率不下咽引去先君归亦不复食也伏读侍郎周公论事牒子犹想见当时忠臣烈士忧愤感激之余风於虘建炎绍兴间国势危蹙如此而内平羣盗外扞强敌卒能披草莽立社稷者诸贤之力为多某故具载之以励士大夫傥人人知所勉则北平燕赵西复关辅实度内事也开禧丁卯岁正月丁亥故史官陆某谨书

跋周侍郎寻姊妹帖

方建炎多故羣盗如林士大夫家罹祸有尽室不知在亡者观周公所书可为流涕六七十年在仕在野皆安其生养老者字幼者藏死者可不知所自邪尚勉思所以报开禧三年正月丁亥陆某书

跋鲍参军文集

鲍明远宋元嘉中人比陶渊明谢灵运差为晚出然与灵运诗名相埒体制亦颇相类故世称鲍谢云开禧三正九放翁书

跋南华真经

南华真经并音二册籤题皆友人莆阳方伯谟书伯谟下世已二年矣哀哉开禧丁卯二月四日老学庵识

跋与周监丞书

某顷得监丞公书作报如此後二十余年公家持以来属以题数字於後乃为记岁月公诸子多贤不幸有早世者今惟主簿君以力学承其绪他日仕途有崭然头角者必吾主簿君恨耄期已迫不及见之耳开禧三年三月丙子渭南伯陆某书於山陰泽中老学庵

再跋皇甫先生文集後

司空表圣论诗有曰愚尝览韩吏部诗其驱驾气势掀雷决电撑挾於天地之垠物状其变不得鼓舞而徇其呼吸也其次皇甫祠部文集外所作亦为邈逸非无意於深密盖或未遑尔据此则持正自有诗集孤行故文集中无诗非不作也正如张文昌集无一篇文章李习之集无一诗篇皆是诗文各为集耳表圣直以持正诗配退之可谓知之然犹云未遑深密非笃论也予读之盖累叹云开禧丁卯四月二十一日某再书

跋汉文帝後元年三月诏

汉文此诏与诗之七月书之无逸何异吾以此知文景太平之有自也虽然岂独为天下哉十室之邑十金之产傥能思是言其有至於丧败者乎庚申五月十七日陆某书

跋张魏公与刘察院帖

与人同功人用而已舍君子不敢言劳与人同辜人免而已穷君子不敢逃责非能异夫人也理固如是也不然则亡耻已使御史公无恙得予此说其将以为能知言乎

跋世父大夫诗稿

世父大夫公自幼得末疾以左手作字性喜钞书尝钞王岐公华阳集百卷笔笔无倦意岂特其书可贵重哉亦可见其为人矣

渭南文集卷三十

卷三十一

钦定四库全书

渭南文集卷三十一

宋 陆游 撰

跋鲁直书大戴践阼篇

上古之文幸不泯者率非後世所可及不必坏鲁壁发汲冢而得之乃可信也丹书之辞如此武王之铭如此虽微大戴礼载之可置疑哉某鄉先生傅公子骏为学者言洪范自无偏无党至归其有极三十二字皆古所传为人君之常训箕子申以告武王吴械才老着尚书裨传以为得此说於虞仲琳少崔少崔学於傅公此三十二字与丹书三十九字一传於箕子一传於师尚父武王敬受力行之卜世卜年之永有所自矣开禧三年五月辛卯故史官陆某识於黄太史所书践阼篇後以遗庐陵彭君孝求

跋唐昭宗赐钱武肃王铁券文

某按唐昭宗乾宁四年遣中使焦楚鎰赐吴越武肃王铁券以八月壬子至国是岁武肃始兼领镇东节出师大败淮南兵十八营定婺睦苏湖州而铁券适至盖其国始盛时也及忠懿王入朝以其先王所藏玉册铁券置之祖庙不敢以自随淳化元年杭州悉上之於朝时忠懿王已薨太宗皇帝复以册券赐王之子安僖王惟濬安僖王薨券归文僖公惟演文僖公薨券传仲子霸州防御使晦霸州侍仁宗皇帝燕间帝问先世所赐铁券欲见之霸州并三朝御书以进帝为亲识御书之末复赐焉文僖之孙开府公景臻尚秦鲁国大长公主某年十二三时尝侍先夫人得谒见大主铁券实藏卧内状如箬瓦今七十余年乃得见录本於武肃诸孙燾家後十字盖文僖手书某家旧藏文僖书帖亦有押字皆与此同武胜军节度使印则文僖尹洛时所领邓州节钺也开禧三年六月乙巳山陰陆某谨书

跋司马端衡画传灯图

司马六十五丈抱负才气絶人远甚方少壮时以党家不获施用於时欲有以寓其胸中浩浩者遂放意於画落笔高妙有顾陆遗风某尝以通家之旧亲闻其论画衮衮终日如孙吴谈兵临济赵州谈禅何其妙也每恨是时不能记录一二以遗後之好事者今获观传灯图恍如接言论风指时稽首太息不能自己开禧丁卯岁十月丁未山陰陆某谨题

跋吕伯共书後

绍兴中某从曾文清公游公方馆甥吕治先日相与讲学治先有子未成童卓然穎异盖吾伯

共也後数年伯共有盛名从之学者以百数不幸中道奄忽而予几九十尚未死揽其遗墨大抵忠信笃敬之言也为之涕下开禧丁卯岁十二月乙巳山陰陆某书

跋张敬夫书後

隆兴甲申某佐郡京口张忠献公以右丞相督军过焉先君会稽公尝识忠献於掾南郑时事载高皇帝实录以故某辱忠献顾遇甚厚是时敬父从行而陈应求参赞军事冯圆仲查元章馆於予廨中盖无日不相从迨今读敬父遗墨追记在京口相与论议时真隔世事也开禧丁卯十二月乙巳山陰陆某书

跋刘戒之东归诗

乾道中予与戒之同在宣抚使幙中同舍十四五人宣抚使召还予辈皆散去范西叔宇文叔介最先下世其余相继凋落至开禧中独予与张季长犹存今春季长复考终於江原予年开九秩独幸未书鬼录偶得戒之郎君市征君所藏送行诗观之恍然如隔世事也为之流涕丁卯十二月乙丑渭南伯陆某书於山陰老学庵

跋秦淮海书

黄豫章秦淮海皆学顔平原真行豫章晚尤自称许淮海则退避不肯以书自名亦各行其志也嘉定改元四月己酉山陰陆某书

跋柳书苏夫人墓志

近世注杜诗者数十家无一字一义可取盖欲注杜诗须去少陵地位不大远乃可下语不然则勿注可也今诸家徒欲以口耳之学揣摩得之可乎书家以鍾王为宗亦须升鍾王之堂乃可置论耳尔来书法中絶求柳诚悬辈尚不可得书其可遽论哉然予为此意非独触人亦不善自为地矣览者当粲然一笑也嘉定元年四月己酉陆某书

跋朱希真所书杂钞

朱先生与诸贤当建炎间裔夷南牧羣盜四起时犹相与讲学如此吾辈生平世安居鄉里乃欲饱而嬉可乎嘉定之元四月乙酉陆某书於山陰老学庵时年八十有四

跋为子遯书诗卷後

子遯持足纸求录诗期年矣以乃翁衰疾不忍迫蹙予更以此念之为写终此卷然此儿近者时时出所作皆大进论建安黄初以来至元和後诗人皆有本末历历可听吾每为汗出因并记之嘉定戊辰岁五月乙巳放翁书时年八十有四

跋吕文靖门铭

一言可以终身行之者其恕乎此圣门一字铭也诗三百一言以蔽之曰思无邪此圣门三字铭也其简且尽如此学者苟能充之虽入圣域不难矣丞相申国文靖吕公作门铭自忠孝十有八字广吾夫子之训以遗後人某得本於公元孙祖平敢再拜书其後致愿学之意嘉定元年夏五月辛亥山陰陆某谨识

跋傅给事竹友诗稿

王逸少写经换鵞给事傅公笼鹅换竹二者皆山陰胜絕事然换鹅事人皆能道之换竹事未甚着鄉人以为恨独某曰是不足怪也逸少志在物外不肯轻为世用故换鹅事易传给事方南渡之初忠义大节为一时称首虽困於谗诬用之不尽然至今闻其风者可立衰懦则换竹事固应不传盖所见於世者大也给事遗文百卷今藏秘阁某领策府时见之嘉定元年七月庚申陆某谨识

跋陈伯予所藏乐毅论

世传中山古本兰亭之流带右天五字有残缺处於是士大夫所藏兰亭悉然又谓乐毅论古本至一海字止於是凡乐毅论亦至海字而亡其余妄伪乱真大抵如此今伯予此轴皆佳後一本尤敷腴可爱未可以海字为定论也嘉定戊辰岁七月己未山陰陆某务观书时年八十有四

跋伯予所藏黄州兄帖

某之从父兄故黄州使君遗墨伯予书其後发扬大节至矣伏读感涕不知所云先兄讳沆字子东仕至朝奉大夫嘉定元年七月己未山陰老民陆某谨书

跋詹仲信所藏诗稿

予平生作诗至多有初自以为可他日取视义味殊短亦有初不满意熟观乃稍有可喜处要是去古人远尔詹仲信何处得予断稿以见示为之屡叹乃题其後归之嘉定改元六月壬辰山陰陆某务观书於三山老学庵年八十四

跋陈伯予所藏兰亭帖

予监定此本自是絕佳然亦不必云唐旧刻也卷末数跋皆吾友王君玉所录黄太史鲁直语窃恐未必然盖周孔无过兰亭笔法亦无过学者步亦步趋亦趋犹或失之岂可以轻心慢心观之哉若以夫子尝自谓有过孟子云周公之过遂据以为周孔有过乃醉梦中语也嘉定改元十月庚午陆某书

跋坡谷帖

先大父左辖元佑中自小宗伯自请守颍逾年移南阳而苏公自北扉得颍与大父为代此当时往来书也书三幅前後二幅藏叔父房其一幅则从伯父彦远得之亡兄次川又得於伯父此是也传授明白可以不疑而或者疑其出於摹仿识真者寡前辈所叹嘉定元年十二月乙亥山陰陆某谨识

跋山谷书陰真君诗

此石刻在夔州漕司白云楼下黄书无出其右者嘉定己巳四月辛卯放翁书

跋吕尚书帖

右尚书吕公给事傅公往来书二卷书曰昔先正保衡作我先王语曰起予者商也盖臣当有以作其君弟子当有以起其师而况朋友之际乎二公可谓无负於古道矣使此书广传安知百世之下无兴起者嘉定己巳秋七月辛亥山陰陆某谨识

跋傅给事帖

绍兴初某甫成童亲见当时士大夫相与言及国事或裂眦嚼齿或流涕痛哭人人自期以杀身翊戴王室虽丑裔方张视之蔑如也卒能使敌消沮退缩自遣行人请盟会秦丞相桧用事掠以为功变恢复为和戎非复诸公初意矣志士仁人抱愤入地者可胜数哉今观傅给事与吕尚书遗帖死者可作吾谁与归嘉定二年七月癸丑陆某谨识

跋熊舍人四六後

裕陵见伯通外制手批付中书曰熊本文词朕自知之荆公亦曰读熊君奏报如面相语

跋临汝志

欧阳澈字德明抚州临川人徙崇仁金人犯阙上书请身使金庭驭亲王以归不报建炎初伏阙上书论大臣误国太学生陈东亦上书所言略同遂并诛二人年三十一车驾渡江赠承事郎绍兴初赠朝奉郎秘阁修撰官其三子赐田十顷

跋尼光语录

予登豫章西山其上盖有光禅师塏焉及来成都又得师所说法要博辩奇伟雷霆一世犹有蜀忠文公立朝堂堂不挠於死生祸福之遗风信其为范氏女子也笠泽渔隐陆某

跋陈正伯所藏山谷帖

此卷不应携在长安逆旅中亦非贵人席?金络马传呼入省时所观程子他日幅巾筇杖渡青衣江相羊唤鱼潭瑞草桥清泉翠樾之间与山中人共小巢龙鹤菜饭扫石置风炉煮蒙顶紫茁然後出此卷共读乃称尔

跋张待制家传

待制公蹶於仕宦晚途仅得一郎吏而感激国难冒兵渡河北行忠义之气可沮金石方其客死灵丘寓骨云中时虽蛮貊之人亦为霑涕也今其家寢微一孙未去天官侍郎选公卿大夫乃未有表出之以为忠义劝者诚某所不识也

跋柳氏训序

方毗之为是书也璿已长矣诗曰海尔谆谆听我藐藐悲夫

跋祠部集

祠部叔祖诗文至多今皆不传此小集得之书肆盖石氏所藏也某谨

跋消灾颂

高道传言此颂盖武陵张尊师作尊师亦号白云子岂以此故遂误为子微乎玉笈斋书

跋肇论

高僧传肇公化时年三十一耳所着书乃传百世吾曹老而无闻可愧也

先楚公奏检

旧有海陵时录白元本巨编大字有先左丞亲书更定处今不复存此本绍兴中先少师命笔史传录者某识

跋宗元先生文集

宗元先生吴贞节唐史有传以歌诗名天宝中此一卷盖见云章宝室云放翁书

跋韩子苍语录

此故人范季随周士所记也周士没後数年得之於其子然余旧闻周士道韩公语极多尚恐所记不止於此当更访之

跋孟浩然诗集

此集有示孟郊诗浩然开元天宝间人无与郊相从之理岂其人偶与东野同姓名邪晁伯以谓岳阳楼止有前四句亦似有理

续考之伯以之说盖不然大抵浩然四十字诗後四句率觉气索如洞庭寄阁九岁莫归南山之类皆然杜少陵评浩然诗云新诗句句尽堪传岂当时已有此论故少陵为揜之耶

适越留别谯县张主簿诗初云得与故人会後云浮云去吴会此亦是吴与会稽也

跋出疆行程

此一书盖陈鲁公出使时官属所记不知为何人也文词虽鄙浅事颇详洽故录之

淳熙己酉秋钱愷之子端忠为金部外郎予在仪曹与之同廊日会食尝问此书谁所作端忠云刁雍也雍字文叔颇有文不应鄙浅如此恐未必然也放翁书

跋李卫公集

韦执谊之为人顺宗实录及唐书载之甚详正人所唾骂也今观李卫公祭文称誉之乃如此卫公之言固过矣史官所书无乃亦有溢恶者乎毁誉之可疑如此者多矣可胜叹哉执谊作相时实录言尝迁中书侍郎同平章事而史不书卫公又以为仆射虽小节亦聊附见於此

跋徐节孝语

仲车名在天下孰不知尊仰者虽无苏公所云可也况他人乎此集前後所载悉当削去陆某识

跋赵渭南诗集

唐人如韦苏州五字赵渭南唐律终身所作多出此故能名一代云

跋石鼓文辨

予绍兴庚辰辛巳间在朝路识郑渔仲好古博识诚佳士也然朝论多排诋之时许至三馆借书故馆中尤不乐云

跋西崑酬唱集

祥符中尝下诏禁文体浮艳议者谓是时馆中作宣曲诗宣曲见东方朔传其诗盛传都下而刘杨方幸或谓颇指宫掖又二妃皆蜀人诗中有取酒临邛远之句赖天子爱才士皆置而不问独下诏讽切而已不然亦殆哉

跋兼山家学

予始得此书时犹未识昌国後五年始同朝详观其为人诚法度之士间相与论学辄忘昏旦乃知其得於了和先生者深矣昌国名其所居曰艮斋亦以嗣兼山之学欤

跋淮海後集

悼王子开五诗贺铸方回作也子开名蘧居江陰既死返葬赵州临城故有和氏干将之句方回诗今不多见於世聊记之以示後人放翁

跋张季长中庸辨择

此书大槩似陈莹中初着尊尧集识者当自得之

跋法书後

法书一编付子遫能熟观之亦可得笔法之梗槩矣

跋李太白诗

此本颇精今当涂本虽字大可喜然极谬误不可不知也

跋重广字说

字说凡有数本盖先後之异此犹非定本也

跋岩壑小集

朱希真夜热坐寺庭五字一篇及病虎过酒楼二古诗皆出同时诸人上

跋王元泽论语孟子解

元泽之歿诏求遗书荆公视篋中得论语孟子解皆细字书於策之四旁遂以上之然非成书

也

渭南文集卷三十一

卷三十二

<集部,别集类,南宋建炎至德佑,渭南文集>

钦定四库全书

渭南文集卷三十二

宋 陆游 撰

右朝散大夫陆公墓志铭

陆氏自汉以来为天下名族文武忠孝史不絶书比唐亡恶五代之乱乃去不仕然孝弟行於家行义修於身独有古遗法世世守之不以显晦易也宋兴历三朝数十年秀杰之士毕出太傅始以进士起家楚公继之陆氏衣冠之盛寔复如晋唐时往往各以所长见於世而材略伟然可纪者如公是也公讳宗字元珍曾祖吏部郎中直昭文馆赠太傅讳翰太傅两子伯曰万载县令讳琪县令生宿州符离县主簿赠朝奉大夫俨仲曰国子博士赠太尉讳珪实生楚公仕至尚书左丞讳佃公楚公第五子大夫早卒无嗣子楚公命公後焉任为假承务郎调台州宁海县丞行令事遇事立决老吏宿奸畏慑缩栗不敢辄动巫以淫祀惑民悉捕寘於法习俗为变会省丞官父老送公出境争赉金帛公拒之不可至或泣下乃敢丝一钩历杭州仁和县尉越州司工曹事以举为苏州长洲县县号繁剧且久不治公至从容如无事而县以大治以最迁郎就命通判真州事发奸伏申冤枉号称神明州多大陂泽用事者方兴水利官吏人人怀希望意谓且得厚赏公独不肯与人莫测也而覆核多诞谩遂置诏狱惟公独免盗起青溪张甚至出大兵监司知公长於治剧共荐为随军勘计官军食漕浙江公建议潮汐赢缩不可必请令士卒各持三日粮舟至龙山果失朝赖以无乏而主将怒护舟吏欲立斩之莫敢争者公独慨然曰江行与平地异非吏罪且戮二人衆必大骇怯者求死强者委舟窜立败事矣乃议分所载募民陆犏以行舟遂轻皆以时会虽沙碛湍濑无害也衆多其谋而主将终以戾其意不说凡与军事者皆超擢独公更为通判登州徙制置发运司干当公事未赴除江南东路转运判官实代兄中散公寔当时以为荣部中饥公便宜留上供米六十万石损直予民而余於他郡官无所亡失而民赖以济避亲嫌移提举京畿常平等事与转运提点刑狱皆置司陈留会金人犯京师游骑突至转运提点刑狱仓卒避去故事两司皆兼提举将兵及保甲而常平司弗与也及是公独不动以便宜招集燕山戍卒数千杂以保甲日夜部勒习教命旧将张宪统之扼据要害敌既不能犯而溃卒亦不为乱措置号令赫然有大将风采因间道上章自劾且乞犒军诏释罪从所请方是时敌剽掠四出陈留适当其冲微公几殆议者谓宜出入兵间以尽其材而公罢归矣屏居常州无锡县读书赋诗以自适初甚贫约公才具高既不仕因治产业甫数年家大赡足然取予有大略不务苛碎凶年赈贷至倾仓庾无少计惜邻里疾病嫁娶丧葬有弗给者不待告而调之然必以莫夜曰吾畏人知也盖公虽退而家居然有所为犹卓卓如此使得尽其材於多故时视古所谓功名之士岂远哉初太傅遇异人得秘诀服气仙去公晚而嗣其学起居康宁齿髮不衰疾已革犹不乱以绍兴十八年闰八月四日卒年六

十有一官至右朝散大夫遗命葬太湖之东大浮山之原以宜人徐氏祔宜人尚书礼部员外郎君平之女有贤德善笔札文辞先公二十有九年卒四男子演某官仕以廉直称亦以故不得志後公十一年卒淙某官汶某官渲某官一女子适某官段彬孙若公既葬十有五年淙等始属公从子某为铭铭曰以公之材遭时艱虞驰骋功名公盖有余世方尚法豪杰斥疎亦或知之旁睨歔歔卒歛智略老於里閭二十三年燕及惇孤大浮之原其下震泽春秋奉祠世世无斁

陈君墓志铭

建炎四年先君会稽公奉祠洞霄属中原大乱兵祲南及吴楚谋避之远游而所在盗贼充斥莫知所乡有惟悟道人者东阳人为先君言同邑有陈彦声名宗誉其义可依其勇可恃彦声事亲孝父死赀百万悉推以予弟脱身躬耕复致富饶宣和中盗发旁郡东阳之民有将应之者赖彦声为言逆顺祸福得不从乱安抚使刘忠显公因命悉将其乡之兵彦声设方略明部伍尽出家赀激使用命者有溃卒阻林莽且数百人彦声驰一马自往招之皆感泣愿効死东阳当横溃中而能独全不为盗区者彦声之力也刘公奇其材欲官之辞不肯受至建炎初群盗四合州县复以御贼事属彦声方是时所立尤壮伟及论赏则又固辞先君闻之大喜曰是豪杰士真可托死生者也於是奉楚国太夫人间关适东阳彦声越百里来迎旗帜精明士伍不譁既至屋庐器用无一不具者家人如归焉居三年乃归彦声复出境饯别泣下沾襟已而先君捐馆舍予兄弟游宦四方念无以报之每惕然不自安乾道二年予归自豫章一日有衰絰来见者则彦声之子愔也泣曰先君晚岁竟以前功补承信郎遇登极恩迁承节郎盱眙军守尝奏为沿淮巡检不赴不幸以去年三月某日歿矣享年七十四将以今年十一月某日葬於猿腾山之原遗言求铭呜呼是盖尝有德於予家者义不可辞彦声曾大父用之大父希观父娶罗氏以子回授恩封孺人六男子恂忱恇恇愔恪恂忱皆吉州助教恇成忠郎新差监光化军在城都酒税女一人适贵州助教卢敏求孙男二十二人溥泳源淮泛湜深潜沿澹淳浚汲瀟涓皆业进士滋汪潭淮淇涛洋尚幼孙女二十人适进士王宦范庭艾胡咏保义郎路光祖进士葛少伊晏刚中左迪功郎婺州武义尉应振曾孙男女三十二人元孙一人予闻彦声既得官赴铨离立庭中吏操牍唱姓名彦声大不乐即日弃去其自爱重又有士大夫所愧者则其得铭亦不独以与之有雅素而已铭曰

乱能全其乡功名非其愿也富能燕其族公侯非其美也一辱於铨吏而擗耳疾走终身弗见则吾侪区区释耕而干禄者非可贱也夫

费夫人墓志铭

故建平守蜀费公枢有女子子曰法谦字海山年十有七归於今右宣教郎晋张君珖三十有八年年五十五而没没百二十三日而葬葬再岁而铭铭之岁实乾道八年而作铭者君之友吴陆某也君少为进士有场屋声既壮屡屈於礼部乃以从父任入官又蹭蹬几二十年故时同为进士者今丞相叶公自大司马使西鄙奏君为其属君顾太夫人春秋高将辞不行夫人曰行矣妾在侧君奚忧於是尽斥奩中之藏具滫髓滑甘以时进馈奉盥授帨比平日加谨虽

有疾强自持不怠至疾平太夫人或终不知君得夙夜王事而无内忧者夫人力也君尝自楚归蜀上忠州独珠滩触石舟败舟人皆失魂魄夫人独不动徐谓君曰与君平生皆俯仰无愧何至溺死已而果全上下交庆而夫人乃澹然无甚喜色某曰夫人笃孝君姑以成其夫之贤盖有古列女风至临死生之变而不以动心则虽学士大夫有弗及者然求其所以能至是者亦自孝敬始而已夫人生四子男曰宗望宗康女曰海月海云海云先夫人四十余日卒孙祖义铭曰呜呼有宋孝妇费夫人之墓

曾文清公墓志铭

公讳几字吉甫其先赣人徙河南之河南县曾祖识泰州军事推官妣祖氏宁晋县君李氏祖平衢州军事判官赠朝散大夫妣慈利县君刘氏考准朝请郎赠少师妣魏国太夫人孔氏公有器度舅礼部侍郎孔武仲秘阁校理平仲叹誉以为奇童未冠从兄官郢州补试州学为第一教授孙勰亦赣人异时读诸生程试意不满辄曰吾江西人属文不尔诸生初未谕及是持公所试文矜语诸生曰吾江西人之文也乃皆大服已而入太学屡中高等声籍甚会兄弼提举京西南路学事按部溺死无後特恩补公将仕郎公以太夫人命不敢辞试吏部铨中优等赐上舍出身擢国子正兼钦慈皇后宅教授迁辟雍博士兼编修道史检阅官时禁元佑学术甚厉而以剽剥黷熟烂为文博士弟子更相授受无敢异一少自激昂辄摈弗取曰是元佑体也公独愤叹思一洗之一日得经义绝伦者而他场已用元佑体见黜公争之不可明日会堂上出其文诵之一坐耸听称善争者亦夺气及啓封则内舍生陈元有也元有遂释褐文体为少变学者相贺改宣义郎入秘书为校书郎道士林灵素以方得幸尊宠用事作符书号神霄籙自公卿以下羣造其庐拜受独故相李纲故给事中傅崧卿及公俱移疾不行出为应天少尹尹故相徐处仁敬待公公尝决疑狱徐公谢曰始徒谓君儒者乃精吏道如是邪一日有中贵人传中旨取库金而不齎文书徐公用府寮议将姑许之公力争至谒告不出徐公虽不果用而尤以此服公丁内艰服除主管南外宗室财用靖康初提举淮南东路茶盐公事女真入寇都城受围太府盐钞无自得商贾不行公乃便宜为太府钞给之比贼退得缗钱六十万丧乱之余国用赖以济而公不自以为功也改提举荆湖北路茶盐公事羣盗大起湖北诸郡皆破独辰沅靖三州仅存有封桩盐公以与蛮獠货易得钱数钜万间道上行在所贼孔彦舟据鼎州川陕宣抚使司幕官有傅雱者辄假彦舟湖北副总管彦舟因自称官军而杀掠四出自若也俄以总管檄公求盐给军食官属震恐请与以纾祸公卒拒不予其後有为鼎澧镇抚使者怙权暴横复欲得盐公曰使吾畏死则输彦舟矣亦卒不予以疾乞闲主管临安府洞霄宫起为福建路转运判官未赴改广南西路广南支郡赋入悉隶转运司岁度所用给之吏缘为奸公独亲其事吏不得与文书下诸郡愜服徙江南西路提点刑狱公事改两浙西路故太师秦桧用事与敌和士大夫议其不可者辄斥公兄为礼部侍郎争尤力首斥而公亦罢时秦氏专国柄未久犹憚天下议复除公广南西路转运副使以慰士心徙荆湖南路贼骆起郴州宜章县郴道桂阳皆警且度岭诏湖北宣抚司遣将逐捕贼引归宜章之临武峒宣抚司遂以平贼闻公独奏其实朝廷始命他将讨平之主管台州崇道观起提举湖北茶盐未赴改广西转运判官公虽益左迁然於进退从容自若人莫能窥其涯复主管崇道观寓上饶七年读书赋诗盖将终焉绍兴二十五年桧卒太上皇帝当宁慨然尽斥其子孙嫻而收用耆旧与一时名士十一月起公提点两浙东路刑狱公老矣而精明不少衰去大猾吏张镐一路称

快明年知台州公娶钱氏有郡酒官者夫人族子也大为奸利且恣横患苦里间公亟捕系狱奏废为民黄岩令用两吏为囊橐以受赇吏持之令不胜怒械吏置狱一夕皆死公发其罪或以书抵公曰令左丞相客也公治益急亦坐废踰年召赴行在所力以疾辞除直秘阁归故官数月复召既对太上皇帝劳问甚渥曰闻卿名久矣公因论士气不振既久陛下兴起之於一朝矫枉者必过直虽有折檻断鞅牵裾还笏若卖直沽名者愿皆优容獎激之时太上惩秦氏专政之後开言路獎孤直应诏论事者衆公惧或有以激讦获戾者故先事反覆极论以开广上意太上大悦除秘书少监先是少监选轻士至不乐入馆公既以老臣自外超用名震京都及入朝鬓须皓然衣冠甚伟虽都人老吏皆感歎以为太平之象於是公去馆中三十有八年矣举故事与同舍赋诗饮酒纵谈前辈言行台阁典章从容每竟日故相汤思退尝语客曰恨进用偶在前不得当斯时从曾公游也其为荐绅歆慕如此擢尚书礼部侍郎初公兄楸历礼部侍郎至尚书兄开亦为礼部侍郎至是公复继之衣冠尤以为盛事二十七年吴越大水地震公极论消复灾变之道及言賑济之令当以时下太上皆嘉纳时将郊祀公力请对言臣老筋力弗支矣陛下郊天若礼官失仪亦足辱国太上曰卿气貌不类老人姑为朕留公再拜谢曰臣无补万分一惟进退有礼尚不负陛下拔擢不然且为清议罪人乃以集英殿修撰提举洪州玉隆观又三岁除敷文阁待制金主亮盗塞下诏进讨已而敌大入或欲通使以缓其来公方病卧闻之奋起上疏曰遣使请和增币献城终无小益而有大害为朝廷计当尝胆枕戈专务节俭整军经武之外一切置之如是虽北取中原可也且前日陛下降诏诸将传檄数金人君臣直诟骂耳何词复和邪今上初受内禅公又上疏累数千言大槩如前疏而加详既封奏具衣冠遡阙再拜乃发公自宣义郎十一迁为左中大夫至是以即位恩迁左太中大夫执政欲起公入侍经筵度不可致乃以公子逮为提点浙西刑狱以便养隆兴二年公上章谢事迁左通议大夫致仕庄文太子立群臣为父後者得加封其亲公子逢请於朝而有司疑公官高诏特迁左通奉大夫乾道二年五月戊辰卒於平江府逮之官舍享年八十三爵至河南县开国伯食邑至七伯户公平生燕居庄敬如斋至没不少变九月辛酉逢等葬公於绍兴府山陰县凤凰山之原诏赠左光禄大夫有司谥曰文清娶故翰林学士钱勰之孙朝请郎东美之女封鲁国太夫人男三人逢朝散大夫尚书左司郎中逮朝奉大夫充集英殿修撰知湖州迅通直郎主管台州崇道观女一人嫁右朝散郎知吉州吕大器孙男七人盘迪功郎监户部贍军乌盆酒库桌承务郎新知平江府长洲县梁从政郎监户部贍军诸暨酒库槃迪功郎监建康府提领所激赏酒库槃宣教郎裴修职郎监明州支盐仓棠迪功郎新湖州长兴县尉孙女九人长适从事郎衢州江山丞李孟传次适通直郎新通判扬州军州事朱辂次适宣义郎新浙东提举常平司干办公事詹徽之次适从政郎新婺州金华县丞邢世材次适宣教郎干办行在诸军审计司叶子强次适修职郎吕祖俭次适文林郎湖州长兴县丞丁松年次适迪功郎前明州慈谿县主簿王中行次适迪功郎监衢州比较务张震曾孙男女十三人公贯通六经尤长於易论语夙兴正衣冠读论语一篇迨老不废孝悌忠信刚毅质直笃於为义勇於疾恶是是非非终身不假人以色词少师捐馆舍公才十余岁已能执丧如礼终丧不肉食及遭内艰则既祥犹蔬食凡十有四年至得疾颠眊乃已每生日拜家庙未尝不流涕也平生取与一断以义三仕岭外家无南物或求沉水香者虽权贵人不与守台州以属县竝海产蚶菜比去官终不食初佐应天时节元佑諫臣刘安世亡恙禁方厉仕者不敢闯其门公独日从之游论经义及天下事皆不期而合避乱寓南岳从故给事中胡安国推明子思孟子不传之絶学後数年时相倡程氏学凡名其学者不历岁取通显後学至或矫托干进公源委实自程氏顾

深闭远引务自晦匿及时相去位为程氏学者益少而公独以诚敬倡导学者吴越之间翕然师尊然後士皆以公笃学力行不譁世取宠为法公治经学道之余发於文章雅正纯粹而诗尤工以杜甫黄庭坚为宗推而上之繇黄初建安以极於离骚雅颂虞夏之际初与端明殿学士徐俯中书舍人韩驹吕本中游诸公继没公岿然独存道学既为儒者宗而诗益高遂擅天下有文集三十卷易释象五卷他论着未论次者尚数十卷某从公十余年公称其文辞有古作者余风及疾革之日犹作书遗某若永诀者投笔而逝故公之子以铭属某会某客巴蜀久乃归铭之岁实淳熙五年去公之歿十二年矣铭曰

圣人既没道裂千岁士诵遗经用鲜弗戾孰如文清得於絶传耄期躬行知我者天秉礼蹈义笃敬以终病不惰媮大学之功仕岂不逢施则未究刻铭於丘维以诏後

渭南文集卷三十二

卷三十三

钦定四库全书

渭南文集卷三十三

宋 陆游 撰

青阳夫人墓志铭

有宋蜀人天池先生谭公讳篆字拂云之夫人青阳氏井研人大父知归州事泰实生五丈夫子以幼子古继其弟春是为夫人之考夫人归谭氏不及事舅独事君姑太安人太安人则归州之女子子於夫人为姑夫人夙夜妇道不以亲故少懈天池与其考隆山先生讳望字勉翁皆以文章名一代取友皆天下士亦继以进士起家然得年皆不盈五十志远年局未尝问家人产业方天池歿时一子曰季壬甫生十年茆然独立而天池亦无兄弟谭氏不絶如綫太安人传家事已久夫人幼读书了大义於是行其所知自处俭薄而不以贫忧其姑躬履艱难而不以事累其子外父母家而一意立谭氏门户太安人饘服非其手调笔缝纫不以进亲客至夫人视庖厨刀匕惟谨及即席则立侍姑侧终日不休酒馔洁丰果蔬芳甘奉盥授帨肃只无譁客归皆太息祝其女妇愿庶几夫人万一而夫人歉然常愧力不足也斥卖簪襦遣季壬就学夜课以书必漏下三十刻乃止间则为道隆山天池言行以磨砺之及季壬稍长与人交则诲之曰某可师某可友某当絶勿与通故季壬名其堂曰愿学室曰胜已私皆夫人所以训也夫人享家庙如养姑之孝字孤嫠如爱子之恩盖其节行法度士君子莫能加焉季壬举进士拔解太安人尚无恙夫人不自喜而为太安人喜及擢第拜庙夫人犹涕泣曰先姑不及见矣观者皆感动惻怆後以德壽宫庆寿恩得封亦以是不敢乐也初季壬解褐为崇庆府府学教授凡四年徙成都府吏部以侨寓格不下执政为奏复还崇庆以便养命至而夫人弃其孤矣初命教成都今枢密使周公貳大政知予与季壬友以书来告曰石室得人矣季壬有学行为诸公大人所知盖如此以故士皆慕与之交而夫人墓道之碣乃万里来属予於山阴镜湖上义不可辞夫人讳字及年与其他在法当书者皆已见内志惧於再告故独述其大节而已自周以降礼教日衰为女子者不闻姆师之训图史之戒闾巷尼媪交煽其间非天资淑柔则悖戾昏贪黷悍骄不复知供养祭祀为妇职者固其所也夫人奋乎千载之下独不移於俗矫矫自立如此於虔贤哉予与季壬实兄弟如也故述孝子之意以作铭其辞曰

淳熙十祀冬十月丙申孤季壬奉先夫人之柩附於天池先生之藏平生相倚为命兮未尝轻去吾亲之傍日将夕而未返则倚门其皇皇今也山空无人凜乎欲霜鸟兽纷其号鸣木叶實兮草黄吾亲不见其孤兮悲生死之茫茫儿不能奉养於泉涂兮肝心裂而涕滂茹哀忍死兮庶其显扬维友予铭兮後百世而弥芳

陆孺人墓志铭

孺人山陰陸氏曾大父某國子博士贈太尉大父某承奉郎考某迪功郎明州司法參軍母同郡齊氏孺人年若干嫁為承議郎知梧州高郵桑公莊之妻端靖淑柔讀書略知大義自其在父母家已得孝名見治絲枲輒趨與共事法曹與齊夫人皆異之建炎間法曹避兵天台而承議適攝縣主簿事故時兩家已繼為婚姻情好甚篤因以孺人歸焉承議既罷主簿以亂故不克北歸因寓近縣山中凡四十年間雖出仕歲滿輒歸居山之日多於在官衣食嘗不足孺人處之超然自幼奉佛法戒擊鮮終身不犯嘗舟行泝汴遇老桑門丐錢孺人亟施之且問曰師何許人老如此尚行乞耶對曰居天台兄弟十八人我獨好遠游故抵此汝與我有宿契他日當為鄰及是寓居適近石橋一日登應真閣修茶供至第三尊者驚嘆曰此吾汴舟所見也承議嘗為西安令有娠婦以事系獄念釋之未果孺人夢白衣人告曰囚且字子矣旦以告承議呼乳醫眎之而信即脫械予假使歸果以是夕產孺人事佛之驗至如此然奉家廟盡孝盡敬朝夕定省如事生凡祭祀烹飪滌濯皆親之至累夕不寐承議平生所與游多知名士每客至輒信宿留孺人執刀匕白首無倦色曰此婦職也近世閨門之教略妄以學佛自名則於祭祀賓客之事皆置不顧惟私財賄以徇其好曰吾徼福於佛也於虐娶婦所以承先祖主中饋顧乃使之徼佛福而止耶安得以孺人之事告之承議有兄之子妻士人陳汝翼貧無以生孺人力贊承議挈之歸同十五年使其子與己子俱就學遂中名第而孺人諸子皆好修世昌從諸公問學不以貧奪其志人以為積善之報孺人得年七十有四以淳熙十二年正月己丑卒丈夫子三人長之瑞早卒次則世昌次世茂女子子四人徐廷煥顧淵陳寬吳植其甥也明年某月甲子葬於天台之太平鄉朴塢祔承議之墓世昌寔來請銘孺人於予為從祖姉其敢辭銘曰廟祭賓享維婦之職嫚嫚狼狽我壺則孰如孺人耆老益恭名山崇閣此幽宮

浙東安撫司參議陸公墓志銘

紹興初詔修元佑故事命大臣近侍以十科舉士翰林學士承旨知制誥孫公近首舉右迪功郎陸靜之文章典麗可備著述科方詔之下也孫公一時辭宗主盟翰墨自三館諸儒與進士高第愿得一言者袂相屬也公年財二十余以門子入官初未為人知而孫公獨嘆譽稱荐之一旦出千百人右於是中朝名勝士莫不知陸伯山慕與之交而公仲弟升之仲高亦以文章有名号二陸仲高遂登進士丙科公業春秋及賦再試禮部乃輒斥因不復踐名場而一意欲以才略致通显然愈不偶以老豈非命耶公會稽山陰人曾大父珪國子博士贈太尉大父昉中大夫考長民左朝請大夫尚書右司員外郎兩世皆贈金紫光祿大夫公以父任補將仕郎調信州上饒縣台州天台县主簿皆不赴監潭州南岳廟徙措置戶部贍軍酒庫所干辦公事又不赴徙江南东路转运司淮南西路转运司干辦公事知台州宁海縣部使者挾私憾中公以法鍛鍊累月无所得然猶坐微文冲替起知臨安府臨安县主管台州崇道觀通判隆興府建康府資當守郡會得重听疾不能奉臨遣乃為浙东路安撫司參議官官至朝散大夫服三品淳熙十四年六月癸酉卒享年七十七娶季氏先公二十年卒贈宜人子二人子墨前台州宁海縣主簿子桢當以公納祿恩補官女子二人長適承議郎新權知台州軍州事司馬僖次適從政郎趙善价孫男三人立達立言立柔孫女五人長適鄉貢進士石正大余尚幼子墨子桢將以九月丙午葬公於會稽縣上臯尚書塢以季宜人祔實來請銘公平生不大試於事故可傳載者少然在宁海有姬訴子不孝二十條公遽呼姬問之憫不能置一辭逮問為書者則姬之女婿實為之案驗辭服一邑驚以為神佐建康會久旱力請於府為火備已而火屢作皆以

有备不为灾士民至今诵之晚既久不仕日诵左氏传史记前汉书率尽两卷不以寒暑疾恙少废有疑义客至辄讲之前五年忽作治命百余言戒家人勿用浮屠法及厚葬比终无大疾疾已亟犹起坐堂上观书如平生徐阖书危坐遂逝於廬亦奇矣铭曰士患不材材患莫知既或之知又弗克施在昔所叹天嗇其寿耄耄不试将孰归其咎

山陰陆氏女女墓铭

淳熙丙午秋七月予来牧新定八月丁酉得一女名闰娘又更名定娘予以其在诸儿中最穉爱怜之谓之女女而不名姿状瓌异凝重不妄啼笑与常儿絕异明年七月生两齿矣得疾以八月丙子卒敢於城东北澄谿院九月壬寅即葬北冈上其始卒也予痛甚洒泪棺衾间曰以是送吾女闻者皆恸哭女女所生母杨氏蜀郡华阳人铭曰

荒山穷谷霜露方坠被荆榛兮於廬吾女孤冢岿然四无邻兮生未出房奥死弃於此吾其不仁兮

傅正议墓志铭

公讳某字凝远其先为北地清河着姓後徙光州为固始人唐广明之乱光人相保聚南徙闽中今多为大家而傅氏之祖曰府君实与其夫人林氏始居泉州晋江县生五子长子卒谋葬有异人告以葬圣姑山之右而徙其居仙游罗山之麓林夫人有高识悉用其言宋兴仙游隶兴化军而傅氏钜公显人始继出矣若夫德修於家教行於乡而身不及用者亦在其子孙如公是也公之大父程父嵩以累举进士推恩闭门教子不肯仕累赠奉直大夫公奉直第二子幼有美质读书日数千言学为文辄惊其长老崇宁中甫年十八入太学声名籍甚试中高等然犹几二十年乃以上舍登第调沧州无棣县主簿会金人陷全燕棄虚南下两河皆震吏士相顾无人色或委官去郡檄公饷军公南方书生平生不习金鼓初咸意公难之而公得檄即行不暇秣马冒兵往来军赖以无乏敌出塞会公亦遭奉直忧始南归终丧得南劍州顺昌县尉时所在盗起县民亦相挺为乱公素得士心徐设方略穷其窟穴未几悉平部使者欲言之朝公辞而出弓手有谋叛者语其徒曰奈累傅公何比公罢去盗遂作杀掠暴甚邑人以不留公为悔调泉州安溪县丞改宣教郎犹安其官不求徙有自吏部拟往来代者始徙南安县丞其恬於仕进如此南安大饥民弃子者相属公请於州出常平钱米设安养院於延福僧舍乳湩糜粥汤液皆不失其宜明年岁丰悉访其所亲归之曩时县之贫民鬻业者辄减其户产以求速售或业尽而赋独存官责之急至死徙相踵公既得其弊一切以肥硲定赋民之冤失职者皆得直治最一路迂知晋江县会诏造战舰他郡县吏多并缘烦扰事亦不时集公独不以诿吏躬督其役劳费视他邑省殆半而事独先期办安抚使张忠献公闻於朝特减磨勘年遂为茶事司干办公事公於是行能已为时所知秩满造行在所顾不数见公卿赴铨得通判南劍州而归将之官以绍兴二十一年六月十一日感疾不起享年六十有八积寄禄官至左朝奉大夫累赠正议大夫公亡恙时自发书卜葬於白石之南虽月日莫不有治命至歿悉遵用焉娶林氏正议大夫豫之女封宜人今累封太淑人六子湊奉议郎知漳州漳浦县汝朝散郎江南西路提举常平茶盐公事淇朝散大夫直龙图阁两浙西路提点刑狱公事洵举进

士奉议莅官有家法不幸与沟淩皆早世常平以才望擢使一道而龙图尝位列卿实中朝宿德皆且柄用矣士大夫以为公积行累功之报四女长适进士林维次适龙溪县尉陈希錫次适进士林若思次适进士林若公初龙图使浙东实治会稽而某为郡人始从龙图游获观公文章豪迈絶人而其诗尤工龙图又为某言公当官至廉为县时有小吏持官烛入中闕公顾见立遣出仕官三十年先畴无一垄之增老犹力学不厌行其所知未尝以穷达累心饥者辍食济之病者治药疗之所居之傍有路达泉州而林谷阻险者四十余里行旅告病公率亲党塹山伐石易为夷途人至今诵焉疾革犹戒诸子曰吾平生无愧顔仰歿後汝曹居官主清治家主严奉先主敬收族主恩造次颠沛必主忠信能用吾言虽贫贱犹为有德君子不然猎取光显奚为哉语终遂瞑方龙图言此时固已属某以发扬潜德会徙节浙西後逾年乃以状来请铭铭曰

筑野肖梦相武丁死不泯亡骑列星後世继起三千龄峩冠相望立汉廷公入太学奋由经蹕踰晚乃驾箠篁抱才不试归泉扃二妙山立尚典刑公虽埋玉有余馨印绶三品告诸冥马鬣之封柏青青咨尔云来视斯铭

渭南文集卷三十三

卷三十四

钦定四库全书

渭南文集卷三十四

宋 陆游 撰

尚书王公墓志铭

宝谟阁直学士正议大夫致仕赠银青光禄大夫王公既葬之二年孙宿来请於公之里人陆某愿次公出处请谥於有司某辞不获既以状授其家宿复来泣且言曰古之葬以碑封因识於碑则碑固在墓外後世隧葬识於隧中非古也吴会稽之葬弗隧则虽已葬刻石墓旁实为近古惟丈人予之铭某辞以既尝状公之行愿更求名卿巨人以信後世宿复泣言近世固有既为状而复为之碑者丈人何为独谦某用是不果固辞惟公讳佐字宣子会稽山陰人曾大父讳仁大父讳忠世有隐德孝讳俊彦以进士起家经行尊显为时醇儒仕至左宣义郎太平州州学教授赠至特进两娶同郡叶氏追赠同安永宁郡夫人同安实生公幼而颖异不群七岁特进为讲孟子即能复讲不遗一言退无矜色特进叹曰吾家积善百年当有兴者是子其当之乎十八补太学生二十有一以南省高选奉廷对为第一方唱名时趋拜进止详华中度高宗皇帝喜动玉色授承事郎签书平江军节度判官厅公事未赴召为秘书省校书郎时秦丞相桧专政其子熺以前执政提举秘书省馆中或趋附以为捷径公独简默严重未尝妄交一语尝语同舍曰唐三馆故事丞相与赤县尉均为学士安得妄自屈哉熺闻不能平噤言者论去之逾年请祠禄为主管台州崇道观丁特进忧服除会秦丞相死熺亦斥逐起家拜秘书郎兼玉牒所检讨官迁尚书吏部员外郎右司郎阙以公兼领秦丞相夫人王氏陈乞旧所得恩数之未用者自称冲真先生公持白执政曰妇人安得此名向者误恩有司不能执为失职今当追正然王氏封两国夫人盖祖宗以宠亲王之配及外家尊属者何可辄引以阶僭紊当并夺之执政不能听但寝其请而已後王氏死卒夺先生号识者犹恨不尽用公初议同安夫人墓在山陰为盗所发公即日不待命奔赴至墓一日获盗公与母弟左司公公袞欲手杀之亲戚为言此在法固当死不患讐耻不雪乃告於有司公既斂葬犹不忍去墓所朝旨趣还不得已造朝逾月狱成盗不死左司公愤切手戮盗挈其首诣郡自系待罪公迺乞尽纳官以赎弟罪诏给舍议给事中杨公椿等共议曰春秋之义义复讐公袞无罪佐纳官之请可勿许诏曰给舍议是於是趣公就职如初绍兴二十九年二月拜起居郎遇事直前献纳多所裨益未两月以台评罢然言者诋公甚峻至请投窜而上终保全之命守外郡遂知永州公自初仕即在馆阁未尝一日历州县到郡每决事吏皆抱牒立数步外不呼不敢辄进公亲与民语有冤者得尽其言诞谩者一再诘皆词穷折服自谓当受罚公迺延见诸生劳问耆年凡可美民俗励士节者举之无遗又言永之士衆於道州而解名财及道四之一愿诏有司稍均之庶无失士徙知吉州庐陵号江西剧郡人疑公且困於事不得复闲暇公至为政如零陵时不知有闲剧之异而事亦顿省治声闻於行在诏直宝文阁逾年徙知明州仍命入奏而张丞相浚力荐公及王侍郎十朋张舍人孝祥以为可大用既对寿皇圣帝谕以且有亲擢既退除中书门下

省检正诸房公事兼权户部侍郎公力辞且言臣昨面奏乃者户部以江东岁歉有江西和籴之令臣在江西实见一路决不能独出百五十万石而关子茶药乳香之属既不能售必至抑配其为民病且甚於江东之饥今臣若不自揆贪荣冒受而实未有以为策他日固不敢逃谴然民力国计将何以支愿复补外或止供检正职事诏不允仍兼侍讲汤丞相思退以首相领江淮都督请公参其军谋公为汤公言敌方议和而以兵入吾境此非其帅本指盖用事者幸一胜以遂所求当选骁将精卒乘其骄惰急击之彼以败闻则用事者且得罪吾可从容制之矣会汤公去位公亦罢参谋方是时疆场未靖调兵遣戍用度日窘且诸路岁颇不登公从容应变窒漏察欺事无不集而民间泰然如无事时会永宁夫人卧疾恳求奉祠改权吏部侍郎请不已乃复以直宝文阁知宣州徙知建康府行宫留守建康自车驾行幸建为别都居守多执政及侍从久次者惟公以威望被亲擢中外皆知上任属之意妖人朱端明崔先生挟左道与军中不逞辈谋不轨且久及公至相与谋曰是不可欺少缓必败不如先事发乃共约以春大阅日起事虽极诡秘而公已尽得其阴谋一日坐帐中决事命捕为首者至前略诘数语即责短状判斩之而流其徒数人於岭外余置不问僚属方候见於客次无一人知者见公掷笔乃异之而妖人已诛矣公方阅案牒治他事如平时良久延见宾僚乃退无一毫异於常日又徙知平江隆兴二府未赴会知上元县李允升坐贿前事未作已丐寻医去而谗者谓公纵有罪坐削官居建昌军谗者去上察守臣连坐未有公比且数思其才复官主管台州崇道观俄起知饶州又复直宝文阁知扬州入对劳问甚渥留为宗正少卿兼权户部侍郎上祀南郊命公玉辂执绥凡所顾问占对瞻敏上甚悦有褒嘉语於是疾公者益衆史侍郎正志为发运使坐奏课不实谪有欲为史分谤者乃并罢公而发运司事公始末未尝与且尝论其徒扰无补至是乃并得罪逾年主管台州崇道观起为福建路转运判官徙知潭州连进秘阁修撰集英殿修撰淳熙六年正月彬州宜章县民陈峒窃发俄破道州之江华桂阳军之蓝山临武连州之阳山县旬日有衆数千彬道连永桂阳军皆警公奏乞荆鄂精兵三千未报公度不可待而见将校无可可用者流人冯湛适在州公召与语曰君能有功不特雪前辜且遂为朝廷用北乡恢复自此始矣湛请行公曰请行易耳今当不俟奏报以兵相付既受此命即以群盗授首为期一有弗任军法非某敢贷也遂檄湛带元管权湖南路兵马铃辖统制军马即日令湛自选潭州厢禁军及忠义寨凡八百人即教场誓师遣行仍命凡兵之分屯诸州县者皆听湛调发违慢皆立诛又出军令牌付湛军士所过秋毫扰民及临敌不用命或既胜而攘贼金帛使得窜逸者皆必行军法上奏以擅遣湛待罪且请亟发荆鄂军又私念湛有善战名贼必遽入广南思得劲兵遏其冲而广南非所部未有以为计会受命节制讨贼军马而前一日又奉诏会合诸路兵乃合二命为一称节制会合诸路兵马檄广南摧锋军兵官黄进张喜分屯要害贼知湛至而广南守备已严乃驱载所掠輜重由间道归宜章转运司闻之即移诸州以为贼已穷蹙自守巢穴毋以备御妨农公得报曰是不独害捕寇且必惑朝廷乃檄转运司及诸州以为贼未尝败何谓穷蹙其巢穴旁接三路七郡林菁深阻出入莫测何谓自守复奏言遣冯湛之後事方有绪若遽弛备贼必更猖獗愚民且有附和而起者非细事也因坚乞前所请荆鄂军从之已而果闻贼方作箭镞甚盛遣入溪峒买毒药之可为药箭者公赫然以荡灭为期且奏向者连州受贼首李曦降赏犒备足未几复亡去为贼今陈峒之次首领是也以此知不一意讨捕容其不死湖广之忧未艾俟诛贼首而贷胁从未为晚也枢密院犹谓当先招降上独是公策命公躬至军前节制公即日戒行师徒不譁耕陇市肆之人莫有知者既至宜章命湛以四月二十三日移屯何卑山湛请进兵日不富惟给以合符曰符至即行耳二十九日夜半

始发兵符命湛及鄂州军统领夏俊五月朔日诘旦分五路进兵贼初诈降实欲缮治寨栅阻险以抗官军公得其情督兵甚峻及驰入隘口贼果立寨栅未及成闻官军至狼狈出战既败又退失所凭乃皆溃走是日夺空冈寨驻兵十二渡贼之起也假唐源淫祠以诳其下日杀所虏一人祭神至是斩像焚其祠湛遂诛陈峒函首来献已而李曦以下诛获无遗宥其胁从发仓粟振贷安辑之案功行赏悉如初令且上其事於朝振旅而还诏以公忠劳备着起拜显谟阁待制湛亦由此复进用俄徙公知扬州平江遂知临安府公力辞曰人各有能有不能天府臣所不能为也方祖宗时用人莫重於三司开封高选贤杰号将相之储豪右憚其威望莫不歛避故得人为多□幸以来用人益轻惟能媚奉权贵则为称职沿袭非一日矣若使方拙自守者为之犹推舟於陆决不可行纵臣欲降心下气周旋其间赋性既定如燥湿之不可移终有不能自抑者徒速颠隮而已奏三上不得请遂就职入对上褒勉甚宠特赐金带进工部侍郎兼知临安府进权工部尚书而尹京犹如故兼侍讲久之进侍读遂权户部尚书知淳熙十一年贡举公尹京逾三年又兼版曹故时以冗剧日夜不得休公处之超然闲暇事皆立办贵臣权家歛手不敢干以私民间利病无巨细罢行之或可施於四方者则疏其事以闻多见施行岁饥畿内小民或以农器蚕具抵粟於大家苟纾目前明年皆有失业之忧公乃出令断自东作之日先以还之俟蚕麦讫事而归其子本大家不遵令小民负约不以时偿皆坐罪令下农家相庆识者以为与吕文靖公建请不税农器事相埒他日且为名相上亦自器异之尝因夜直召对出御书三都赋序以赐盖倚以拓定中原之事会长子病卒公力乞奉祠上察其不可留命以宝文阁直学士出守公复力申前请得提举江州太平兴国宫以归执永宁夫人丧服除提举隆兴府玉隆万寿观凤翔府上清太平宫绍熙元年八月自制圻记又为治命凡沐浴歛葬之节莫不备具时公方康强无疾人或怪之二年二月十一日晨起犹读书理事如平时俄暴感风眩遂卒享年六十有六寄禄官自承事郎积迁至正奉大夫封自山陰县开国男至开国伯食邑自三百户至九百户致仕进正议大夫遗表上赠银青光禄大夫以卒之岁十一月四日葬於山陰县天乐乡竺里峰之原公娶同郡高氏早卒继室括苍季氏亦先公若干年卒皆追封硕人子男二人履常承奉郎监淮西总领所建康府西酒库克常承奉郎知台州天台县丞皆前卒女四人长适温州平阳县主簿梁叔括叔括卒再适提举湖北路常平茶盐张孝曾次适通判建康府曾槩今存者惟适曾氏女而槩卒矣孙男二人宿承务郎某某官孙女二人尚幼公以英杰迈往之资自学校科举时已卓然出千万人上仕虽至侍从所施設曾未究一二闲居九年忧患或出意表而公所养愈刚大不为事变之所折困人莫窥其涯一日尝语某曰里中或谓仆以诛杀衆故多难不知仆为人除害也湖湘乡者盜相踵今遂扫迹者二十年绵地数州深山穷谷之氓得以滋息而仆以一身当旼譴万万无悔於虜公可谓知命者铭曰

维宋中兴三圣相承公听并观以出贤能公奋於幽有德有勲知我者天用我者君蹈义秉节迄至耆艾山立在庭以道进退大夏方建拱把毓材岂兹栋梁万牛莫回生或忌之亦叹其死我铭弗诬用谥太史

杨夫人墓志铭

郢为东方大邦宋兴以来多名公卿虽摈不仕及仕而不显者如穆参军修士兵部建中学易

刘先生跂皆既死而言立化行於家至今学者尊焉建炎南渡人物寢衰矣而山堂巩先生讳庭芝经为人师行为世范德义之化自家人始凜然克配前数公先生之仲子处士讳灋之夫人曰武义杨氏年二十有一而嫁二十有三而字二十有六而寡寡四十有三年年六十有八而卒十一年而葬望处士之墓实绍熙五年十一月丙申也夫人自为巩氏妇事山堂及君姑钱夫人一步趋一话言悉皆巩氏家法耳目濡染又皆天下长者事故行成德进山堂以为称吾家妇宗党嫺戚隣里皆取法焉处士先山堂不禄当是时夫人尚盛年也遂誓不再行二子伯始学步踉蹌不踰阬仲尚襁褓及能言夫人皆亲授以孝经论语毛诗国风为之讲声形正章句具有师法二子未从外塾而於幼学之事各已通贯精习卓然为奇童矣其後子益长夫人身任家事不以荒其子之业故皆举进士中其科然夫人不喜子之得禄所以教而进之者父师莫加焉於呼非是母固不能成其子非巩氏家法亦不能成是妇也予少时犹及见赵魏秦晋齐鲁士大夫之渡江者家法多可观虽流离九死中长幼逊悌内外严正肃如也距今未五十年散处四方寢不能如故时久而不变如巩氏者盖鲜矣夫人曾大父琮大父彬父伸卿皆不仕子曰丰从事郎江南东路提点刑狱司干办公事嵘奉议郎知徽州歙县事孙复亨慈孙阳孙耦孙孙女七皆处丰来请铭铭曰

巩氏之先化行闺门我观夫人典则具存夫人之贤实应图史有如不信视其二子东有茂櫜处士所藏虽不克耐郁乎相望

陆郎中墓志铭

公讳沅字子元会稽山陰人曾大父珪国子博士赠太尉大父佃中大夫尚书左丞赠太师楚国公考寅右中散大夫赠少师公於某为从父兄某盖少公十五岁方为童子时公已学成行着以两浙转运司进士试礼部不中试博学宏词又不中乃以世赏试礼部再为第一人所与交多一时知名士每见某必谆谆道其所与共学日夜磨礪浸灌以希古人者曰时然进之时然庄氏名革早死不显而进之则故相汤岐公也及岐公以文章事业相高皇帝公犹沉浮州县久之乃得监行在都进奏院监尚书六部门岐公每见必留公道往昔相从讲习时事抵掌笑语公辄俛首蹶蹶自引去岐公亦叹息以为不可亲疎後辈躡进至大官者相望公顾处百僚底自若也岐公免相门下士多牵联以臯斥未去者亦不自安公独澹然如平时人亦莫指议者初少师自山陰徙四明已数十年婚姻皆在焉盖四明人也会史魏公入为参知政事为右丞相与公实姻家少相从魏公亦器待公而公未尝数谒见朝士亦莫知其相国亲且厚也监门岁满迁太府寺丞权尚书户部郎久次当为真矣而公亟求归养得提举两浙市舶权知舒州提举福建市舶遭母益国夫人忧以归初通判泉州者尝有所请以法拒之公去而提点刑狱兼权舶司事通判者因誅提点刑狱以危法中公公平日以恭谨闻又方以举职被赏迁一官朝论右之公虽得臯犹傳轻比於是公 门絕交游诵佛书以夜继日多至万卷不复言再仕亦絕口不及仇家对客清谈而已自束髮至老无一日废书尤长於诗闲澹有理致在场屋时以赋称老犹自喜子孙及族党从之讲贯皆有师法公为人夷雅旷远与人言惟恐伤之然遇事必力行所知无所挠屈尝为丹徒丞朝廷用言者遣使籍江上沙田立税额使指甚厉吏莫敢违亦或从而张虚数以为功使者至郡闻人人称公详练乃檄与偕往公既极论其不可又为诗陈民情诗流传至朝廷遂止不行沙人砉石刻其诗今犹可考其使福建也有中贵

人所亲皇甫甲者辄讽公以珍货别进公正色拒之戒典客者他日谒至勿复通其不阿类如此公仕自修职郎至朝奉大夫而废二十三年以绍熙五年四月六日卒享年八十有五娶卢氏封宜人先公十二年卒享年亦八十有五六子曰梓通直郎知宁国府宣城县先公十二年卒曰格举进士曰之瑞国学免解进士曰橦曰櫜曰之祥皆举进士一女适文林郎监淮东总领所余场楼钧六孙曰炳曰焕曰炎曰燿曰燮曰熨四孙女诸孤以庆元元年九月二十五日遵治命返葬於会稽滋坞望少师墓百步且来属某为铭铭曰

仕蹶於时年登耄期孰夺孰与理莫可推铭识於幽孰知我悲

知兴化军赵公墓志铭

庆元二年八月辛亥朝请郎新知兴化军事赵公以疾卒於第越十月庚午葬於会稽五云乡汤家畈之原明年九月乙卯诸孤□夫等墨其哀见予於郡西南泽中泣且言曰先君之葬将请铭於执事以大事之日迫方伏苦块间不能自通今幸踰年未即死敢以承事郎签书平江军节度判官厅公事莫君子纯之状来告惟公幸许之某等即死无憾予以老疾辞请益牢维公文学治行皆应铭法而亲夫实娶予从孙女与其弟同时中进士科为乡里后来之秀乃卒与铭谨按公讳彦真一名彦能以淳熙新制改今名胄出宣祖昭武皇帝之後曾大父讳叔澹赠武康军节度使洋川郡公大父讳赉之武经大夫浙东路兵马钤辖赠右朝请大夫考讳公懋左朝请大夫知临江军赠太中大夫公少纯笃从故侍御史王公十朋学王公尝得中书舍人张公孝祥书不欺室榜持以遗公所以期公者甚远公益自奋虽举进士盖不止为科举而已然同时为进士亦皆推之遂中其科调抚州录事参军以太中公丧解官归除丧起为信州弋阳县丞终更调建宁府观察推官荐者如格改宣教郎知宁国府宣城县未赴以内艱罢除丧知平江府吴县通判袁州知兴化军朝廷知公者寢多谓且用矣而得郡未及赴遽至大故公之将赴抚州录事参军也太中公戒之曰汝任治狱人死生所系也可不勉乎公再拜受教既就职束吏甚严视囚之寒暑饥渴惨然不啻在已囚以故皆输其情曰不忍欺吾父也会部使者以事付狱有冤状而使方怒风指甚厉人皆谓乖其意且得谴吏尤惶恐即欲挫掠成之公叱吏去具列其冤使者为屈因欲荐公公亦终不就也太中闻之太息曰吾有子矣及在建宁幕南劔州将乐沙县诸寨军食不时给郡卒空垒来诉於转运司赵公公硕谢公师稷为使乃檄公行公驰至沙县与其令调财得三千缗明日召卒於庭阅籍自下给之军吏及卒长皆不得一摇手衆乃大服比至将乐给之如沙县亦皆大服於是议者谓公所试者小然犹能表表如此他日功名事业詎可测哉郡守郑公伯熊知公最深有疾不以郡事属其贰而言於使者请檄公摄守疾革独延公至卧内属以草乞致仕奏其知之如此高宗皇帝永思陵櫨宫事兴公适为吴县转运司调取洞庭青石期会迫不可遽办公即日涉湖至其地召石工泣谕之曰先皇帝栉风沐雨恶衣菲食为天下攘强虏除大盗轻赋薄役汝曹数十年安居乐业亦知所自乎今官取此石欲何用而汝曹尚可顾望不竭力哉於是民趣役不待督责先期告毕使者欲上其劳於朝公力辞曰此臣子职也袁州积雕弊公佐其守穷利病根源一切罢行之郡为一振民困於坊场官弊於护运皆久不能革公奋曰小民知目前之利不知後日之害一陷於坊场则富者贫贫者大坏非死徙不得免乃取尤者白守请於户部蠲除之挺系收檄一旦几空郡人驩呼以为昔所未有护运异时多以所遣官非其人故多蠹害公一切精择才吏

其以权贵请托来者皆力拒絶之抵公去所发漕运四十万缗不费一钱造朝得知兴化军未及到郡而卒享年五十有四公笃学工文辞有集五卷易集解五卷他所着未成编者尚多初太中通判饶州有江州统军官王益者坐事下吏更江州鄂州鞠治狱成而家以冤闻由是复命太中鞠之得冤状明白益赖以不死而太中以决疑狱进秩除郡未几捐馆舍益之家人怀太中之德无已乃厚载金帛以助葬为请公固辞不受曰非吾先人之志也益家人泣而去盖公之清德类此然常畏人知故予亦不得而悉书也公娶李氏冯氏皆早世赠安人今皆从葬徐氏封安人四子二女皆李出?夫迪功郎隆兴府武宁县主簿先公十一年卒□夫从政郎隆兴府南昌县丞寓夫从政郎临安府於潜县尉忒夫未仕女长嫁从事郎新平江府常熟县尉刘祖迈次未行二孙时敏时哲铭曰

以公之才何适不宜晚始专城政弗克施天嗇其报子孙是貽匪筮匪龟眎我铭诗

渭南文集卷三十四

<集部,别集类,南宋建炎至德佑,渭南文集>

卷三十五

钦定四库全书

渭南文集卷三十五

宋 陆游 撰

夫人孙氏墓志铭

夫人孙氏会稽山陰人四世祖沔观文殿学士户部侍郎諡威敏有传国史曾祖之文朝议大夫主管杭州洞霄宫累赠正奉大夫祖延直奉议郎通判盱眙军赠朝散郎考综宣义郎致仕母同郡梁氏夫人幼有淑质故赵建康明诚之配李氏以文辞名家欲以其学传夫人时夫人始十余岁谢不可曰才藻非女子事也宣义奇之乃手书古列女事数十授夫人夫人日夜诵服不废既笄归今文林郎宁海军节度推官苏君瑒逮事舅姑左右就养唯谨凡组织缝纫烹饪调絮之事非出其手舅姑弗悦舅姑歿夫人执丧哀终丧事家庙如生祭荐丰洁中度疾已革犹修秋祭不知其力之惫推官女兄实朝议大夫直显谟阁吕公正已之夫人性坚正善持家法凡家人必责以法度不知者以为过严至夫人能事之则终身怡怡未尝少忤宗党间既称誉夫人之贤又以知吕夫人非难事者也绍熙四年从推官官临安以其年七月辛巳疾終於官舍夫人平生奉浮图氏能信践其言及处生死之际盥濯易衣泰然不乱世外道人有所不逮亦贤矣享年五十有三五子瀛太学生泐洞滨潞皆卓然自立能世其家盖推官与夫人善训督之力也二女长适修职郎通州録事参军王易简次尚幼孙男二人曰暹幼未名字予世家山陰先太尉边夫人实与威敏夫人为女兄弟予与宣义外兄弟也少时交好甚笃今夫人年逾五十而歿予乃及铭其隧则予安得不老铭曰

猗与夫人率德不惰舅姑宜之曰善事我移其事姑以奉女公雍雍肃肃既和且恭相夫以正教子以严施於先後以逊以谦一病不复奄其告终我作铭诗用诏亡穷

奉直大夫陆公墓志铭

吴郡陆氏方唐盛时号四十九枝太尉枝最盛唐末自吴之嘉兴东徙钱塘吴越王时又徙山陰鲁墟宋祥符中赠太傅讳軫以进士起家仕至吏部郎中直昭文馆太傅生国子博士赠太尉讳珪太尉生尚书左丞赠太师楚国公讳佃太师生中散大夫赠少师讳宰少师八子皆以文学政事自奋公讳洸字子光少师第四子绍兴初以?补登仕郎调右迪功郎浦江尉历筠州司法参军徽州司法参军湖北路转运司干办公事知玉山县江淮等路坑冶司主管文字通判通州知荆门军提举江南西路常平茶盐公事江南西路提点刑狱公事主管建宁府武夷山冲佑观遂致仕积官至奉直大夫赐紫金鱼袋封陈留县开国男食邑三百户以庆元元年十月丙寅卒於私第享年七十有二初少师避建炎之乱益东徙居明州鄞县之横溪犹返葬山陰至公兄弟遂有即葬鄞县者故公以三年十二月庚午葬於县之丰乐郷西?之原诸孤

请铭於公从弟某某则少公一岁儿时分梨共枣稍长同入家塾实知公比他人爲详公天资
颖异数岁能属文举进士连拔两浙转运司解又爲江东转运司解首然卒不第公不以忤有
司治经考古益不少懈爲吏穷日夜勤其官未尝事燕游所至上官委以事公至忘寢食寒暑
以趋事赴公在玉山时剗剔蠹弊根原窟穴毫髮必尽正俸外他增给悉弃不取比代去计其
数凡六十余万故諫官尹穡有别业在县岁往来邑中尹爲人喜议论仕者多憚之公不爲动
尹顾敬公每日子光清足以肃吏惠足以养民诸邑求其比殆未见也自荆門回奏事殿上所
陈合指皆即日施行明日孝宗皇帝对辅臣称公之才丞相王鲁公力荐之遂擢江西常平使
者到官治便坐於厅事之後治事退足迹不履中閫揭所治钱谷出纳之最於壁列案皆簿书
终日坐卧其间目阅手披窒罅漏严期会官属吏胥奔走承命不暇不旬月事大治一道肃然
岁旱公一先事爲备得米百万斛吏不能一毫爲姦五州之民讫无流殍於是特进一官遂除
提点刑狱且进用於朝会有临江军民习仪卿爲其奴所杀狱成则谓仪卿弟宣卿实使之宣
卿既服复以冤告凡八移鞠皆然最後特以命公公始得其情宣卿实无使之之迹奴亦无异
辞远近称神明事上刑部刑部以爲疑言诸朝移大理寺穷治久自卿以下亦不能与公异宣
卿竟不死公既以自请得奉祠而归矣於是益知奉法守官之难不复有仕进意甫七十即上
书告老始终进退之际可谓无媿矣公娶林氏吏部侍郎保之女三男子桂修职郎监秀州芦
沥盐場已卒椿迪功郎临安府临安县主簿棣迪功郎徽州歙县西尉二女子长适迪功郎平
江府司户参军詹骥次女适从政郎监楚州盐城县盐场耿开孙男焯燁炜燠皆进士孙女适
文林郎新监台州支盐仓宋安雅余尚幼铭曰

遭余道兮晚乃逢握使节兮抚困穷发积劝兮忘岁凶以经决狱兮平反之功人不我知兮
道则通归筑室兮老於东位列卿兮善始终服三品兮五等之封植櫟郁郁兮起坟崇崇閱百
世兮过者必恭

中丞蒋公墓志铭

公讳继周字世修初周公相成王封元子伯禽於鲁是为鲁公别子伯齡封於蒋其後子孙因
以国爲氏至汉有蒋诩十世孙休自乐安徙义兴阳羨县始爲吴人裔孙伸相唐宣宗僖宗故
蒋氏益大宋兴有堂爲仁宗侍臣之奇执政徽宗初芾相孝宗皆不去阳羨而公之先独益东
徙家处州青田县曾祖球贈通奉大夫祖禔父仔宣教郎致仕贈中散大夫公天资警迈七岁
賦牧童诗有奇思遂精词賦十四弃其业习戴氏礼期年輒通贯诸老先生自谓莫及一日先
生有欲勉成之者期以间处曰吾将有以发子公先时往俟之甚谨先生喜曰子诚可教士当
务学才不足恃也子於书能博观而得要则善如其未也当勉之母以才自足蹈吾所悔公再
拜谢自是穷日之力无所不读人罕见其面遂举进士中其科调衢州常山县主簿试教官中
选历太平州州学临安府府学教授改宣教郎入爲太学正会省官添差签书镇东军节度判
官厅公事复入爲司农寺主簿召试馆职擢秘书省正字进校书郎秘书郎兼国史院编修官
实录院检讨官遭中散公忧服除起知舒州陞辞改宗正丞初公在馆中得对所论甚衆其间
因论和采省运孝宗皇帝大悦曰卿文絶类陆贄省运诚不难行又曰朕将用卿卿果有趋事
赴功之意乎公逡巡退避久之上亦默然方是时士大夫銳於进取者衆得上一语自谓结主
知往往遂投合以取大官公独若不敢当上意者故至是财得补郡然上终贤之辞目上问卿

往年论事朕谓似陆贄今七年矣卿尚能记否舒州待次几年公以三年对上曰卿家贫母老岂得待远次当除卿行在职事官公谢曰臣事君犹子事父固愿朝夕膝下然干蛊於外亦子职也敢有所择上益察公静退乃大悦即有是命改秘书丞兼国史院编修官权吏部郎官公还朝逾二年杜门絶造请诸公贵人以为简我将假他事出之会荧惑犯氏公因对言氏者邸也驿传宜备非常不淹旬都进奏院果灾上谕辅臣曰蒋某博学善论事卿知其人否皆对以不详知上乃自禁中索班簿閱之将作监阙即命除公已而命下则少监也盖有密以资浅为言者上终不快未几迁将作监遂兼太子侍读然所以属公者顾不在是方试太学诸生未出院除右正言实淳熙十年九月也十一年正月同知贡举有礼记义絶出流辈已见黜公力主之拔置高等及启封则吴人卫泾也已而廷对遂为第十二年二月兼侍讲八月迁右谏议大夫十三年九月迁御史中丞公任谏官中执法凡五年知无不言初上受内禅收召四方名士举集於朝其间议论或过为激昂贵近不便之於是妄言方秦桧当国时遴於除授一人或兼数职亦未尝废事又可省县官用度於是要官多不补而收召絶稀公首论之曰往者权臣用事专进私党广斥异己故朝列多阙至有一人兼数职者今独何取此朝臣俸禄有限侍从卿监郎中以至百司月计其俸除百缗而已假使省二十员不过月省二千缗是特一二节度使俸耳其省几何而遗才乏事上下交病且一官治数司而收其禀裴延龄用以欺唐德宗也孰倡此议者请得其人诘之其言盖指贵臣人服其敢言时着令赃吏必坐举官既屡施行矣有蒋亿者以赃坐罪而举官独置不问公劾之曰此非有所避则有所庇耳同罪异罚法且由是废上悦命有司举行如初诏进士黄光大上书送台州听读公极论其不可且曰臣既朴愚不长於言人之有言又不能开导以广言路实有愧焉太史奏日中有黑子公言日象君德岂容陰慝棄之大臣之蒙蔽外夷之侵軼後宫之私谒宦者之用事下民之困穷皆其应也愿陛下仰观天文俯察人事以消羣陰之萌会地震公复反覆论奏而加详焉将行郊礼上春秋寢高或以陟降拜跪为劳公言今距冬至则踰半年愿陛下清心省事养性导和毋强疲劳毋过燕乐饮酒以和气不可以无节而饮过度之酒服药以养生不可以无疾而服伐性之药自今以往宜若神只在其上下祖宗临其左右诚意所加幽明并助将不劳而成礼矣上悉嘉纳议者亦翕然以为得耳目之体有女冠请於皇太子妃以久废上清宫额徙置其居因为住持祝妃本命女冠入谢禁奥适有他女冠祝中宫本命者同列庭中争长旧例以住持者为首事闻上取文书毁之初不知有旧额也皇太子惶恐不敢入朝羣臣不知所为公乃抗言徙废额置他寺观天下皆有之然女冠自不应入宫今当一切禁絶僧尼道士女冠勿使得入而已上悦曰卿此奏善处朕父子间矣封以付东宫明日皇太子入谢上欢甚皇太子今太上皇帝也亦遣人谢曰非公虑不及此方是时上以暇日时御佛书间召其徒入对或自内东门赐肩輿以入故公因以为谏自是遂无所召士论归重都下喧传游奕军统制官答百姓娠妇至堕胎公上章弹之诏大理寺鞠治同时又有故内人陆靓姬者诉其夫恃为阁门官无故弃逐且据有其貲公请穷治其人自计下吏词且穷乃遣人妄誑公曰旦莫且除签书枢密矣公叱遣之论愈力会考殿试进士此两人者相与合力於是大理具狱以为所答乃军妻公为风闻不实即日统制官者复还故官且赐金带而靓姬所诉亦得不治考试毕公方再抗章诏迁礼部尚书辞不拜出知婺州未几以母丧解绍熙元年除丧复还徙宁国府加焕章阁待制徙太平州比四年易三郡适遇水旱公力行賑恤之政寢食不置所条上者皆尽利害之实其大略曰臣夙夜访求荒政言者万端然大指不过广储蓄一事尔有备则拙者亦能集事不然虽智何益中外服其论故奏多见听其以常平桩管通融賑民盖得请乃行又旋已补足且灾伤五分许

賑糶方高宗時已屢着之春秋頒矣常平使者顧劾以為罪或曰是為其所親報宿怨公蓋自言於朝公曰吾初不計此人臣奉行寬大詔令寧過无不及天下豈无公論會使者召用公卒以口語罷歸卜居嚴州得屋僅庇風雨頽垣坏甃悠然自適讀書旦莫不輟時从其耆老而訓其子弟若未嘗貴達者初公任言責累年排击不避權豪至士大夫有以誣得謗傷者輒語同舍曰夷考其人平日恐不至此及廣詢之果不合故一時在朝寒遠孤進之士得以自保而四方賢牧伯皆得究其設施不為怨仇所搖及公治郡善政為一路最所遭乃如此人為公憤悵而公未嘗見之色辭於虐非學問之力疇克至此居嚴逾年稍起提舉江州太平興國宮俄感疾以通議大夫致仕遂卒實慶元二年十一月二十一日也享年若干娶梁氏故戶部尚書汝嘉之孫封碩人五男子綸修職郎台州司法參軍緯宣義郎知徽州休寧縣丞絳承奉郎維將仕郎紳承務郎二女子朝散郎通判温州湯宋彥進士梁至其壻也五孫男一孫女皆幼諸孤將以某年某月某日葬公於處州某縣某原以某获从公游属以銘不敢以衰耄辭銘曰

孝宗龍興大哉為君聖意圖回羣才駿奔於時語公爾朕自知今且巨用欽哉勿違公屹如山却立弗前曰臣實愚敢先衆賢帝初不怡久乃太息是予所求忠厚諒直乃長諫垣乃丞御史陳謨諤諤國論所倚一去不復白首外藩晚踈於讒浩然丘園維始及終進德彌劭勒銘墓隧萬世是詔

渭南文集卷三十五

卷三十六

钦定四库全书

渭南文集卷三十六

宋 陆游 撰

吕从事夫人方氏墓志铭

维申国吕氏自五代至宋历十二圣常有显人忠孝文武克肖先世婚姻多大家名胄妇姑相传以德先後相勉以义富贵不骄汰虽甚贫丧祭犹守其旧养上抚下恩意曲尽虽寓陋巷环堵之屋邻里敬化服之犹在京师故第时於虞盛哉从事郎讳大同之夫人方氏严州桐庐人曾大父楷尚书驾部员外郎大父蒙朝散郎尚书屯田员外郎父元矩朝散郎知建州建州之歿夫人尚幼事母已为宗党所称年二十有一来归生一男一女而从事不禄夫人能笃礼孝义哀死字孤为子求师择友日夜进其业而教其女以妇事皆訖於成不幸得年不长四十有九而卒於淳熙三年祖平犹未仕也及祖平通朝籍以宗祀恩赠从事通直郎夫人亦追封孺人故祖平每言辄霑涕曰祖平不天不得以斗升之禄养吾亲视斯世尚何聊惟图所以慰亲於九原者在墓隧之文乎遂来告某於山陰泽中曰愿有述某亦早失先亲与吾子之憾无异也行年八十每思之殆欲忘生则吾子之悲哀某实能深知之其敢爱一日之劳不以成吾子之悲乎初从事葬於信州上饶县明远乡之德源山以潦水啮墓趾改卜於旧墓少东二百步实庆元二年十二月庚申而夫人初没时祖平窆不能以柩祔从事墓乃即婺州武义县明招山祖墓之旁葬焉自改葬从事諏日奉夫人归祔而筮未得吉祖平於是承议郎知兴化军仙游县事女嫁朝请郎添差通判镇江府曾棐孙男樗年孙女莱孙铭曰

维吕世世有令德繫女父母皆得职夫人熏陶成厥质行则尊矣壽胡嗇归柩同穴慰存歿先刻此铭俟卜吉

夫人陈氏墓志铭

绍熙庆元之间予以故史官屏居镜湖上有东阳进士吕友德自太学来与予游问学论议文辞皆有源流而衣冠进趋甚伟予固异之访於东阳人则曰是清潭吕君绍义之子吕君盖贤有德而其配陈夫人又贤生三子孟则友德仲定夫季友之孟固奇士仲季亦有声学校场屋间能称其兄者也自是友德不閱岁必一过予过必见其进予老病谢客无贵贱多不能接独友德来欣然倒屣不知疾痛之在体也岁戊午十月壬午忽墨其衰絰叩子门哭且言母夫人不幸以八月戊子歿矣得年六十有五卜用十二月壬申葬於孝顺乡蟠谷之原以其家君之命徵铭於予予方病亦不胜悲不敢以病为解乃按从事郎陈君黼状序次为铭夫人与吕君同邑人曾大父懿大父严父子渊皆鄉长者夫人幼孤女功不待教而能稍长佐其母经纪家事如成人大父犹无恙奇之为择所归得吕君既嫁事舅姑以孝闻女妹适人倾其嫁时囊装

无少靳积勤俭以裕财隆祭享以尽孝厚振施以立义吕氏之兴夫人之助为多处事明果虽吕君有不能回者诸子献疑亦坚守初意不为变曰後当如是及事定一如夫人言人人叹服其後吕氏家益康大第千础堂寝尤宏丽而夫人顾自挹损齐居玩道即东偏汛扫一室萧然如老释之庐或终日不出闕如是历十余年吕君与诸子屡劝其归堂中皆不可然丝枲絨缕之事至老犹自力暇日勉诸子以学授诸妇以家事谆谆不惰虽古贤妇殆无以加不幸一日不疾而卧医药至皆却之曰吾固无疾也已而遂不复语诸子方就试驰归省疾颔之而已神宇泰定超然就蛻及有司以友德名上礼部报至夫人不及见矣可哀也已夫人三女嫁吴一夔徐侨徐鼐皆良士孙男四人铭曰

山盘水紆龟食簪从吉日壬申宅是幽宫表表三子奋繇诗书维夫人之贤有以基之

承议张君墓志铭

君讳鉉字深父年三十有八庆元三年十一月壬辰病卒以四年九月庚申孤某葬君於临安府西湖佛首山之原因其伯父寺丞功父鎡以君之友太学内舍生陈公道原状请铭予与功父交二十年信重其言而陈君所叙文亦甚美可考据遂与为铭君家秦之三阳曾大父安民靖难功臣太师靖江宁武静海军节度使清河郡王追封循王諡忠烈配飨高宗皇帝庙庭大父讳子厚左武大夫康州刺史带御器械赠少傅考讳宗元通议大夫敷文阁待制赠少师君幼而颖异强记好学少师遇郊祀恩任为承事郎稍长主管建昌军仙都观遭少师忧未除而母夫人继卒君执丧累年毁瘠几不可识族人以不胜丧为忧共谕勉之始稍自抑然终丧犹羸甚历两浙转运司明州造船场签书安丰军判官厅公事江淮荆浙福建广南路都大提点坑冶铸钱司检踏官监总领淮西江东军马钱粮所太平惠民局积官承议郎君之为场人或唁其非勲阀所宜处君谢之曰景迂晁以道先生所尝为也吾处之惧弗称敢薄之邪讫代去不以卑冗怠其事自守以下皆叹誉之晚官药局尤号闲冷顾无所施其才又素简俭远声色独以书自娱时属文辞见志然未尝妄出以示人所居帷屏壁门皆有铭以自警戒其文尤高没後始或见之皆惊其才服其识以为使未死得享中壽其所至讵可量哉孰谓不幸年止於此君尝以进士试礼部见黜不以怗有司亦遂不复践场屋诸公贵人多知之然仕常从铨与寒士并进至终其身其静退乃天性娶杨氏太师和王存中之孙继室以潘氏少保安庆军节度使邵之孙皆封孺人子男一人渥将仕郎有贤称女一人与孙伯东皆幼铭曰

君家勲德奕世传图像麟阁侍甘泉佳哉公子何翩翩才当用世不永年有美乐石可磨镌百世之下知此贤

朝奉大夫石公墓志铭

公讳继曾字兴宗周武王之弟康叔封於卫五世生靖伯邑於石是为石氏之始祖而会稽新昌之石实自青之乐陵南徙距公二十三世其详见於世谱左朝议大夫累赠正奉大夫讳端中朝散大夫大理正出为福建路参议讳邦哲迪功郎温州平阳县主簿累赠朝奉大夫讳祖仁公之三代也公幼颖异入家塾日诵千言过目不再寺正筑堂名博古藏书二万卷每抚公

叹曰吾是书以遗尔无恨矣客至侍左右进退应对唯谨客悚然不敢童子视之曰石氏兴未艾也朝议捐馆舍时公尚未生遗言吾致仕得任子恩当以予适曾孙公既生补明州文学调黄州黄陂县尉以便养亲监潭州南岳庙历临安县新城县主簿楚州司理参军监行在编估打套局门监建康府户部贍军西酒库知饶州德兴县两浙转运司主管文字提辖行在文思院未及造朝以疾卒於家享年五十有八自迪功郎十迁至朝奉大夫公事亲孝执丧如礼毁瘠几不可识除丧久之乃复居官守家法以廉自励俸入可以受可以无受必辞馈赈可以取可以无取必却徇公而忘私约已而裕物捐利而笃义为主簿新城时谨簿书拊吏姦以善其职闻移於潜丞邑民謹於境上曰奈何夺我主簿久乃涕泣辞去在楚州治狱尤详明属县尉一日获盗十辈意且得醴赏同僚为言君虽恕然不可纵盗公正色对曰盗诚不可纵罪亦不可入囚辞亦不可不尽同僚退相顾曰尉赏不谐矣然憚其正不敢复言狱成真盗财伍人余破械遣去部使者赵公思尤贤公一路有疑狱滞讼辄以委公公治之无遗察虽受罚者皆称其平德兴壮县俗喜负气健鬪而终讼公始下车叹曰是不可以柱後惠文治也於是为政一本於教化有兄弟宗族争讼者辄对之泣下多感愧而去俗为一变缮治学宫聚经史丰饌羞尊延耆老而宾友其秀民又创小学以诱进其童子诵书之声闻於行路会科诏下德兴与荐送者二十有三人比他邑为最盛县之远郊贫民憚多子或不能全公举行胎养之令置保伍以察之甚悉而盗攘因不得辄发其政大抵类此郡以上闻势孤无为援者不报还朝从吏部得两浙漕司属官公澹然无滯留色浙江西陵渡旧设官护舟楫岁久不复择人其弊丛出岁有覆溺公建言请各命文臣一员察其勲惰以为陞黜且渡舟一置备舟二以翼之虽有恶风怒涛可无大害江之津官旧为筑舍数十区为待渡之所後辄废往来有暴衣露盖之患公亦请以官废屋复之事有施行者皆至今为利而议者惜其不尽用也公虽以任子入仕然志在继世科尝贡礼部不合有司退而力学着书比卒遗稿可次第者数十卷多可行世娶郭氏封安人先公一岁卒丈夫子三曰正大正谊正权皆举进士而正大亦尝至礼部女子子九已嫁者五鄉贡进士郭溪修职郎新邵武军司户参军赵善騄从政郎新隆兴府府学教授王益之国学进士孙之渊国学进士刘敏文其壻也诸孤将以卒之明年庆元六年正月丙午葬於山陰县谢墅之原以安人祔前葬来请铭铭曰

噫大夫秀而文学自强仕有闻秩中郎返蒿焄我作铭賁其坟後百世仰遗芬

方伯谟墓志铭

伯谟甫姓方氏名士繇一名伯休莆阳人曾大父会事徽宗皇帝出入荣显显谟阁待制赠少师大父昭左朝请大夫尝入尚书省为驾部郎中父丰之右迪功郎监建州丰国监中书舍人吕公居仁著作郎何公晋之皆屈年辈与之游绍兴间有名士方德亨者是也予尝序其文今行於世伯谟甫所自出曰兵部尚书吕公安老尚书以临大节不挠死淮西之难载在国史伯谟甫遭父忧时财十二岁从太夫人依外家居邵武军执丧已能无违礼而事太夫人及庶祖母以孝谨称入小学与他童子从师授经既退意不满为朋侪剖析义理师闻之悚然自失既冠游鄉校试屡在高等闻侍讲朱公元晦倡道学於建安往从之朱公之徒数百千人伯谟甫年尚少而学甚敏不数年称高弟因徙家从之於崇安五夫籍谿之上所?熏陶器质涵养德业磨礪浸渍以至於广大高明者盖朱公作成之妙而伯谟甫有以受之也伯谟甫既见朱公既

厌科举之习久之遂自废不为进士专以传道为後学师六经皆通尤长於易亦颇好老子尝叹曰老子之言盖有所激者生於衰周不得不然世或黜之以为申韩惨刻原於道德亦过矣又曰释氏固夷也至於立志坚决吾亦有取焉其博学兼取不以百家之駁揜所长如此亦足见其资之寬裕忠厚与世俗异也伯谟甫晚得脾弱之疾春夏之交辄作不能食者弥月乃已庆元五年夏病如常岁至五月庚申忽命家人为之总髮既毕取镜自照正冠危坐而歿得年五十有二娶黄氏曹氏男女各三男曰丕曰立曰平女嫁张銓刘学稼幼未行明年卜葬於武夷山石门寺之原六月丕书来请铭其辞指甚哀予虽老病昏眊亦重违孝子之意且伯谟甫之贤固愿有所述遂不敢辞初德亨之文豪迈警絶人莫能追及而伯谟甫之作则闲澹简远有一唱三叹之音世莫能优劣之也工於书自篆籀分隶行草诸体皆极其妙又能讲其时世之变与圓方腴瘠之法听之终日忘倦遗稿数百篇与它着书甚衆丕等方辑之未成好方技治疾有奇验能逆决生死着伤寒括要亦未成尝谓予曰士贫惟卖药可为然子孙继为之有怠且欺则不免害人不若不为之愈也大抵伯谟甫多才艺所能辄过人其思虑精詣又若此然在伯谟甫皆不足言故不详着铭曰

方氏三徙而不出闽君从朱公始为建人武夷山麓郁有封树车过必式曰是为伯谟甫之墓

留夫人墓志铭

庆元六年十月余之友信安徐赓赴告其母夫人之丧於山陰泽中曰赓不天早失先人先人无他子赓於母氏相恃为命稍长娶妇韩赓出游获从一时知名士学问母氏与妇韩治家事以待赓归赓虽游不敢甚远母氏壽而康间有小疾则驰归省到家往往已愈母氏见赓所与诸公论议辨质文章则大喜曰使汝尝在吾傍詎有是哉今年六月赓客都下得报母氏有疾赓即日归行二日而遭大变至家已无及矣俯仰天地岂能生存大事未终不敢致毁惟是幽隧之铭敢请於执事赓忍死以须执事忍却乎按状夫人姓留氏常山之马厓人曾大父唐大父永父师古世为儒夫人适西安人徐君讳国润徐君一乡善士其卒也故尚书谢公谔状其行而内相洪公迈志其葬不知徐君者以二公许与可信其贤夫人资端重色庄言厉然遇慢已者辄退自省曰吾其有以致之舅姑御家严夫人左右无违嫁女妹凡已嫁时服饰粧泽无所惜与先後处自始逮终欢如一日凡徐君行事见称於族党闾里者多夫人相之而赓之学识卓然闻於世者抑又夫人教诲之力也是可以得铭矣夫人享年七十生丈夫子一赓也女子子三知武当县刘鎔新知乐安县刘璫前监太平县税韩朴其甥也孙男曰鲁孙女长适进士翁时敏余二尚处卒之岁某月某日葬於清平乡官山附徐君之墓铭曰三代益远世废女史岂无淑人曾莫之纪埋玉於泉孰知贞坚我文尚传夫人与焉

渭南文集卷三十六

卷三十七

钦定四库全书

渭南文集卷三十七

宋 陆游 撰

朝议大夫张公墓志铭

於虜士有才足以任重责成谋足以折冲经远而不见知於人不获用於时者世固有矣人犹未以为憾也至於知之而不尽用之而不极利安元元之功卒不克见则後世读其事至於悲伤叹息有不能自己者某自壮岁客游四方获识其豪杰如朝议大夫张公其殆是已公讳郯字知彦和州乌江人曾大父讳延庆大父讳补蓄德深厚然皆不仕父讳几才尤高以子贵赠金紫光禄大夫公少用兄待制邵出使恩授右迪功郎调开化尉兼主簿历平江府西比较务监南岳庙平江府録事参军全椒令复监南岳庙监行在激赏酒库所糯米场枢密院编修官通判建康府主管台州崇道观主管淮西转般仓监登闻检院太府寺丞知真州鄂州提举江南东路常平茶盐公事复主管崇道观建宁府武夷山冲佑观积九迁至朝奉大夫遂请老以子遇郊祀恩积四封至朝议大夫公为人魁磊不凡学问识其大者临事前见逆决若烛照龟卜无秋毫疑滯他人极思虑不能可否者公一言处之常有余裕初为编修官公府吏素容养习为姦利无所畏忌视掾属无如也公因事时白发其甚不可者羣吏缩栗至相语以公白事为忧未几坐台评免归孝宗皇帝受内禪敌犹窥江淮上慨然思却敌复中原庙堂共谋拔擢人材分任两淮事筑城浚隍什伍民兵漕上江之粟以储兵食乃自?地起公主管淮西转般仓然初议乃欲槩付以淮西边事不独治仓庾也会更用大臣所议不果行乃以公监甌院丞大府无深知公者求试外出守仪真得对言臣疎贱历州县颇熟民间事今蒙恩使治郡不敢不力惟淮南新被敌祸民散徙未还臣当体圣意安辑抚摩察其蠹弊一皆上闻惟陛下省察如臣不任职固不敢逃罪前守员琦献羨缗八万皆文具实不有一金公到郡悉以实闻讫得免输俄诏两淮郡守及部使者各上用钱券利害公力言券用於四蜀全盛之地故能流转然犹有弊今两淮凋瘵如此诸郡赖以给用度者不过酒税新为战场无复土产可以贸易独赖钱币而已若用券商贾且不行何以为郡时议者多妄揣时事谋开边隙公密奏敌盟固不足恃然其主孱懦愆故酋败盟之失方幸无事其任事之臣又皆齷齪日事琴奕无远略可知我若惑浮言遽动不惟力有未给又激彼使生事朝廷且旰食矣上颇采用其说公因言真为杨楚之冲当城此郡以固人心度费缗钱十万米三千斛而郡有上供与经制羨数可得大半止乞给降三万缗发傍近屯兵二千人臣身自督役不再閱月可成既得请果以四十有四日告毕楼櫓屹立而民不与知上闻益知公可用代归入对所陈又合上指乃有武昌之命入辞上慰諭曰卿真州之政不苟鄂上游重地是以委卿卿便宜体此意到郡有事第奏来御前当遣金字牌报卿公感奋益尽力鄂为江湖间一都会总领转运及都统制三司鼎立异时多纵肆虽幙府僚属皆下视郡守公素刚介难犯人固已震畏其名及视事衣冠视瞻甚伟号令设施皆当人心由是莫不敬惮而军中犹倔强自如纵羣卒入市视民及郡兵有长身中度程者辄毆

以往公捕至郡庭呼吏作奏军吏罗拜请後不敢自是讫公去无敢犯都统入朝有营卒夜挟刃贷於富室胁使不敢言公廉得之驰入提举军事张平家平素以兄事公呼家人置酒公曰我来正欲饮但当得劫富民者行军法乃快饮尔平惶恐立捕治如公言妖人吴兴居属邑有诏命捕公求得善捕盗者唐青厚资给之且授以方略遣行而方士皇甫坦挟禁奥势为私请公弗听俄获兴以献及公还朝上首问获兴之状公谢曰妖人在郡境不即置法至烦诏命臣乃有罪然唐青实尽力赏未偿劳敢昧死以为请蜀士以丧归遇名盗破舟杀人又欲斲其棺公厚赏捕之竟伏法由是江路清夷有誤触舟者柁师大言曰今张公在此汝尚敢尔邪岁大疫公为之营医药以全否为医殿最饿给之食死予之轉民家一牛死贷钱三万以买犊治声闻於行在及使江东公言部中旱饶南康尤甚济之当如救焚拯溺今当奏事往返且两月请先驰至部议所以賑恤者又条上其事甚悉上皆从其请事略定乃入对且以闻上惻然曰何以使吾民得食至麦熟邪公又具以计画对上劳勉遣行会诏诸路诸郡陈事之不便於民者公因言岁饥民流去年渡江而北者殆数百万至淮南亦无所得食死者相枕藉今仅中熟而郡县不度民力督常赋及私负甚厉加之造寨屋教民兵行和籴刼马棚铸钱币未见其利已不胜其扰愿发德音一切罢之此数事有主之者施行方力而公尽言乃如此武臣提点刑狱怙权侵官公略不为屈职业所及必力争得直乃已至甚不可者又以互察法劾上之其人惧乃与池州守相附结排公赖上素知公譖不得行岁满请奉祠而归初待制治命以遗恩官诸侄仲兄秘阁公祁辞不取以予公之子初不告也公闻亦固辞而乞官孤侄孝严寓家萧山收养孤嫠与同甘苦视所居之鄉如其宗党进善人海责其有过者俗为一变门当吴越大道有病於旅死於行公以私财疗治斂瘞之无遗力岁恶饥民争归公公为设食不可数计然用度初不给足食或不肉也间无事时出门尚羊扶一童立里巷老稚遥见稽首祝之曰愿吾父壽百千岁为穷民归淳熙十六年八月七日晨辟户有方外士二人来谒公接之如平时将食曰吾今日病不能同汝食家人请命医公不许且麾使去家人行数步回视之奄然逝矣享年八十有七娶余氏进士芾之女封恭人赠硕人先公三年卒诸孤以公捐馆之明年十月二十有八日奉公之丧与硕人合葬於庆元府鄞县桃源乡西山之原子六人孝伯朝请大夫权礼部尚书兼侍讲兼实录院同修撰孝仲承议郎京西南路安抚司干办公事孝叔孝季未官而卒孝穉从事郎监严州神泉监孝闻从事郎新差管押绍兴府石堰庆元府鸣鹤盐场袋盐女四人修职郎高得中进士王孝友其壻也其二早卒孙六人守之宜之约之及之即之能之孙女十有五人初公兄弟皆负异材惟待制稍显荣然皆不得尽行其志秘阁之子中书舍人孝祥以进士第一起家出入朝廷二十年文学议论政事隐然号中兴名臣亦未四十而卒公晚遇主又壽最高亦竟不用识者谓天嗇其报将大兴张氏後而公之陰德在人其後亦当大今尚书公忠孝文武方极柄用公既以通议大夫告第矣追荣且继下然後知识者之言为验某生晚不及拜待制之门若秘阁及中书则辱知厚甚晚始识公於武昌公又特期之远不惟以秘阁中书故也时方葺南楼公朝夕召与燕饮慨然语曰吾南楼天下壮观要得如子者落之子之来造物以厚我也谢不敢当今尚书之客皆一时贤杰其巨笔鸿藻皆足以慰公於九泉而尚书独以志墓属某岂犹以公遗意邪用是不敢辞铭曰

世患无才才大輒弃万里之涂方驾而税若时张公表表国器入掾枢庭谤讒亟至两城一节所至大治抱负万亿出微一二犹或忌之竟以谗蹶言归江滨风雨财蔽聃然耄期化被闾里天其知我报在享子教忠之荣四品告第尚有宠褒震耀一世爰勒斯铭式贲幽隧

王季嘉墓志铭

予自尚书郎罢归屏居镜湖上郡牧部使者多不识面至县大夫以耕钓所寄尤避形迹弗敢与通惟两人曰山陰张君橐会稽王君时会相从驩然如故交张君端亮英达不幸卒於官王君尤渊粹有守官满造朝来别予怅然语之曰赠行当以言愿足下自爱毋以用舍媿初心败晚节君曰是我志也及见除书从天官铨调湖南转运司主管文字以去方是时大臣多知君贤近臣或奏疏荐君而扬历久且尝为邑以最闻近比当得美官君一不顾方上书论进退人才当考实不宜以近似斥善士已而迂道来过予喜津津见眉宇曰某於是粗能不负公所期矣予作而畚曰仆不失言足下不失已皆可贺也及卒予闻讣惊叹为朝廷惜此一士亦窃喜君仕虽蹶而志达也会其子前葬来求铭因叙而铭之君字季嘉庆元府奉化县人曾大父起大父元发皆布衣考中立以君有列於朝再贈至宣教郎君自少时事亲孝事兄悌处乡里学校从师择友甚严言语举动忠敬有法与兄时叙同登乾道五年进士第仕自台州司户参军历袁州州学教授监行在左藏西库知绍兴府会稽县最後终於长沙自迪功郎七迁至朝散郎赐绯鱼袋初魏惠宪王判明州累年君移书丞相史魏公言国家早建储宫以定天下之本而魏王偃藩在外天下皆以为当然者父子异宫天下为家东藩之守犹异宫也然父子兄弟之情终若有间虽曲加恩礼岂若用故事使得日奉朝谒外庭济济示天下以公内庭熙熙从家人之乐哉史公读之太息称善会魏王薨言不果行观君此书使得居中任用其补国家化天下必有大过人者矣有识之士恨君之不遇也会稽岁霖潦郡方督已蠲之赋甚急君持不可守不听乃袖告身易服立庭中力争守为之夺气民赖以纾遂修社仓之政因立保伍以察不孝不悌惰游不逞者风俗一变会营奉永阜陵吏按旧比抱文檄如山环案立君徐视去十之七余不可已者召民面给钱粟与为期会於是民不知役而事悉集君所至设施多可称述论事亦多识大体予所书特其章章可备史官之求者若廉於货财简於自奉不纳妄馈不受美俸此在君为不足言故皆略之君銳意经学有易诗书论语训传乡饮酒辨疑凡数十百卷文辞简古尤喜为诗与范文穆公及尤延之杨廷秀倡酬诸公皆推之有泰庵存稿三十卷病已亟犹强起拱手端坐无惰容顾家人曰吾学易昼夜之理甚明遂卒享年六十有四庆元六年正月丙申也娶杨氏封安人淑柔孝恭晚益好静安於死生有学士大夫所难者先君一岁卒男女各五男宗广以君遗恩入官宗大太学生宗朴早卒宗野宗愚女长嫁进士杨琪迪功郎沈黯进士杜思问进士孙之颖幼尚处孙男五人与点与回与赐与文与求孙女七人皆尚处诸孤将以十二月甲午奉君及安人之柩合葬於某地之原铭曰

君才隗伟天所授早笃於学晚益富年过六十是亦壽道悠运促志弗究子孙森然敏而秀如芝在庭骥在厩筑丘植櫟日高茂盛德表表宜有後

石君墓志铭

会稽之姓石为大君讳允德字迪之会稽剡人梁开平中分剡为新昌君之籍在焉为新昌人五世祖开府仪同三司待旦以学行为范文正公所礼子孙又多贤为闻人而石氏益为名家君曾祖景恭祖端怡父图南独皆不列仕籍然邑人皆推以为贤长者至君继以好学谨行事後母至孝举乡进士亦每在选中然卒不遇以死吾尝观一邦一邑之士其犯法触禁流离困

蹈者非必皆其身不善也问其先往往丧节而贵者也否则不义而富者也否则养交党事颊舌饰诈售伪以取名誉者也其仕而达处而给足且有才子令孙者非必皆其身之贤也问其先往往正直而不遇者也否则廉让而贫者也否则笃学守道而不为人知者也若君之家世庶几於正直廉让笃学守道者欤君又能继之而滋不遇初君先世寡兄弟至君亦子立而君乃生四子皆不坠诗书之业天之报将有在矣君薄於自奉厚於宾友所居财蔽风雨而作东园有大堂方池为宴客之地客至把酒赋诗奕棋投壶或终日乃休平居尤乐施惠尝葬不举之丧遣失时之女晚与族人吏部公画问议同作义庄以给族之贫者会吏部下世君乃与其子提刑宗昭将终为之而君又歿提刑亦歿善之鲜克举如此於虐悲夫君歿以庆元六年四月癸丑享年四十九娶许氏朝散郎知辰州从龙之女子孝本孝施孝闻孝积皆进士女孟嫁太平州司户参军赵时儒仲季未行诸子将以嘉泰元年十二月甲申葬君於仙桂乡大姥山之原实祔大墓来请铭铭曰

维石畜德世克嗣至君宜显乃复蹶报不在身在後裔天之昭昭其可恃

夫人陆氏墓志铭

夫人陆氏吴兴人曾大父某大父某皆为荐绅士大夫父某有学行为进士母刘氏同郡户部侍郎刘公岑之女刘公盖与进士君游甚久夫人幼有美质懿行既笄嫁金谿人故通直郎黄君齐黄君仕至靖州军事判官以歿夫人持家教子有法度庙享宾燕合礼嫁娶不苟里中多称之遇疾虽笃不乱起坐盥栉正衣冠乃歿其歿以庆元六年十一月己未享年六十七上距黄君捐馆舍三十六年初葬以嘉泰二年十月壬午实祔黄君之墓夫人三男子曰甲曰庚曰丙一女嫁陆縠四孙自勉自得自立自防一孙女予与夫人皆吴人夫人之先徙吴兴而予家徙山陰其实一族也而縠又予从子故其孤以朝奉郎通判江州黄君荣之状来请铭铭曰生苕溪嫁汝水夫善士又有子家方兴孙嶷嶷葬得铭永弗毁

程君墓志铭

君讳宏济字志仁兵部尚书讳瑀之子尚书乡里世次家有谱墓有碑国史有传君生於宣和六年客有得古劒於武夷山中以献尚书已而君生遂以劒命之幼读书记诵博敏号奇童十二能为诗有老成气绍兴初尚书以给事中劝讲还英殿敷绎古义开广上听以济中兴之业者甚衆君槩闻其说辄叹息不已一夕梦道君皇帝大驾南还且以告尚书尚书悲慨为赋诗他日以示中书舍人傅公崧卿傅公抱负大节常思捐肝脑死国家与尚书尤厚读诗感歎曰忠义出天资非勉强可至吾辈老矣使後生皆如此儿寤寐不忘国事尚何虑黜耻之不雪哉十年以宗祀恩授右承务郎久之不调官或劝之仕皆不从秦丞相桧亦尝以问尚书君尤不谓可凡再为监南岳庙法不许复请乃命以江南西路安抚司属官尚书壽终君哀慕过人除丧监通州金沙盐场秦丞相用事久数起罗织狱士大夫株连被祸者袂相属也廉得尚书所着论语说捫近似语以为讪祸且叵测母夫人忧惧不知所为君侍左右无俄顷舍去且慰解言先人逮事三朝上所眷礼必且蒙矜宥愿母戚戚母夫人赖以少安君虽竟坐罢官然母子居家如平日同时得罪莫得与比盖高宗皇帝终保全之如君所料久之起家为江南西路转

运司干办公事时李庄简公光自海南归舟下潇湘而病君曰吾先友也且儿时蒙公知得一见死不恨亟谒告往迓兼程抵江州则李公至蕲州薨矣君吊祭尽哀历江南西路提举常平司干办公事遭内艰除丧监建康府榷货务乾道元年六月丙戌以疾卒年财四十有二官止通直郎明年五月庚申葬於蕃阳县鉴山之原夫人临川黄氏吏部郎季岑之女六男子有功宣教郎故通判秀州有孚朝散郎户部稿赏酒库所主管文字有元进士有徽太学内舍生充国子监小学教谕当赴殿试正奏名有初有大皆进士二女子长适进士鲍庭掞次适黄州黄冈县尉臧海一孙蒞始予自蜀召归出为江南西路常平使者进士程君有章字文若以五字诗为贄卓然有元和遗风予刮目视之自是二十余年数相见及见於临安程君已入太学更名有徽字晦之才名动一时即君第四子也来属予铭君墓不获以衰病辞铭曰

古士奚学惟忠暨孝君虽不试志弼名教中蹈嶮巇凛不回挠咨尔後人是则是恸

渭南文集卷三十七

<集部,别集类,南宋建炎至德佑,渭南文集>

卷三十八

钦定四库全书

渭南文集卷三十八

宋 陆游 撰

朝奉大夫直秘阁张公墓志铭

公讳瑄字子律宁州真宁县人其先为邠宁望族世以学行着或居邠或居宁居邠之後故吏部侍郎兼侍读舜民为元佑名臣居宁者则公之大父大中大夫也讳居擢元佑六年进士第元符三年徽宗皇帝嗣位下诏求言太中时为黔州彭水令上疏切直出数百人上而数百人者得其副亦叹以为不可及会蔡京入相取奏疏次第之置奸党上等特降官冲替永不许改官数年遂卒於沈废後以子仕登朝累赠至今官实生朝请大夫通判永州事讳遹则公之考也亦累赠至中奉大夫中奉遭乱南渡从大将岳少保飞为之属身先将士屡与金人鏖战走其名王大将策功进官方慨然以功名自许会朝廷与金和中奉去幙府调知岳州巴陵县有异政久之佐永州以歿识者谓用不究其才後当有兴者公始以郊祀恩入官调赣州会昌县主簿未几以材选摄事兴国丞信丰令皆閱岁会昌与梅州比境梅移文捕逃卒卒已亡去巡检司乃发卒围其所亲李杞舍杞雄其乡以为耻诟聚谋乱令托辞委县去以印属公公不为动械巡检卒系狱亲为檄谕杞以祸福杞皇恐听命县赖以无事兴国有婚讼久不决公察其妇人不类良家一问引服信丰俗悍输赋卒不以时吏亦以此扰之至相率抱嶮自固吏计穷即以民拒官为言公曰岂有是哉驰至近村憩僧庐中以善言招其乡之为士者及父老与之酒食从容曰税赋岂可终负然已失时姑使吾得十七藉手若何皆踊跃而去更相告即日皆集如约公去而之他乡悉如之旬日归报大守公迈异其能方荐於朝而忌者间之於部使者遂止调潭州右司理参军有老卒夫妇居牙城中白昼为何人所屠而掠其赀卒有义子兵官疑之执送州且以同处之卒及牧羊儿为证既击狱公亲诘之皆词服公察其冤他日取牧羊儿寘壁间引义子者与他重囚杂立庭中出儿问孰为杀老卒者懵无以对乃入白州请揭厚赏募告真盗不閱日获之则卒王青也捕至具伏且得其赀於市库无遗即日释义子去湘乡县械铺卒张德上州以为手刃其叔祖公引至前语之曰兹罪十恶赦宥所不及汝兄与叔祖同居汝暂自外来有何憾而戕之德泣曰囚来省叔祖不得见兄以疾告就视则死而非疾也方愕眎兄与里正及邻人笑谋执诬之且以言胁诱谓决不死今乃知死矣因称冤不已公亟呼其兄与对兄情得语塞遂伏辜他死囚类此得不死者十有七人终不言赏府帅林公栗以直得名临事刚果小人揣知之有榜於州治门言提辖官者为帅谋将称兵林公怒阖门徧呼吏卒验其书一兵典者与榜出一手亲诘不服乃以付金厅苛惨虽至终不服乃属公即金厅鞫问公寬之而谕使以情言且许以不死始具言提辖官横甚为所患苦之状度不可许故出下策为此榜以为不及帅则无以激其怒不知乃陷重辟公问於六局兵人人言同公乃白帅且求寬其罪林公大怒嘻笑必诛之公一日凡十余进力争曰帅所以属某者欲得其情也今得其情而失信则有司自是不复可鞫狱矣争至莫林公亦悟黥隶岭外而已民有诉一冤死

而十年不见理者诉於提点刑狱马公大同马公以属公公閱其狱皆谓震死公独得其死状实以鬪欧非震也公曰臯固有所归然岁月久屡更赦令当从末减马公强果自信下吏莫敢与争公独不为屈又有讼者马公直判委公勘某罪公力陈其不可马公皆霁威严如公请识者两善之公每白事姓名岁月及事之名数曲折皆成诵在口无一遗者马公始亦疑因强记一条验之牒皆合乃大叹服自谓不逮又调常德府武陵县丞政事益明习摄县及府从事者凡再閱岁绍熙中武陵大水犯县城不没者三版门不得阖水且入城公时方摄县丞命实土於布囊以窒门俄而水定乃设方略募舟救民且亲载粟户给之泥行露宿无所憚蠲阁赋输一切必以实吏不得一摇手民忘其灾县三里港灌溉甚广久弗治数遇枯旱公为筑之不愆期乞事因治他陂塘无遗利迨今赖焉以荐者及格改宣教郎知隆兴府奉新县县有营田征赋比他为最薄民竞耕之久而营田罢以鬻於民履亩?税比旧已增俄而复命折粟帛以緡钱其低昂或至十百民皆破家不能输令屡以病告不见听公力请又不听则欲弃官去会帅张公构来是公言始奏蠲之户千有九十皆若更生杨公万里记其事他兴除利害劝农桑筑陂防兴学校不可胜载所部及府俱以其事论荐於朝而王公大人亦自知公乃命主管官告院进将作监主簿太府寺丞方公在朝子右史舍人翱翔三馆俄擢从班父子相望於班列中客至门见公便坐从容闻国朝故事前辈履行後生所未闻者人人履足退而见舍人硕大雋杰之资同时进用为国光华史册所载殆无以进焉而公了不以自满方勤其官如仕州县时文思院火告身绌无在者士大夫不以时得告身公时在告院建言援故例便宜以杂华绶紓目前从之药局旧隶太府积奸弊至衆公曰夜穷极弊原发梲而缕析之都人无贵贱皆得善药方擢眞要官而近比厄於未为郡公亦小疾思彷徨外藩力请去乃知嘉兴府中贵人篮氏殖产於崇德县名田过制而役不及有钟淳者纠之篮迫期去产以规免官吏欲许之公判曰两家物力相去远甚而篮又白脚必如法乃可一郡称快故人子槩舟方醉纵从者与将官朱樗年忿争交诉於府公察故人子不直治其从者不少贷民张璠得临安营妓与之归遂欲弃妻出子其兄止之复悖兄兄以告官公为逐妓归临安且以大义开谕之於是璠为兄弟夫妇父子如初其为政有古循吏风类如此且摘发隐伏照了如神良民虽相与化服而奸豪之谗作矣改主管建宁府武夷山冲佑观公怡然命驾去郡人钱公孜乡之老成人尝以书抵其舅娄公机曰张公廉直有守近时鲜及今乃遽去此无他吾乡士民福薄耳归过国门右史方请外乃櫂舟北关需同载而归会右史被命使金国右史将恳奏辞行公不许曰使事不可辞我留此待汝自蓟门回乃偕去未晚也遂寓钱塘门外张氏园甫再旬右史既渡淮而北公女孙丑老生十岁暴得疾丑老慧而孝公甚爱之朝莫亲抚视因亦感疾比其夭家人不敢告而公揣知之曰吾与此孙偕逝矣遂卒享年六十有四上始闻之疾革以子方远使加直秘阁盖异恩也公自宣教郎七迁至朝奉大夫赐绯鱼袋娶韩氏魏忠献王元孙通直懿胄之女封?人三子嗣真从事郎新州新兴县尉先公七年卒嗣祖苦学得心疾未能仕其季则朝散大夫侍立修注官兼实录院检讨官国史院编修官资善堂小学教授嗣古也一女适宣教郎新知太平州芜湖县赵汝鐸三孙烜煜举进士幼未名公资磊落恢疎与人交洞然无城府而默察其贤否邪正无能遽者善则称之不遗余力不善则苦言规之虽愠不恤也初中奉公遭乱去秦生公於襄阳遂卜居宜春公仕宦五十年先畴之外不增一垄比右史奉公丧归至无屋可庀其清约如此右史卜以开禧元年八月丙申葬公於袁州宜春县归化乡宜化里大富岭赵家冲之原以王君克勤之状来属某为铭某与舍人同为史官因得从公游义不可以耄疾辞铭曰彭原之张与邠相望邠迁杜城元佑之英彭原绵绵独处不迁至太中公得谴以忠中奉履艱

有功兵间传家禾兴益以才称刚不容世方用而蹶是生记注麟仪凤翥父子在廷国有典刑子聘於幽公逝不留上闻叹息加錫秘职生谁不终责耀无穷刻铭隧道百世是告

山堂陆先生墓志铭

陆氏之遗谱曰汉太中大夫贾生仕为豫章都尉葬於吴胥屏亭始为吴人至晋侍中赠太尉玩生始始生万载万载生子真子真生惠澈惠澈生闲闲生儿儿生丘公丘公生探探生山仁山仁生玄之玄之生元生元生生景融景融後四世曰文公希声仕唐为户部侍郎同中书门下平章事文公生崇崇生德迁犹居吴遭唐季之乱始从家抚州之金谿德迁生有程有程生演演生处士讳戡配曰周氏处士生赠宣教郎讳贺配曰孺人饶氏宣教生从政郎讳九思配曰孺人赐冠帔彭氏从政生山堂先生讳焕之字伯章一字伯政生而穎异端重五岁入家塾坐立语默悉有常度读书自能质问出长者意表与季父象山先生九渊生同年学同时先生不敢以年均狎季父象山则朋友视之磨礲浸灌甚至十三学为进士即有声十六诸父开以大学先生一闻辄穷深造微极其指趣而文章机杼自成一家宿士见之多自贬以为不可及屡贡礼部皆不合学益成文章益奇闵世学多沦於异端尤务自拔出以张吾道意所不可虽名儒显人为时所宗者必力斥之恨力之不足也诸父虽继以进士起家亦不用於时象山晚为朝士陆陆百寮底旋复斥死先生滋信其道之穷盖将退耕於野着书传世而未及也以嘉泰三年十月戊子卒年六十有四诸孤以是年十二月乙酉葬先生於某乡之福林娶陈氏鄱阳人有贤行先十八年卒子男三洽濬浹洽笃於养先生出游赖以经理家事无後忧濬游太学有隼才而器度渊粹可喜浹方就学女五项点朱日迈邓文子其壻也皆良士余二尚处先生葬曰迫幽隧之铭未刻既葬二年濬以先生之友晁君百谈之状来请铭某以既尝序先生文章所谓山堂集者而先生多朋游不应并以铭见属因辞焉连三年请益勤乃叙而铭之铭曰

陆姓入汉祖好時兮迨及豫章始南徙兮吴晋至唐世见史兮断自文公三百祀兮传世八九皆可纪兮虽不公卿世为士兮後乃浸大名实伟兮培养既久产杞梓兮维时伯章继以起兮白首笃学未见止兮攘斥异端正而不诡兮天不少留使耄齿兮伯章之志在其子兮我铭於隧亦以诔兮

监丞周公墓志铭

公讳必正字子中曾祖讳衍朝奉郎祖讳诜左朝散大夫皆赠太师秦国公曾祖妣郭氏祖妣潘氏李氏张氏俱赠秦国夫人考讳利见左朝请郎赠金紫光禄大夫妣尚氏赠邳郡夫人世居郑州管城县祖秦公通判吉州遇乱不能北归因家焉光禄与弟秦公讳利建皆世以进士擢第公与从父弟丞相益公讳必大成童俱入家塾学行修立俱以世科自期已而益公策名又举博学宏词如其志公乃不偶始以祖遗泽补将仕郎易迪功郎监潭州南岳庙亦尝贡至礼部久之调袁州司户参军适岁旱盗起分宜尉巡检捕之皆不能获安抚公公茂良闻公至召问计公曰此皆饥民羣聚贷粟以自活耳桀黠为之倡者财一二辈可以计取余必自散糒公乃檄公往捕至则谕以祸福解散其党而陰募乡豪授之策俾擒致盗首於是盗尽得坐诛

者二人而已。龚公复委公以荒政。当是时，自郡至属邑，流民坌集。公日夜行视，凡累月，全活钜万。诸司共荐於朝。孝宗皇帝召对便殿，论奏合上，指谕以将褒用。遂改宣教郎，知建昌军南丰县。南丰，剧邑也。公遇事明敏，常若有余。民柏氏夜被盗，并杀守藏奴，贼逸去。公物色求之，果获。面诘，犹不承。搜其家，得白金器一篋。既至，倒奁出之。囚闻其声，即引服。净梵寺有盗，夜斩关入。既获，公察其非盗，挺出之，立赏捕真盗。僧恨甚，以公为故，出诉之郡。郡方以他事怒公，即逮所纵囚系鞠，甚峻。囚不能自伸，并邑吏皆重坐。未几，获真盗，送郡拒不肯治。公乃以白诸司。虽治犹久不决。御史闻之，奏徙大理，乃得实如公所言。邑赋色目极繁，以入偿出不足者，犹四万缗。率苛征，预借苟追，吏责公至一切罢之。且以其实言於转运司，得稍脩邑。赖以苏。乡校久不治，公凡可以补弊起仆者，一切为之。甫满秩，诏赴都堂，审察除主管官告院，进军器监丞。会益公参知政事，公请外知舒州。陛辞，所陈又合。指命公恤民隐，修武备，辟田莱，并究鼓铸利害。先是，同安、宿松两监岁铸铁钱三十万缗。言者以为扰，既损其半，而监亦遽废。亟复，会岁荐饥，又命罢铸。故临遣及之。公至郡，乃知地产铁炭，民以不售为患，而兵工失业，亦或转而为盗。故当饥岁，尤宜鼓铸，以聚民。条上便宜，诏命复铸。且省宿松监入同安。公奉行尤有术。公私皆便。又奏：自昔鼓铸，未始殽以铅。止因议者谓入铅之钱不可为兵。始殽铅以铸。臣尝亲视之，铅之精者为飞烟，其滓恶下坠，鑪底与铁初不相为用。亦尝以入铅不入铅钱较其坚脆，及冶为兵，初无异。徒使处信两州岁岁挽运，谓宜废夹铅之制。又奏郡岁输上供缗钱五万八千，旧皆倚办於常赋。不足则取征榷之赢以补之。乾道间，守臣偶以羨余为民代输租税一年而来者，因踵为例。会征榷之赢不能当其半，余三万趣办於坊渡二十九所。今诸场旧余铁炭及民所贷钱凡一万五千缗，若取以为铸本，可岁得三万缗代舒民上供。悉罢坊渡之征，百世利也。事俱施行。大修学宫。如在南丰时，又立文翁庙於学，立周将军庙於城南。皆舒人也。复故堤城北，以御灊溪涨溢。民田数千亩，复为膏腴。因作四桥於北西东门之外。其一公自捐俸为之，州民号周公桥。郡东南有乌石陂，分其流，旁则为石塘陂。乌石之民欲专其利，乃壅水使不得行。石塘之田岁以旱告。公命怀宁令丞视之，得实图上於州。公按图自以意定水门高下，甫去壅水未尺，余得古旧迹，与所高下不少差。陂利始均，石塘民喜至感泣，乃歌曰：乌石陂，石塘陂，流水溅溅有尽时，思公无尽时。徙知赣州，过阙上谕曰：闻赣兵悍，骄死徙之余，今亦无几，可勿复补。傥尚循故习，卿当便宜行事。朕将以他郡兵更戍。公对守臣古号郡将，今结衔云知军州事，苟有过，臣自当临，几应变不敢劳圣虑。上喜，明日语宰相曰：周必正有器识，似其弟。谓益公也。至郡，江西副总管钱卓本起行伍，暴人也。入境下令诸校将，以翼日部肄其子弟，选补军额。初不以告郡，会卓请见，公诘其率意力一之，且微谕以上旨。钱惊谢，然意不悦。乃漏公言於诸校，将激使诣郡诉。公徐晓之，如所以告卓辞，指明辩卒，皆帖服，无敢讟者。章贡二水来自郡南，夹城东西流，皆有浮梁以济，而城南独以舟渡。溪恶，或至覆溺。公始作南桥，又治道路以石，易甃最数百丈。兴国县之安陂溉田六十顷，水势自上奔突，故难筑而易坏。坏且五十年，公命复之，费不及民。擢提举江东常平茶盐公事，入奏还道玉山。县有徐田陂，某渠濒江，数决。将徙渠，则地主不可。将徙陂而下，则柘陂居下流，惧为己害，复不可。交讼於公。公谕徐田民买地凿渠，倍陂其直。柘陂民遂幡然，无靳色。不三日，渠成。溉田三百余顷，民大感悦。江自陂而下，避碍析为两支，其一掠县壩而去。岁久岸溃，民居其滨者，闻公修渠以利民，乃遮道自言公为相，水之冲为石堤，民欣赖之，相与绘公像祠於玉虹桥侧。岁时奉牲酒抵，今不懈旧法，没官之差，以畀民耕而归其租於常平。及是，议臣请鬻田以价充余本。公言如此，则常平储愈匱，请除新令。光宗皇帝从之。因并行於诸路。池州旧试贡士，率寓景德寺，隘不能容。士病之，会阙守公兼领郡事，始作贡

院植八桂於門名其門曰擢桂是歲貢士五人而三奏名士以為公之賜言者誠於間言誣玉山之役以為抗罷歸主管建寧府武夷山冲佑觀上章納祿不許再命武夷祠而公歸志已決告老益力乃許致仕公自江東還闔門屏外事讀書賦詩者累年益公少公一歲亦謝事歸第相與置酒高會無少間時人比漢二疏益公薨公哭之慟不復有世間意開禧元年十一月旦感疾不起享年八十一娶向氏文簡公五世孫封恭人前公一年卒男二人縉蚤夭綱今為修職郎前潭州醴陵主簿一女適進士胡榆孫男二人頌穎皆將仕郎孫女一人尚幼恭人之歿也葬廬陵縣膏澤鄉金鳳山祔大墓之東至是乃以十二月庚申奉公柩合葬焉維公仕自廸功郎積遷至奉直大夫爵管城縣開國男服三品公孝友最篤歸自龍舒筑第於永和鎮聚族共弟侄蚤世育其孤如己子伯氏宜春守出妾之子世修流落潁境公訪得之為治產筑室於永豐蓋伯氏志也其處閨門率如此鄭人有寓旁近者皆歲饋之剛介有守不以進退累心方家居時前後當國數公多與公有雅故數問公安否公應之泊然益公屢推恩數以貶公亦辭不受善屬文尤長於詩孝宗皇帝嘗訪當代詩人於胡忠簡公銓忠簡首稱公敷文閣直學士程公大昌亦稱公文學操行之美晚取莊周息黥補劓之說名其堂曰棄成因以自號有文集三十卷書有古法四方丰碑巨扁多出公筆既葬綱以朝奉大夫新知真州郭君贊之狀來求銘某與益公定交五十年且嘗遇公於臨川適重九日同集擬峴台風度話言尚可想也而女孫又歸公之從子紀情好厚矣銘其敢辭銘曰

仕不為不逢人不以為通年不為不究人不以為壽有愛在民百世不泯有棄其丘利爾後之人

夫人樊氏墓志銘

廬陵隱君子宣溪王英臣之夫人樊氏同郡永新人曾大父佐大父仲文學行皆見推於其里中父才字子明尤以賢著聞敬其里之長老而教其子弟環數縣從之決曲直雖所不與亦皆厭服往往內省而徙義為善士矣二男五女獨奇夫人以為吾門亦將賴焉及少長女工婦儀未習而能事親左右無違及笄歸英臣君舅南鵬交友傾一世食客塞門君姑不幸早沒二長子亦不得年冢婦嫠居悲傷齋居不能與賓祭事亞婦又父母奪志獨夫人佐英臣仰事俯育凡祭祀燕享將迎吊婚姻之事一皆身任之英臣隱操達識見於楊公廷秀志銘先夫人十五年捐館舍夫人不以家事累諸子使皆得用其力於學暇則勉以道義名節不獨責其仕進起家也及琳以進士策名又嘗有列於朝出為大縣文章得盛名然後荐紳間愈知英臣及夫人之賢夫人母壽百歲夫人無一日不遣人問起居珍膳良劑必出其手終身不少怠又請於朝得封卒如子明之言夫人以宣和五年五月某日生以開禧二年十一月甲辰卒享年八十有四卒之明年三月甲申葬於廬陵縣膏澤鄉山寺岡之原子男四人長即琳也宣教郎新知潭州衡山縣次揚杲揚烈揚暉皆進士女二人廸功郎辰州叙浦縣主簿張履勉解進士曾需二女及履皆已卒孫男八人霽之彬之勝之蒙之得之冲之隆之丰之嘗試吏部孫女九人壻則廸功郎新道州江華縣主簿張淵進士左利見戴元崇曾克寬易應龍彭舜牧劉侃劉治元曾克愿利見克寬亦皆嘗貢禮部曾孫女各七人尚幼琳予友也遣一介行千七百里持書抵予於山陰澤中以臨安府府學教授危君稹之狀來求銘予年八十三不敢以老疾辭銘曰

女也而行则士毫也而志不惰敏而好修静以寡过持身如畏趋义则果我铭之悲维以代些

渭南文集卷三十八

卷三十九

钦定四库全书

渭南文集卷三十九

宋 陆游 撰

求志居士彭君墓志铭

庐陵太和有士曰彭君惟孝字孝求曾大父述大父琮父汝弼三世皆笃於为善乡人过其门
乘车者式放轡者肃忿争者解去盖古所谓一乡之善士歿而可祭於社者至君不幸甫冠而
孤服丧致毁族姻忧其不胜丧共以大义宽譬之乃少自抑而事母尽子道乡人皆喜曰是称
其家子也稍长力於学聚书万余卷号彭氏山房延老师宿士主讲说命子侄执弟子礼惟谨
君亦造其席旦莫不懈每自励曰学而不施於事犹不学也於是闾乡闻之急赴公上之难必
行其志乃已乡士当试礼部而以道远食贫未能驾者君不待其求亟馈之盖非一人其他馆
寓客药疾病藏死字孤多至不可数造梁以济涉甃甃以夷途周其乡百里无不以身任之退
无夸辞矜色以人不知为喜识者谓且享天报然举进士辄厄於命乃浮江东游遂诣行在所
上书言天下事自丞相以下多称其言议英发将推挽之而卒报闻公即日南归自誓老於故
乡筑第闢壮园林台沼为一邦之盛自号求志居士或曰玉峰老人日置酒觴客笑谈不倦间
则赋诗多警迈之思以开禧三年五月癸未考终於新第享年七十有三明年嘉定改元正月
甲申葬於石陂桌冈之原初君从艮垒平园诚垒三先生游君之卜筑也三先生赋诗属文以
表之一日而传天下由是无远近皆知彭孝求国士也及君之葬将求铭而三先生皆已歿於
是诸孤与君之友曾君之谨谋曰然则舍陆渭南将安归乃以曾君之状来请铭君之配倪氏
婉嫕有法度先君九年卒丈夫子五一飞前卒一鸣一德太学生一愚礼部进士一遵皆有学
行女子子二周瓌曾炜其壻也孙模果棗渠棗棗桌棗棗模棗皆继君卒女孙七已嫁者
二其壻曰吴克勤李宪周铭曰有藴不逢以布衣终世叹其穷孝以事亲惠以及人世与其仁
冠弁戢戢後从前诃忧媿则多读书充宇行必稽古孰予敢侮於孝求学讲行修言归於丘
我作铭诗百世是貽匪君之私

吏部郎中苏君墓志铭

公讳玘字训直泉州同安人其高大父翰林侍读学士讳某曾大父观文殿大学士太子太保
讳某两世皆赠太师封魏国公大父讳某朝请郎赠金紫光禄大夫考讳某中散大夫赠正议
大夫两魏公皆厚德重望仕至公卿登载国史至光禄正议仕虽不甚通显而学术风节皆挺
挺为时闻人游公定夫铭光禄墓而正议之铭则韩公无咎作两公皆重许可然於称述犹歉
然若不能尽者正议三子公最长而正议之配硕人欧阳氏实充文忠公之孙公生出既异於
人又天资嗜学恂恂孝悌才虽高而不以骄人处羣衆中退然若不能者及遇事奋发切中事
机於古有考於後可传而公色辞愈谦下衆或不知其出於公也初以叔祖待制致仕恩补将

仕郎调右廸功郎严州遂安尉会正议通判平江府正议尝为枢密院计议官同僚胡公铨上书诋斥时相胡公既贬窜正议亦株连去国不调者久之及来平江适王晌为守揣时相意日窥伺正议正议廉且公无所肆毒既去而正议权府事适中丞常公同卒於海盐公为文歎之语颇及时相响得之曰此奇货可以逞即为告密之举时相大忿嗾御史劾奏且日常同师德之友壻且其子玘之妇翁遣玘致祭以库金二千緡賻之虽究得诬状正议犹徙汀州公坐停官及时相死正议起於久废公亦复官调台州黄岩县主簿台四邑黄岩为大縣地百万亩吏与豪民为市户籍惟出乡有秩手官莫能稽考公日夜紬绎吏不得欺虽数十年蠹弊皆洞见贫下始得职徙淮西安抚司书写机宜文字又以辟书从舅侍郎方公某使金国裨助既多又以其暇系日为书凡山川城邑人情风俗登载详密史官盖有取焉归而知衢州常山县其治抑豪右伸贫弱下令简而信用刑明而寬前日输公上不以时者皆期而至又因定阳一乡民病於役与义役厝置井井有理至今为利它乡人不病者亦置之其虚心裕民如此岁饥出仓粟振粢不待上命民赖以不死徙徐遣吏市米於吴视常平旧藏悉如其故政既成顾县学久弗不治乃力葺之进秀民於学以礼延乡老先生为之表倡士亦自知勉励儒风益盛至於桥梁道路廐置委积产蓐医药莫不为之经理而於掩骼殮死长养孩幼尤笃後数十年士民追论之犹感涕也召赴都堂审察监行在?货务都茶场公事亲尽孝惟恐毫发不当亲意继遭家难执丧毁瘠注血食米不啻盐酪蔬果皆不御终丧期如一日朋友规以於礼为过辄痛哭以对规者亦为惨怆至除丧久之容貌犹不能复故通判明州在官二年历两守政事狱讼不苟合亦不为崖异然有一媿事士民辄譁曰此出於苏公也城东有造船场晁公以道坐元符上疏辄不许亲民来为船官所着书及文章最多邦人至今言晁朝散公慨然为筑祠立碣致其师尊之意陈忠肃公尝调於明而丰清敏公明人也公又言於郡立二公祠於学宫风励学者其所建类非庸衆人所及如此会岁歉常平使者朱公元晦檄公属以一郡荒政客米自海道至者多公请於朱公请发积钱广粢以为後备朱公为闻於朝如其请又建筑定海县崇丘河灌四千顷公为之亲驾不避风雨历五月而後成还朝除知衡州大臣荐公才可用乃改常州常股肱郡守符盖不轻畀及入对所陈皆当上意且行矣会有间言乃改知泰州泰亦名城也公下车已六十殊无倦意祀社稷陟降盥荐恪敬不懈学校释奠器服有不如礼令者一皆正之尽买国子监书以惠诸生王公明变墓在郡境遣郡僚致奠人士为之兴起既擢为尚书吏部郎分职侍郎西铨吏畏缩不敢肆孤远微眇悉得自伸誉望日着以绍熙三年五月某甲子遇疾损馆舍享年六十有四寄禄至朝请大夫八月庚申葬於会稽陶山西塢附正议墓娶常氏封宜人以贤称於族党先公一年卒丈夫子二人溱文林郎新知衢州常山县有志节执丧如公丧考妣时濂将仕郎女子二人长嫁承直郎常州晋陵县丞徐邦杰次尚处孙男女二人男曰随与其妹皆尚幼公家世显於累朝天资穎异读书一过目辄不忘尤长考订异同其於官名地里军制民赋虽甚细微皆能讲画穷尽无所放轶属文有体制笔法简远其尺牋尤为时所珍爱往往藏去少从张公子韶徐公端立汪公圣锡游皆期之甚远晚学於朱公元晦尽门人礼元晦亦称其善学初公从父有着魏公谈训者未及成或附益之正议尝以为有可更定者而未及书公卒成之藏之家塾又着魏公年谱一卷累岁乃成识者贵之公既歿之年溱乃以吕君祖俭状来请铭某曾大父太尉隧铭实出魏公而正议之铭则某实书之又少时获独拜正议於床下退而与公相从甚久山陰之居又俱在城西南相望烟水间扁舟往来交好不薄故为之铭铭曰

维相魏公克有全德菑畚三世是生训直事贤友仁政则宜民晚才为郎志不尽信陶山之腋松栝孔硕峩峩高丘过者必式

陆氏大墓表

山陰陆氏大墓九里袁家?曰二评事讳忻配李氏祔是为某之七世祖九评事讳郇配范氏祔是为某之六世祖光禄卿赠太子太保讳昭配福昌县君赠昌国夫人李氏祔是为某之五世祖九评事冢前少右有小冢或以为殇子昌国冢傍又有冢差小或以为其娣不可考也四世祖太傅公始别葬焦坞而元配靖安县君赠崇国夫人吴氏犹祔大墓绍圣九年先大父楚公惧寢远失传墓上皆立石表自是距今又九十五年中更兵乱惟太保冢可识余皆迷不知处岁时祭於太保冢前而已淳熙十二年三月或为某言乡民鋤麦得石表草间盖陆氏祖坟亟往视之则二评事冢也幸不毁乃从父老参订不三日尽得之石表皆在封识如新而地多为人冒没闻某至迭相质证於是侵地皆归培冢筑垣辟道莳木而陆氏大墓皆复其故某老矣羣从有曾孙行其视二评事已十世世益远则大墓守护或益怠故具书始末於石以告後之人淳熙十五年正月日朝请大夫权知严州军州事某谨书

詹朝奉墓表

新定遂安县詹氏为郡望族自光禄公讳良臣以死勤事被褒显书其事於国史少保公讳大方纯诚质厚为中兴贤辅熏陶渐渍子孙皆以学行显闻虽未必皆至贵仕而学行渊粹论议坚正师友称其贤乡闾服其化身歿而不泯若故朝奉郎讳靖之字康仲及其子承奉郎讳长民字子齐者是矣某谨按家传及质之乡人所传朝奉公以少保遇郊祀恩补承务郎历浙东安抚司主管机宜文字监潭州南岳庙婺州金华常州宜兴县丞浙东提举常平司干办公事通判靖州卒於官舍年五十二葬淳安县仁寿乡拜山之阳初将赴金华而代者以私故欲迁延而重於自言既遣吏来迓公始闻之亟出避吏至家人告以适他郡後数月乃往郡委以受输而公所亲有居部内者贫不能及期公亟代之输民闻之莫敢後嵎有筮者徐生尝仓卒系狱无妻孥有田数亩预书券属其友鬻之友鬻而有其直徐生出讼於有司久不决公诘以数语得其情宜兴到官才再閱月会兄得疾甚笃丐归视疾郡不许乃弃官归郡督还甚厉公卒不可曰宁坐法不忍有负於孝悌也人服其决郡亦卒无以罪浙东茶盐司同僚有嫚公者公置不较及其人遇疾卒妻前死男女皆幼稚贫甚歛具归装一切皆出公力又为营其葬及嫁孤女之费无憾而後已公虽闲居无厚积余藏然勇於为义有婚姻不能举及疾病死丧之急慨然助之忘其力之不足也所亲郑椿年官於严公以嫌不数见一日椿年卒有子在外名曰似宗而未及以归及卒有致仕恩族子自其乡来衰絰而入将冒取官公力排出之求得似宗卒官之公所为大率类此不可槩举古所谓可以属孤托死者公真其人也公娶王氏封安人赐冠帔後公四年卒子七人长民承奉郎前公三年卒阜民文林郎新宁海军节度推官表民出继公弟徽之仕至从事郎常州无锡县丞卒定民少有疾亦已卒义民从事郎前楚州司户参军养民仁民未仕女子二人朝请郎前通判湖州曾盘朝散大夫直华文阁前淮南转运副使石宗昭其壻也孙七人强学好学好问好礼好谦好修好信承奉君以少保遗表恩补承务郎迁承奉郎历监绍兴府都税院镇江府排岸兼拆船公事卒於家享年二十七葬祔世墓之

次君所至勤其官在绍兴时府遣官检校所遣者无以为功则肆为侵刻行道为之咨嗟君与争不听即自劾去故时镇江排岸官兼掌总领所逋欠纲运官吏君至閱视凡八九十辈皆饥寒疾病或父死而督其子君慨然为之言皆得挺系以去未几属疾谒告归省郡持不可比得请则疾已笃矣朝奉公见其癯瘠惊问故以实告且曰惧为亲忧故不敢左右闻者皆感歎自是疾遂不可为而君每见父母辄以有瘳告痛楚则忍不发声惧亲之闻也君从吾友吕祖谦伯恭学伯恭门人数百君以孝谨好学屡见称叹比卒伯恭哀之见於歆辞虽位下而年不遐亦可不泯矣娶冯氏子一人强学初朝奉公之子阜民以父兄遗事属予为墓表且曰愿共为一碑而疑古未有比予谓石元懿公熙载及其子文定公中立实同一碑故相苏魏公所为也是为比後世尚有考焉庆元某年某月某日中大夫直华文阁致仕山陰县开国男食邑三百户赐紫金鱼袋陆某撰

孙君墓表

会稽余姚县有士曰孙君名椿年字永叔其先山陰人当仁宗皇帝时有讳沔者仕至枢密副使有忠直名謚威敏威敏之弟曰洞洞生俨始东徙余姚俨生玘玘生绎绎生述君之考也以君贡南省遇庆寿恩补修职郎实始聚书馆士人以善其子弟子多自奋於学而君尤知名间游四方从老师宿儒受学尤好左氏春秋班氏汉书司马氏通监平居至忘寝食遇其得意时时着说以发明三家奥指多世儒所不及又从长老及有识者讲国家兵兴以来理乱得失之故某事可法某事可戒至於淮江以北极於司并幽蓟山川险要及前代用师馈粮道路所出言之莫不详尽听者忘倦使君得至人主前口论手画极利害是非之实以感悟上听安知不见拔用而成功名哉士固有幸不幸未易以成败论也晚预特奏名人皆谓公且遇合乃复以不合有司意入下第时有诏例补岳祠君辞焉然君年未六十识者以为学识如此安知终不合而君不幸死矣君虽终不合以死然居家可纪者多尤笃於孝友兄早死诸孤犹襁负父母哀之君曰某在兄不亡也父母为损哭泣君於是奉嫠嫂抚孤侄尽敬尽爱父母既终视平日加笃立义居法度寬裕而密察可久不废两院子弟分授诸经择名师遣从学朋游亦谨择以故皆有学行可称姊适里中胡氏夫妇皆早卒君抚孤恩意甚备不幸其孤又早夭君益哀怜之复为立後胡氏之祭繫君力得不絕晚仿范文正公义庄之制贍其族长幼亲疎咸有伦序岁以为常有余又以及嫠戚故旧无遗力绍熙中岁旱米价日翔君悉发廩贷里人明年稼登余贱来偿者止受其米如初贷之数有鬻屋庐将散而之四方者君必贷之以钱如鬻屋之数曰所得几何奈何舍乡里而去以此旁近无流徙者县竝海堤防数决在仕者欲汎湖募人耕其中积粟为筑堤费君争不可曰扞海固利矣汎湖则无以灌溉岁且饥利不补害请出私金率乡里共营之堤可成卒如君言而湖利亦得不废君之所为大槩类此观者可知其磊落不凡矣君享年五十有九以庆元五年二月壬申卒卜以明年十二月甲申葬於龙泉乡澄清之原娶吴氏子四人之宏之亮之望之穎皆有学行之宏之亮尝同试礼部女一人归迪功郎衢州州学教授史弥忠亦知名士既纳铭窆中又来请文以表墓上於孝义修而命室施丰而报嗇维报不忒亦不在亟尚其後人克肖君德庆元六年十月中大夫直华文阁致仕陆某表

何君墓表

诗岂易言哉一书之不见一物之不识一理之不穷皆有憾焉同此世也而盛衰异同此人也而壮老殊一卷之诗有淳漓一篇之诗有善病至於一聯一句而有可玩者有可疵者有一读再读至十百读乃见其妙者有初悦可人意熟味之使人不满者大抵诗欲工而工亦非诗之极也鍛炼之久乃失本指斷削之甚反伤正气虽曰名不可幸得以名求诗又非知诗者纤丽足以移人夸大足以盖衆故论久而後公名久而後定呜呼難哉子固不足为知此道者亦致其意久矣顾每不敢易於品藻盖彼皆广求约取极数十年之力仅得其所谓自喜者以示人而我乃欲一览而尽其可乎何君名逮字思顺能诗终身不自足而卒卒後予友人曾乐道巩仲至始介思顺之子羨以遗藁属予表墓且言思顺平生欲见予而不果故有斯请予年近九十病卧镜湖上凡以文章来者积架上不能省一日取思顺诗读之不觉起坐太息曰今世岂无从事於此者如思顺盖未易得也不以字害其成句不以句累其全篇超然於世俗毁誉之外予之恨不一见其人甚於其人之愿见予也思顺曾大父讳粹中大父讳汝能父讳松东阳人以嘉泰三年九月十一日卒年五十有一两娶郭氏皆先卒以开禧元年十一月二十日合葬於仁寿乡陂头山之原子一人女长适进士郭槩次尚幼开禧二年四月戊寅太中大夫宝谟阁待制致仕山陰县开国子食邑五百户赐紫金鱼袋陆某表

孺人王氏墓表

孺人王氏名中字正节潍州北海人曾大父讳竞朝议大夫直秘阁大父讳慎修廸功郎贈中奉大夫父讳嶠贈承事郎字季夷负天下才名孺人嫁司马文正公元孙龙图阁待制讳汲之仲子通直郎新权发遣信州军州事遵司马君亦有文学政事称其家登用於朝孺人实相之人谓季夷虽坎 不偶以死而三子皆知名士夫人复以贤妇称天所以报善人亦昭昭矣司马君签书宁海军节度判官公事孺人不幸遇疾卒时嘉泰三年二月初二日也得年四十有四司马君来赴告曰亡妇不逮事君姑其事舅及少姑皆尽孝执丧中礼而哀有余至除丧犹不能自抑司马大族也孺人承上接下肃敬明恕既歿哭之皆哀以开禧二年十二月壬申葬於会稽山陰清 北塢之原三子拓?操二女尚幼予与待制及季夷少共学情好均兄弟两公又皆娶子中表孙氏则表孺人之墓宜莫如予乃泣而书之太中大夫宝谟阁待制致仕山陰县开国子食邑五百户赐紫金鱼袋陆某书

令人王氏圻记

於虜令人王氏之墓中大夫山陰陆某妻蜀郡王氏享年七十有一封令人以宋庆元丁巳岁五月甲戌卒七月己酉葬祔君舅少傅君姑鲁国夫人墓之南冈有子子虞乌程丞子龙武康尉子惔子坦子布子聿孙元礼元敏元简元用元雅曾孙阿喜幼未名

渭南文集卷三十九

卷四十

钦定四库全书

渭南文集卷四十

宋 陆游 撰

祖山主塏铭

嘉州天王禅院景伦师有二弟子孟曰绍觉仲曰绍祖伦且老叹曰孰能问法南方以大吾门者乎於是觉请行曰不可使师有恨祖请留曰老人不可以莫养也觉南游得法居蕲州五祖山而祖左右就养先意承志终身不去伦欲新其庐祖则雨濡日炙出入闾巷累年崇成郁为宝坊伦饮食往来者祖则高困大庖床敷洁温凡至者如归焉皆曰伦师可谓有子矣祖既老亦有二弟子曰海慧海澄慧万里走闽中求大藏经以归祖不及待而澄实送终其撰次祖行实以求予铭者慧弟子法琳也是伦师不独有子子又有孙何其盛哉世所谓学士大夫蹈义秉礼终其身者或鲜矣况至四世閱百年而不失者乎予於是有感焉祖姓杨氏字继远世居龙游歿以乾道四年十月某甲子年七十五葬以五年二月某甲子铭曰

峨嵋之麓郁郁方坟维尔有承以弋吾文

定法师□铭

淳熙四年予自梁益还吴盖西游九年矣耆老凋落朋旧散徒无与晤语而少年学问日新议论锋出亦莫与顾为之懔懔不乐一日有叩户者摄衣迎之则所谓惠定法师也风骨巉巉如太华之立云表议论衮衮如黄河之行地中为予谈诸经辞指精诣往辄破的穷日夜不休子作而曰公生肇一辈人予惧不足以辱公友也会予复出仕又三年迺还屏居镜湖之西略无十日不过予霰雪风雨往往留不去予方以譴斥退亦安於不遇意者相从湖山间有老而师不幸死矣其徒来乞铭师字宁道姓王氏世为绍兴山陰人幼岁从钱清保安院子尧道人得度出游四方从道隆师会景崇三师授华严义尽得其说至超然自得出入古今不妄随不苟异三师盖莫能屈也衆请住戒珠省院未几弃去时大慧禅师宗杲说法阿育王山师慨然往造其居所闻益广学者宗之起住妙相徙观音复还省院皆萧然小刹羹藜饭豆人不堪其枯槁然着书不少辍若金刚般若经解法界观图会三归一章庄岳论已盛行於世余在稿者犹数十百篇以淳熙八年十二月二十四日焚香说偈示灭年六十八僧夏四十八九年十二月十八日葬於钱清得法弟子妙定了洪了悦得度弟子了知了端了達初师着金刚解成持以示予语之曰昔德山见龙潭言下悟尽焚金刚疏钞公见大慧而归更着此解与德山孰优师笑不畚岂鲁之善学柳下惠者欤铭曰木叶旁行九译而东维此杂华衆经之宗肇自有唐世以名家师如巨舟极其津涯着书至死此亦奚求承其师传以絶为羞我徂吊之遗书满室喟然作铭用媿逢掖

良禅师塏铭

禅师处良字遂翁会稽山陰刘氏子绍兴五年甫九岁以童子得度十三岁游诸方仅胜衣笠路人为之惊叹初为妙喜禅师宗杲侍者又从万庵禅师道顔为书记遂翁英迈玉立游二师间皆受记荆余事能文词善笔札诸方翕称良书记然亦以议论皦核不少假借不为诸方所容妄一比丘辄得名山壮刹遂翁独陆陆衆中尝居嘉兴法喜院举香为万庵嗣萧然数僧食财半菽再岁退庐会稽海上今太常尤公延之守临海起遂翁领紫囊复以县大夫不乐弃去久之领峨山荐严资福寺遂以疾逝淳熙十四年六月戊寅也遗言藏骨庐山智林寺寺万庵与遂翁所同建也近之日手书求铭於予铭曰

山栖谷汲利欲靡及孰挤使蹶道成谤集庐阜峨峨浮屠岌岌吾识其封身没名立

高僧猷公塏铭

宋山陰有高僧曰子猷字修仲晚自号笑云老人宏材博学高行达识卓然出一世之表虽华严其宗而南之天台北之慈恩少林之心法南山之律部莫不穷探历讨取其妙以佐吾说虽浮屠其衣百家之书无所不读闻名儒贤士虽在千里之远必往交焉笃行义励风操严取与一得丧接物简而峻不屈於富贵有以供施及门者苟礼不足虽累百金辄拒不取於虐贤哉修仲出陈氏生七岁从同郡大善寺晏时为童子十有二岁祝发受具习华严经论於广福院择交得其学又游钱塘见惠因院师会博尽所疑二师皆自以为弗迨遂还山陰说法於城东妙相院仅二十年学者常百余人修仲厌其近城市思居山林乃舍衆遯於梅山上方学者不肯散去而院隘不能容相与言於府愿迎修仲还妙相於是法席加盛於昔所着书大行於世院亦益葺号为壮刹大慧禅师宗杲过而异之为留偈壁间然修仲竟弃去学者犹不舍又说法者三最後住姜山閱三年喟然叹曰老矣将安归邪亟橐书归梅市结庵以老淳熙十六年八月二十有六日忽命舟遍别平日所往来者明日晨起说法遂坐逝寿六十有九又三日火化得舍利五色粲然弟子即庵之西建塏奉灵骨及舍利以葬修仲度弟子四人戒海戒先戒明戒坚戒先传家学而四方之学者得法出世又十有七人隱於衆者盖以百数修仲之道其传又可涯哉戒明来乞铭铭曰

予尝观古高僧穷幽闡微能信踐之不为利誅不为势挠未尝不与学士大夫同也考修仲之为人可谓有古高僧之风矣吾予之铭非独以厚故人盖亦天下之公也

别峰禅师塏铭

南山自长安秦中西南驰为嶓为 东行纡余起伏历蛮夷中跨轶且千里然後秀伟特起为三峰摩星辰蓄云雨龙蟠凤翥是名峨嵋山通义犍为二郡实在其下人鍾其气为秀民杰士出而仕者固多以功业文章擅名古今至於厌薄纷华弃捐衣冠木食涧饮自放於尘垢声利之外而不幸为人知不能遂其隐操亦卒至於光显荣耀者如别峰禅师是也师名宝印字坦叔生为龙游李氏子世居峨嵋之麓少而奇警日诵千言然不喜在家乃从德山院清远道

人得度自成童时已博通六经及百家之说至是复从华严起信诸名师穷源探赜不高出同学不止论说云兴泉涌衆请主讲席谢不可圓悟克勤禅师有嗣法上首安民号密印禅师说法於中峰道场廼挈一笠往从之一日密印举僧问巖头起灭不停时如何巖头叱曰是谁起灭师豁然大悟自是室中鋒不可触密印恨相得之晚会圓悟自南归成都昭觉乃遣师往省因随衆入室圓悟举从上诸圣以何法接人师举起拳圓悟曰此是老僧用者孰为从上诸圣用者师即挥拳圓悟亦举拳相交大笑而罢圓悟叹异之曰是子他日必类我师留昭觉三年密印犹在中峰以堂中第一座致师师辞密印大怒曰我以法得人人不我传尚何以说法为欲弃衆去衆皇恐亟趋昭觉罗拜恳请圓悟亦助之请始行道望日隆学者争归之虽圓悟密印不能撝也久之南游见汾山佛性泰福严月庵果疎山草堂清皆目击而契或以第一座留之师潜遯以免最後至径山见大慧杲大慧问曰上座从何处来师曰西川来大慧曰未出劔门关与汝三十棒了也师曰不合起动和尚时径山衆千七百虽耆宿名衲以得栖笠地为幸顾为师独扫一室堂中皆惊大慧南迁师亦西归始往临邛凤皇山举香嗣密印历住广汉崇庆武信东禅成都龙华眉山中岩复还成都住正法道既盛行士大夫亦喜从之游筑都不会庵松竹幽邃暇日名胜毕集闻师一言皆自谓意消稍或间濶辄相语曰吾辈鄙吝萌矣其道德服人如此俄复下硤抵金陵应庵华方住蒋山馆师於上方白留守张公焘举以代已师闻即日发去会陈丞相俊卿来为金陵以保宁延师俄徙京口金山学者倾诸方金山自兵乱後虽屡葺莫能成至是始复大兴如承平时而有加焉异时居此山鲜踰三年者师独安坐十五夏潭帅张公孝祥尝延以大为山师与张公雅故念未有以却而京口之人自郡守以降力争之卒返潭使魏惠宪王牧四明虚雪窦来请师度不可辞廼入东凡住四年乐其山林有终老之意而名益重被敕住径山淳熙七年五月也七月至行在所至尊寿皇圣帝降中使召入禁中以老病足蹇赐肩輿於东华门内赐食於观堂引对於选德殿特赐坐劳问良渥师因举古宿云透得见闻觉知受用见闻觉知不堕见闻觉知上悦曰此谁语师曰祖师皆如此提倡亦非别人语上为微笑时秋暑方炽师再欲起上再留使毕其说廼退後十余日又命开堂於灵隐山中使齎赐御香恩礼备至十年二月上制圓觉经注遣使驰赐且命作序师廼筑大阁秘奉以侈上恩师老益厌住持事门人惧其远游不返相与筑庵於山北俟其归今上在东宫书别峰二大字榜之十五年冬奏乞养疾於别峰得请明年上受内禅取向所赐宸翰识以御宝复赐焉绍熙元年冬十一月忽在见今住山智策告别策问行日师曰水到渠成归取幅纸大书曰十二月七日夜鷄鸣时如期而化奉蛻质返寺之法堂留七日顔色精明须发皆长顶温如沃汤是月十四日葬於别峰之西冈寿八十有二腊六十有四得法弟子梵牟宗性道奇智周慧海宗璨等得度弟子智穆慧密等百四十有七人有慧绰者山陰陆氏子当以?得官辞之从师祝发又得记莚迹巖岫终身不出师既示寂上为敕有司定諡曰慈辩且名其塋曰智光庵曰别峰极方外之宠师说法数十年所至门人集为语録晚际遇寿皇被宸翰咨询法要皆对使者具奏将化说偈尤奇伟已别行於世此不悉着三年三月法孙宗愿走山陰镜湖属某铭师之塋某与师交最久尝相约还蜀结茆青衣唤鱼潭上今虽老病义不可辚铭曰

圓悟再传是为别峰坐十道场心法之宗渊识雄辩震惊一世矫乎人中龙也海口电目旄期称道卓乎涧壑松也叩而能应应已能默浑乎金钟大镛也师之出世如日在空升於阳谷不为生隐於崦嵫其可以为终乎

海淨大師塋銘

乾道中史魏公以故相牧会稽严重简贵士大夫非素负才望莫得登其门顾每召灵秘院僧智性与语有大兴造辄以付之性公时年且七十亦辄受命不辞已而事皆井井有条理邦之人始服魏公之知人虽方外道人任之亦能举其事如此又叹性公之不负所知也及淳熙末予还朝典南宫賤奏兼领祠部而会稽守言灵秘院本籙籙表丈地智性以孤身力成之今为名刹请以其徒世守之报可予虽会稽人然自魏公去不复见性公乃惊叹曰是道人尚在邪又五年予卧疾镜湖上性公法孙德恭来告曰公以绍熙三年六月五示化将奉遗骨塋于小夹山且来请铭性公本会稽山陰蔡氏子七岁从广福院崇教大师慧超祝发九岁赐紫方袍号海淨大师坐八十三夏住灵秘五十一载年九十度弟子七人覃永宗庆宗亮宗振宗懋宗宝宗一孙四人德和德?德兴德椿曾孙二人行昭行闻铭曰龟食簪从宅此山阿陵谷有迁吾铭不磨

松源禅师□銘

松源禅师名崇岳生於处州龙泉之松源吴氏故因以自号自幼时已卓犖不羣处羣儿中未尝嬉宕稍长闻出世法慕向之年二十三弃家衣扫塋服受五戒於天明寺首造灵石妙禅师继见大慧杲禅师於径山久之大慧陞堂称蒋山应庵华公为人径捷师闻之不待旦而行既至入室未契退愈自奋励中夜自举狗子无佛性话豁然有得即以扣应庵举庵世尊有密语迦叶不覆藏师云钝置和尚应庵励声一喝自是朝夕咨请应庵大喜以为法器说偈劝使祝发栋梁吾道隆兴二年师始得度於临安西湖白莲精舍自是徧历江浙诸大老之门罕当其意乃浮海入闽见乾元木庵永禅师一日辞木庵欲往黄檗木庵举有句无句如藤倚树师云裂破木庵云琅琊道好一堆烂柴师云矢上加尖如是应酬数反木庵云老兄下语老僧不过如此祇是未在他日拂柄在手为人不得验人不得师云为人者使博地凡夫一超入圣域固难矣验人者打向面前过不待开口已知渠骨髓何难之有木庵举手云明明向汝道开口不在舌头上後当自知逾年见密庵於衢之西山随问即答密庵微笑曰黄杨禅尔师切於明道至忘寝食密庵移住蒋山华藏经山皆从之一日密庵入室次问傍僧不是心不是佛不是物师侍侧豁然大悟乃云今日方会木庵道开口不在舌头上自是机辩纵横锋不可触木庵又迁灵隐遂命师为堂中第一座旋出世於平江澄照为密庵嗣迁江陰之光孝无为之冶父饶之荐福明之香山平江之虎丘皆天下名山惟冶父最寂寞又以火废师一临之四方名衲踵至栋宇亦大兴人谓师能使所居山大庆元丁巳年适灵隐虚席僉曰安得岳公来乎果被旨以昇师驩声如潮居六年道盛行得法者衆法席为一时冠而师有栖隐之志即上章乞罢住持事上察其诚许之退居东庵俄属微疾犹不少废倡道忽垂一则语以验学者曰有力量人为甚麼擡脚不起开口不在舌头上又贻书嗣法香山光睦云居善开传以大法因书偈曰来无所来去无所去瞥转玄关佛祖罔措跏趺而寂实嘉泰二年八月四日也得年七十有一坐夏四十奉全身塋於北高峯之原塋成之四年香山遣其侍者道孚以铭属某某方谢事居镜湖上年过八十病卧一榻得书不觉起立曰亡友临川李德远浩实闻道於应庵盖与密庵同参李德远每与某谈参问悟入时机缘言句率常达旦今读师语峻峭 峯下临云雨如立千仞之华山蹴天驾空骇心眩目如钱塘海门之涛虎豹股栗屋瓦震动如汉军昆阳之战追

思德远所言然後知师真临济正宗应庵密庵之真子孙也铭曰

临济一宗先佛正传应庵父子以一口吞金圈栗蓬晚授松源松源初心论劫参禅於一笑中疾雷破山坐八道场衆如涛澜金镡脱手碎首裂肝彼昏何智万里?关後十大劫摧山湮川法力所持此塏岿然

退谷云禅师塏铭

佛照禅师有嗣子曰淨慈报恩光孝退谷禅师名义云生於福州闽清黄氏世为士禅师幼入家塾成童入乡校穎异有声既冠游国学因读论语中庸有所悟入後闻龟峯山堂淳禅师说法遂自断出家从山堂祝发徧游江湖至吴见鍊庵一大禅为侍者一日室中闻国师三唤侍者话师亟举手掩其口又问曰侍者三应又作麼生师拂袖径出鍊庵大喜时佛照倡道灵隐师往依之及佛照移育王师从其行历十年为堂中第一座佛照闻其说法叹曰此子提倡宛如雪堂行和尚吾鉢袋有所付矣遂出住香山居五年徙台州光孝又徙镇江甘露会平江虎丘万寿皆欲延师师闻万寿颇废即欣然就之淮南转运使虞公俦又以长芦来招师与虞公有雅故又从之会育王虚席朝命师补其处时佛照方居东庵父子曰相从发明临济正宗学者云集会有魔事师即舍衆退居香山盖将终焉而朝命又起师说法淨慈恩光赫奕都邑耸动一日领衆持鉢畿邑是夕寺灾无遗宇比师归独三门岿然在瓦砾中师不动容曰成坏相寻亦岂有常今日之坏安知不为四衆作福之地哉天子闻之出内库金以赐自重臣贵戚以下倾橐鞶金惟恐居後未期年广殿邃庑崇閤杰阁盖愈於前日矣於是上为亲御翰墨书慧日阁三大字赐之开禧二年五月师示微疾六月朔旦辛亥作偈别衆曰意乌猝嗟万人气索佛法向上何曾踢着临行业识茫茫一任诸方卜度遂寂後九日弟子处约等奉全身塏於寺之东北隅世寿五十八僧夏五十五住山十九载度弟子四十有畸学者集师语为七会録行於世师初欲以复佛殿属予记之未及而弃世於是处约等以西堂可宣禅师之状来求予铭适予老疾弗克就宣公又以书来固请而师之侍僧处讷者留逾年不肯去辞指?欵予为之叹曰师之在育王也将新僧堂而陰阳家以为法所禁将不利於主人师奋不顾排衆说力为之堂成而魔果作遂去陰阳家之说使人拘而多畏然其法本出流俗不待师之明知其妄决矣虽或适中终为不足信也又师在淨慈遭火患涤地皆尽度非金钱累亿万且假以岁月必不能成师谈笑尽复旧观议者或以为师之才用絶人见於此者则亦陋矣此事若澄观辈则可称大善知识直游戏尔师所以独立一世者岂直以此哉师示衆有曰鸟道孤危玄关妙密在曹洞宗旨亦奇矣若较临济直是天地悬隔此足以知师能断圓悟妙喜佛照之大作用者自有所在也铭曰

猗欤云公自儒衣奋为东庵子无示无问上距圓悟四世而近龙象蹴踏狮子奋迅或以其室目不容瞬丹碧南山盖其游刃於谈笑顷变化煨烬以此论师其殆未尽譬如观海测以尺寸我铭不磨百世其信

渭南文集卷四十

<集部,别集类,南宋建炎至德佑,渭南文集>

卷四十一

钦定四库全书

渭南文集卷四十一

宋 陆游 撰

皇太后灵驾发引祭文

风御上宾玉衣永閤生尧鉤弋尚怀帝武之祥从禹会稽遽奉寝园之卜母慈罔极坤载无疆方同轨之毕来怅东朝之已远然而艱难契阔归慰圣主问安之诚壽考康宁躬享先后莫致之福阴功阳德上际下蟠历邃古而罕闻知圣心之无憾臣藩维有守怆慕徒深目断柏城神驰雲御敢修馈奠之礼少致攀号之心

祭梁右相文

人之生世如云之出於山川云不自用用之者天降为甘泽散为丰年抑有时而弗用则轮囷磅礴或卷或舒以自适於野水之涯荒山之巔彼云无心岂有用舍之异出处之偏哉公之在朝道大材全不为世变不为物迁显相庙郊华袞金蝉太平之功溢於简编谢病而归大节愈坚从容迓英抗议慨然曰我非尧舜之道不敢以陈於前孰谓万鍾之禄不足顾留遂委之而僊乎抑公之学得圣所传视生死为一区等华屋於荒阡乎又岂如云之既散廓然太虚则前日用舍初不足以为贤愚乎酒不盈觞肉不揜豆独区区之词写其肺肝者公岂捐之乎

祭龚参政文

某官劔南公在廊庙书从驿来如奉色笑哀穷悼屈忘其不肖岁戊戌春某辱号召归未及都公歿荒徼山川阻修万里孤旄官事有守不遑往吊寓哀一觞公乎来釃

祭鲁国太夫人文

呜呼昔先太师遯世怀宝播庆於家生我元老维少傅公秉德逢辰长养成就则繄夫人少傅在朝袞衣绣裳帝锡夫人御醴宸章少傅在藩豹尾玉节帝锡夫人兼金重帛金曰盛哉其荣则多夫人曰嘻其报伊何帝虚元弼方属少傅於时夫人以疾即路煌煌安輿少傅实从天佑德人华其初终某受恩门闌义均子姓晚偕妇息升堂修敬万里羈宦忽承哀音东望永怀碎裂寸心送车辚辚倾动乡?陨涕羞奠形留神往

祭王侍御令人文

惟灵生自大家来嫔德门象服有?涕媵如云相我御史克勤藻萃诸子甚材颀然荐绅世所愿
怀孰如夫人惟是孤生实忝外姻万里焉依如在乡邻遭此不淑惨然酸辛蓐鲫之微侑以斯
文

祭祝永康文

嗟我与公万里羈单人孰知之所恃者天庶几白首相从乡关追谈梁益把酒笑欢云胡不淑
一病莫还遗孤子立未逮冠婚谓天可恃公宜百年玉裂竹折喟其永叹公守导江啮蘖饮泉
凜凜色词请谒莫干人或谤嘲公守益坚虽昔君子终此实难云持此归何憾九泉公丧之东
丹旌翩然我病莫兴抚枕涕潜矢辞羞奠尚慰营魂

祭刘枢密文

呜呼公乎有文有武有仁有智立朝无助以直自遂声气不动而折万里之冲从容一言而决
盈廷之议盖人所难公之所易仰天俯地一念不愧秋毫未安寝食忘味轻失富贵而重朋友
之责自屈达尊而下白屋之士盖人之所忽公之所畏昔岁癸未某始去国见公西省凜然正
色顾虽不肖窃师公直流落得归公与有力舟过金陵公疾已亟命之不淑旋闻易箴祭不及
时实负盛德尚想平生出涕横臆

祭蒋中丞夫人文

维灵出由德阀克配儒先从容图史之规肃敬苹蘩之荐是生耆哲来瑞明时大邦开赐沐之
封列鼎极循陔之养奄闻不淑靡究遐龄窀穸有期川途云邈虽莫缀千车之盛顾敢稽一酌
之恭仰冀灵魂俯歆诚意

祭赵提刑文

惟灵早以茂异起膺简求逢时休明为国壽隤建牙淮服拥节王畿方期来朝遽以疾谗挂冠
决去共高静退之风易箴亟闻何胜殄瘁之感某早托通家之好晚逢挽轡之行挥麈轩昂恍
如昨日拊棺摧痛莫喻孤怀敢陈一奠之恭少叙九京之诀

祭勤首座文

我之与公义则师友情骨肉也相从十年谈道赋诗艺松菊也别虽数月使来自东书相续也
比独怪公书词淳淳若予属也嗟哉已矣颀然野鹤尚在目也卵墻告成欲往不果身桎梏也
上愧道义下负交情泪可掬也龙文之茗沈水之薰荐甘馥也怀旧之心有如丘山此一粟也

祭许辰州文

惟灵美操懿行达识英辞笔阵扫千人军早擢太常之第胸中吞九云梦耻裁光范之书抱沈英之痛者十年分共理之忧者两郡人之不淑生也有涯旅馆招魂一朝今古孤舟反葬万里风涛岂知故里之交遽作夜台之别魂兮未远鉴此哀诚呜呼哀哉

祭韩无咎尚书文

兄之初载甚蹶而躅逢乱客吴万里孤寡文方日衰荡为狂澜组织纤弱各自谓贤士睨莫救兄勇而前陋巷一室日旰未饔诵书鼓琴志操益坚落笔天成不事雕镌如先秦书气充力全壮年相从顾悯我孱曰是有志许以周旋我自蜀归兄典三铨邂逅都门挈手欢然兄牧东阳我走闽山旷不相值今五六年我病早衰顾未及泉兄之壽康一朝先颠饷酒踵门乃酌柩前嗟嗟造物孰尸此权岂其好恶亦与俗迁微官有守丧车莫攀蓐溲之奠叙诀终天

祭胡监丞文

惟公文学足以发身政事足以宜民人则不合何罪於神乃者起家往守宜春临别慨然握手江津曾未逾月乃以讣闻舟载铭兆返其乡粉台省袞袞公独逡巡室家嘻嘻公独悲辛我虽晚交甚知公真适苦骭疡奠弗及亲尚想生平寓哀斯文

祭丘运使母夫人文

昔先大夫怀宝里閭没世不耀乃以其孤属之夫人道德是诏故河图公文学政事望在廊庙荣养五鼎眉壽百年其德弥劭高识超然朱门画戟视若蓬蒿再入都城曾未温席翩其归旄方岁之恶公私交病冀寬赋调而河图公遽以忧归道路相吊我登门阡情均甥侄宜送宅兆官守所縻矢辞伤悲荐此清醪

祭曾原伯大卿文

惟灵渊乎似道敏而好学韦编铁砚雪窗萤几不足以言其勤冢书壁简铜墙鬼炊不足以名其博文辞典舆论议超卓不使直承明之庭犹当置之天禄之阁时方越拘挛以用人公奚彼之不若而乃老於惠文之冠弗预甘泉之橐痛结慈闱悲纏华萼凡閭巷之故交想话言之如昨闻讣相吊摧然涕落羞一醑以祖行冀九原之可作

祭大侄文

汝实先少傅之长孙岳州使君之嫡子早列仕籍垂五十年夫妇二人更相为命岭海万里沦谢不还收骨於灰烬之中藏榇於松楸之次烦冤痛酷霑涕何言歿而有灵歆此薄醑

祭十郎文

自汝不幸早世将二十年乃克祔葬於先少师鲁国夫人莹兆之南冈距汝母令人墓尤还汝而不泯岂不得所愿哉感念畴昔悲痛何言

祭朱元晦侍讲文

某有捐百身起九原之心有倾长河注东海之汨路修齿耄神往形留公歿不亡尚其来飨

祭方伯谟文

予与伯谟别於武夷予五十有五齿髮未衰伯谟盖方壮耳顾後日犹长未知别之悲也俯仰二十有一年卒不相遇而伯谟遂舍我而何之乎予年垂八十如朝露之将曦与伯谟别尚复几时生也相遇犹不可必死游地下果可期乎予言之及兹涕不可止伯谟尚能有知也乎

祭张季长大卿文

於虜世之定交有如某与季长者乎一产岷下一家山阴邂逅南郑异体同心有善相勉阙遗相箴公醉巴歌我病越吟大笑剧谈坐客皆瘖公既造朝衆彦所钦我南入蜀九折嶽岑公以忧归我亦陆沈久乃相遇垂涕沾襟宿好未远旧盟复寻驾言造公公已来临我倡公和如鼓瑟琴送我东归握手江浔欲行复尼顿足噫暗是实古道乃见於今公还为卿华路駸駸我方畏谗潜恐不深公去我召如商与参渺邈天涯一书万金我自史闱进长书林迫老亟退突不暇黔亦尝挽公力微弗任比乃闻公请投华簪旋又闻讣天乎难谏玉树永閤茔柏已森何时复闻正始遗音渍酒絮中不及手斟英魂如生岂忘来歆於虜哀哉

祭周益公文

某绍兴庚辰始至行在见公於途欣然倾盖得居连墙日接嘉话每一相从脱帽褫带从容笑语输写肝肺邻家借酒小圃鉏菜荧荧青灯瘦影相对西湖吊古并轡共载赋诗属文颇极奇怪淡交如水久而不坏各谓知心絶出流辈别二十年公位鼎鼐我方西游荷戈穷塞归得台郎旋又坐废公亦策免久处於外见不可期使我形瘵斯文日卑公则崧岱士昏於智公则蓍蔡公老不衰雷霆百代每得手书字细如芥痴儿駸女问及琐碎孰为一病良医莫差赴告鼎来震动海内犇赴不遑涕泗澎湃岂无蓴鲫致此薄酌辞则匪工聊寄悲慨

尤延之尚书哀辞

帝艺祖之初造兮纪号建隆焕乎文章兮躋揖逊之遐踪诏册施於朝廷兮万里雷风灏灏噩噩兮始扫五季之雕虫閱世三传兮车书大同黄麾绣仗兮驾言东封继七十二后於邃古兮勤崇垂鸿吾宋之文抗汉唐而出其上兮震耀无穷柳张穆尹欧王曾苏名世而间出兮巍如华嵩虽宣和之蛊弊与建炎之军戎文不少衰兮殷殷醺醺太平之象兮与六龙而俱东余自梁益归吴兮怅故人之莫逢後生成市兮摘裂剽掠以为工遇尤公於都城兮文气如虹落笔

纵横兮独殿诸公晚乃契遇兮北扉南宫涂改雅颂兮蹈躡轲雄余久摈於世俗兮公顾一见而改容相期江湖兮斗粟共舂别五岁兮晦显靡同书一再兮奄其告终於虐哀哉孰抗衣而复公兮呼伯延甫於长空孰诵些以招公兮使之舍四方而归徕乎郢中孰酌荒丘兮露草霜蓬孰闯虚堂兮寒灯夜蛩文辞益衰兮奇服彪蔚天不憖遗兮黼黻火龙嗟局浅之一律兮彼宁辨夫瓦釜黄钟话言莫听兮孰知我衷患难方殷兮孰恤我躬煮蒿不返兮吾党孰宗死而有知兮惟公之从

沈子壽母赵夫人哀词

呜呼人孰无母母孰无子母以壽终子克终养亦可纾无穷之悲矣维吾子寿自初遭艱昼夜号泣匪泪伊血羸乎莫支陞堂吊祭者不忍闻其声得书赴告者不忍观其辞子壽盖曰不孝孤少罹凶父丧母嫠无垄可耕母子相依及游太学母客京师冬兮母寒昼兮母饥无一囊之粟寒无一裘之衣不孝孤虽食於学官羹在前叹息而麾抚所读书而与之誓曰编絶则辑字渝则补宁死於书傍不敢畏难苟止以负吾母之慈如是十年幸赐第於太常归而拜母相持以泣泪尽目萎母前子後告於先墓庶几吾父闻之而寬其九泉之思也於虐此子壽之既言而其未言者盖可推矣奉身以道义发身以诗书文章传於不朽节行全而无亏士患无志不患无位士患无才不患无恃子寿之志所以事亲者盖其所以事君子寿之才顾犹屈而未施亲则日远时节奉祀如将见之一言一行足以显扬吾亲者苟有怠忽是以吾亲为歿而亡知也子壽之令名与天壤同弊则亲实与焉谯刻千字置守万家盖不足进於斯也子壽之存於胸中而未言者予得陈之非独慰吾子壽盖以为天下孝子之诒哀哉

渭南文集卷四十一

卷四十二

钦定四库全书

渭南文集卷四十二

宋 陆游 撰

天彭牡丹谱

花品序第一

牡丹在中州洛阳为第一在蜀天彭为第一天彭之花皆不详其所自出土人云曩时永宁院有僧种花最盛俗谓之牡丹院春时赏花者多集於此其後花稍衰人亦不复至崇宁中州民宋氏张氏蔡氏宣和中石子滩杨氏皆尝买洛中新花以归自是洛花散於人间花户始盛皆以接花为业大家好事者皆竭其力以养花而天彭之花遂冠两川今惟三井李氏刘村母氏城中苏氏城西李氏花特盛又有余力治亭馆以故最得名至花户连畛相望莫得而姓氏也天彭三邑皆有花惟城西沙桥上下花尤超絶由沙桥至棚口崇宁之间亦多佳品自城东抵蒙阳则絶少矣大抵花品近百种然着者不过四十而红花最多紫花黄花白花各不过数品碧花一二而已今自状元红至欧碧以类次第之所未详者姑列其名於後以待好事者

状元红 祥云 绍兴春 燕脂楼 金腰楼 玉腰楼 双头红 富贵红 一尺红 鹿胎红 文公红 政和春 醉西施 迎日红 彩霞叠罗 胜叠罗 瑞露蝉 乾花 大千叶 小千叶

右二十一品红花

紫绣球 乾道紫 泼墨紫 葛巾紫 福严紫

右五品紫花

禁苑黄 庆云黄 青心黄 黄气球

右四品黄花

玉楼子 刘师哥 玉覆盂

右三品白花

欧碧

右碧花

转枝红 朝霞红 洒金红 瑞云红 壽阳红探春球 米囊红 福胜红 油红 青丝红红鷺毛
粉鷺毛 石榴红 洗粧红 蹙金球间緑楼 银丝楼 六对蟬 洛阳春 海芙蓉膩玉红 内人娇
朝天紫 陈州紫 袁家紫御衣紫 斬黄 玉抱肚 胜琼 白玉盘界金楼 楼子红

右三十二品未详

花释名第二

洛花见纪於欧阳公者天彭往往有之此不载载其着於天彭者彭人谓花之多叶者京花单叶者川花近岁尤贱川花卖不复售花之旧栽曰祖花其新接头有一春两春者花少而富至三春则花稍多及成树花虽益繁而花叶减矣状元红者重叶深红花其色与鞞红潜绯相类而天姿富贵彭人以冠花品多叶者谓之第一架叶少而色稍浅者谓之第二架以其高出衆花之上故名状元红或曰旧制进士第一人即赐茜袍此花如其色故以名之祥云者千叶浅红花妖艳多态而花叶最多花户王氏谓此花如朵云状故谓之祥云绍兴春者祥云子花也色淡伫而花尤富大者径尺绍兴中始传大抵花户多种花子以观其变不独祥云耳燕脂楼者深浅相间如燕脂染成重趺累萼状如楼观色浅者出於新繁勾氏色深者出於花户宋氏又有一种色稍下独勾氏花为冠金腰楼玉腰楼皆粉红花而起楼子黄白间之如金玉色与燕脂楼同类双头红者并蒂骈萼色尤鲜明出於花户宋氏始秘不传有谢主簿者始得其种今花户往往有之然养之得地则岁岁皆双不尔则间年矣此花之絶异者也富贵红者其花叶圆正而厚色若新染未乾者他花皆落独此抱枝而槁亦花之异者一尺红者深红颇近紫色花面大几尺故以一尺名之鹿胎红者鹤顶红子花色红微带黄上有白点如鹿胎极化工之妙欧阳公花品有鹿胎花者乃紫花与此颇异文公红者出於西京潞公园亦花之丽者其种独蜀中遂以文公名之政和春者浅粉红花有丝头政和中始出醉西施者粉白花中间红晕状如酡颜迎日红者与醉西施同类浅红花中特出深红花开最早而妖丽夺目故以迎日名之彩霞者其色光丽烂然如霞叠罗者中间琐碎如叠罗纹胜叠罗者差大於叠罗此三品皆以形而名之瑞露蟬亦粉红花中抽碧心如合蟬状乾花者粉红花而分蟬旋转其花亦富大千叶小千叶皆粉红花之杰者大千叶无碎花小千叶则花萼琐碎故以大小别之此二十一品皆红花之着者也紫绣球一名新紫花盖魏紫之别名也其花叶圆正如绣球状亦有起楼者为天彭紫花之冠乾道紫色稍淡而晕红出未十年泼墨紫者新紫花之子花也单叶深黑如墨欧公记有叶底紫近之葛巾紫花圆正而富丽如世人所戴葛巾状福严紫亦重叶紫花其叶少於紫绣球莫详所以得名按欧公所纪有玉版白出於福严院土人云此花亦自西京来谓之旧紫花岂亦出於福严耶禁苑黄盖姚黄之别品也其花闲淡高秀可亚姚黄庆云黄花叶重复郁然轮囷以故得名青心黄者其花心正青一本花往往有两品或正圆如球或层起成楼子亦异矣黄气球者淡黄檀心花叶圆正向背相承敷腴可爱玉楼子者白花起楼高标逸韵自然是风尘外物刘师哥者白花带微红多至数百叶纖妍可爱莫知何以得名玉覆盂者一名玉炊饼盖圆头白花也碧花止一品名曰欧碧其花浅碧而开最晚独出欧氏故以姓着大抵洛中旧品独以姚魏为冠天彭则红花以状元红为第一紫花以紫绣球为第一

黄花以禁苑黄为第一白花以玉楼子为第一然花户岁益培接新特间出将不特此而已好事者尚屡书之

风俗记第三

天彭号小西京以其俗好花有京洛之遗风大家至千本花时自太守而下往往即花盛处张饮帘幙车马歌吹相属最盛於清明寒食时在寒食前者谓之火前花其间稍久火後花则易落最喜阴晴相半时谓之养花天栽接剔治各有其法谓之弄花其俗有弄花一年看花十日之语故大家例惜花可就观不敢轻翦盖翦花则次年花絶少惟花户则多植花以俸利双头红初出时一本花取直至三十千祥云初出亦直七八千今尚两千州家岁常以花饷诸台及旁郡蜡叶筠篮旁午於道予客成都六年岁常得饷然率不能絶佳淳熙丁酉岁成都帅以善价私售於花户得数百苞驰骑取之至成都露犹未曦其大径尺夜宴西楼下烛焰与花相暎发影摇酒中繁丽动人嗟乎天彭之花要不可望洛中而其盛已如此使异时复两京王公将相筑园第以相夸尚予幸得与观焉其动荡心目又宜何如也明年正月十日山阴陆某书

天申节致语

得吾道而上为皇方探真詮之妙有天下而尊归父适当孝治之隆肆均湛露之恩用侈流虹之瑞恭惟皇帝陛下德高邃古泽被縣区神武应期三纪抚绍开之运希夷玩志兆民倾爱戴之诚爱辑上仪式彰华旦山呼万岁驩已浹於神人花覆千官庆更同於中外臣获预梨园之法部遥瞻凤阙於丹霄敢采民謡恭陈口号宫殿红云捧紫皇河清电绕拥休祥壶中常占青春在物外方知浩劫长昼立龙旗风不动晓开璫笈远飘香尧年岂特封人祝动地驩声遍万方

又

枢电効祥丕显生商之旦需云示惠肆均在镐之恩喜溢鸞鸾光生俎豆伏惟皇帝陛下圣神广运垂拱无为躬尧舜之性仁致成康之刑措克肖其德天惟申命用休非求於民人皆同心以戴号令雷风之鼓舞文章日月之昭明侈甲观之昌期疏瑶池之广宴山呼万岁花覆千官潏灋上樽味挹金茎之露悠揚法曲声留玉宇之云【臣】等生值圣时身参乐府敢缘归美之义赓载太平之诗

广殿遥闻警蹕音觚棱晓色尚沈沈半空瑞靄炉香馥一点红云黼座深夷夏驩声归羽舞乾坤和气入薰琴欲知圣德齐尧舜邈阙争倾万国心

又

有王者兴应绕电流虹之瑞使圣人壽实敷天率土之心欣逢震夙之期恭致彪鸿之祝伏惟皇帝陛下聪明稽古?数在躬圣泽上际而下蟠睿化东渐而西被追景德祥符之治万?丕平

御紫宸垂拱之朝四夷入贡爰锡需云之宴用均湛露之恩臣等端遇清时遥瞻丹阙听虞帝箫韶之奏同极驩情缀汉家乐府之诗敢陈薄伎

嘉会千龄岂易逢佩声俱集未央宫九重凤阙曈曈日百尺龙旗掩苒风奇瑞屡书图牒上太平长在咏歌中区区击壤虽无取意与生民既醉同

徐稚山给事庆八十乐语

伏以就第而赐安车爰及尝珍之岁为酒以介眉寿宜伸善颂之诚恭惟致政龙学给事东省近臣西清宿望体锺和气生元佑之盛时道合圣君赞隆兴之初政抗议每先於诸老遗荣靡顾於万锺虽容疎傅之归行见谢公之起至若羸金比训庭玉生辉出将使指之荣入奉色难之养膺兹全福属我耆英维降岳之嘉辰当发春之令月庙堂旧弼纓华袞以临觴台阁名卿焕绣衣而在席式歌且舞俾炽而昌上对台颜敢陈口号欲知主圣本臣忠倾尽嘉谟沃舜聪同载方如周吕尚安车不数汉申公日烘盎盎花光暖烛映鳞鳞酒浪红白首同朝各强健莫辞烂醉答春风

致语

伏以碧油红旆有严幕府之容琬俎华觴用饰輿情之喜恭惟某官西清禁从东省名臣据古守经凜北斗泰山之望黜浮崇雅粲铭锺篆鼎之辞行表縉绅言书简册虽弗容然後见君子顾未起何以慰苍生适兹谋帅之辰谁处耆英之右佩麟符而就镇犹屈经纶穿豹尾以还朝伫闻趣召某官爰申宴乐式奉笑谈士民踊跃而仰瞻将吏奔驰而即事谐金石铿锵之奏盛鱼龙曼衍之观上对台堦敢陈口号

曾立蛾眉禁省班至今风采照金銮纵横笔阵千人废浩荡辞源万顷寛落纸烟云纷态度照人冰玉峙高寒从容坐啸香凝寝说与宾僚拭目观

又

西颢司辰素商纪节?日初开於幕府肆筵式奉於皇华恭惟某官节槩清真风规简亮过眼不再尽读五车之书落笔可惊早冠万人之勇文久传於後学名疑覩於昔贤凜台柏之生风焕使星之下烛绣衣持斧威声方肃於列城豹尾属车趣召行参於法从某官爰开燕豆欸奉谈犀画栋珠帘纳九秋之爽气金樽玉酒醉一道之欢声仰对台堦敢陈口号

凉月参差白露溥请看宾主罄清欢麟符玉节交相映凤竹鸾丝殊未阑百谷方登仓庾足七州无事里闾安樽前莫惜山颓玉四者能兼自古难

渭南文集卷四十二

卷四十三

钦定四库全书

渭南文集卷四十三

宋 陆游 撰

入蜀记

乾道五年十二月六日得报差通判夔州方久病未堪远役谋以夏初离乡里

六年闰五月十八日晚行夜至法云寺兄弟饯别五鼓始决去

十九日黎明至柯桥馆见送客巳时至钱清食亭中凉爽如秋与诸子及送客步过浮桥桥坚好非昔比亭亦华洁皆史丞相所建也申後至萧县憩梦驿驿在觉苑寺旁世传寺乃江文通旧居也有大碑叶道卿文寺额及佛殿榜皆沈睿达所书有碑亦睿达书尤精古又有毗陵人戚舜臣所画水盖佛後座大壁也卒然见之觉涛澜汹涌可骇前辈或谓之死水过矣县丞权县事纪旬尉曾盘来曾原伯逢招饮於其子盘?中二鼓归原伯复来共坐驿门月如昼极凉四鼓解舟行至西兴镇

二十日黎明渡江江平无波少休仙林寺寺僧为开馆设汤饮遂买小舟出北关登漕司所假舟於红亭税务之西夜无蚊

二十一日省三兄

二十二日至二十四日皆留兄家

二十五日晚叶梦锡侍郎衡招饮案间设矾山数盆望之如雪

二十六日晚芮国器司业?招饮同集仲高兄詹道子大着亢宗张叔潜编修渊坐中国器云顷在广东作漕有提举茶盐石端义者性残忍每捕官吏系狱辄以石盐木枷枷之盖木之至坚重者每曰木名石盐天生此为我用也其後石坐罪竟荷校云

二十七日

二十八日同仲高出闔门买小舟泛西湖至长桥寺予不至临安八年矣湖上园苑竹树皆老苍高柳造天僧寺益葺而旧交多已散去或贵不复相通为之絶叹

二十九日沈持要检正枢招饮邂逅赵德庄少卿彦端晚出涌金门并湖绕城至舟中

三十日

六月一日早移舟出闸几尽一日始能出三闸?舫栳比热甚午後小雨热不解泊采场前

二日禺中解舟乡仆来言乡中闵雨村落家家车水比连三年颇稔今春父老言占岁可忧不知终何如也过赤岸班荆馆小休前亭班荆者北使宿顿及赐燕之地距临安三十六里晚急雨颇凉宿临平临平者太师蔡京葬其父準於此以钱塘江为水会稽山为案山形如骆駝葬於駝之耳而筑塏於駝之峯盖葬师云駝负重则行远也然东坡先生乐府固已云谁似临平山上塏亭亭迎客西来送客行则临平有塏亦久矣当是蔡氏葬後增筑或迁之耳京责太子少保制云托祝圣而饰临平之山是也夜半解舟

三日黎明至长河堰亦小市也鱼蟹甚富午後至秀州崇德县县令右从政郎吴道夫丞右承直郎李植监秀州都税务右从政郎章湜来旧闻戴子微云崇德有市人吴隐忽弃家寓旅邸终日默坐一室室中惟一卧榻客至共坐榻上或载酒过之亦不拒清谈竟日隐初不学问至是间与人言易数皆造精微亦能先知人吉凶寿夭见者莫能测也因见吴令问之云皆信然今徙居村落间矣是晚行十八里宿石门火云如山明日之热可知也

四日热甚午後始稍有风晚泊本觉寺前寺故神霄宫也废於兵火建炎後再修今犹甚草创寺西庑有莲池十余亩飞桥小亭颇华洁池中龟无数闻人声皆集骈首仰视儿曹惊之不去亭中有小碑乃郭功甫元佑中所作醉翁操後自跋云见子瞻所作未工故赋之亦可异也

五日早抵秀州见通判权郡事右通直郎朱自求员外通判右承事郎直秘阁赵师□方务德侍郎滋务德留饭饭罢还舟小憩极热谒樊自强主管樊自牧教授【广抑皆茂实吏部子】闻人伯卿教授【阜民茂德删定子】二樊居城外居第颇壮茂实晚岁所筑尚未成也隔水有小园竹树修茂荷池渺弥可喜池上有堂曰读书堂游宝华尼寺拜宣公祠堂有碑 坏磨灭之余时时可读苏州刺史于頔书大略言秘书监陆公齐望始作尼寺於此其後灞滢灑兄弟又新之後又有贤妹字意者陆氏尝有女子为尼云然不言宣公所以有祠者【家谱灑赖此证误讳灞者则宣公之父也】老尼妙济大师法淳及其弟子居白留啜茶且言方新祠堂也移舟北门宣化亭晚复过务德饭

六日右奉议郎新通判荆南吕援来援字彦能进士闻人纲来纲字伯纪方务德馆客自言识毛德昭德昭名文衢州江山县人居於秀予儿时从之甚久德昭极苦学中年不幸病盲而卒无子纲言其盲後犹终日危坐默诵六经至数千言不已可哀也赴郡集於倅?中坐花月亭有小碑乃张先子野云破月来花弄影乐章云得句於此亭也晚赴方夷吾导之集於陈大光县丞家二樊吕倅皆在大光字子充莹中谏议孙居第洁雅末利花盛开

七日早遍辞诸人赴方务德素饭晚移舟出城泊禾兴馆前馆亦颇阔壮终日大雨不止招姜

医视家人及絢

八日雨霁极凉如深秋遇顺风舟人始张帆过合路居人繁夥卖鮓者尤衆道旁多军中牧马运河水泛滥高於近村地至数尺两岸皆车出积水妇人儿童竭作亦或用牛妇人足踏水车手犹绩麻不置过平望遇大雨?风舟中尽湿少顷霁止宿八尺闻行舟有覆溺者小舟叩舷卖鱼颇贱蚊如蠹羣可畏

九日晴而风舟人惩昨夕狼狈不敢解舟日高方行自至崇德行大泽中至此始望见震泽远山午间至吴江县渡松江风极静癰庵竹树益茂而主人死矣知县右承议郎管铨尉右迪功郎周邨来县治有石刻曾文清公渔具图诗前知县事柳楹所刻也渔具比松陵倡和集所载又增十事云托周尉招医郑端诚为统絢胗脉皆病暑也市中卖鱼鮓颇珍晚解舟中流回望长桥层堦烟波渺然真若图画宿尹桥登桥观月

十日至平江以疾不入沿城过盘门望武丘楼堦正如吾乡宝林为之慨然宿枫桥寺前唐人所谓半夜钟声到客船者

十一日五更发枫桥晓过浒墅居人极多至望亭小憩自是夹河皆长冈高垄多陆种菽粟或灌木鼓筱气象窘隘非枫桥以东比也近无锡县始稍平旷夜泊县驿近邑有锡山出锡汉末讖记云有锡天下兵无锡天下清有锡天下争无锡天下宁至今锡见辄揜之莫敢取者

十二日早谒喻子材郎中樗子材来谢以两夫荷轿不持胡床手自授谒云知县右奉议郎吴澧来晚行夜四鼓至常州城外

十三日早入常州泊荆谿馆夜月如昼与家人步月驿外絢始小愈

十四日早见知州右朝奉大夫李安国通判右朝奉郎蒋谊员外倅左朝散郎张坚坚文定公纲之子教授左文林郎陈伯达员外教授左从政郎沈瀛司户右从政郎许伯虎来伯达字兼善瀛字子寿皆未识子寿仍出近文一卷伯虎字子威余儿时笔砚之旧也至东岳庙观古桧数百年物也又小憩崇胜寺纳凉遂解舟甲夜过犇牛闸宋明帝遣沈怀明击孔觐至犇牛筑垒即此也闸水湍激有声甚壮遂抵吕城闸自祖宗以来天下置堰军止四处而吕城及京口二闸在焉

十五日早过吕城闸始见独辕小车过陵口见大石兽偃仆道傍已残 盖南朝陵墓齐明帝时王敬则反至陵口恸哭而过是也余顷尝至宋文帝陵道路犹极广石柱承露盘及麒麟辟邪之类皆在柱上刻太祖文皇帝之神道八字又至梁文帝陵文帝武帝父也亦有二辟邪尚存其一为藤蔓所纏若絜缚者然陵已不可识矣其旁有皇业寺盖史所谓皇基寺也疑避唐讳所改二陵皆丹阳距县三十余里郡士蒋元龙子云谓予曰毛达可作守时有卖黄金石榴来禽者疑其盗捕得之果发梁陵所得夜抵丹阳古所谓曲阿或曰云阳谢康乐诗云朝日发云阳落日到朱方盖谓此也

十六日早发丹阳汲玉乳井水井在道旁观音寺名列水晶色类牛乳甘冷熨齿并额陈文忠公所作堆玉八分也寺前又有练光亭下阚练湖亦佳境距官道甚近然过客罕至是日见夜合花方开故山开过已月余气候不齐如此过夹冈有二石人植立冈上俗谓之石翁石媪其实亦古陵墓前物自京口抵钱塘梁陈以前不通漕至隋炀帝始凿渠八百里皆濶十丈夹冈如连山盖当时所积之土朝廷所以能驻蹕钱塘以有此渠耳汴与此渠皆假手隋氏而为吾宋之利岂亦有数邪过新丰小憩李太白诗云南国新丰酒东山小妓歌又唐人诗云再入新丰市犹闻旧酒香皆谓此非长安之新丰也然长安之新丰亦有名酒见王摩诘诗至今居民市肆颇盛夜抵镇江城外是日立秋

十七日平旦入镇江泊船西驿见知府右朝散郎直秘阁蔡洸子平都统庆远军节度使成闵通判右朝奉大夫章汶右朝奉郎陶之真府学教授左文林郎熊克总领司干办公事右承奉郎史弥正端叔

十八日右奉议郎签书节度判官厅公事葛郇观察推官右文林郎徐务滋司户参军左迪功郎杨冲焦山长老定圆甘露长老化昭来

十九日金山长老宝印来字坦叔嘉州人言自峡州以西滩不可胜计白傅诗所谓白狗到黄牛滩如竹节稠是也赴蔡守饭於丹阳楼热特甚堆冰满坐了无凉意蔡自点茶颇工而茶殊下同坐熊教授建宁人云建茶旧杂以米粉复更以薯蕷两年来又更以楮芽与茶味颇相入且多乳惟过梅则无复气味矣非精识者未易察也申後移舟出三闸至潮闸而止

二十日迁入嘉州王知义船微雨极凉

二十一日

二十二日郡集卫公堂後圃比旧唯增染香亭饮半登寿丘普照寺终宴壽丘者宋高祖宅有故井尚存寺本名延庆隆兴中复泗州有普照寺僧奉僧伽像来归寓焉因赐名普照寺侨置僧伽道场东望京山连亘抱合势如繚墙官寺楼观如画西阚大江气象极雄伟也

二十三日至甘露寺饭僧甘露盖北固山也有狠石世传以为汉昭烈吴大帝尝据此石共谋曹氏石亡已久寺僧辄取一石充数游客摩娑太息僧及童子辈往往窃笑也拜李文饶祠登多景楼楼亦非故址主僧化昭所筑下临大江淮南草木可数登览之胜实过於旧邂逅左迪功郎新太平州教授徐容容字子公泉州人此山多峭崖如削然皆土也国史以爲石壁峭絶误矣

二十四日

二十五日早以一豨壶酒谒英灵助顺王祠所谓下元水府也祠属金山寺寺常以二僧守之无他祝史然榜云赛祭猪头例归本庙观者无不笑初绍兴未完顏亮入寇枢密叶公审言督

视大军守江禱於水府祠请事平奏加帝号既而不果隆兴中敌再入有近臣申言之议者谓四渎止封王水府不应在四渎上乃但加美称而已庙中遇武人王秀自言博州人年五十一完顏亮寇边时自河朔从义军攻下大名以待王师既归朝不见録且自言孤远无路自通獻歎不已是晚欲出江舟人辞以潮不应遂宿江口

二十六日五鼓发船是日舟人始伐鼓遂游金山登玉监堂妙高台皆穷极壮丽非昔比玉监盖取苏仪甫诗云僧於玉监光中坐客蹋金鳌背上行仪甫果终於翰苑当时以为诗讖新作寺门亦甚雄翟耆年伯壽篆额然门乃不可泊舟凡至寺中者皆由雄跨阁长老宝印言旧额仁宗皇帝御飞白张之则风波汹涌蛟鼉出没遂藏之寺阁今不复存矣印住山近十年兴造皆其力寺有两堦本曾子宣丞相用西府俸所建以荐其先者政和中寺为神霄宫道士乃去堦上相轮而屋之谓之?罗霄台至是五十余年印始复为堦且增饰之工尚未毕山絶顶有吞海亭取毛吞巨海之意登望尤胜每北使来聘延至此亭烹茶金山与焦山相望皆名蓝每争雄长焦山旧有吸江亭最为佳处故此名吞海以胜之可笑也夜风水薄?鞞鞞有声

二十七日留金山极凉冷印老言蜀中梁山军鹭鸶为天下第一

二十八日夙兴观日出江中天水皆赤真伟观也因登雄跨阁观二岛左曰鹘山旧传有栖鹘今无有右曰云根岛皆特起不附山俗谓之郭璞墓奉使金国起居郎范至能至山遣人相招食於玉监堂至能名成大圣政所同官相别八年今借资政殿大学士提举万寿宫侍读为金国祈请使云午间过瓜洲江平如镜舟中望金山楼观重复尤为钜丽中流风雷大作电影腾掣止在江面去舟财丈余急系?俄而开霁遂至瓜洲自到京口无蚊是夜蚊多始复?

二十九日泊瓜洲天气澄爽南望京口月观甘露寺水府庙皆至近金山尤近可辨人眉目也然江不可横絶放舟稍西乃能达故渡者皆迟回久之舟人以帆弊往姑苏买帆是日方至【檣高五丈六尺帆二十六幅】两日间閱往来渡者无虑千人大抵多军人也夜观金山堦灯

三十日

渭南文集卷四十三

卷四十四

钦定四库全书

渭南文集卷四十四

宋 陆游 撰

入蜀记

七月一日黎明离瓜洲便风挂颿晚至真州泊鉴远亭州本唐扬州扬子县之白沙镇杨溥有淮南徐温自金陵来覲溥於白沙因改曰迎銮镇或谓周世宗征淮时诸将尝於此迎謁非也国朝乾德中升为建安军祥符中建玉清昭应宫即军之西北小山置冶铸玉皇圣祖太祖太宗四圣像既成遣丁谓李宗鐸为迎奉使副至京车驾出迎肆赦建军曰真州而於故冶筑仪真观政和中修九域图志又名曰仪真郡旧以水陆之冲为发运使治所今废

二日见知州右朝奉郎王察市邑官寺比数年前颇盛携统游东园园在东门外里余自建炎兵火後废坏涂地漕司租与民岁入钱数千昔之闳壮巨丽复为荆棘荒墟之地者四十余年乃更葺为园以记考之惟清醺堂拂云亭澄虚阁麤复其旧与右之清池北之高台尚存若所谓流水横其前者湮塞仅如一带而百亩之园废为蔬畦者尚过半也可为太息登台望下蜀诸山平远可爱裴回久之过报恩光孝寺少留辛巳之变仪真焚荡无余而此寺独存堂中僧百人长老妙湍常州人

三日右迪功郎监税务闻人尧民来尧民茂德删定之兄子以恩科入官北山永庆长老蘊常来羣集于平易堂遍游澄澜阁快哉亭遂至壮观以归壮观旧有米元章所作赋石刻今亡矣初问王守仪真观去城远近云在城南里许方怪与国史异既归亟往游则信城南也有老道士出迎年七十余自言庐州人能述仪真本末云旧观实在城西北数里小土山之麓祥符所铸乃金铜像并座高三丈以黄麾全仗道门幢节迎赴京师皆与国史合故当时乐章曰范金肖像申严奉宫馆状翬飞万灵拱卫瑞烟披堤柳映黄麾道士又言赐号瑞应福地则史所不载也今所谓仪真观者昔黄冠入城休憩道院耳晚大风舟人增缆

四日风便解缆挂帆发真州岸下舟相见後发者甚衆烟帆映山缥缈如画有顷风愈厉舟行甚疾过瓜步山山蜿蜒蟠伏临江起小峰颇巉峻絶顶有元魏太武庙庙前大木可三百年一井已智传以为太武所凿不可知也太武以宋文帝元嘉二十七年南侵至瓜步建康戒严太武凿瓜步山为蟠道於其上设檀庐大会羣臣疑即此地王文公所谓鼙祠瓜步认前朝是也梅圣俞题庙云魏武败亡归孤军驻山顶按太武初未尝败圣俞误以佛狸为曹瞞耳山出玛瑙石多虎豹害人往时大将刘宝每募人捕虎於此周世宗伐南唐齐王景达自瓜步渡江距六合二十里设栅亦此地也入夹行数里沿岸园畴衍沃庐舍竹树极盛大抵多长芦寺庄出夹望长庐楼堞重复自江淮兵火官寺民庐莫不残坏独此寺之盛不减承平至今日常数百

衆江面渺弥无际殊可畏李太白诗云维舟至长芦目送烟云高是也晚泊竹筱港有居民二十余家距金陵三十里

五日大风将晓覆袂衾晨起凄然如莫秋过龙湾浪涌如山望石头山不甚高而峭立江中缭绕如垣墙凡舟皆由此下至建康故江左有变必先固守石头真控扼要地也自新河入龙光门城上旧有赏心亭白鹭亭在门右近又创二水亭在门左诚为壮观然赏心为二亭所蔽颇失往日登望之胜泊秦淮亭说者以为鍾阜艮山得庚水为宗庙水秦凿淮本欲破金陵王气然庚水反为吉天下事信非人力所能胜也见留守右朝请大夫秘阁修撰唐瑑通判右朝散郎潘恕建康行宫在天津桥北桥琢青石为之颇精致意其南唐之旧也晚小雨右文林郎监大军仓王烜来王言京口人用七月六日为七夕盖南唐重七夕而常以帝子镇京口六日辄先乞巧翌旦驰入建康赴内燕故至今为俗云然考太宗皇帝时尝下诏禁以六日为七夕则是北俗亦如此此说恐不然

六日见左朝散大夫太府少卿总领两淮财赋沈夏武泰军节度使建康诸军都统郭振右宣教郎知江宁县何作善右文林郎观察推官褚意来作善字百祥意字诚叔晚见秦伯和侍郎伯和名塤故相益公桧之孙延坐画堂栋宇闳丽前临大池池外即御书阁盖赐第也家人病创托何令招医刘仲宝视脉

七日早游天?观在冶城山之麓地理家以为此山脉络自蒋山来不可知也吴晋间城垒大抵多因山为之观西有忠烈庙卞壺庙也以嵇绍及壺二子眇眇配食绍死於惠帝时在壺前且非江左事而以配壺非也庙後叢木甚茂传以为壺墓墓东北又有亭颇疎豁曰忠孝亭亭本南唐忠贞亭後避讳改焉忠贞壺諡今日忠孝则并以其二子死父难也云堂道士陈德新字可久姑苏人颇开敏相从登览久之遂出西门游清凉广慧寺寺距城里余据石头城下临大江南直牛头山气象甚雄然坏於兵火旧有德?堂在法堂前堂榜乃南唐後主撮襟书石刻尚存而堂徙於西偏矣又有祭悟空禅师文曰保大九年岁次辛亥九月皇帝以香茶乳药之奠致祭於右街清凉寺悟空禅师按南唐元宗以癸卯岁嗣位改元保大当晋出帝之天福八年至辛亥实保大九年当周太祖之广顺元年则祭悟空者元宗也建康志以为後主非是长老宝余楚州人留食赠德?堂榜墨本食已同登石头西望宣化渡及历阳山真形胜之地若异时定都建康则石头仍为关要或以为今都城徙而南石头虽守无益盖未之思也惟城既南徙秦淮乃横贯城中六朝立栅断航之类缓急不可复施然大江天险都城临之金汤之势比六朝为胜岂必依淮为固邪左廸功郎新湖州武康尉刘炜右廸功郎比较务李膺来炜秦伯和馆客也言秦氏衰落可念至屡典质生产亦薄问其岁入几何曰米十万斛耳

八日晨至鍾山道林真觉大师塏焚香塏在太平兴国寺上宝公所葬也塏中金铜宝公像有铭在其膺盖王文公守金陵时所作僧言古像取入东都啓圣院祖宗时每有祈祷啓圣及此塏皆设道场考之信然塏西南有小轩曰木末其下皆大松髯甲夭矫如蛟龙往往数百年物木末盖後人取王文公诗木末北山云冉冉之句名之建康志谓公自命此名非塏後又有定林庵旧闻先君言李伯时画文公像於庵之昭文斋壁着帽束带神彩如生文公没斋常扃闭遇重客至寺僧开户客忽见像皆惊耸觉生气逼人写照之妙如此今庵经火尺椽无复存者

予乙酉秋尝雨中独来游留字壁间後人移刻崖石读之感叹盖已五六年矣归途过半山少留半山者王文公旧宅所谓报宁禅院也自城中上锺山此为中途故曰半山残毁尤甚寺西有土山今谓之培塿亦後人取文公诗所谓沟西顾丁壮担土为培塿名之也寺後又有谢安墩文公诗云在冶城西北即此是也

九日至保宁戒坛二寺保宁有鳳皇台揽辉亭台有李太白诗云三山半落青天外二水中分白鹭洲今已废为大军甲仗库惟亭因旧趾重筑亦颇宏壮寺僧言亭榜本朱希真隶书已为俗子易之法堂後有片石莹润如墨玉乃宋子嵩诗题云鳳凰山亭子陈献司空乡贡进士宋齐丘司空者徐知诰也後改姓名曰李昇是为南唐烈祖而齐丘为大臣後又有题字云昇元三年奉勅刻石盖烈祖既有国追念君臣相遇之始而表显之昇齐丘虽皆不足道然当攘夺分裂横溃之时其君臣相遇不如是亦不能粗成其功业也戒坛額曰崇胜戒坛寺古谓之瓦棺寺有阁因冈阜其高十丈李太白所谓锺山对北户淮水入南荣者又横江词一风三日吹倒山白浪高于瓦棺阁南唐後主时朝廷遣武人魏丕来使南唐意其不能文即宴於是阁因求赋诗丕揽笔成篇末句云莫教雷雨损基局後主君臣皆失色及南唐之亡为吴越兵所焚国朝承平二百年金陵为太府寺观竞以崇饰土木为事然阁终不能复绍兴中有北僧来居讲惟识百法论誓复兴造求伟材於江湖间事垂集者屡矣会建宫阙有司往往辄取之僧不以此动心愈益经营卒成卢舍那阁平地高七丈雄丽冠於江东旧阁基相距无百步今废为军营秦伯和遣医柴安恭来视家人疮柴邢州龙冈人晚褚诚叔来诚叔尝为福州闽清尉获盗应格当得京官不忍以人死为己利辞不就至今在选调又有为他邑尉者亦获盗营赏甚力卒得京官将解去入郡过邢人处辄掩目大呼数日神志方定後至他郡见通衢有石幢问此何为从者曰法场也亦大骇叫呼几坠车自此所至皆逗道以避邢人之地人之不可有媿於心如此移舟泊赏心亭下秦伯和送药

十日早出建康城至石头得便风张帆而行然港浅而狭行亦甚缓宿大城冈金陵冈陇重复如梅岭石子冈余【读如蛇】婆冈尤其着者也居民数十家亦有店肆

十一日早出夹行大江过三山矶烈洲慈姥矶采石镇泊太平州江口谢玄晖登三山还望京邑李太白登三山望金陵皆有诗凡山临江皆曰矶水湍急篙工并力撑之乃能上然今年闰余秋早水落已数尺矣则盛夏可知也三山自石头及凤皇台望之杳杳有无中耳及过其下则距金陵财五十里晋伐吴王濬舟师过三山王浑要濬议事濬举帆曰风利不得泊即此地也是日便风击鼓挂帆而行有两大舟东下者阻风泊浦溆见之大怒顿足诟骂不已舟人不忿但抚掌大笑鸣鼓愈厉作得意之状江行淹速常也得风者矜而阻风者怒可谓两失之矣世事盖多类此者记之以寓一笑烈洲在江中上有小山曰烈山草木极茂密有神祠在山巔慈姥矶之尤巉絶峭立者徐师川有慈姥矶诗序云矶与望夫石相望正可为的对而诗人未尝挂齿牙故其诗云离鸾只说闺中恨舐犊谁知目下情然梅圣俞护母丧归宛发长芦江口诗云南国山川都不改伤心慈姥旧时矶师川偶忘之耳圣俞又有过慈姥矶下及慈姥山石崖上竹鞭诗皆极高奇与此山称采石一名牛渚与和州对岸江面比瓜洲为狭故隋韩擒虎平陈及本朝曹彬下南唐皆自此渡然微风辄浪作不可行刘宾客云芦苇晚风起秋江鳞甲生王文公云一风微吹万州阻皆谓此矶也矶即南唐樊若水献策作浮梁渡王师处初

若水不得志於李氏诈祝髮为僧庐於采石山凿石为窍及建石浮图又月夜系绳於浮图棹小舟急渡引绳至江北以渡江面既习知不谬即亡走京师上书其後王师南渡浮梁果不差尺寸予按隋炀帝征辽盖尝用此策渡辽水造三浮桥於西岸既成引趋东岸桥短丈余不合隋兵赴水接战高丽乘岸上击之麦铁杖战死始歛兵引桥复就西岸而更命何稠接桥二日而成遂乘以济然隋终不能平高丽国朝遂下南唐者实天意也若水何力之有方若水之北走也江南皆知献南征之策或请诛其母妻李煜不敢但羈置池州而已其後若水自陈母妻在江南朝廷命煜护送煜虽愤切终不敢违厚遗而遣之然若水所凿石窍及石浮图皆不毁王师卒用以系浮梁则李氏君臣之暗且怠亦可知矣虽微若水有不亡者乎张文潜作平江南议谓当缚若水送李煜使甘心焉不然正其叛主之辜而诛之以示天下岂不伟哉文潜此说实天下正论也予自金陵得疾是日方小愈尚未能食夜雨

十二日早移舟泛姑熟溪五里泊閱武亭初询舟人云江口泊船处距城二十里须步乃可入及至閱武乃止在城闔之外徽猷阁直学士左朝请郎知州周元特操闻予病与医郭师显俱来视疾自都下相别迨今八年矣太平州本金陵之当涂县周世宗时南唐元宗失淮南侨置和州於此谓之新和州改为雄远军国朝开宝八年下江南改为平南军然独领当涂一邑而已太平兴国二年遂以为州且割芜湖繁昌来属而治当涂与兴国军同时建置故分纪年以名之

十三日通判右朝请郎叶梦弼员外通判左朝奉郎钱同仲耕军事判官左文林郎赵子颯知当涂县右通直郎王权来午後入州见元特呼郭医就坐间为予切脉且议所用药州正据姑熟溪北土人但谓之姑溪水色正绿而澄澈如镜纤鳞往来可数溪南皆渔家景物幽奇两浮桥悉在城外其一通宣城其一可至浙中姑熟堂最号得溪山之胜适有客寓家其间故不得至又有一酒楼登望尤佳皆城之南也往时溪流分一支贯城中湮塞已久近岁浚治然春夏之交暂通今七月已絕流矣李太白集有姑熟十咏予族伯父彦远尝言东坡自黄州过当涂读之抚手大笑曰贗物败矣岂有李太白作此语者郭功父争以为不然东坡又笑曰但恐是太白後身所作耳功父甚愠盖功父少时诗句俊逸前辈或许之以为太白後身功父亦遂以自负故东坡因是戏之或曰十咏及归来乎笑矣乎僧伽歌怀素草书歌太白旧集本无之宋次道再编时贪多务得之过也

十四日晚晴开南窗观溪山溪中絕多鱼时裂水面跃出斜日暎之有如银刀垂钓挽罟者弥望以故价甚贱僮使辈日皆餍饫土人云此溪水肥宜鱼及饮之水味果甘岂信以肥故多鱼耶溪东南数峰如黛盖青山也

十五日早州学教授左文林郎吴博古敏叔员外教授左文林郎杨恂信伯来饭已游黄山东岳庙广福寺遂登凌歊台岳庙栋宇颇盛本谓之黄山大监庙大监者不知何神盖淫祠也今既为岳庙而大监反寓食庑下广福本寿圣寺以绍兴壬午诏书改额败屋二十余间残僧三四人萧然如古驿主僧惠明温州平阳人凌歊台正如凤皇雨花之类特因山巔名之宋高祖所营面势虚旷高出氛埃之表南望青山龙山九井诸峰如在几席龙山即孟嘉登高落帽处九井山有桓玄僭位坛稍西江中二小山相对云东梁西梁也北户临和州新城楼櫓历历可

辨盖自絕江至和州才十余里李太白有黄山凌歊台送族弟泛舟赴华阴诗即此地也台後有一堦堦之後又有亭曰怀古云余初至当涂饮姑熟溪水喜其甘滑已而遍饮城中水皆甘盖泉脉佳也

十六日羣集於道院历游城上亭榭有坐觀亭颇宜登览城濠皆植荷花是夜月白如画影入溪中摇荡如玉堦始知东坡玉堦卧微澜之句为妙也

渭南文集卷四十四

<集部,别集类,南宋建炎至德佑,渭南文集>

卷四十五

钦定四库全书

渭南文集卷四十五

宋 陆游 撰

入蜀记

十七日羣集於青山李太白祠堂二教授同集祠在青山之西北距山尚十五里墓在祠後有小冈阜起伏盖亦青山之别支也祠莫知其始有唐刘全白所作墓碣及近岁张真甫舍人所作重修祠碑太白乌巾白衣锦袍又有道?氅裘侑食於侧者郭功甫也蚤饭罢游青山山南小市有谢玄晖故宅基今为汤氏所居南望平楚极目而环宅皆流泉奇石青林文筱真佳处也遂由宅後登山路极险巇凡三四里有两道人持汤饮迎劳於松石间又里许至一庵老道人出迎年七十余姓周潍州人居此山三十年颧颊如丹须鬓无白者又有李媪八十矣耳目聪明谈笑不衰自言尝得异人秘诀庵前有小池曰谢公池水味甘冷虽盛夏不竭絶顶又有小亭亦名谢公亭下视四山如蛟龙奔放争赴川谷絶类吾乡舜山但舜山之巔丰沃夷旷无异平陆此所不及也亭北望正对历阳周生言完顏亮入寇时战鼓之声震於山中云夜归舟次已一鼓尽矣坐间信伯言桓温墓亦在近郊有石兽石马制作精妙又有碑悉刻当时车马衣冠之类极可观恨不一到也

十八日小雨解舟出姑熟溪行江中江溪相接水清浊各不相乱挽行夹中三十里至大信口泊舟盖自此出大江须风便乃可行往往连日阻风两小山夹江即东梁西梁一名天门山李太白诗云两岸青山相对出孤帆一片日边来王文公诗云崔嵬天门山江水遶其下梅圣俞云东梁如仰蚕西梁如浮鱼徐师川云南人北人朝莫船东梁西梁今古山皆得句於此也水许小儿卖菱芡莲藕者甚衆夜行堤上观月大信口欧阳文忠公于役志谓之带星口未详孰是于役志盖谪夷陵时所着也

十九日便风过大小褐山矶奇石巉絶渔人依石挽罾宛如画图间所见过梟矶在大江中耸拔特起有道士结庐其上政和中赐名寧渊观旧说梟矶有梟能害人故得名方郡县奏乞观額时恶其名因曰矶在水中水常沃石故曰浇矶今观屋亦二十余间然止一道人居之相传有二人则其一辄死故无敢往者至芜湖县泊舟吴波亭知县右通直郎吕昭问来按汉丹阳郡有芜湖县吴陆逊屯芜湖又杜预注春秋楚子伐吴克鳩兹亦云在芜湖至东晋乃改名于湖不知所自王敦反屯于湖今故城尚存又有玩鞭亭亦当时遗迹唐温飞卿有湖陰曲叙其事近时张文潜以为晋书所云帝至於湖陰察营垒当以于湖为句飞卿盖误读也作于湖曲以反之刘梦得历阳书事诗叙道中事云望夫人化石梦帝日环营盖梦得自□州移牧历阳过此邑也邑人云数年前邑境有盗发大墓棺槨已坏得镜及刀劒之属甚衆甃塼有大将军墓四字或疑为敦墓云

二十日宁国太平县主簿左迪功郎陈炳来见泛小舟往谢之则寓宁渊观下院以提刑司檄来督大礼钱帛宁渊在泉矾隔大江故置下院於近邑道流十余坛宇像设甚盛有观主何守诚者今选居太一宫矣炳字德先婺州义乌人自言其从姑得道徽宗朝赐号妙静练师结庐葛仙峯下平生不火食惟饮酒啗生果为人言祸福死生无毫厘差每风日清和时辄掩关独处或於户外窃听之但闻若二婴儿声或歌或笑往往至中夜方止莫有能测者年九十正旦自四月八日当远行果以是日坐逝每为德先言汝有仙骨当遇异人後因得疾委顿有皖山徐先生来饵以药即日疾平徐因留教以絶粒诀德先父母方望其成名固不许然自是絶滋味日食淡汤饼及饭而已如此者六年益觉身轻能日行二百里会中第娶妻复近荤血徐遂告别临行语德先曰汝二纪後当复从我究此事德先送至谿上方呼舟欲渡徐褰裳疾行水上而去呼之不复应德先至今怅恨有弃官入灊皖之意予遂游东寺登王敦城以归城并大江气象宏敞邑出緑毛龟就船卖者不可胜数将午解舟过三山矾矾上新作龙祠有道人半醉立薜崖峭絶处下观行舟望之使人寒心亦奇士也江中江豚十数出没色或黑或黄俄又有物长数尺色正赤类大蜈蚣奋首逆水而上激水高三二尺殊可畏也宿过道口

二十一日过繁昌县南唐所置初隶宣城及置太平州复割隶焉晚泊荻港散步堤上游龙庙有老道人守之台州居县人自言居此十年日伐薪二束卖之以自给雨雪则从人乞未尝他营也又至一庵僧言隔港即铜陵界远山嶄然临大江者即铜官山太白所谓我爱铜官乐千年未拟还是也恨不一到最後至凤凰山延禧观观废於兵烬者四十余年近方兴葺羽流五六人观主陈延瑞婺州义乌县人言此古青华观也有赵先生荻港市中人父卖茗先生幼名王九年十三疾亟父抱诣青华愿使入道是夕先生梦老人引之登高山谓曰我陰翁也出柏枝啗之及觉遂不火食後又梦前老人教以天篆数百字比觉悉记不遗太宗皇帝召见度为道士赐冠简易名自然给装钱遣还遂为观主祥符间再召至京师赐紫衣改青华?曰延禧先生恳求还山养母得归一日无疾而逝门人葬之山中行半途棺忽大重不可举其母曰吾儿必有异命发棺果空无尸惟劒履在耳遂即其处葬之今冢犹在谓之劒冢自然国史有传大槩与延瑞言颇合惟劒冢一事无之荻巷盖繁昌小墟市也归舟已夜矣

二十二日过大江入丁家洲夹复行大江自离当涂风日清美波平如席白云青嶂远相映带终日如行图画殊忘道途之劳也过铜陵县不入晚泊水洪口江湖间谓分流处为洪王文公诗云东江木落水分洪是也

二十三日过阳山矾始见九华山九华本名九子李太白为易名太白与刘梦得皆有诗而刘至以为可兼太华女儿之奇秀南唐宋子嵩辞政柄归隐此山号九华先生封青阳公由是九华之名益盛惟王文公诗云盘根虽巨壮其末乃修纖最极形容之妙大抵此山之奇在修纤耳然无含蓄敦大气象与庐阜天台异矣岸傍荻花如雪旧见天井长老彦威云庐山老僧用此絮纸衣威少时在惠日亦为之佛灯珣禅师见而大嗔云汝少年辄求温暖如此岂有心学道邪退而问兄弟则堂中百人有荻花衣者财三四皆年七十余矣威愧恐亟除去泊海根港巨鱼十数色苍白大如黄犍出没水中每出水辄激起沸白成浪真壮观也

二十四日到池州泊税务亭子州唐置南唐尝为康化军节度今省又尝割青阳隶建康今复

故惟所置铜陵东流二县及改秋浦为池今因之盖南唐都金陵故当涂芜湖铜陵繁昌广德青阳并江宁上元溧阳溧水句容凡十一县皆隶畿内今建康为行都而才有江宁等五邑有司所当议也李太白往来江东此州所赋尤多如秋浦歌十七首及九华山清溪白谿陂玉镜潭诸诗是也秋浦歌云秋浦长似秋萧条使人愁又曰两鬓入秋浦一朝已衰援声催白发长短尽成丝则池州之风物可见矣然观太白此歌高妙乃尔则知姑熟十咏决为贗作也杜牧之池州诸诗正尔观之亦清婉可爱若与太白诗并读醇醪异味矣初王师平南唐命曹彬分兵自荆州顺流东下以樊若水为乡导首克池州然後能取芜湖当涂驻军采石而浮桥成则池州今实要地不可不备也

二十五日见知州右朝议大夫直秘阁杨师中通判右朝奉郎孙德刍游光孝寺寺有西峯圣者所留笛圣者生当吴武王杨行密时阳狂不羈好吹笛能役鬼神蛟龙尝寓池州乾明寺乾明即光孝也及去留笛付主事僧笛似铜而非色绿而莹润如绿玉不知何物僧惧为好事者所夺郡官求观之辄出一凡笛充数予偶与监寺僧有旧独得一见有石刻沈睿达所作西峯铭文辞古雅可爱恨非其自书也僧言贵池去城八十里在秀山下江之一支别漚为池四隅皆因山石为岸产鲤鱼金鳞朱尾味极美本以此得贵池之名秀山有梁昭明太子墓拱木森然今池州城西有神甚灵者曰九郎或云九郎即昭明晚登弄水亭杜牧之所赋诗也亭殊不葺然正对清溪齐山景物絶佳州虽濒江然据冈阜上颇难得水

二十六日解舟过长风沙罗刹石李太白江上赠窦长史诗云万里南迁夜郎国三年归及长风沙梅圣俞送方进士游庐山云长风沙浪屋许大罗刹石齿水下排历此二险过湓浦始见瀑布悬苍崖即此地也又太白长干行云蚤晚下三巴预将书报家相迎不道远直到长风沙盖自金陵至此七百里而室家来迎其夫甚言其远也地属舒州旧最号湍险仁庙时发运使周湛役三十万夫疏支流十里以避之至今为行舟之利罗刹石在大江中正如京口鹳峯而稍大白石拱起其上葢筱乔木亦有小神祠旛竿不知何神也西望羣山靡迤岩嶂深秀宛如吾庐南望镜中诸山为之累歛宿怀家泐怀姓也吴有尚书郎怀叙见顾雍传

二十七日五鼓大风自东北来舟人不告櫓便风解船过雁翅夹有税场居民二百许家岸下泊船甚衆遂经皖口至赵屯未朝食已行百五十里而风益大乃泊夹中皖口即王师破江南大将朱令贇水军处赵屯有戍兵亦小市聚也是日大风至莫不止登岸行至夹口观江中惊涛骇浪虽钱塘八月之潮不过也有小舟掀簸浪中欲入夹者再三不可得几覆溺矣号呼求救久方能入北望正见皖山太白江上望皖公山诗云巉絶称人意巉絶二字不刊之妙也南唐元宗南迁豫章舟中望皖山爱之谓左右曰此青峭数峯何名畚曰舒州皖山时方新失淮南伶人李家明侍侧献诗曰龙舟千里扬东风汉武浔阳事正同回首皖公山色好日斜不到寿盃中元宗为悲愤歔歔故王文公诗云南狩皖山非故地北师淮水失名王计其处当去此不远也夜雨

二十八日过东流县不入自雷江口行大江江南羣山苍翠万叠如列屏障凡数十里不絶自金陵以西所未有也是日便风张帆舟行甚速然江面浩渺白浪如山所櫓二千斛舟摇兀掀舞才如一叶过狮子矶一名佛指矶薛壁百尺青林绿筱倒生壁间图画所不及犹恨舟行

北岸不得过其下旁有数矶亦奇峭然皆非狮子比也至马当所谓下元水府山势尤秀拔正面山脚直插大江庙依峭崖架空为阁登降者皆自阁西崖腹小石径扞萝侧足而上宛若登梯飞甍曲檻丹碧缥缈江上神祠惟此最佳舟至石壁下忽昼晦风势横甚舟人大恐失色急下颿趋小港竭力牵蚤间同行一舟亦蜀舟也忽有大鱼正绿腹蚤间同行一舟亦蜀舟也忽有大鱼正绿腹下赤如丹跃起桅旁高三尺许人皆异之是晚果折樯破帆几不能全亦可怪也入夜风愈厉增十余缆迨晓方少定

二十九日阻风马当港中风雨凄冷初御袂衣有小舟冒风涛来卖薪菜猪肉亦有卖野彘肉者云猎芦场中所得饭已登南岸望马当庙北风吹人劲甚至不能语既莫风少定然怒涛未息击船终夜有声

八月一日过烽火矶南朝自武昌至京口列置烽燧此山当是其一也自舟中望山突兀而已及抛江过其下嵌岩窈穴怪奇万状色泽莹润亦与它石迥异又有一石不附山杰然特起高百余尺丹藤翠蔓罗络其上如宝装屏风是日风静舟行颇迟又秋深潦缩故得尽见杜老所谓幸有舟楫迟得尽所历妙也过澎浪矶小孤山二山东西相望小孤属舒州宿松县有戍兵凡江中独山如金山焦山落星之类皆名天下然峭拔秀丽皆不可与小孤比自数十里外望之碧峯巉然孤起上於云霄已非他山可拟愈近愈秀冬夏晴雨姿态万变信造化之尤物也但祠宇极於荒残若稍饰以楼观亭榭与江山相发挥自当高出金山之上矣庙在山之西麓额曰惠济神曰安济夫人绍兴初张魏公自湖湘还尝加营葺有碑载其事又有别祠在澎浪矶属江州彭泽县三面临江倒影水中亦占一山之胜舟过矶虽无风亦浪涌盖以此得名也昔人诗有舟中估客莫漫狂小姑前年嫁彭郎之句传者因谓小孤庙有彭郎像澎浪庙有小姑像实不然也晚泊沙夹距小孤一里微雨复以小孤游庙中南望彭泽都昌诸山烟雨空蒙鸥鹭灭没极登临之胜徙倚久之而归方立庙门有俊鹘抟水禽掠江东南去甚壮也庙祝云山有栖鹘甚多

二日蚤行未二十里忽风云腾涌急系缆俄复开霁遂行泛彭蠡口四望无际乃知太白开帆入天镜之句为妙始见庐山及大孤大孤状类西梁虽不可拟小姑之秀丽然小孤之旁颇有沙洲葭苇大孤则四际渺弥皆大江望之如浮水面亦一奇也江自湖口分一支为南江盖江西路也江水浑浊每汲用皆以杏仁澄之过夕乃可饮南江则极清澈合处如引绳不相乱晚低江州州治德化县即唐之浔阳县柴桑栗里皆其地也南唐为奉化军节度今为定江军岸土赤而壁立东坡先生所谓舟人指点岸如赭者也泊湓浦水亦甚清不与江水乱自七月二十六日至是首尾财六日其间一日阻风不行实以四日半泝流行七百里云

三日移泊琵琶亭见知州左朝请郎周昇强仲通判左朝散郎胡适发运使户部侍郎史正志志道发运司干办公事程坦履道察推左文林郎蔡戡定夫始得夔州公移

四日游天庆观李太白诗所谓浔阳紫极宫也苏黄诗刻皆不复存太白诗有一石亦近时俗书见观主李守智问玉芝亦不能畚观皆古屋初不更兵烬而遗迹扫地独太清殿老君像乃唐人所塑特为奇古真人女真仙官力士童子各二躯又有唐明皇帝金铜像衣冠如道士而

气宇粹穆有五十年安享太平富贵气象李守智者滁州来安人自言家故富饶遇乱弃家为道人大将岳飞以度牒与之始为道士至今画岳氏父子事之史志道招饮於发运廨中登高望亭望庐山天气澄霁诸峯尽见志道出新鼓铸铁钱

五日羣集於庾楼楼正对庐山之双劍峯北临大江气象雄丽自京口以西登览之地多矣无出庾楼右者楼不甚高而觉江山烟云皆在几席间真絶景也庾亮尝为江荆豫州刺史其实则治武昌若武昌南楼名庾楼犹有理今江州治所在晋特柴桑县之湓口关耳此楼附会甚明然白乐天诗固已云浔阳欲到思无穷庾亮楼南湓口东则承误亦久矣张芸叟南迁録云庾亮镇浔阳经始此楼其误尤甚

六日甲夜有大灯球数百自湓浦蔽江而下至江面广处分散渐远赫然如繁星丽天土人云此乃一家放五百碗以禳灾祈福盖江乡旧俗云

七日往庐山小憩新桥市盖吴蜀大路市肆壁间多蜀人题名并溪乔木往往皆三二百年物盖山之麓也自江州至太平兴国宫三十里此适当其半是日车马及徒行者憧憧不絶云上观盖往太平宫焚香自八月一日至七日乃已谓之白莲会莲社本远法师遗迹旧传远公尝以一日借道流故至今太平宫岁以为常东林寺亦自作会然来者反不若太平之盛亦可笑也晚至清虚庵庵在拨云峯下皇甫道人所居皇甫名坦嘉州人出游旁郡独见其弟子曹弥深登绍兴焕文阁实藏光尧皇帝御书又有神泉清虚堂皆宸翰题榜宿清虚西室曹君置酒堂中炙鹿肉甚珍酒尤清醇夜寒可附火

渭南文集卷四十五

卷四十六

钦定四库全书

渭南文集卷四十六

宋 陆游 撰

入蜀记

八日蚤由山路至太平兴国宫门庭气象极閼壮正殿为九天采访使者像衮冕如帝者舒州灊山灵仙观祀九天司命真君而采访使者为之佐故南唐名灵仙曰丹霞府太平曰通玄府崇奉有自来矣至太宗皇帝时尝遣中使送泥金绦罗云鹤帔仍命三年一易神宗皇帝时又加封应元保运真君及赐涂金殿額两壁图十真人本吴生笔建炎中李成何世清二盗以庐山为巢宫屋焚荡无余先是山中有太一宫摹吴笔於殿芜及太平再兴复摹取太一本所托非善工无复彷彿憩於云无心堂盖冷翠亭故趾也溪声如大风雨至使人毛骨寒栗一宫之最胜处也采访殿前有鍾楼高十许丈三层累塼所成不用一木而櫨桷翬飞虽木工之良者不能加也但鍾为塼所揜蔽声不甚扬亦是一病观主胡思齐云此一楼为费三万緡鍾重二万四千余斤又有经藏亦佳扁曰云章琼室太平规模大槩南昌之玉隆然玉隆不经焚焚尚有古趣为胜也遂至东林太平兴龙寺寺正对香炉峯峯分一支东行自北而西环合四抱有如城郭东林在其中相地者谓之倒挂龙格寺门外虎溪本小涧比年甃以塼但若一沟无复古趣予劝其主僧法才去塼使少近自然不知能用吾言否食已煮观音泉啜茶登华严罗汉阁阁与卢舍阁鍾楼鼎 皆极天下之壮丽虽闽浙名蓝所不能逮遂至上方五杉阁舍利塼白公草堂上方者自寺後支径穿松陰蹑石磴而上亦不甚高五杉阁前旧有老杉五本传以为晋时物白傳所谓大十尺围者今又数百年其老可知矣近岁主僧了然辄伐去殊可惜也塼中作如来示寂像本宋佛驮跋陀尊者自西域持舍利五粒来葬於此草堂以白公记考之略是故处三间两注亦如记所云其他如瀑水莲池亦皆在高风逸韵尚可想见白公尝以文集留草堂後屡亡逸真宗皇帝尝令崇文院写校包以斑竹帙送寺建炎中又坏於兵今独有姑苏版本一帙备故事耳草堂之旁又

有【女】故趾云是王子醇枢密庵基盖东林为禅苑始於王公而照觉禅师常总实第一祖总公有塑像严重英特人也宿东林

九日至晋慧远法师祠堂及神运殿焚香憩官厅堂中有耶舍尊者刘遗民等十八人像谓之十八贤远公之侧又有一人执军持侍立谓之辟蛇童子传云东林故多蛇此童子尽拾取投之蕲州神运殿本龙潭深不可测一夕鬼神塞之且运良材以作此殿皆不知实否也然神运殿三字唐相裴休书则此说亦久矣官厅重堂邃庑?廡备设壁间有张文潜题诗寺极大连日游历犹不能徧唐碑亦甚多惟顏鲁公题名最为时所传又有聪明泉在方丈之西卓锡泉在远公祠堂後皆久废不汲不可食为之太息食已游西林乾明寺西林在东林之西二林之间

有小市曰雁门市传者以为远公雁门人老而怀故乡遂彷彿雁门邑里作此市汉作新丰之比也西林本晋江州刺史陶范舍地建寺绍兴十五六年间方为禅居徧小非东林比又絶弊坏主僧仁聪闽人方渐兴葺然流泉泠泠环遶庭际殊有野趣正殿释迦像着宝冠他处未见僧云唐塑也殿侧有慧永法师祠堂永公盖远公之兄像下一虎偃伏又有一居士立侍不知何人方丈後有塼墘不甚高制度古朴予登二级而止东厢有小阁曰待贤盖往时馆客之地今亦颓弊东西林寺旧额皆牛奇章八分书笔力极浑厚西林亦有顔鲁公题名书家以为二林题名顔书之冠冕也旧闻庐山天池塼墘初成有僧施经二匣未几墘震一角经亦失所在是日因登望以问僧僧云诚然或谓经乃刺血书故致此异又云今年天池火尺椽不遗盖旁焚火所及也晚复取太平宫路还江州小憩於新亭距州二十五里过董真人炼丹井汲饮味亦佳董真人者奉也

十日史志道饒谷帘水数器真絶品也甘腴清冷具备衆美前辈或斥水品以为不可信水品固不必尽当然谷帘卓然非惠山所及则亦不可诬也水在庐山景德观晚别诸人连夕在山中极寒可拥炉比还舟秋暑殊未艾终日挥扇

十一日解舟吴发干约待夔州书因小留江口望庐山自到江州至是凡十日皆晴秋高气清长空无纤云甚宜登览亦客中可喜事也泊赤沙湖口东北望犹见庐山老杜潭州道林诗云殿脚插入赤沙湖此湖当在湖南然岳州华容县及此皆有赤沙湖盖江湖间地名多同犹赤壁也

十二日江中见物有双角远望正如小犊出没水中有声晚泊櫓脐湫隔江大山中有火两点若鐙开阖久之问舟人皆不能知或云蛟龙之目或云灵芝丹药光气不可得而详也

十三日至富池昭勇庙以壶酒特豕谒昭毅武惠遗爱灵显王神神吴大帝时折冲将军甘兴霸也兴霸尝为西陵太守故庙食於此开宝中既平江南增江淮神祠封爵始封褒国公宣和中进爵为王建炎中大盗张遇号一窝蜂拥兵过庙下相率卜筊一筊腾空中不下一筊跃出户外羣盗惶恐引去未几遂败大将刘光世以闻复诏加封岳飞为宣抚使大葺祠宇江上神祠皆不及也门起大楼曰卷雪有钉洲正对庙故庙虽附大江而可泊舟钉洲者以锐下得名神妃封顺佑夫人神二子封绍威绍灵侯神女封柔懿夫人皆有像而後殿复有王与妃像偶坐祭享之盛以夜继日庙祝岁输官钱千二百緡则神之灵可知也舟人云若精?致祷则神能分风以应往来之舟庖下有关云长像云长不应祀於兴霸之庙者岂各所事神灵共食皆可以无愧邪彻奠自祠後步至旌教寺寺为酒务及酒官廨像设歛置一屋尽逐去僧辈亦事之已甚者富池盖隶兴国军

十四日晓雨过一小石山自顶直削去半与余姚江滨之蜀山絶相类抛大江遇一木栈广十余丈长五十余丈上有三四十家妻子鸡犬臼碓皆具中为阡陌相往来亦有神祠素所未覩也舟人云此尚其小者耳大者於栈上铺土作蔬圃或作酒肆皆不复能入夹但行大江而已是日逆风挽船自平旦至日昃才行十五六里泊刘官矶旁蕲州界也儿辈登岸归云得小径至山後有陂湖渺然莲芰甚富沿湖多木芙蓉数家夕阳中芦藩茅舍宛有幽致而寂然无人

声有大梨欲买之不可得湖中小 采菱呼之亦不膺更欲穷之会见道旁设机疑有虎狼遂不敢往刘官矶者传云汉昭烈人吴尝橈舟於此晚观大鼉浮沉水中

十五日微陰西风益劲挽船尤难自富池以西沿江之南皆大山起伏如涛头山麓时有居民往往作棚持弓矢伏其上以伺虎过龙眼矶江中拳石耳矶旁山上有龙祠晡後得便风次蕲口镇居民繁错蜀舟泊岸下甚衆监税秉义郎高世栋来旧在京口识之言此镇岁课十五万緡雁翅岁课二十六万緡夜与诸子登岸临大江观月江面远与天接月影入水荡摇不定正如金虬动心骇目之观也是日买熟药於蕲口市药贴中皆有煎煮所须如薄荷乌梅之类此等皆客中不可仓卒求者药肆用心如此亦可嘉也

十六日过新野夹有石瀨茂林始闻秋莺沙际水牛至多往往数十为羣吴中所无也地属兴国军大治县当是土产所宜尔晚过道士矶石壁数百尺色正青了无窍穴而竹树迸根交错其上苍翠可爱自过小孤临江峰嶂无出其右矶一名西塞山即玄真子渔父辞所谓西塞山前白鹭飞者李太白送弟之江东云西塞当中路南风欲进船必在荆楚作故有中路之句张文潜云危机插江生石色擘青玉殆为此山写真又云已逢斌媚散花峡不泊难危道士矶盖江行惟马当及西塞最为湍险难上抛江泊散花洲洲与西塞相直前一夕月犹未极圆盖望正在是夕空江万顷月如紫金盘自水中涌出平生无此中秋也

十七日过回风矶无大山盖江滨石碛耳然水急浪涌舟过甚难过兰溪东坡先生所谓山下兰芽短浸谿者买鹿肉供膳晚泊巴河口距黄州二十里一市聚也有马祈寺吴大帝刑马坛传云吴攻寿春刑白马祭江神於此自兰谿而西江面尤广山阜平远两日皆逆风舟人以食尽欲来巴河糶米极力牵挽日皆行八九十里苏黄门謫高安东坡先生送至巴河即此地也张文潜亦有巴河道中诗云东南地缺天连水春夏风高浪卷山

十八日食时方行晡时至黄州州最僻陋少事杜牧之所谓平生睡足处云梦泽南州然自牧之王元之出守又东坡先生张文潜谪居遂为名邦泊临皋亭东坡先生所尝寓与秦少游书所谓门外数步即大江是也烟波渺然气象疎豁见知州右朝奉郎直秘阁杨由义通判右奉议郎陈绍复州治陋甚厅事仅可容数客倅居差胜晚移舟竹园步盖临皋多风涛不可夜泊也黄州与樊口正相对东坡所谓武昌樊口幽絶处也汉昭烈用吴鲁子敬策自当阳进住鄂县之樊口即此地也

十九日蚤游东坡自州门而东冈垄高下至东坡则地势平旷开豁东起一垄颇高有屋三间一gui头曰居士亭亭下面南一堂颇雄四壁皆画雪堂中有苏公像乌?紫裘横按筇杖是为雪堂堂东大柳传以为公手植正南有桥榜曰小桥以莫忘小桥流水之句得名其下初无渠涧遇雨则有涓流耳旧止片石布其上近辄增广为木桥覆以一屋颇败人意东一井曰暗井取苏公诗中走报暗井出之句泉寒熨齿但不甚甘又有四望亭正与雪堂相直在高阜上览观江山为一郡之最亭名见苏公及张文潜集中坡西竹林古氏故物号南坡今已残伐无几地亦不在古氏矣出城五里至安国寺亦苏公所尝寓兵火之余无复遗迹惟遶寺茂林啼鸟似犹有当时气象也郡集於栖霞楼本太守閻丘孝终公显所作苏公乐府云小舟横截春江

卧看翠壁红楼起正谓此楼也下临大江烟微微茫远山数点亦佳处也楼颇华洁先是郡有庆瑞堂谓一故相所生之地後毁以新此楼酒味殊恶苏公齎汤蜜汁之戏不虚发郡人何斯举诗亦云终年饮恶酒谁敢憎督邮然文潜乃极称黄州酒以为自京师之外无过者故其诗云我初謫官时帝问司酒神曰此好饮徒聊给酒养真去国一千里齐安酒最醇失火而得雨仰戴天公仁岂文潜謫黄时适有佳匠乎循小径繚州宅之後至竹楼规模甚陋不知当王元之时亦止此邪楼下稍东即赤壁矶亦茆冈尔略无草木故韩子苍待制诗云岂有危巢与栖鹘亦无陈迹但飞鸥此矶图经及传者皆以为周公瑾败曹操之地然江上多此名不可考质李太白赤壁歌云烈火张天照云海周瑜於此败曹公不指言在黄州苏公尤疑之赋云此非曹孟德之困於周郎者乎乐府云故垒西边人道是当日周郎赤壁盖一字不轻下如此至韩子苍云此地能令阿瞒走则真指为公瑾之赤壁矣又黄人实谓赤壁曰赤鼻尤可疑也晚复移舟菜园步又远竹园三四里盖黄州临大江了无港澳可泊或云旧有澳郡官厌过客故塞之

二十日晓离黄州江平无风挽船正自赤壁矶下过多奇石五色错杂粲然可爱东坡先生怪石供是也挽行十四五里江面始稍狭隔江冈阜延袤竹树葱蒨渔家相映幽邃可爱复出大江过三江口极望无际泊戚矶港

二十一日过双柳夹回望江上远山重复深秀自离黄虽行夹中亦皆旷远地形渐高多种菽粟荞麦之属晚泊杨罗洲大堤高柳居民稠衆鱼贱如土百钱可饱二十口又皆巨鱼欲觅小鱼饲猫不可得

二十二日平旦微雨过青山矶多碎石及浅滩晚泊白杨夹口距鄂州三十里陆行止十余里居民及泊舟甚多然大抵皆军人也

二十三日便风挂帆自十四日至是始得风食时至鄂州泊税务亭贾船客舫不可胜计街尾不絶者数里自京口以西皆不及李太白赠江夏韦太守诗云万舸此中来连帆过扬州盖此郡自唐为冲要之地夔州迓兵来参见知州右朝奉郎张郟之彦转运判官右朝奉大夫谢师稷市邑雄富列肆繁错城外南市亦数里虽钱塘建康不能过隐然一大都会也吴所都武昌乃今武昌县此州在吴名夏口亦要害故周公瑾求以精兵进住夏口而晋武帝亦诏王濬唐彬既定巴?与胡奋王戎共平夏口武昌顺流长骛也自江州至此七百里泝流虽日得便风亦须三四日韩文公云盆城去鄂渚风便一日耳过矣盖退之未尝行此路也

二十四日蚤谢漕招食於漕园光华堂依山亭馆十余不甚葺晚羣集於奇章堂以唐牛思黯尝为武昌节度使也

二十五日观大军教习水战大舰七百艘皆长二三十丈上设城壁楼櫓旗帜精明金鼓鞀?破浪往来捷如飞翔观者数万人实天下之壮观也

二十六日与统紆同游头陀寺寺在州城之东隅石城山山繚绕如伏蛇自西亘东因其上为

城缺坏仅存州治及漕司皆依此山寺毀於兵火汴僧舜广住持三十年兴葺略备自方丈西北蹶支径至絕顶旧有奇章亭今已废四顾江山井邑靡有遗者李太白江夏赠韦南陵诗云头陀云外多僧气正谓此寺也黄鲁直亦云头陀全盛时宫殿梯空级藏殿後有南齐王简栖碑唐开元六年建苏州刺史张庭圭温王书韩熙载撰碑陰徐锴题额最後云唐岁在己巳武昌军节度观察留後知军州事杨守忠重立前鄂州唐年县主簿秘书省正字韩夔书碑陰云乃命犹子夔正其旧本而刊写之以是知夔为熙载兄弟之子也碑字前後一手又作温字不全盖南唐尊徐温为义祖而避其名则此碑盖夔重书也碑陰又云皇上鼎新文物教被华夷如来妙旨悉已徧穷百代文章罔不备举故是寺之碑不言而兴按此碑立於己巳岁当皇朝之开宝二年南唐危蹙日甚距其亡六年尔熙载大臣不以覆亡为惧方且言其主鼎新文物教被华夷固已可怪又以穷佛旨举遗文及兴是碑为盛夸诞妄谬真可为後世发笑然熙载死李主犹恨不及相之君臣之惑如此虽欲久存得乎唐制节度使不在镇而以副大使或留後居任则云知节度事此云知军州事盖渐变也唐年县本故唐时名梁改曰临夏後唐复晋又改临江然历五代鄂州未尝属中原皆遥改耳故此碑开宝中建而犹曰唐年也至江南平始改崇阳云简栖为此碑骈俪卑幼初无过人世徒以载於文选故贵之耳自汉魏之间駸駸为此体极於齐梁而唐尤贵之天下一律至韩吏部柳柳州大变文格学者翕然慕从然骈俪之作终亦不衰故熙载锴号江左辞宗而拳拳於简栖之碑如此本朝杨刘之文擅天下传夷狄亦骈俪也及欧阳公起然後扫荡无余後进之士虽有工拙要皆近古如此碑者今人读不能终篇已坐睡矣而况効之乎则欧阳氏之功可谓大矣若鲁直云唯有简栖碑文章岿然立盖戏也

渭南文集卷四十六

卷四十七

钦定四库全书

渭南文集卷四十七

宋 陆游 撰

入蜀记

二十七日羣集於南楼在仪门之南石城上一曰黄鹤山制度閼伟登望尤胜鄂州楼观为多而此独得江山之要会山谷所谓江东湖北行画图鄂州南楼天下无是也下阡南湖荷叶弥望中为桥曰广平其上皆列肆两旁有水阁极佳但以卖酒不可往山谷云凭栏十里芰荷香谓南湖也是日蚤微雨晚晴

二十八日同章冠之秀才甫登石镜亭访黄鹤楼故址石镜亭者石城山一隅正枕大江其西与汉阳相对止隔一水人物草木可数唐沔州治汉阳县故李太白沔州泛城南郎官湖诗序云白迁於夜郎遇故人尚书郎张谓出使夏口沔州牧杜公汉阳令王公觴於江城之南湖其後沔州废汉阳以县隶鄂州周世宗平淮南得其地复以为军太白诗云谁道此水广狭如一疋练江夏黄鹤楼青山汉阳县大语犹可闻故人难可见形容最妙黄鲁直宵征江夏县睡起汉阳城亦此意老杜有公安送李晋肃入蜀余下沔鄂及登舟将适汉阳诗而卒於耒水可恨也汉阳负山带江其南小山有僧寺者大别山也又有小别谓之二别云黄鹤楼旧传费祎飞升於此後忽稟黄鹤来归故以名楼号为天下絶景崔灏诗最传而太白奇句得於此者尤多今楼已废故址亦不复存问老吏云在石镜亭南楼之间正对鹦鹉洲犹可想见其地楼榜李监篆石刻独存太白登此楼送孟浩然诗云孤帆远映碧山尽惟见长江天际流盖帆樯映远山尤可观非江行久不能知也复与冠之出汉阳门游仙洞止是石壁数尺皆直裂无洞穴之状旧传有仙人隐其中尝啓洞出游老兵遇之得黄金数瓶後化为石东坡先生有诗纪其事初不云所遇何人且太白固已云颇闻列仙人於此学飞术一朝向蓬海千载空石室今鄂人谓之吕公洞盖流俗附会也有道人澶州人结庐洞侧设吕公像其中洞少南即石镜山麓巖顽石也色黄赤皴驳了不能监物可谓浪得名者由江滨堤上还船民居市肆数里不絶其间复有巷陌往来憧憧如织盖四方商贾所集而蜀人为多

二十九日蚤有广汉僧世全左縣僧了证来附从人舟日映移舟江口回望堤上楼阁重复灯火歌呼夜分乃已招医赵随为灵照视脉

三十日黎明离鄂州便风挂颿沿鹦鹉洲南行洲上有茂林神祠远望如小山洲盖祢正平被杀处故太白诗云至今芳洲上兰蕙不敢生梁王僧辨击邵陵王纶军至鹦鹉洲即此地也自此以南为汉水禹贡所谓嶓冢导漾东流为汉者水色澄澈可监太白云楚水清若空盖言此也过谢家矶金湫矶不甚高而石皆横裂如累层巒得缩项鰖鱼重十斤湫中有聚落如小

县出鲟鱼居民率以卖鮓为业晚泊通济口自此入沌沌读如篆字书云水名在江夏过九月则沌涸不可行必由巴陵至荆渚

九月一日始入沌实江中小夹也过新潭有龙祠甚华洁自是遂无复居人两岸皆葭苇弥望谓之百里荒又无挽路舟人以小舟引百丈入夜财行四十五里泊葭苇中平时行舟多於此遇盗通济巡检持兵来警逻不寐达旦

二日东岸苇稍薄缺时见大江渺弥盖巴陵路也晡时次下郡始有二十余家皆业渔钓芦藩茅屋宛有幽致鱼尤不论钱自此始复有挽路登舟背望竟陵远山泊白臼有庄居数家门外皆古柳侵云

三日自入沌食无菜是日始得菰及芦服然不肯斲根皆刈叶而已过八叠湫口皆有民居晚泊归子保亦有十余家多桑柘榆柳

四日平旦始解舟舟人云自此陂泽深阻虎狼出没未明而行则挽卒多为所害是日蚤见舟人焚香祈神云告红头须小使头长年三老莫令错呼错唤问何谓长年三老云梢工是也长读如长幼之长乃知老杜长年三老长歌里白昼摊钱高浪中之语盖如此因问何谓摊钱云博也按梁冀能意钱之戏注云即摊钱也则摊钱之为博亦信矣过纲步有二十余家在夕阳高柳中短篱晒罾小往来正如画图所见沌中之最佳处也泊毕家池地势爽垲居民颇衆有一二家虽茆茨结庐而窗户整洁藩篱坚壮舍傍有果园甚盛盖亦一聚之雄也与诸子及二僧步登岸游广福永固寺阒然无一人东偏白云轩前橙方结实虽小而极香相与烹茶破橙抵莫乃还舟中毕家池盖属复州玉沙县沧浪乡云

五日泊紫湄

六日过东场并水皆茂竹高林堤净如扫鸡犬闲暇鳧鸭浮没人往来林樾间亦有临渡唤船者使人恍然如造异境舟人云皆村豪园庐也泊鸡鸣

七日泊湛江

八日蚤次江陵之建宁镇盖沌口也晋王澄弃荆州别驾郭舒不肯从澄东下乃留沌沌口陈侯安都讨王琳至沌口皆此地也阻风大雨浮水中无数凡行沌中七日自是泛江入石首县界夜观隔江烧芦场烟焰亘天如火城光照舟中皆赤

九日蚤谒后土祠道旁民屋苦茆皆厚尺余整洁无一枝乱挂帆抛江行三十里泊墦子矶江滨大山也自离鄂州至是始见山买羊置酒盖村步以重九故屠一羊诸舟买之俄顷而尽求菊花於江上人家得数枝芬馥可爱为之颓然径醉夜雨极寒始覆絮衾

十日阻风雨遣小舟横絕江面至对岸买肉食得大鱼之半又得一乌牡鸡不忍杀畜於舟中

俄有村翁持茭萌一束来饷不肯受直遣人先之夔晚晴开船窗观月

十一日舟行望西南一角水与天接舟人云是为潜军港古尝潜军伺敌於此遥见港中有两点正黑疑其远树则下不属地久之渐近可辨盖二千五百斛大舟也又有水禽双浮江中色白类鹅而大楚人谓之天鹅飞蹇絶高有弋得者味甚美或曰即鹄也泊三江口水浅舟行甚难自此遂不复有山太白诗山随平野尽江入太荒流盖荆门所作也

十二日过石首县不入石首自唐始为县在龙盖山之麓下临汉水亦形胜之地杜子美有送石首薛明府诗即此邑也泊藕池

十三日泊柳子夜过全证二僧舟中听诵梵语般若心经此经惟蜀僧能诵

十四日次公安古所谓油口也汉昭烈驻军始更今名规模气象甚壮兵火之後民居多茆竹然茆屋尤精致可爱井邑亦颇繁富米斗六七十钱知县右儒林郎周谦孙来湖州人游二圣报恩光孝禅寺二圣谓青叶髻如来委至德如来也皆示鬼神力士之形高二丈余陰威凜然可畏正殿中为释迦右为青叶髻号大圣左为委至德号二圣三像皆南面予按藏经驹字函娑罗浮殊童子成道为青叶髻如来青叶髻如来再出世为楼至如来则二如来本一身耳有碑言邑人一夕同梦二神人言我青叶髻委至德如来也有二巨木在江干我所运者俟鄣行者来令刻为我像已而果有人自称鄣行者又善肖像邑人欣然请之像成人皆谓酷类所梦然碑无年月不知何代也长老祖珠南平军人寺後有废城髣髴尚存图经谓之吕蒙城然老杜乃曰地旷吕蒙营江深刘备城盖玄德子明皆屯於此也老杜晓发公安诗注云数月憩息此县按公移居公安诗云水烟通径草秋露接园葵而留别公安太易沙门诗云沙村白雪仍含冻江县红梅已放春则是以秋至此县莫冬始去其曰数月憩息盖为此也泊弭节亭驯鸥低飞往来竟日不去

十五日周令说县本在近北枕汉水沙虚岸摧渐徙而南今江流乃昔市邑也又云县有五乡然共不及二千户地旷民寡如此民耕尤苦堤防数坏岁岁增筑不止晚携家再游二圣寺衆寮有维摩刻木像甚佳云沙市工人所为也方丈西有竹轩颇佳珠老说五祖法演禅师初住四面山子然独处凡二年始有一道士来问道乃请作知事又三年僧宝良来与道士朝夕参叩皆得法於是演公之道寢为人知而四方学者始稍有至者虽其後门人之盛称天下然终身不过数十衆珠闻此於其师万庵顔禅师荆州絶无禅林惟二圣而已然蜀僧出关必走江浙回者又已自谓有得不复参叩故语云下江者疾走如烟上江者鼻孔撩天徒劳他二佛打供了不见一僧坐禅

十六日过白湖渺然无涯抛江至升子舖有天鹅数百翔泳水际日入泊沙市自公安至此六十里自此至荆南陆行十里舟不复进矣老杜诗云买薪犹白帝鸣橹已沙头刘梦得云沙头檣干上始见春江濶皆谓此也

十七日日入後迁行李过嘉州赵青船盖入峡船也沙市堤上居者大抵皆蜀人不然则与蜀

人为婚姻者也

十八日见知府资政殿学士刘恭父珙通判右奉议郎权嗣衍左宣教郎陈孺荆南图经以为楚之郢都梁元帝亦尝都焉唐为江陵府荆南节度今因之然牧守署衙但云知荆南军府与永兴河阳正同初无意义但沿旧而已

十九日羣集於新桥马监监在西门外四十里自出城即黄茅弥望每十余里有村疇数家而已道遇数十骑纵猎获狐兔皆系鞍上割鲜藉草而饮云襄阳军人也是日极寒如穷冬土人云此月初已尝有雪

二十日倒橈竿立橈牀盖上峡惟用橈及百丈不复张帆矣百丈以巨竹四破为之大如人臂予所乘千六百斛舟凡用橈六枝百丈两车

二十一日刘帅丁内艰分趂兵之半负肩輿自山路先归夔州是日重雾四塞

二十二日五鼓赴能仁院建会庆节道场中夜後舟人祀峡神屠一豕

二十三日奠刘帅母安定郡太夫人卓氏刘帅受吊礼与吴人同

二十四日见左朝奉郎湖北安抚司主管机宜文字牛达可右奉议郎安抚司干办公事汤衡右朝奉郎安抚同干办公事赵蘊

二十五日右文林郎知归州兴山县高祁来

二十六日修船始毕骨肉入新船祭江滨庙用壶酒特豕庙在沙市之东三四里神曰昭灵孚应威惠广源王盖四渎之一最为典祀之正者然两庑淫祠尤多盖荆楚旧俗也司法右军右迪功郎王师点録其叔祖君仪待制讼卦讲议来君仪严州人师事先大父精於易然遗书不传讲义止存一篇而已然亦其少作也

二十七日解舟击鼓鸣橈舟人皆大噪拥堤观者如堵墙泊新河口距沙市三四里盖蜀人修船处

二十八日泊方城有嘉州人王百一者初应募为船之招头招头盖三老之长顾直差厚每祭神得胙肉倍衆人既而船户赵清改用所善程小八为招头百一失职怏怏又不决去遂发狂赴水予急遣人拯之流一里余三没三踊仅得出一招头得丧能使人至死况大於此乎

二十九日阻风

十月一日过瓜洲坝仓头百里洲泊沱?皆聚落竹树郁然民居相望亦有村夫子聚徒教授羣

童见船过皆挟书出观亦有诵书不辍者沱江别名诗江有沱禹贡岷山导江东别为沱是也?则尔雅所谓春秋夏有水冬无水曰?也

二日泊桂林湾全证二僧陆行来云沿路居民大抵多四方人土着财十一也舟人杀猪十余口祭神谓之开头

三日舟人分胙行差晚与儿辈登堤观蜀江乃知李太白荆门望蜀江诗江色绿且明为善状物也自离墙子矶至是始望见巴山山在松滋县泊灌子口盖松滋枝江两邑之间松滋晋县自此入蜀江枝江唐县古罗国也江陵九十九洲在焉晋柳约之罗述甄季之闻桓玄死自白帝至枝江即此地也欧阳文忠公有枝江山行五言二十四韵盖文忠赴夷陵时自此陆行至峡州故其望州坡诗云崎岖几日山行倦却喜坡头见峡州灌子口一名松滋渡刘宾客有诗云巴人泪应猿声落蜀客船从鸟道回

四日过杨木塞盖松滋有四寨曰杨木车羊高平税家云泊龙湾

五日过白羊市盖峡州宜都县境上宜都唐县也谒张文忠公天觉墓残伐墓木横道几不可行天觉之子直龙图阁茂已卒二孙一有官病狂易一白丁也初作墓江滨已而不果葬改葬山间今墓是也而旧墓亦不复毁啓隧道出入中可容数十人坐有道人结屋其旁守之道人出一石刻草书云莫将外物寻奇宝须问真师决永铅寄八琼张子高锺离权始自王屋游都下弟子浮玉山人来乞此字今又将西还丹元子再请书卷之末绍圣元年仲冬望日权即世所谓锺离先生子高即天觉丹元子即东坡先生与之醺倡者後有魏泰道辅跋云天觉修黄籀醺法成浮玉山人谓之曰上天录公之功为须弥山八琼洞主宜刻印谢帝而佩之天觉不以为信故浮玉又出锺离公书为证後丹元子又为天觉求书卷末又有徐注者跋云天觉舟过真州方出谒有布衣幅巾者径入舟中索笔大书闲人吕洞宾来谒张天觉十字掷笔即去而天觉即归墨犹未乾注真人人云亲见之坟前碑楼壁间有诗一篇云秋风十驿望台星想见冰壶照坐清霖雨已回公旦驾挽须聊听野王箏三朝元老心方壮四海苍生耳已倾白髮故人来一别却归林下看昇平盖魏道辅赠天觉诗後人所题者唐立夫舍人亦有一诗末句云无碑堪堕泪着句与招魂宜都知县右文林郎吕大辨来泊赤崖

渭南文集卷四十七

<集部,别集类,南宋建炎至德佑,渭南文集>

卷四十八

钦定四库全书

渭南文集卷四十八

宋 陆游 撰

入蜀记

六日过荆门十二碛皆高崖絶壁崭岩突兀则峡中之嶮可知矣过碛望五龙及鸡笼山嵯峨正如夏云之奇峯荆门者当以险固得名碛上有石穴正方高可通人俗谓之荆门则妄也晚至峡州泊至喜亭下峡州在唐为硤州後改峡而印文则为陕州元丰中郎官何洵直建言陕与陕相乱请改铸印文从山事下少府监而监丞欧阳发言湖北之陕州从阜从夹【夹从两人】陕西之陕州从阜从夹【夹从两人】偏旁不同本不相乱恐四方谓少府监官皆不识字当时朝士之议皆是发而卒从洵直言改铸云至喜亭记欧阳公撰黄鲁直书

七日见知州右朝奉大夫叶安行字履道以小舟游西山甘泉寺竹桥石磴甚有幽趣有静练洗心二亭下临江山颇疎豁法堂之右小径数十步至一泉曰孝妇泉谓姜诗妻庞氏也泉上亦有庞氏祠然欧阳文忠公不以为信故其诗曰丛祠已废姜祠在事迹难寻楚语讹又此篇首章云江上孤峯蔽绿萝初读之但谓孤峯蒙藤萝耳及至此乃知山下为绿萝谿也又至汉景帝庙及东山寺景帝不知何以有庙於此欧阳公为令时有祈雨文在集中东山寺亦见欧阳公诗距望京门五里寺外一亭临小池有山如屏环之颇佳亭前冬青及柏皆百余年物遂至夷陵县令见县左从政郎胡振厅事东至喜堂郡守朱虞部为欧阳公所筑者已焚坏柱础尚存规模颇雄深又东则祠堂亦简陋肖像殊不类可叹听事前一井相传为欧阳公所浚水极甘寒为一郡之冠井旁一桮合抱亦传为公手植晚郡集於楚塞楼遍历尔雅台锦障亭亭前海棠二本亦百年物尔雅台者图经以为郭景纯注尔雅於此又有绦雪亭取欧阳公千叶红梨诗而红梨已不存矣

八日五鼓尽解船过下牢关夹江千峰万嶂有竞起者有独拔者有崩欲压者有危欲坠者有横裂者有直坼者有凸者有洼者有罅者奇怪不可尽状初冬草木皆青苍不雕西望重山如阙江出其间则所谓下牢谿也欧阳文忠公有下牢津诗云入峡山渐曲转滩山更多即此也系船与诸子及证师登三游洞蹑石磴二里其险处不可着脚洞大如三间屋有一穴通人过然陰黑峻险尤可畏繚山腹偃倮自岩下至洞前差可行然下临溪潭石壁十余丈水声恐人又一穴後有壁可居锤乳岁久垂地若柱正当穴门上有刻云黄大临弟庭坚同辛紘子大方绍圣二年三月辛亥来游旁石壁上刻云景佑四年七月十日夷陵欧阳永叔下缺一字又云判官丁下又缺数字丁者宝臣也字元珍今丁字下二字亦髣髴可见殊不类元珍字又永叔但曰夷陵不称令洞外溪上又有一崩石偃仆刻云黄庭坚弟叔向子相侄?同道人唐履来游观辛亥旧题如梦中事也建中靖国元年三月庚寅按鲁直初謫黔南以绍圣二年过此岁在

乙亥今云辛亥者误也泊石牌峡石穴中有石如老翁持鱼竿状略无少异

九日微雪过扇子峡重山相掩政如屏风扇疑以此得名登虾蟆碚水晶所載第四泉是也虾蟆在山麓临江头鼻吻頔絶类而背脊疱处尤逼真造物之巧有如此者自背上深入得一洞穴石色緑润泉泠泠有声自洞出垂虾蟆口鼻问成水帘入江是日极寒岩岭有积雪而洞中温然如春碚洞相对稍西有一峯孤起侵云名天柱峰自此山势稍平然江岸皆大石堆积弥望正如濬渠积土状晚次黄牛庙山复高峻村人来卖茶菜者甚衆其中有妇人皆以青斑布帕首然颇白皙语音亦颇正茶则皆如柴枝草叶苦不可入口庙灵感神封嘉应保安侯皆绍兴以来制书也其下即无义滩乱石塞中流望之可畏然舟过乃不甚觉盖操舟之妙也传云神佐夏禹治水有功故食於此门左右各一石马颇卑小以小屋覆之其右马无左耳盖欧阳公所见也庙後叢木似冬青而非莫能名者落叶有黑文类符篆叶叶不同儿辈亦求得数叶欧诗刻石庙中又有张文忠一贊其词曰壮哉黄牛有大神力輦聚巨石百千万亿劒戟齿牙礲碓江侧壅激波涛险不可测威胁舟人骇怖失色刳羊酺酒千载庙食张公之意似谓神聚石壅流以胁人求祭飨使神之用心果如此岂能巍然庙食千载乎盖过论也夜舟人来告请无击更鼓云庙後山中多虎闻鼓则出

十日早以特豕壺酒祭灵感庙遂行过鹿角虎头史君诸滩水缩已三之二然湍险犹可畏泊城下归州秭归县界也与儿曹步沙上回望正见黄牛峡庙後山如屏风叠峩插天第四叠上有若牛状其色赤黄前有一人如着?立者昨日及今早云冒山顶至是始见之因至白沙市慈济院见主僧志坚问地名城下之由云院後有楚故城今尚在因相与访之城在一冈阜上甚小南北有门前临江水对黄牛峡城西北一山蜿蜒回抱山上有伍子胥庙大抵自荆以西子胥庙至多城下多巧石如灵壁湖口之类

十一日过达洞滩滩恶与骨肉皆棄轿陆行过滩滩际多奇石五色粲然可爱亦或有文成物象及符书者犹见黄牛峡庙後山太白诗云三朝上黄牛三莫行太迟三朝又三莫不觉?成丝欧阳公云朝朝莫莫见黄牛徒使行人过此愁山高更远望犹见不是黄牛滯客舟盖谚谓朝见黄牛莫见黄牛一朝一莫黄牛如故故二公皆及之欧阳公自荆渚赴夷陵而有下牢三游及虾蟆碚黄牛庙诗者盖在官时来游也故忆夷陵山诗云忆尝祗吏役钜细悉经觀其後又云荒烟下牢戍百仞塞溪漱虾蟆噴水帘甘液胜饮酎亦尝到黄牛泊舟听猿狖也晚泊马肝峡口两山对立修耸摩天略如庐山江岸多石百丈紫绀极难过夜小雨

十二日早过东 滩入马肝峡石壁高絶处有石下垂如肝故以名峡其傍又有狮子岩岩中有一小石蹲踞张颐碧草被之正如一青狮子微泉泠泠自岩中出舟行急不能取尝当亦佳泉也溪上又有一峰孤起秀丽略如小孤山晚抵新滩登岸宿新安驿夜雪

十三日舟上新滩由南岸上及十七八船底为石所损急遣人往拯之仅不至沈然鋭石穿船底牢不可动盖舟人载陶器多所致新滩两岸南曰官漕【平声】北曰龙门龙门水尤湍急多暗石官漕差可行然亦多鋭石故为峡中最嶮处非轻舟无一物不可上下舟人冒利以至此可为戒云游江渎北庙庙正临龙门其下石罅中有温泉浅而不涸一村赖之妇人汲水皆

背负一全木盎长二尺下有三足至泉旁以杓挹水及八分即倒坐旁石束盎背上而去大抵峡中负物率着背父多妇人不独水也有妇人负酒卖亦如负水状呼买之长跪以献未嫁者率为同心髻高二尺插银钗至六只後插大象牙梳如手大

十四日留驿中晚以小舟渡江南登山至江渚南庙新修未毕有一碑前进士曾华旦撰言因山崩石壅成此滩害舟不可计於是着令自十月至二月禁行舟知归州尚书都官员外郎赵诚闻於朝疏凿之用工八十日而滩害始去皇佑三年也盖江絕於天圣中至是而复通然滩害至今未能悉去若榷十二月正月水落石尽出时亦可并力尽鑿去銳石然滩上居民皆利於败舟贱卖板木及滯留买卖必摇沮此役不则赂石工以为石不可去须断以必行乃可成又舟之所以败皆失於重载当以大字刻石置驿前则过者必自惩创二者皆不可不讲当以告当路者

十五日舟人尽出所载始能挽舟过滩然须修治遂易舟离新滩过白狗峡泊舟兴山口肩輿游玉虚洞去江岸百里许隔一溪所谓香溪也源出昭君村水味美録於水晶色碧如黛呼小舟以渡过溪又里余洞门小才袤丈既入则极大可容数百人宏敞壮丽如入大宫殿中有石成幢盖旛旗芝草竹笋仙人龙虎鸟兽之属千状万态莫不逼真其絕异者东石正圆如日西石半规如月予平生所见岩窰无能及者有熙宁中谢师厚岑岩起题名又有陈尧咨所作记叙此洞本末云唐天宝中猎者始得之比归已夜风急不可秉烛炬然月明如昼儿曹与全师皆杖策相从殊不觉崖谷之险也

十六日到归州见知州右奉议郎贾选子公道判左朝奉郎陈端彦民瞻馆於报恩光孝寺距城一里许萧然无僧归之为州才三四百家负卧牛山临江州前即人鮓薶城中无尺寸平土滩声常如暴风雨至隔江有楚王城亦山谷间然地比归州差平或云楚始封於此山海经夏啓封孟除於丹阳城郭璞注云在秭归县南疑即此也然史记成王封熊绎於丹阳裴駰乃云在枝江未详孰是

十七日羣集於望洋堂玩芳亭亦皆沙石萃确之地贾守云州仓岁收秋夏二料麦粟秔米共五千余石仅比吴中一下户耳

十八日初得艤船羌小然底濶而轻於上滩为便十九日羣集於归乡堂欲以是晚行不果访宋玉宅在秭归县之东今为酒家旧有石刻宋玉宅三字近以郡人避太守家讳去之或遂由此失传可惜也

二十日早离归州出巫峰门过天庆观少留观唐天宝元年碑载明皇梦老子事巴东太守刘瑫所立字画颇清逸碑侧题当时郡官吏胥姓名字亦佳又有周显德中荆南判官孙光宪为知归州高从让所立碑从让盖南平王家子弟光宪亦知名国史有事迹盖五代时归峡皆隶荆渚也殿前有相数百年物观下即吒滩乱石无数饭於灵泉寺遂登舟过业滩亦名滩也水落舟轻俄顷遂过

二十一日舟中望石门关仅通一人行天下至险也晚泊巴东县江山雄丽大胜秭归但并邑极於萧条邑中才百余户自令廨而下皆茅茨了无片瓦权县事姊归尉右廸功郎王康年尉兼主簿右廸功郎杜德先来皆蜀人也谒寇莱公祠堂登秋风亭下临江山是日重陰微雪天气颼颼复观亭名使人怅然始有流落天涯之叹遂登双柏堂白云亭堂下旧有莱公所植柏今已槁死然南山重复秀丽可爱白云亭则天下幽奇絕境羣山环拥层出间见古木森然往往二百年物栏外双瀑泻石涧中跳珠溅玉冷入人骨其下是为慈溪犇流与江会予自吴入楚行五千余里过十五州亭榭之胜无如白云者而止在县听事之後巴东了无一事为令者可以寝饭於亭中其乐无涯而阙令动辄二三年无肯补者何哉

二十二日发巴东山益奇怪有夫子洞者一窠在峭壁絕高处人迹所不可至然髣髴若有栏楯不知所谓夫子者何也过三分泉自山窠中出止两???俗云三???有年两???中熟一派或絕流饥饉泊疲石夜雨

二十三日过巫山凝真观谒妙用真人祠真人即世所谓巫山神女也祠正对巫山峰峦上入霄汉山脚直插江中议者谓太华衡庐皆无此奇然十二峯者不可悉见所见八九峯惟神女峯最为纖丽奇峭宜为仙真所托祝史云每八月十五夜月明时有丝竹之音往来峰顶山猿皆鸣達旦方渐止庙後山半有石坛平旷传云夏禹见神女授符书於此坛上观十二峯宛如屏障是日天宇晴霁四顾无纖翳惟神女峰上有白云数片如鸾鹤翔舞裴徊久之不散亦可异也祠旧有乌数百送迎客舟自唐□州刺史李贻诗已云羣乌幸胙余矣近乾道元年忽不至今絕无一乌不知其故泊清水洞洞极深後门自山後出但黠闇水流其中鲜能入者岁旱祈雨颇应权知巫山县左文林郎冉徽之尉右廸功郎文庶几来

二十四日早抵巫山县在峡中亦壮县也市井胜归峡二郡隔江南陵山极高大有路如綫盘屈至絕顶谓之一百八盘盖施州正路黄鲁直诗云一百八盘携手上至今归梦绕羊肠即谓此也县有故盆底銳似半甕状极坚厚铭在其中盖汉永平中物也缺处色光黑如佳漆字画淳质可爱玩有石刻鲁直作盆记大略言建中靖国元年予弟叔向嗣直自涪陵尉摄县事予起戎州来寓县此盆旧以种莲余洗涤乃见字云游楚故离宫俗谓之细腰宫有一池亦当时宫中燕游之地今湮没略尽矣三面皆荒山南望江山奇丽又有将军墓东晋人也一碑在墓後跌入地碑倾前欲压字才半存

二十五日晡後至大谿口泊舟出美梨大如升

二十六日发大谿口入瞿唐峡两壁对耸上入霄汉其平如削成仰视天如足练然水已落峡中平如油盖过圣姥泉盖石上一罅人大呼於旁则泉出屡呼则屡出可怪也晚至瞿唐关唐故夔州与白帝城相连杜诗云白帝夔州各异城盖言难辨也关西门正对灩澦堆堆碎石积成出水数十丈土人云方夏秋水涨时水又高於堆数十丈肩輿入关谒白帝庙气象甚古松柏皆数百年物有数碑皆孟蜀时所立庭中石笋有黄鲁直建中靖国元年题字又有越公堂隋杨素所创少陵为赋诗者已毁今堂近岁所筑亦甚宏壮自关而东即东屯少陵故居也

二十七日早至夔州州在山麓沙上所谓鱼复永安宫也宫今为州仓而州治在宫西北甘夫人墓西南景德中转运使丁谓薛颜所徙比白帝颇平旷然失关险无复形势在瀼之西故一曰瀼西土人谓山间之流通江者曰瀼云州东南有八阵碛孔明之遗迹碎石行列如引绳每岁江涨碛上水数十丈比退阵石如故

渭南文集卷四十八

卷四十九

钦定四库全书

渭南文集卷四十九

宋 陆游 撰

赤壁词【招韩无咎游金山】

禁门钟晓忆君来朝路初翔鸾鹄西府中台推独步行对金莲宫烛蹙绣华鞵僊葩宝带看即
飞腾速人生难料一尊此地相属回首紫陌青门西湖闲院锁千梢修竹素壁栖鸦应好在残
梦不堪重续岁月惊心功名看镜短?无多緑一欢休惜与君同醉浮玉

浣沙溪【和无咎韵】

嬾向沙头醉玉瓶唤君同赏小窗明夕阳吹角最关情忙日苦多闲日少新愁常续旧愁生客
中无伴怕君

行

又【南郑席上】

浴罢华清第二汤红绵扑粉玉肥凉娉婷初试藕丝裳凤尺裁成猩血色螭奩熏透麝脐香水
亭幽处捧霞

觞

青玉案【与朱景参会北岭】

西风挟雨声翻浪恰洗尽黄茱瘴老惯人间齐得丧千岩高卧五湖归棹替却凌烟像

故人小驻平戎帐白羽腰间气何壮我老渔樵君将相小槽红酒晚香丹荔记?蛮江上

水调歌头【多景楼】

江左占形胜最数古徐州连山如画佳处缥渺着危楼鼓角临风悲壮烽火连空明灭往事忆
孙刘千里曜戈甲万竈宿貔貅露沾草风落木岁方秋使君宏放谈笑洗尽古今愁不见襄阳
登览磨灭游人无数遗恨黯难收叔子独千载名与汉江流

浪淘沙【丹阳浮玉亭席上作】

綠树暗长亭几把离尊
阳关常恨不堪闻
何况今朝秋色里身是行人
清泪浥罗巾各自消魂
一江离恨恰平分
安得千寻横铁鎖截断烟津

定风波【进贤道上见梅赠王伯寿】

欹?垂鞭送客回
小桥流水一枝梅
衰病逢春都不记
谁谓幽香却解逐人来
安得身闲频置酒
携手与君看到十分开
少壮相从今雪?因甚
流年羈恨两相催

南乡子

归梦寄吴檣
水驿江程去路长
想见芳洲初系缆
斜阳烟树参差认武昌
愁?点新霜
曾是朝衣染御香
重到故乡交旧少
凄凉却恐它乡胜故乡

又

早岁入皇州
罇酒相逢尽胜流
三十年来真一梦
堪愁客路萧萧两?秋
蓬峤偶重游
不待人嘲我自羞
看镜倚楼俱已矣
扁舟月笛烟蓑万事休

满江红

危堞朱栏登览处
一江秋色人正似征鸿
社燕几番轻别
缱绻难忘当日语
凄凉又作它乡客
问?边都有几多丝
真堪织 杨柳院秋千陌
无限事成虚掷
如今何处也梦魂难觅
金鸭微温香缥缈
锦茵初展情萧瑟
料也应红泪伴秋霖
灯前滴

又【夔州催王伯礼侍御寻梅之集】

疎蕊幽香禁不过
晚寒愁絶那更是巴东
江上楚山千叠
欹?闲寻西瀼路
鞦韆笑向南枝说
恐使君归去上銮坡
孤风月 清镜里悲华发
山驿外溪桥侧
凄然回首处
凤凰城阙顚顚如今谁
领略飘零已是无顏色
问行厨何日唤宾僚
犹堪折

感皇恩【伯礼立春日生日】

春色到人间
彩幡初戴正好春盘
细生菜一般
日月只有仙家偏耐雪霜
从点鬓朱顏在
温诏鼎来延英催
对凤阁鸾台看
除拜对衣裁
稳恰称球纹新带
个时方旋了功名债

又

小阁倚秋空下临江渚漠漠孤云未成雨数声新雁回首杜陵何处壮心空万里人谁许
黄阁紫枢筑坛开府莫怕功名欠人做如今熟计只有故乡归路石帆山脚下菱三亩

好事近【寄张真甫】

羈雁未成归肠断宝箏零落那更冻醪无力似故人情薄
瘴云蛮雨暗孤城身在楚山角烦问劔南消息怕还成疎索

又

风露九霄寒侍宴玉华宫阙亲向紫皇香案见金芝千叶
碧壺仙露醞初成香味两奇絶醉後却骑丹凤看蓬莱春色

又【次字文卷目韵】

客路苦思归愁似鬣丝千绪梦里镜湖烟雨看山无重数
尊前消尽少年狂慵着送春语花落燕飞庭户叹年光如许

又

岁晚喜东归扫尽市朝陈迹拣得乱山环处钓一潭澄碧
卖鱼沽酒醉还醒心事付横笛家在万重云外有沙鸥相识

又

华表又千年谁记驾云孤鹤回首旧曾游处但山川城郭
纷纷车马满人间尘土污芒屨旦访葛仙丹井看岩花开落

又

挥?别人间飞蹶峭崖苍壁寻见古仙丹竈有白云成积
心如潭水静无风一坐数千息夜半忽惊奇事看鲸波噉日

又

湓口放船归薄暮散花洲宿两岸白苹红蓼暎一蓑新绿
有沽酒处便为家菱芡四时足明日又乘风去任江南江北

又【登梅仙山絶顶望海】

挥袖上西峰孤絕去天无尺拄杖下临鲸海数烟颿历历
贪看云气舞青鸾归路已将夕多识半山松吹解殷懃留客

又

小倦带余酲澹澹数椀斜日驱退睡魔十万有双龙苍壁
少年莫笑老人衰风味似平昔扶杖冻云深处探溪梅消息

又

觅个有缘人分付玉壺灵药谁向市尘深处识辽天孤鹤
月中吹笛下巴陵条华赴前约今古废兴何限叹山川如昨

又

平旦出秦关雪色驾车双鹿借问此行安往赏清伊修竹
汉家宫殿劫灰中春草几回綠君看变迁如许况纷纷荣辱

又

秋晓上莲峯高蹑倚天青壁谁与放翁为伴有天坛轻策铿铿然忽变赤龙飞雷雨四山黑谈
笑做成丰岁笑禅龕榔栗

鷓鴣天【送叶梦锡】

家住东吴近帝乡平生豪举少年場十千沽酒青楼上百万呼卢锦瑟傍
身易老恨难忘尊前赢得是凄凉君归为报京华旧一事无成两鬓霜

又【葭萌驿作】

看尽巴山看蜀山子规江上过春残惯眠古驿常安枕熟听阳关不惨顏
慵服气嬾烧丹不妨青鬓戏人间秘传一字神仙诀说与君知只是顽

又

梳发金盘剩一窝画眉鸾镜晕双蛾人间何处无春到只有伊家独占多
微步处奈娇何春衫初换麝尘罗东邻鬪草归来晚忘却新传子夜歌

又

家住苍烟落照间丝毫尘事不相关斟残玉瀣行穿竹卷罢黄庭卧看山
贪啸傲任衰残不妨随处一开颜元知造物心肠别老却英雄似等闲

又

插脚红尘已是颠更求平地上青天新来有个生涯别买断烟波不用钱
沽酒市采菱船醉听风雨拥蓑眠三山老子真堪笑见事迟来四十年

又

嬾向青门学种瓜只将渔钓送年华双双新燕飞春岸片片轻鸥落晚沙
歌缥缈橹呕哑酒如清露鲚如花逢人问道归何处笑指船儿此是家

又【薛公肃家席上作】

南浦舟中两玉人谁知重见楚江滨凭教後苑红牙版引上西川緑锦茵
才浅笑却轻颦淡黄杨柳又催春情知言语难传恨不似琵琶道得真

蓦山溪【送伯礼】

元戎十乘出次高唐馆归去旧鵷行更何人齐飞霄汉瞿唐水落惟是泪波深催叠鼓起牙樯
难鎖长江断春深鳌禁红日宫甍暖何处望音尘黯消魂层城飞观人情见惯不敢恨相忘梅
驿外蓼滩边只待除书看

又【游三荣龙洞】

穷山孤垒腊尽春初破寂寞掩空斋好一个无聊底我啸台龙岫随分有云山临浅瀨?长松闲
据胡床坐二盃径醉不觉纱巾堕画角唤人归落梅村籃輿夜过城门渐近几点妓衣红官驿
外酒垆前也有闲灯火

木兰花【立春日作】

三年流落巴山道破尽青衫尘满?身如西瀼渡头云愁抵瞿唐关上草
春盘春酒年年好试戴银旛判醉倒今朝一岁大家添不是人间偏我老

朝中措【梅】

幽姿不入少年场无语只凄凉一个飘零身世十分冷淡心肠
江头月底新诗旧梦孤恨清香任是春风不管也曾先识东皇

又【代谭得称作】

怕歌愁舞嬾逢迎粧晚托春醒总是向人深处当时枉道无情
关心近日啼红密诉剪緑深盟杏馆花陰恨浅画堂银烛嫌明

又

冬冬雉鼓饯流年烛焰动金船彩燕难寻前梦酥花空点春妍
文园谢病兰成久旅回首凄然明月梅山笛夜和风禹庙鸪天

临江仙【离果州作】

鸠雨催成新緑燕泥收尽残红春光还与美人同论心空眷眷分袂却匆匆
只道真情易写那知怨句难工水流云散各西东半廊花院月一?柳桥风

蝶恋花【离小益作】

陌上箫声寒食近雨过园林花气浮芳润千里斜阳鍾欲暝凭高望断南楼信
海角天涯行略尽三十年间无处无遗恨天若有情终欲问忍教霜点相思?

又

桐叶晨飘蛩夜语旅思秋光黯黯长安路忽记横戈盘马处散关清渭应如故
江海轻舟今已具一卷兵书叹息无人付早信此生终不遇当年悔草长杨赋

又

水漾萍根风卷絮倩笑娇颦忍记逢迎处只有梦魂能再遇堪嗟梦不由人做
梦若由人何处去短?轻衫夜夜眉州路不怕银缸深绣户只愁风断青衣渡

钗头凤

红酥手黄滕酒满城春色宫墙柳东风恶欢情薄一怀愁绪几年离索错错错
春如旧人空瘦泪痕红浥蛟绡透桃花落闲池阁山盟虽在锦书难托莫莫莫

清商怨【葭萌驿作】

江头日莫痛饮乍雪晴犹凜山驿凄凉灯昏人独寝鸳机新寄断锦叹往事不堪重省梦欲南
楼緑云堆一枕

水龙吟【荣甫作】

樽前花?寻春处堪叹心情全减一身萍寄酒徒云散佳人天远那更今年瘴烟蛮雨夜郎江畔
漫倚楼横笛临?看镜时挥涕惊流转 花落月明庭院悄无言魂消肠断凭肩携手当时曾效
画梁栖燕见说新来网萦尘暗舞衫歌扇料也羞顚顚慵行芳径怕啼鶯见

秋波媚【七月十六日晚登高兴亭望长安南山】

秋到边城角声哀烽火照高台悲歌击筑凭高酹酒此兴悠哉
多情谁似南山月特地莫云开灞桥烟柳曲江池馆应待人来

又

曾散天花蕊珠宫一念堕尘中铅华洗尽珠玑不御道骨仙风
东游我醉骑鲸去君驾素鸾从垂虹看月天台采药更与谁同

采桑子

宝钗楼上粧梳晚嬾上秋千闲拨沉湮金缕衣寬睡髻偏
鳞鸿不寄辽东信又是经年弹泪花前愁入春风十四弦

卜算子【咏梅】

驿外断桥边寂寞开无主已是黄昏独自愁更着风和雨
无意苦争春一任羣芳妬零落成泥碾作尘只有香如故

沁园春【三荣横谿阁小宴】

粉破梅梢緑动萱丛春意已深渐珠帘低卷筇枝微步水开跃鲤林暖鸣禽荔子扶疎竹枝哀
怨浊酒一尊和泪斟凭栏久叹山川冉冉岁月駸駸 当时岂料如今漫一事无成霜?侵看故
人强半沙堤黄合鱼悬带玉貂映蝉金许国虽坚朝天无路万里凄凉谁寄音东风里有灞桥
烟柳知我归心

又

一别秦楼转眼新春又近放灯忆盈盈倩笑纖纖柔握玉香花语雪暖酥凝念远愁肠伤春病
思自怪平生殊未会君知否渐香消蜀锦泪渍吴绫 难求系日长绳况倦客飘零少旧朋但江
郊雁起渔村笛怨寒缺委炉孤砚生水绕山围烟昏云惨纵有高台常怯登消魂处是鱼牋
不到兰梦无凭

又

孤鹤归飞再过辽天换尽旧人念累累枯塚茫茫梦境王侯蝼螳毕竟成尘载酒园林寻花巷陌当日何曾轻负春流年改叹围腰带?点?霜新 交亲散落如云又岂料如今余此身幸眼明身健茶甘饭软非惟我老更有人贫躲尽危机消残壮志短艇湖中闲采蓴吾何恨有渔翁共醉谿友为隣

忆秦娥

玉花骢晚街金轡声 珑声 珑闲敲乌?又过城东富春巷陌花重重千金沽酒酬春风酬春风笙歌围

里锦绣鞦中

汉宫春【张园赏海棠作园故蜀燕王宫也】

浪迹人间喜闻猿楚峡学劒秦川虚舟汎然不系万里江天朱顔緑鬓作红尘无事神仙何妨在鷲花海里行歌闲送流年 休笑放慵狂眼看闲坊深院多少婣娟燕宫海棠夜宴花覆金船如椽画烛酒阑时百炬吹烟凭寄语京华旧侶幅巾莫换貂蝉

又【初自南郑来成都作】

羽箭雕弓忆呼鷹古垒截虎平川吹笳莫归楚帐雪压青氊淋漓醉墨看龙蛇飞落蛮牋人误许诗情将略一时才气超然 何事又作南来看重阳药市元夕灯山花时万人乐处歆?垂鞭闻歌感旧尚时时流涕尊前君记取封侯事在功名不信由天

月上海棠【成都城南有蜀王旧苑多梅皆二百余年古木】

斜阳废苑朱门闭吊兴亡遗恨泪痕里淡淡宫梅也依然点酥剪水凝愁处似忆宣华旧事 行人别有凄凉意折幽香谁与寄千里伫立江皋杳难逢陇头归骑音尘远楚天危楼独倚【宣华故蜀苑名】

又

兰房绣户厌厌病叹春醒中闷甚时醒燕子空归几曾传玉关边信伤心处独展团窠瑞锦熏笼消歇沈烟冷淚痕深展转看花影漫拥余香怎禁他峭寒孤枕西?晓几声银瓶玉井

乌夜啼

金鸭余香尚煖綠窗斜日偏明兰膏香染云鬟膩钗坠滑无声
冷落秋千伴侣阑珊打马心情绣屏惊断潇湘梦花外一声鶯

又

檐角楠陰转日楼前荔子吹花鷓鴣声里霜天晚叠鼓已催衙
乡梦时来枕上京书不到天涯邦人讼少文移省闲院自煎茶

又

我按丹台玉字君书蕊殿云篇锦官城里重相遇心事两依然
携酒何妨处处寻梅共约年年细思上界多官府且作地行仙

又

世事从来惯见吾生更欲何之镜湖西畔秋千顷鷗鹭共忘机
一枕苹风午醉二升菰米晨炊故人莫讶音书絕钓侣是新知

又

素意幽栖物外尘綠浪走天涯归来犹幸身强健随分作山家
已趁余寒泥酒还乘小雨移花柴门尽日无人到一径傍谿斜

又

园馆青林翠樾衣巾细葛轻纨好风吹散霏微雨沙路喜新乾
小燕双飞水际流鶯百啭林端投壺声断弹碁罢闲展道书看

又

从宦元知漫浪还家更觉清真兰亭道上多修竹随处岸纶巾
泉冽偏宜雪茗杭香雅称丝尊翛然一饱西窗下天地有闲人

又

纨扇婵娟素月纱巾缥缈轻烟高槐叶长陰初合清润雨余天
弄笔斜行小草鉤帘浅醉闲眠更无一点尘埃到枕上听新蝉

真珠帘

山村水馆参差路感羈游正似残春风絮掠地穿帘知是竟归何处镜里新霜空自恼问几时
鸾台鳌署迟莫谩凭高怀远书空独语 自古儒冠多误悔当年早不扁舟归去醉下白苹洲看
夕阳鸥鹭菰菜鲈鱼都弃了只换得青衫尘土休顾早收身江上一蓑烟雨

好事近

混迹寄人间夜夜画楼银烛谁见五云丹竈养黄芽初熟
春风归从紫皇游东海宴赐谷进罢碧桃花赋赐玉尘千斛

渭南文集卷四十九

卷五十

钦定四库全书

渭南文集卷五十

宋 陆游 撰

柳梢青【故蜀燕王宫海棠之盛为成都第一今属张氏】

锦里繁华环宫故邸叠萼奇花俊客妖姬争飞金勒齐驻香车
何须幙障帷遮宝盃浸红云瑞霞银烛光中清歌声里休恨天涯

又【乙巳二月西兴赠别】

十载江湖行歌沽酒不到京华底事翩然长亭烟草衰?风沙
凭高目断天涯细雨外楼台万家只恐明朝一时不见人共梅花

夜游宫【记梦寄师伯浑】

雪晓清笳乱起梦游处不知何地铁骑无声望似水想关河雁门西青海际
睡觉寒灯里漏声断月斜?纸自许封侯在万里有谁知?虽残心未死

又【宫词】

独夜寒侵翠被奈幽梦不成还起欲写新愁泪溅纸忆承恩叹余生今至此
耿耿灯花坠问此际报人何事只尺长门过万里恨君心似危栏难久倚

安公子

风雨初经社子规声里春光谢最是无情零落尽蔷薇一架况我今年顛顚幽窗下人尽怪诗
酒消声价向药炉经卷忘却鷖窗柳榭 万事收心也粉痕犹在香罗帕恨月愁花争信道如今
都罢空忆前身便面章台马因自来禁得心肠怕纵遇歌逢酒但说京都旧话

玉蝴蝶【王忠州家席上作】

倦客平生行处坠鞭京洛解佩潇湘此夕何年来赋宋玉高唐绣帘开香尘乍起莲步稳银烛
分行暗端相燕羞鷖妬蝶扰蜂忙 难忘芳樽频劝峭寒新退玉漏犹长几许幽情只愁歌罢月
侵廊欲归时司空笑闷微近处丞相嗔狂断人肠假饶相送上马何妨

木兰花慢【夜登青城山玉华楼】

閱邯鄲梦境叹緑?早霜侵奈华岳烧丹青谿看鹤尚负初心年来向浊世里悟真詮秘訣絶幽深养就金芝九畹种成琪树千林 星坛夜学步虚吟露冷透瑶簪对翠凤披云青鸾遡月宫阙 萧森琅函一封奏罢自钧天帝所有知音却过蓬壺嘯傲世间岁月駸駸

苏武慢【唐西安湖】

澹靄空蒙轻陰清潤綺陌細尘初靜平橋繫馬画閣移舟湖水倒空如鏡掠岸飛花傍檐新燕都似学人无定叹連年戎帳經春边垒暗凋顏?空记忆杜曲池台新丰歌管怎得故人音信 羈怀易感老伴无多谈尘久闲犀柄惟有翛然笔床茶竈自适笋輿烟艇待緑荷遮岸红蕖浮水更爽幽兴

齐天乐【左绵道中】

角殘钟晚关山路行人乍依孤店塞月征尘鞭丝?影常把流年虚占藏鴉柳暗叹轻负鷺花漫劳书劒事往关情悄然頻动壯游念 孤怀谁与强遣市垆沽酒酒薄怎当愁醪倚瑟妍词调鉛妙笔那写柔情芳艷征途自厌况烟斂芜痕雨稀萍点最是眠时枕寒門半掩

又【三榮人日游龍洞作】

客中随处闲消悶来寻嘯台龍岫路斂春泥山开翠霧行乐年年依旧天工妙手放轻緑萱牙淡黄杨柳笑问东君为人能染?丝否 西州催去近也?檐风软且看市樓沽酒宛转巴歌淒涼塞管携客何妨頻奏征尘暗袖漫禁得梅花伴人疎瘦几日常归画船平放溜

望梅

寿非金石恨天教老向水程山驿似梦里来到南柯这些子光陰更堪轻擲戍火边尘又过了一年春色叹名姬骏马尽付杜陵苑路豪客 长绳漫道系日看人间俛仰俱是陈迹纵自倚英气凌云奈回尽鹏程铄殘鸞翮终日凭高悄不见江东消息算沙边也有断鴻倩谁问得

洞庭春色

壯岁文章莫年勲业自昔误人算英雄成败軒裳得失难如人意空喪天真請看邯鄲当日梦待炊罢黄梁徐欠伸方知道许多时富貴何处关身 人間定无可意怎換得玉鱸丝蓴且釣竿漁艇笔牀茶竈闲听荷雨一洗衣尘洛水秦关千古後尚棘暗銅駝空愴神何須更慕封侯定远图像麒麟

漁家傲【寄仲高】

东望山陰何处是往来一万三千里写得家书空满纸流清淚书回已是明年事
寄语红桥桥下水扁舟何日寻兄弟行徧天涯真老矣愁无寐?丝几缕茶烟里

綉停针

叹半纪跨万里秦吴顿觉衰谢回首鵬行英俊竝游只尺玉堂金马气凌嵩华负壮略纵横王
霸梦经洛浦梁园觉来泪流如浮 山林定去也却自恐说着少年时话静院焚香闲倚素屏今
古总成虚假趁时?嫁幸自有湖边茅舍燕归应笑客中又还过社

桃园忆故人【并序】

三荣?治之西因子城作楼观曰高垒下临山村萧然如世外余留七十日被命参成都戎幙而
去临行徙倚竟日作桃源忆故人一首

斜阳寂历柴门闭一点炊烟时起鸡犬往来林外俱有萧然意
衰翁老去疎荣利絶爱山城无事临去画楼频倚何日重来此

又【应需道中】

栏干几曲高斋路正在重云深处丹碧未乾人去高栋空留句
离离芳草长亭莫无奈征车不住惟有断鸿烟渚知我频回顾

又

一弹指顷浮生过堕甑元知当破去去醉吟高卧独唱何须和
残年还我从来我万里江湖烟舸脱尽利名纆鎖世界元来大

又

城南载酒行歌路冶叶倡条无数一朵鞦红凝露最是关心处
鶯声无赖催春去那更兼旬风雨试问岁华何许芳草连天莫

又【题华山图】

中原当日三川震关辅回头煨炉泪尽两河征镇日望中兴运
秋风霜满青青鬓老却新丰英俊云外华山千仞依旧无人问

极相思

江头疎雨轻烟寒食落花天翻红坠素残霞暗锦一段凄然
惆怅东君堪恨处也不念冷落樽前那堪更看空相趣柳絮榆钱

一丛花

樽前凝伫漫魂迷犹恨负幽期从来不惯伤春泪为伊後滴满罗衣那堪更是吹箫池馆青子
綠陰时 回廊帘影昼参差偏共睡相宜朝云梦断知何处倩归燕说与相思从今判了十分顚
顚图要个人知

又

仙妹天上自无双玉同翠蛾长黄庭读罢心如水闭朱户愁近丝簧?明几净闲临唐帖深炷宝
奁香 人间无药驻流光风雨又催凉相逢共话清都旧叹尘劫生死茫茫何如伴我綠蓑青箬
秋晚钓潇湘

隔浦莲近拍

飞花如趁燕子直度帘栊里帐掩香云暖金笼鸚鵡惊起凝恨慵梳洗粧台畔蘸粉纖纖指实
钗坠
才醒又困厌厌中酒滋味墙头柳暗过尽一年春事罨画高楼怕独倚千里孤舟何处烟水

又

骑?云路倒景醉面风吹醒笑把浮丘袂寥然非复尘境震泽秋万顷烟霏散水面飞金镜露华
冷 湘妃睡起鬟倾钗坠慵整临江舞处零乱塞鸿清影河汉横斜夜漏永人静吹箫同过缙岭

昭君怨

昼永蝉声庭院人倦嬾摇团扇小景沔潇湘自生凉帘外蹴花双燕帘下有人同见宝篆折宫
黄炷熏香

双头莲【呈范至能待制】

华?星星惊壮志成虚此身如寄萧条病骥向暗里消尽当年豪成梦断故国山川隔重重烟水
身万里旧社凋零青门俊游谁记 尽道锦里繁华叹官闲昼永柴荆添睡清愁自醉念此际付
与何人心事纵有楚梅吴檣知何时东逝空怅望鱸美菰香秋风又起

南歌子【送周机宜之益昌】

异县相逢晚中年作别难?秋风雨客衣寒又向朝天门外话悲欢
瘦马行霜栈轻舟下雪滩乌奴山下一林丹为说三年常寄梦魂间

豆叶黄

春风楼上柳腰肢初试花前金缕衣嫋嫋娉娉不自持晓粧迟画得蛾眉胜旧时

又

一春常是雨和风风雨晴时春已空谁惜泥沙万点红恨难穷恰似衰翁一世中

醉落魄

江湖醉客投盃起舞遗乌帻三更冷翠沾衣湿嫋嫋菱歌催落半川月
空花昨梦休寻觅云台麟阁俱陈迹元来只有闲难得青史功名天却无心惜

鹊桥仙

华灯纵博雕鞍驰射谁记当年豪举酒徒一一取封侯独去作江边渔父
轻舟八尺低篷三扇占断苹洲烟雨镜湖元自属闲人又何必君恩赐与

又

一竿风月一蓑烟雨家在钓台西住卖鱼生怕近城门况肯到红尘深处
潮生理權潮平系?潮落浩歌归去时人错把比严光我自是无名渔父

又【夜闻杜鹃】

茆檐人静蓬?灯暗春晚连江风雨林鷺巢燕总无声但月夜常啼杜宇
催成清淚惊殘孤夢又拣深枝飞去故山犹自不堪听况半世飄然羈旅

长相思

云千重水千重身在千重云水中月明收釣筒 头未童耳未聾得酒犹能双脸红一尊谁与同

又

桥如虹水如空一叶飄然烟雨中天教称放翁 侧船篷使江風蟹舍参差渔市东到时间?钟

又

面苍然?皤然满腹诗书不直钱官闲常昼眠 画凌烟上甘泉自古功名属少年知心惟杜?

又

?山青?霞明梦笔桥头艇子横苹风吹酒醒 看潮生看潮平小住西陵莫较程蓴丝初可烹

又

悟浮生厌浮名回视千锺一发轻从今心太平 爱松声爱泉声写向孤桐谁解听空江秋月明

菩萨蛮

江天淡碧云如扫苹花零落蓴丝老细细晚波平月从波面生
渔家真个好悔不归来早经岁洛阳城?丝添几茎

又

小院蚕眠春欲老新巢燕泥花如扫幽梦锦成西海棠如旧时
当年真草草一櫂还吴早题罢惜春诗镜中添?丝

诉衷情

当年万里觅封侯匹马戍梁州关河梦断何处尘暗旧貂裘
胡未灭?先秋泪空流此生谁料心在天山身老沧洲

又

青衫初入九重城结友尽豪英蜡封夜半传檄驰骑谕幽并
时易失志难成?丝生平章风月弹压江山别是功名

生查子

还山荷主恩聊试扶犁手新结小茆茨恰占清江口风尘不化衣邻曲常持酒那似宦游时折
尽长亭柳

又

梁空燕委巢院静鸠催雨香润上朝衣客少闲谈尘?边千缕丝不足吴蚕吐孤梦泛潇湘月落
闻柔橹

破阵子

仕至千鍾良易年过七十常稀眼底荣华元是梦身後声名不自知营营端为谁
幸有旗亭沽酒何妨茧纸题诗幽谷云萝朝采药静院轩窗夕对碁不归真个痴

又

看破空花尘世放轻昨梦浮名蜡屐登山真率饮筇杖穿林自在行身闲心太平
料峭余寒犹力廉纖细雨初晴苔纸闲题谿上句菱唱遥闻烟外声与君同醉醒

上西楼【一名相见欢】

江头綠暗红稀燕交飞忽到当年行处恨依依 洒清淚叹人事与心违满酌玉壺花露送春归

点绛唇

采药归来独寻茆店沽新酿?烟千嶂处处闻渔唱醉弄扁舟不怕黏天浪江湖上遮回疎放作
个闲人樣

谢池春

壮岁从戎曾是气吞残虏阵云高狼烽夜举朱顏青?拥雕戈西戍笑儒冠自来多误
功名梦断却泛扁舟吴楚漫悲歌伤怀吊古烟波无际望秦阙何处叹流年又成虚度

又

贺监湖边初系放翁归棹小园林时时醉倒春眠惊起听啼鶯催晓叹功名误人堪笑
朱桥翠径不许京尘飞到挂朝衣东归欠早连宵风雨卷残红如扫恨樽前送春人老

又

七十衰翁不减少年豪气似天山凄凉病骥铜駝荆棘洒临风清泪甚情怀伴人儿戏
如今何幸作个故谿归计鹤飞来晴嵐?翠玉壺春酒约羣僊同醉洞天寒露桃开未

一落索

满路游丝飞絮韶光将?此时谁与说新愁有百啭流鶯语
頼仰人间今古神仙何处花前须判醉扶归酒不到刘伶墓

又

识破浮生虚妄从人讥谤此身恰是弄潮儿曾过了千重浪
且喜归来无恙一壺春酿雨蓑烟笠傍渔矶应不是封侯相

杏花天

老来驹隙駸駸度算只合狂歌醉舞金盃到手君休诉看着春光又算
谁为倩柳条系住且莫遣城笳催去残红转眼无寻处尽属峰房燕户

太平时

竹里房栊一径深静愔愔乱红飞尽緑成陰有鸣禽临罢兰亭无一事自修琴铜炉袅袅海南
沈洗尘襟

恋绣衾

不惜貂裘换钓篷嗟时人谁识放翁归櫂借樵风稳数声闻林外?钟
幽栖莫笑蜗庐小有云山烟水万重半世向丹青看喜如今身在画中

又

无方能驻脸上红笑浮生扰扰梦中平地是冲霄路又何劳千日用功
飘然再过莲峯下乱云深吹下?钟访旧隐依然在但鹤巢时有堕松

风入松

十年裘马锦江滨酒隐红尘万金选胜鶯花海倚疎狂驱使青春吹笛鱼龙尽出题诗风月俱
新自怜华发满纱巾犹是官身凤楼常记当年语问浮名何似身亲欲寄吴牋说与这回真个
闲人

真珠帘

灯前月下嬉游处向笙歌锦绣叢中相遇彼此知名才见便论心素浅黛娇蝉风调别最动人
时时偷顾归去想闲牕深院调弦促柱乐府初翻新谱漫裁红点翠闲题金缕燕子入帘时又
一番春?侧?燕脂坡下过料也记前年崔护休诉待从今须与好花为主

风流子【一名内家娇】

佳人多命薄初心慕德耀嫁梁鸿记绿窗睡起静吟闲咏句翻离合格变玲珑更乘兴素纨留
戏墨纖玉抚孤桐蟾滴夜寒水浮微冻凤牋春丽花研轻红人生谁能料堪悲处身落柳陌花
鼓空羡画堂鹦鹉深闭金笼向宝镜鸾钗临粧常晚绣茵牙版催舞还慵肠断市桥月笛灯院
霜钟

双头莲

风卷征尘堪叹处青骢正摇金辔客?贮泪漫万点如血凭谁持寄伫想艷态幽情压江南佳丽
春正媚怎忍长亭匆匆顿分连理目断淡日平芜烟浓树远微茫如荠悲欢梦里奈倦客又是
关河千里最苦唱彻骊歌重迟留无计何限事待与丁宁行时已醉

鹧鸪天

杖屨寻春苦未迟洛城樱笋正当时三千里外归初到五百年前事总知
吹玉笛渡清伊相逢休问姓名谁小车处士深衣叟曾是天津共赋诗

蝶恋花

禹庙兰亭今古路一夜清霜染尽湖边?鹦鹉杯深君莫诉他时相遇知何处
冉冉年华留不住镜里朱颜毕竟消磨去一句丁宁君记取神仙须是闲人做

渭南文集卷五十

放翁逸稿卷上

钦定四库全书

放翁逸稿卷上

宋 陆游 撰

禹庙赋

世传禹治水得玄女之符予从乡人以暮春祭禹庙徘徊於庭思禹之功而叹世之妄稽首作赋其辞曰呜呼在昔鸿水之为害也浮乾端浸坤轴裂水石卷草木方洋徐行弥漫平陆浩浩荡荡犇放洄洑生者寄丘阜死者葬鱼腹蛇龙骄横鬼神夜哭其来也组练百万铁壁千仞日月无色山岳俱震大堤坚防攻齧立尽方舟利舳舻辟易莫进势极而折千里一瞬莽乎苍苍继以饥饉於是舜谋于庭尧咨于朝窘羲和忧臯陶伯夷莫施于典礼后夔何假乎箫韶禹於是时惶然孤臣耳目手足亦均乎人张天维于已絕亟救命於将湮九土以奠百谷以陈阡陌鳞鳞原隰昞昞仰事俯育熙熙终身凡人之类至於今不泯者禹之勤也孟子曰禹之行水也行其所无事也夫以水之横流浩莫之止而听其自行则沉没之害不可治已于传有之禹手胼而足胝宫卑而食菲娶涂山而遂去家不暇视其呱泣之子则其勤劳亦至矣然则孟子谓之行其所无事何也曰世以已治水而禹以水治水也以已治水者已与水交战决东而西溢堤南而北圯治于此而彼败纷万绪之俱起则沟浚可以杀人涛澜作于平地此鯀之所以殛死也以水治水者内不见已外不见水惟理之视避其怒导其驶引之为江为河为济为淮漚之为潭为渊为沼为沚盖溜于性之所安而行乎势之不得已方其怀山襄陵驾空?天而吾以见其有安行地中之理矣虽然岂惟水哉禹之服三苗盖有得乎此矣使禹有胜苗之心则苗亦勃然有不服之意流血漂杵方自此始其能格之干羽之间谈笑之际耶夫人之喜怒忧乐始生而具治水而不忧伐苗而不怒此禹之所以为禹也禹不可得而见之矣惟澹然忘我超然为物者其殆庶乎

虎节门观雨赋

南方既秋兮暑弗归老火干时兮秋金微赫赫炎炎兮炮烙之威赤云如山兮其高巍巍阳乌三足兮中天流辉吴牛喘卧兮海鸟倦飞水泉枯竭兮桔槔息机禾欲茂而槁死兮妇泣而子歔曾纖絺之不御兮如被裘衣吾一夕而三起兮汗如泻其屡挥昏然投牀兮饮馋蚊之方饥倏清风之飒来兮视庭日其苍苍乃命吾驾兮登古城以徜徉云兴东山兮弥漫八荒披吾?而脱吾?兮受万里之凉雨势飘忽兮其阵堂堂甚銳且整兮遇者辟易而莫当翻江倒海兮沃除骄阳天地晦冥兮日月翳光如天战之初酣兮壮士顔行飞白羽之箭兮攢緑沉之枪既散复合兮奇正靡常乘高督战兮吾气甚扬俄 霏之霁止兮烟敛云藏海山呈妩兮天水苍茫泉流泱泱兮尘清土香草木苏醒兮兴起仆僵农夫起舞兮岁以大穰九衢行歌兮厥声洋洋又如既胜兮底定一方氛翳廓清兮寇戎披攘冈峦靡迤兮亭障蹇翔奏凯而归兮竹帛炜煌嗟

夫世有絕景然後发驰骋怪伟之辞士有奇志然後悟超絕诡特之观昔人文章之妙兮固与造化者同夫一端风霆之犇掣兮震薄九关追写以笔墨兮固知其难彼黄尘赤日兮车马衣冠得斯赋而读之兮亦足以发胸中之高寒也

红梔子华赋

余读五岳之书始知蜀之青城岁癸巳之仲冬天畀予以此行极山中之奇观乃税驾乎云局酌瀑泉之甘寒味芝木之芳馨濯肺肝之尘土凜毛骨其凄清乃步空翠之间而听风松之声覩一童子衿佩青青手持异华六出其英以为薈卜则色丹盖莫得而强名方就视而爱叹已絕驰而莫及忽矫首而清歔犹举袂而长揖援修蔓而上腾攀峭壁而遽入敬变灭于转盼久懔懔而伫立有老道士笑而语予人皆可以得道求诸已而有余顾舍是外慕宜见欺于猿狙嗟予好学而味道有书而无师虽羸远於声利寔未免夫喜奇请书先生之言用为终身之规

丰城剑赋【过丰城县作】

在晋大康观星者曰夕有异气见於牛斗之躔时方伐吴或曰吴未可平彼方得天独张华之博识排是说之不然迨孙皓之銜璧气益着而不蹇於是雷焕附华之说曰是宝剑之精惟太阿与龙泉卒之斷获於丰城之狱变化於延平之川世皆以为是矣千载之後有陆子者喟其永叹夫占天知人本以考验治忽卜运祚之促延彼区区之二剑曾何与於上玄若吴亡而气犹见其应晋之南迁有识已悲宗庙之丘墟与河洛之腥羶矣华不此之是惧方饰智而怙权呜呼负重名位大吏俛仰羣枉之间祸败不可以旋踵而顾自谓优游以穷年夫九鼎不能保东周之存则二剑岂能救西晋之颠乎使华开大公进衆贤徙南风於长门投贾谧於羽渊则身名可以俱泰家国可以两全彼三尺者尚何足捐乎焕辈非所责予将酌卮酒赋此以吊吾茂先也

焚香赋

陆子起玉?牧新定至郡弥年困於簿领意不自得又适病眚厌喧譁事幽屏却文移谢造请闭阁垂帷自放於宴寂之境时则有二趾之几两耳之鼎爇明窗之宝炷消昼漏之方永其始也灰厚火深烟虽未形而香已发闻矣其少进也绵绵如鼻端之息其上達也藹藹如山穴之云新鼻观之异境散天葩之奇芬既卷舒而縹渺复聚散而轮囷傍琴书而变灭留巾袂之氤氲参佛龕之夜供异朝衣之晨熏余方将上疏挂冠诛茅筑室从山林之故友娛耄耄之余日暴丹荔之衣藏芳兰之茁茹秋菊之英含古柏之实纳玉?之白和以桧华之蜜掩纸帐而高枕杜荆扉而简出方与香而为友彼世俗其奚恤洁我壶觴散我籤帙非独洗京洛之风尘亦以慰江汉之衰疾也

自闵赋

余有志於古兮骋自壮岁慕杀身以成仁兮如自力於弘毅视闇室其犹康庄兮凜昭昭之可

畏敢以不赀之身兮差冒没於富贵嗟摧不自止兮草奋如翬余旁睨而窃怪兮抵掌戏欬吐狂喙之三尺兮论极泾渭徒祓斋而洁芳兮蹈道则未念国中孰知我兮去而远游穷三江而浮七泽兮莫维余舟赤甲崇崇兮白盐酋酋东屯之下兮清泉美畴是可以置家兮予即而谋忽驰骋而北首兮道阻且悠宕渠葭萌兮石摧车輶云栈剑阁兮险名九州遂戍散关兮北防盛秋登高以望兮慷慨涕流画策不见用兮寧钟釜之是求归过蜀而少休兮卜城南之丘筑室凿井兮六年之留或挽而出兮遗以百忧奚触而忿兮起为寇讐惟节士以见疑兮趋以即死岂摧辱之不置兮尚驰骛而弗止彼贱丈夫之希世兮顽钝亡耻虽钳於市其犹安受兮何有於诋訾毁吾车兮殿门逝将老於故里

思故山赋

陆子为严州逾年困於吏役悒然不乐日有秦稽之思乃作思故山赋其词曰

仲冬之杪木叶既落残暑告归霪雨未作川原奇丽天宇澄廓风萧萧而未厉日晖晖而溼薄陆子於是被白葛之单衣蹑青芸之双屣抱峰阳之宝琴引华亭之鸕鷀出衡茆度略约榜一叶之轻舟凌浮天之大壑白鹭下渚文鱼出跃荷盖摧柄竹枝隕箨松翳翳以藏寺柳疎疎而带郭行欲尽而更賒望若迓而逾邈俄而披烟霞观歛千峯業我万嶂联络或耸起而鸟騫或怒奋而兽抃或離容而暇豫或峭厉而刻削或方行而嶷立或将前而复却连者如堤断者如笮广者如屋銳者如槩泄云如甌蓄雨如橐或平如燕居之几或壮如行军之幙或筋脉奇瘦如夔魑之欵见或窍穴穿空如浑沌之初凿岂惟西压青城北揜紫阁固已擅雄秀於三□迈□里之旁礴矣予乃涉浅涧之淙潺步苍崖之荦确擷幽蹊之凋兰掇孤洲之芳若历市聚之鸡犬望塔庙之丹雘耕壠参差蔬畦交错则有野父樵童迎揖而劳苦道翁药叟一笑而相握拂藜牀以延坐持黍酒而请酌秬饔粟餌牛醢雉臠陈升果蔬调羹盐酪超世俗之浇伪有太古之简朴或惊齿发之衰残或喜精神之矍铄或讥宿志之久负或谓浮名之奚乐嗟余日之几何将舍此而焉托予仰而叹俛而怍蹙然而起谢曰仆所谓自用而愚寡要而博貌智而中麤类强而实弱者也凡子言者敢不敬诸请谢曩昔之过更坚後日之约可乎今予年过六十血气已索春忧重髓秋畏痺症饮不醯觚食不加勺衣食之奉减於市药虽富贵而孰享矧刑祸之可愕冒平地之涛澜忽闯首之蛟鳄以吾身之至贵就华纓而自缚旌摇摇而靡定舟泛泛而安泊逝将归而即汝尚农圃之可学指白日以为盟挽天河以自濯冀晨春之相闻亦社酒之共醪春原出而耦耕秋场筑而偕获仆之念归如寒鱼之欲就箔也若曰金弃於跃冶足刖於猷璞退居之言困而後酢识谢独见机昧先觉则敢不敛衽正容以拜父老之爵爵

閱古泉记

太师平原王韩公府之西繚山而上五步一磴十步一壑崖如伏鼉径如惊蛇大石礚礚或如地踊以立或如翔空而下或翩如将奋或森如欲抃名葩硕果更出互见寿藤怪蔓罗络蒙密地多桂竹秋而华敷夏而箨解至者应接不暇及左顾而右盼则呀然而江横陈豁然而湖自献天造地设非人力所能为者其尤胜絶之地曰閱古泉在溜玉亭之西繚以翠麓覆以美?又以其东向故浴海之日既望之月泉辄先得之袤三尺深不知其几也霖雨不溢久旱不涸其

甘饴蜜其寒冰雪其泓止明静可鑑毛发虽游尘堕叶常若有神物呵护屏除者朝暮雨阳无时不镜如也泉上有小亭亭中置瓢可饮可濯尤於烹茗酿酒为宜他石泉皆莫建公常与客倘佯泉上酌以饮客游年最老独尽一瓢公顾而喜曰君为我记此泉使後知吾辈之游亦一胜也游按泉之壁有唐开成五年道士诸葛监元八分书题名盖此泉湮伏弗耀者几四百年公乃复发之时閱古盖先忠献王以名堂者则泉可谓荣矣游起於告老之後视道士为有媿其视泉尤有媿也幸旦暮得复归故山幅巾短褐从公一酌此泉而行尚能赋之嘉泰三年四月乙巳山陰陆游记

南园记

庆元三年二月丙午慈福有旨以别园赐今少师平原郡王韩公其地实武林之东麓而西湖之水滙於其下天造地设极山湖之美公既受命乃以禄入之余葺为南园因其自然辅以雅趣方公之始至也前瞻却视左顾右盼而规模定因高就下通窒去蔽而物象列奇葩美木争效於前清流秀石若顾若揖於是飞观杰阁虚堂广厅上足以陈俎豆下足以奏金石者莫不毕备高明显敞如蛻尘垢而入窈窕邃深疑於无穷既成悉取先时魏忠献王之诗句而名之堂最大者曰许闲上为亲御翰墨以榜其顔其射厅曰和容其台曰寒碧其门曰藏春其关曰凌风其积石为山曰西湖洞天其瀦水艺稻为囿为场为牧羊牛畜雁鹜之地曰归畊之庄其他因其实而命之名则曰夹芳曰豁望曰鲜霞曰矜春曰岁寒曰忘机曰照香曰堆锦曰清芬曰红香亭之名则曰远尘曰幽翠曰多稼自绍兴以来王公将相之园林相望莫能及南园之髣髴者公之志岂在於登临游观之美哉始曰许闲终曰归畊是公之志也公之为此名皆取於忠献王之诗则公之志忠献之志也与忠献同时功名富贵略相埒者岂无其人今百四十年其後往往寂寥无闻韩氏子孙功足以铭彝鼎被弦歌者独相踵也逮至於公勤劳王家勲在社稷复如忠献之盛而又谦恭抑畏拳拳志忠献之志不忘如此公之子孙又将嗣公之志而不敢忘则韩氏之昌将与宋无极虽周之齐鲁尚何加哉或曰上方倚公如济大川之舟公虽欲遂其志其可得哉是不然知上之倚公而不知公之自处知公之勲业而不知公之志此南园之所以不可无述游老病谢事居山陰泽中公以手书来曰子为我作南园记游窃伏思公之门才杰所萃也而顾以属游者岂谓其愚且老又已挂衣冠而去则庶几其无谀辞无侈言而足以道公之志欤此游所以承公之命而不获辞也中大夫直华文阁致仕赐紫金鱼袋陆游谨记

水龙吟

摩诃池上追游客红緑参差春晚韶光妍媚海棠如醉桃花欲煖挑菜初闲禁烟将近一城丝管看金鞍争道香车飞盖争先占新亭館 惆悵年华暗换黯销魂雨收云散镜奁掩月钗梁拆凤秦筝斜雁身在天涯乱山孤垒危楼飞观叹春来只有杨花和恨向东风满

夜游宫【宴席】

宴罢珠帘半卷画檐外蜡香人散翠雾霏霏漏声断倚香肩看中庭花影乱

宛是高堂館宝奁炷麝烟初煨璧月何妨夜夜满拥芳柔恨今年寒尚浅

月照梨花【闺思】

霁景风软烟江春涨小合无人绣帘半上花外姊妹相呼约樗蒲
修蛾忘了章台样细思一饷感事多惆怅胸酥臂玉消减拟觅双鱼倩传书

又【闺思】

闷已萦损那堪多病几曲屏山伴人画静梁燕催起犹慵换熏笼
新愁旧恨何时尽渐凋绿鬓小雨知花信芳牋寄与何处绣阁珠栊柳阴中

如梦令【闺思】

独倚博山峰小翠雾满身飞绕只恐学行云去作阳台春晓春晓春晓满院绿杨芳草

渭南文集皆放翁未病时手自编辑者其不入韩侂胄园记亦董狐笔也予已梓行久矣牧斋
师复出赋七篇相示皆集中所未载又云阅古南园二记虽见疵於先辈文实可传其饮青衣
泉?尽一瓢且曰视道士有媿视泉尤有媿已面唾侂胄至於南园之乱惟勉以忠献事业无腴
词无侈言放翁未尝为韩辱也因合镌之并载诗余几阙以补渭南之遗云湖南毛晋识

放翁逸稿卷上

放翁逸稿卷下

钦定四库全书

放翁逸稿卷下

宋 陆游 撰

成材将还盱江幕以诗四章为贶次韵其二以识别岁在改元孟夏二十有三日书於卧龙方丈之西壁

漂泊干戈到粤山不妨还正七云冠乾坤策内窥真象龙虎炉中养旧丹静爱白云归远岫时邀明月下层峦此身已作长闲计只愿朝庭四海安

又

文场妙誉古推高卜仕尤从州县劳野鹤未应羣雁鹜幽兰终不敝?蒿岁寒挺节无霜霰海运抟风有羽毛好去江南吐奇策从来功业属吾曹

送李舍人赴阙

执简曾闻侍玉螭谪仙才调尽推奇能将苦语康时病更遣丹诚动主思北阙亲朋瞻旧德东吴山水入新诗知公自有经纶术会见飞翔集凤池

寄邓志宏五首

三径从来半草莱席门那为故人开自慙不是梧桐树安得朝阳鸣凤来

又

彭泽思归意未成折腰五斗谩劳生何如张翰秋风起便忆鲈鱼蓴菜羹

又

厌从薄宦思莲幕思见故人映玉山须信人生贵适志相逢樽酒且开颜

又

笔下文章信有神西来避地不无因要看银河从天落一洗人间万古尘

又

中原回首涕沾裳谁是当时柱石强会唤谪仙天上去扶将日毂出扶桑

大溪滩折桡【舟行至大溪而折桡中流危甚舟人皆惧忤笑谓德夫兄曰吾辈岂当死於此耶已而幸获济处因成二絶】

流流乱石似牛毛雨过狂澜势转豪寄语河公莫作戏从来忠信任风涛

又

暮江初涨浪翻狂一叶轻舟泛渺茫我愧人非跛男子安能与世作津梁

罗山平云阁

上方高阁与云齐腊屐穿云步步跻却恐此身生羽翼不从平地作塔梯九门路接青霄近四望山连碧海低徙倚阑干重回首疎林烟暝野猿啼

中阁

万仞仙山插太空山腰依约见莲宫尘寰隔絶无人到洞府深沉有路通石隙生云埋柱础海光浮日映帘栊野僧斋罢凭阑久千里秋毫入望中

冲虚宫

林馆松门白昼扃参鸾人去已千龄基存旧宅楼台古地有遗丹草木灵满洞晓云春酿雨一池秋水夜涵星麻姑仙驭今何在檻外孤峯晚更青

罗浮山

十里山光翠障开重游何事意徘徊石楼自向云中见仙岛谁知海上来丹竈尚能含日月龙潭还解起风雷天涯为郡空华发十二年间到两回

宝积寺

偶来游古寺景逐眼前生岩上高僧坐林间野客行望穷沧海远吟久暮云平此境真难到登临暂适情

祈雨

折腰为米顏常腩负耒躬耕意自甘积谷千牛多骨相年年祷雨到云庵

又

至德无私不我欺精祈未効莫轻疑但令葵藿勤倾向会有风云感会时

秋日山居

晏起

年年睡债苦相关好梦长随苦角残作意归来偿宿负透牕遮莫已三竿

野步

漠漠秋园暮景孤纶巾羽服从奚奴风流画手无摩诘写作龙山野步图

午枕

茗椀兵休戒老兵客来剥啄急须应为言余正理公事半落乌纱枕曲肱

夜坐

老嬾开编早欠伸强搔短发照青荧藿盐二十年前梦尚想长廊撼夜铃

戏作

飍飍松韵生鱼眼汹汹云涛涌兔毫促膝细论同此味絶胜痛饮读离骚

又

束书旧隐碁岩下惯碾春风傲北窗唤起□生尘土梦赖君圭璧一双双

又

建苑夸豪如贵胄碁岩晦迹类臞仙倘凭闕閼定人物耕野钓溪难自贤

余邦英惠小山新芽作小诗三首以谢

家园破社得鷹爪舌本初参便到眉忽喜云腴来建苑坐令渴肺生华滋

又

正焙如观诗大雅小山当似变风论脱今风格不类古终有先王礼义存

又

平时共语不成些痴坐空雕藜苕肠谁遣春风入牙颊诗成忽带小山香

寄彦成

交旧天涯晓宿稀年来独子付心期满牀文史对谈处万里风霜并饔时雨滴空堦怜夜榻吟牵芳草梦春池合沙桥下东流水双鲤何时上钓丝

荣归

车马填门拨不开吾宗得隽凯歌回折将蟾苑一枝桂泛入萱堂百岁杯雅望素钦山竦岳芳名中占斗中魁先登赖子光邦族继踵行看袞袞来

翠微堂

万顷青山只一溪此中聊欲效真栖寻深巧被闲云到破静时闻幽鸟啼羞有卑功追管晏惭无高节比夷齐困眠饥食真吾事宝篆香残日又西

闲居

小隐轻华屋深山自结茅乱苔侵石磴疎竹映花梢泉瀨含清韵风来慰淡交闭门烧柏子好把道书抄

又

溪透桃源路门连小华峰虹霓横水檻羽盖偃岩松日月诗魂迴烟霞道气浓欲寻鍾吕去世外说从容

又

厨给胡麻粒山供鹿脯盘扫门迟客至入郭借书看种竹添风韵留松老岁寒一生无别事鸡犬恋刘安

又

自得穷通乐而无宠辱惊韬光聊混俗去知默陶情毛竹苍龙瘦云衣白鹤轻时?朝斗磬林外
玉声清

又

野水明牕几通渠遶屋流鹭冲烟织素鱼避月沉钩草闇蚊?市林昏蝙蝠秋开怀觉清旷万象
入冥搜

又

生计淡无味终焉乐有余灌畦亲抱瓮种秫学拈锄择木翔归鸟临渊聚戏鱼地偏心更远靖
节爱吾庐

又

剪叶霜风劲关门谢远游深村梅映雪前浦水明楼蜜熟蜂衙放羶残蚁阵收地炉无兽炭炙
背补衣裘

夜坐

怀抱何萧爽凉风扫鬱蒸寒蛩喧败草饥鼠啮枯藤蝶入谁家梦花残半夜灯无人论道德长
啸愧孙登

新秋晚归

玉粒尝新稻金风作好秋鴈回沙漠信蝉噪夕阳愁立久云生岫归迟月满楼吟余露华冷砧
杵起江头

怀王美

理发侵霜白酡顔借酒红故人千里别何日一樽同魂梦徒劳蝶音书不见鸿抱琴虽有意无
语倚西风

感事

今古成何事兴亡迹已陈干时无上策避世且全真就日思明主看云忆老亲到头垂白早径
醉曲生春

客舍对梅

野?林寒一水傍蜜如疎蘂正商量半霜半雪相仍白无蝶无蜂自在香月过晓牕移影瘦风传残角引声长还怜客路龙山下未折一枝先断肠

春日

平生过眼万芳菲晚景收心与世违枯槁形骸元自瘦膏腴田土为谁肥

据放翁子【子虞】跋云先君编前藁於旧诗多所去取其遗存者尚七卷别名遗藁惜今不传余刻剑南诗藁成复从牧斋师案头见续藁二册又得未刻律诗八句者二十三首四句者二十首但春日一章虽编入断句而语意未了疑亦八句而缺其後遂詮次作逸藁下卷聊补剑南之遗云湖南毛晋识

续添

闻婆饼焦

黄泥岭松森森幽鸟穿枝时一吟汝声一何悲汝语恻我心连村麦熟饼饵香我母九泉那得尝

种桑

孔明百亩桑景畧十具牛岂无子孙念饱暖自可休种桑吾庐西微径出南陌三月叶暗园四月甚可摘戴胜枝上鸣仓庚叶闲飞飞鸣各自□人生□不归归家力农桑慎莫愁贫贱婚嫁就比邻死生长相见

夜闻櫓声

呶哑双櫓声凄切游子情岂无一杯酒孤舟谁与顷清愁不可耐霜月照潮平

离家示妻子

明日当北征竟夕起复眠悲虫号我傍青灯照我前妇忧衣裳薄纫线重敷绵儿为检药笼桂姜手炮煎墩堠默可数一念已酸然使忧能伤人我得复长年同生天壤间人谁无一廛伤哉独何辜遑遑长可怜破屋不得住风雨走道边呼天得闻否赋与何其偏

黄山塔

风吹旗脚西南开挂帆槌鼓何快哉转头已失望如石黄山孤塔迎人来黄山劝汝一杯酒送往迎来殊耐久明年我作故乡归还对黄山一搔首

送三兄赴秦邸

兄年十七弟始生弟今白发森千茎所期相就毕此世一尊浊酒得共倾往年虽穷犹半菽两年糠核苦不足书生志欲及天下贫贱不得收骨肉过悲复恐兄意伤忍涕不觉涕已滂早朝霜露戒衣薄愿书此语欢或忘闭门病衰百无用日望兄归有余俸早从丞相乞湖州莫待异时思少游

闻角

小阁柴门近黄昏画角声时时逐风散嫋嫋伴愁生天地清秋暮关河岁月明湖南贼未破独立久含情

寄杨济伯

闻道皇华使来从万里回五溪春荠老三峡暮猿哀昔日文昌省频年灩澦堆问君何地险斟酌寄声来

幽事

日日营幽事时时有好怀雨园残竹粉风砌落花钗伴蝶行苔径听蛙傍水涯穷通了无谓不必更安排

葺圃

种树书频读齐民术屡窥曾求竹醉日更问柳眠时卢橘初非橘蒲葵不是葵因而辨名物甘作老樊迟

幽事

幽事春来早晨兴即啓阁埽梁迎燕子插援护龙孙数日招宾友先期办酒尊淋漓衣?湿不管渍春痕

北监

北监近中堂緑堦物自芳晨清花拱露地僻藓侵廊坐久时开卷吟余或炷香终朝无客至一枕到羲皇

赠徐相师

许负遗书果是非子凭何处说精微使君岂必如擲大丞相元来要瓠肥?阔日常笼短刺肩寒春未换单衣半头布袋挑诗卷也道游京卖术归

寄姜梅山雷字诗

章台官柳应宫槐宝马蹄轻不动埃只怪好诗无与敌谁知古学有从来江山常逐客帆远岁月不禁衙鼓催剩约东林投净社高情千载有宗雷

采菊

秋花莫插?虽好亦凄凉采菊还揜却空余满袖香

吴娃曲【友有妾而内不容戏为作此因得不去】

满地花陰不闭门琵琶抱恨立黄昏妾身不似天边月此夜此时重见君

又

忘忧石榴深浅红草花红紫亦成丛明年开时不望见只望郎君忆着侬

又

二月镜湖水拍天禹王庙下鬪龙船龙船相似年年好人自今年异去年

又

臂上烧香拜佛前愿郎安稳过新年多情已是长多病莫要留心在妾边

过江至萧山县驿东轩海棠已谢

星星两?怯年华幽館无人江月斜惆怅过江留一夕晓风吹尽海棠花

先君刻逸藁後六十余年展购得别本渭南集五十二卷其前後与家刻畧同祇少入蜀记六卷而多诗八卷细检剑南集中除其重复又得未刻诗二十首并续添於後云汲古後人毛展识

放翁逸稿卷下